

全 唐 诗

(第十二部)

· 全唐诗 ·

第四百二十一卷

卷 421_1 【村花晚】

元稹

三春已暮桃李伤，棠梨花白蔓菁黄。村中女儿争摘将，
插刺头鬓相夸张。田翁蚕老迷臭香，晒暴奄聂熏衣裳。
非无后秀与孤芳，奈尔千株万顷之茫茫。
天公此意何可量，长教尔辈时节长。

卷 421_2 【紫踯躅】

元稹

紫踯躅，灭紫拢裙倚山腹。文君新寡乍归来，
羞怨春风不能哭。我从相识便相怜，但是花丛不回目。
去年春别湘水头，今年夏见青山曲。迢迢远在青山上，
山高水阔难容足。愿为朝日早相暎，愿作轻风暗相触。
乐踯躅，我向通州尔幽独。可怜今夜宿青山，
何年却向青山宿。山花渐暗月渐明，月照空山满山绿。
山空月午夜无人，何处知我颜如玉。

· 全唐诗 ·

卷 421_3【山枇杷】

元稹

山枇杷，花似牡丹殷泼血。往年乘传过青山，
正值山花好时节。压枝凝艳已全开，映叶香苞才半裂。
紧搏红袖欲支颐，慢解绛囊初破结。金线丛飘繁蕊乱，
珊瑚朵重纤茎折。因风旋落裙片飞，带日斜看目精热。
亚水依岩半倾侧，笼云隐雾多愁绝。绿珠语尽身欲投，
汉武帝穿神渐灭。秾姿秀色人皆爱，怨媚羞容我偏别。
说向闲人人不听，曾向乐天时一说。昨来谷口先相问，
及到山前已消歇。左降通州十日迟，又与幽花一年别。
山枇杷，尔托深山何太拙。天高万里看不精，
帝在九重声不彻。园中杏树良人醉，陌上柳枝年少折。
因尔幽芳喻昔贤，磻谿冷坐权门咽。

卷 421_4【树上乌】

元稹

树上乌，洲中有树巢若铺。百巢一树知几乌，
一乌不下三四雏，雏又生雏知几雏。老乌未死雏已乌，
散向人间何处无。攫麕啄卵方可食，男女群强最多力。
灵蛇万古唯一珠，岂可殚弹千万亿。
吾不会天教尔辈多子孙，告诉天公天不言。

· 全唐诗 ·

卷 421_5【琵琶歌】

元稹

琵琶宫调八十一，旋宫三调弹不出。玄宗偏许贺怀智，
段师此艺还相匹。自后流传指拨衰，昆仑善才徒尔为。
湏声少得似雷吼，缠弦不敢弹羊皮。人间奇事会相续，
但有卞和无有玉。段师弟子数十人，李家管儿称上足。
管儿不作供奉儿，抛在东都双鬓丝。逢人便请送杯盏，
著尽工夫人不知。李家兄弟皆爱酒，我是酒徒为密友。
著作曾邀连夜宿，中碾春溪华新绿。平明船载管儿行，
尽日听弹无限曲。曲名无限知者鲜，霓裳羽衣偏宛转。
凉州大遍最豪嘈，六么散序多笼撚。我闻此曲深赏奇，
赏著奇处惊管儿。管儿为我双泪垂，自弹此曲长自悲。
泪垂捍拨朱弦湿，冰泉呜咽流莺涩。因兹弹作雨霖铃，
风雨萧条鬼神泣。一弹既罢又一弹，珠幢夜静风珊珊。
低回慢弄关山思，坐对燕然秋月寒。月寒一声深殿磬，
骤弹曲破音繁并。百万金铃旋玉盘，醉客满船皆暂醒。
自兹听后六七年，管儿在洛我朝天。游想慈恩杏园里，
梦寐仁风花树前。去年御史留东台，公私蹙促颜不开。
今春制狱正撩乱，昼夜推囚心似灰。暂辍归时寻著作，
著作南园花坼萼。胭脂耀眼桃正红，雪片满溪梅已落。
是夕青春值三五，花枝向月云含吐。著作施樽命管儿，
管儿久别今方睹。管儿还为弹六么，六么依旧声迢迢。
猿鸣雪岫来三峡，鹤唳晴空闻九霄。逡巡弹得六么彻，
霜刀破竹无残节。幽关鸦轧胡雁悲，断弦害騷层冰裂。

· 全唐诗 ·

我为含凄叹奇绝，许作长歌始终说。艺奇思寡尘事多，
许来寒暑又经过。如今左降在闲处，始为管儿歌此歌。
歌此歌，寄管儿。管儿管儿忧尔衰，尔衰之后继者谁。
继之无乃在铁山，铁山已近曹穆间。性灵甚好功犹浅，
急处未得臻幽闲。努力铁山勤学取，莫遣后来无所祖。

卷 421_6 【小胡笳引】

元稹

雷氏金徽琴，王君宝重轻千金。三峡流中将得来，
明窗拂席幽匣开。朱弦宛转盘凤足，骤击数声风雨回。
哀笳慢指董家本，姜生得之妙思忖。泛徽胡雁咽萧萧，
绕指辘轳圆衮衮。吞恨絨情乍轻激，故国关山心历历。
潺湲疑是雁鹑鹑，舂𩇔如闻发鸣镝。流宫变徵渐幽咽，
别鹤欲飞猿欲绝。秋霜满树叶辞风，寒雏坠地乌啼血。
哀弦已罢春恨长，恨长何恨怀我乡。我乡安在长城窟，
闻君虏奏心飘忽。何时窄袖短貂裘，胭脂山下弯明月。

卷 421_7 【去杭州】

元稹

房杜王魏之子孙，虽及百代为清门。骏骨凤毛真可贵，
冈头泽底促足论。去年江上识君面，爱君风貌情已敦。

· 全唐诗 ·

与君言语见君性，灵府坦荡消尘烦。自兹心洽迹亦洽，
居常并榻游并轩。柳阴覆岸郑监水，李花压树韦公园。
每出新诗共联缀，闲因醉舞相牵援。时寻沙尾枫林夕，
夜摘兰丛衣露繁。今君别我欲何去，自言远结迢迢婚。
简书五府已再至，波涛万里酬一言。为君再拜赠君语，
愿君静听君勿喧。君名师范欲何范，君之烈祖遗范存。
永宁昔在抡鉴表，沙汰沉浊澄浚源。君今取友由取士，
得不别白清与浑。昔公事主尽忠谏，虽及死谏誓不谖。
今君佐藩如佐主，得不陈露酬所恩。昔公为善日不足，
假寐待旦朝至尊。今君三十朝未与，得不寸晷倍玗璠。
昔公令子尚贵主，公执舅礼妇执笄。返拜之仪自此绝，
关雎之化皎不昏。君今远娉奉明祀，得不齐励亲蘋蘩。
斯言皆为书佩带，然后别袂乃可扪。别袂可扪不可解，
解袂开帆凄别魂。魂摇江树鸟飞没，帆挂樯竿鸟尾翻。
翻风驾浪拍何处，直指杭州由上元。上元萧寺基址在，
杭州潮水霜雪屯。潮户迎潮击潮鼓，潮平潮退有潮痕。
得得为题罗刹石，古来非独伍员冤。

卷 421_8【南家桃】

元稹

南家桃树深红色，日照露光看不得。树小花狂风易吹，
一夜风吹满墙北。离人自有经时别，眼前落花心叹息。
更待明年花满枝，一年迢递空相忆。

· 全唐诗 ·

卷 421_9【志坚师】

元稹

嵩山老僧披破衲，七十八年三十腊。灵武朝天辽海征，
宇宙曾行三四匝。初因怏怏薙却头，便绕嵩山寂师塔。
淮西未返半年前，已见淮西阵云合。

卷 421_10【答子蒙】

元稹

报卢君，门外雪纷纷。纷纷门外雪，城中鼓声绝。
强梁御史人觑步，安得夜开沽酒户。

卷 421_11【辛夷花】

元稹

问君辛夷花，君言已斑驳。不畏辛夷不烂开，
顾我筋骸官束缚。缚遣推囚名御史，狼藉囚徒满田地。
明日不推缘国忌，依前不得花前醉。韩员外家好辛夷，
开时乞取三两枝。折枝为赠君莫惜，纵君不折风亦吹。

· 全唐诗 ·

卷 421_12【厅前柏】

元稹

厅前柏，知君曾对罗希奭。我本癫狂耽酒人，
何事与君为对敌。为对敌，洛阳城中花赤白。花赤白，
囚渐多，花之赤白奈尔何。

卷 421_13【夜别筵】

元稹

夜长酒阑灯花长，灯花落地复落床。似我别泪三四行，
滴君满坐之衣裳。与君别后泪痕在，年年著衣心莫改。

卷 421_14【三泉驿】

元稹

三泉驿内逢上巳，新叶趋尘花落地。劝君满盏君莫辞，
别后无人共君醉。洛阳城中无限人，贵人自贵贫自贫。

· 全唐诗 ·

卷 421_15【何满子歌】

元稹

何满能歌能宛转，天宝年中世称罕。婴刑系在圜墙间，
水调哀音歌愤懣。梨园弟子奏玄宗，一唱承恩羈网缓。
便将何满为曲名，御谱亲题乐府纂。鱼家入内本领绝，
叶氏有年声气短。自外徒烦记得词，点拍才成已夸诞。
我来湖外拜君侯，正值灰飞仲春琯。广宴江亭为我开，
红妆逼坐花枝暖。此时有态蹋华筵，未吐芳词貌夷坦。
翠蛾转盼摇雀钗，碧袖歌垂翻鹤卵。定面凝眸一声发，
云停坐下何劳算。迢迢击磬远玲玲，一一贯珠匀款款。
犯羽含商移调态，留情度意抛弦管。湘妃宝瑟水上来，
秦女玉箫空外满。缠绵叠破最殷勤，整顿衣裳颇闲散。
冰含远溜咽还通，莺泥晚花啼渐懒。敛黛吞声若自冤，
郑袖见捐西子浣。阴山鸣雁晓断行，巫峡哀猿夜呼伴。
古者诸侯飧外宾，鹿鸣三奏陈圭瓚。何如有态一曲终，
牙筹记令红螺碗。

卷 421_16【通州丁溪馆夜别李景信三首】

元稹

月濛濛兮山掩掩，束束别魂眉敛敛。蠹盏覆时天欲明，
碧幌青灯风泠泠。泪消语尽还暂眠，唯梦千山万山险。

· 全唐诗 ·

水环环兮山簇簇，啼鸟声声妇人哭。离床别脸睡还开，
灯炷暗飘珠蔌蔌。山深虎横馆无门，夜集巴儿扣空木。

雨潇潇兮鹃咽咽，倾冠倒枕灯临灭。倦僮呼唤应复眠，
啼鸡拍翅三声绝。握手相看其奈何，奈何其奈天明别。

卷 421_17【酬郑从事四年九月宴望海亭，次用旧韵】

元稹

海亭树木何茏葱，寒光透坼秋玲珑。湖山四面争气色，
旷望不与人间同。一拳壤伏东武小，两山斗构秦望雄。
嵌空古墓失文种，突兀怪石疑防风。舟船骈比有宗侣，
水云滃泱无始终。雪花布遍稻陇白，日脚插入秋波红。
兴余望剧酒四坐，歌声舞艳烟霞中。酒酣从事歌送我，
歌云此乐难再逢。良时年少犹健羨，使君况是头白翁。
我闻此曲深叹息，唧唧不异秋草虫。忆年十五学构厦，
有意盖覆天下穷。安知四十虚富贵，朱紫束缚心志空。
妆梳伎女上楼榭，止欲欢乐微茫躬。虽无趣尚慕贤圣，
幸有心目知西东。欲将滑甘柔藏府，已被郁噎冲喉咙。
君今劝我酒太醉，醉语不复能冲融。劝君莫学虚富贵，
不是贤人难变通。

卷四百二十二

卷 422_1【梦游春七十韵】

元稹

昔岁梦游春，梦游何所遇。梦入深洞中，果遂平生趣。
清冷浅漫流，画舫兰篙渡。过尽万株桃，盘旋竹林路。
长廊抱小楼，门牖相回互。楼下杂花丛，丛边绕鸳鹭。
池光漾霞影，晓日初明煦。未敢上阶行，频移曲池步。
乌龙不作声，碧玉曾相慕。渐到帘幕间，裴回意犹惧。
闲窥东西閤，奇玩参差布。隔子碧油糊，驼钩紫金镀。
逡巡日渐高，影响人将寤。鹦鹉饥乱鸣，娇娃睡犹怒。
帘开侍儿起，见我遥相谕。铺设绣红茵，施张钿妆具。
潜褰翡翠帷，瞥见珊瑚树。不辨花貌人，空惊香若雾。
身回夜合偏，态敛晨霞聚。睡脸桃破风，汗妆莲委露。
丛梳百叶髻，金蹙重台屐。纚软钿头裙，玲珑合欢袴。
鲜妍脂粉薄，暗淡衣裳故。最似红牡丹，雨来春欲暮。
梦魂良易惊，灵境难久寓。夜夜望天河，无由重沿溯。
结念心所期，返如禅顿悟。觉来八九年，不向花回顾。
杂合两京春，喧阗众禽护。我到看花时，但作怀仙句。
浮生转经历，道性尤坚固。近作梦仙诗，亦知劳肺腑。

· 全唐诗 ·

一梦何足云，良时事婚娶。当年二纪初，嘉节三星度。
朝辞玉佩迎，高松女萝附。韦门正全盛，出入多欢裕。
甲第涨清池，鸣驺引朱辂。广榭舞菱蕤，长筵宾杂厝。
青春讵几日，华实潜幽蠹。秋月照潘郎，空山怀谢傅。
红楼嗟坏壁，金谷迷荒戍。石压破阑干，门摧旧桎杻。
虽云觉梦殊，同是终难驻。惊绪竟何如，焚丝不成絢。
卓女白头吟，阿娇金屋赋。重璧盛姬台，青冢明妃墓。
尽委穷尘骨，皆随流波注。幸有古如今，何劳嫌比素。
况余当盛时，早岁谐如务。诏册冠贤良，谏垣陈好恶。
三十再登朝，一登还一仆。宠荣非不早，遑回亦云屡。
直气在膏肓，氛氲日沉痼。不言意不快，快意言多忤。
忤诚人所贼，性亦天之付。乍可沉为香，不能浮作瓠。
诚为坚所守，未为明所措。事事身已经，营营计何误。
美玉琢文珪，良金填武库。徒谓自坚贞，安知受砮铸。
长丝羁野马，密网罗阴兔。物外各迢迢，谁能远相锢。
时来既若飞，祸速当如弩。曩意自未精，此行何所诉。
努力去江陵，笑言谁与晤。江花纵可怜，奈非心所慕。
石竹逞妍黠，蔓青夸亩数。一种薄地生，浅深何足妒。
荷叶水上生，团团水中住。泻水置叶中，君看不相污。

卷 422_2 【桐花落】

元稹

莎草遍桐阴，桐花满莎落。盖覆相团圆，可怜无厚薄。
昔岁幽院中，深堂下帘幕。同在后门前，因论花好恶。

· 全唐诗 ·

君夸沉檀样，云是指搗作。暗澹灭紫花，句连蹙金萼。
都绣六七枝，斗成双孔雀。尾上稠叠花，又将金解络。

我爱看不已，君烦睡先著。我作绣桐诗，系君裙带著。
别来苦修道，此意都萧索。今日竟相牵，思量偶然错。

卷 422_3【梦昔时】

元稹

闲窗结幽梦，此梦谁人知。夜半初得处，天明临去时。
山川已久隔，云雨两无期。何事来相感，又成新别离。

卷 422_4【恨妆成】

元稹

晓日穿隙明，开帷理妆点。傅粉贵重重，施朱怜冉冉。
柔鬟背额垂，丛鬓随钗敛。凝翠晕蛾眉，轻红拂花脸。
满头行小梳，当面施圆靥。最恨落花时，妆成独披掩。

· 全唐诗 ·

卷 422_5【古决绝词】

元稹

乍可为天上牵牛织女星，不愿为庭前红槿枝。
七月七日一相见，相见故心终不移。那能朝开暮飞去，
一任东西南北吹。分不两相守，恨不两相思。对面且如此，
背面当可知。春风撩乱伯劳语，况是此时抛去时。
握手苦相问，竟不言后期。君情既决绝，妾意已参差。
借如死生别，安得长苦悲。
噫春冰之将泮，何予怀之独结。有美一人，于焉旷绝。
一日不见，比一日于三年，况三年之旷别。
水得风兮小而已波，笋在苞兮高不见节。矧桃李之当春，
竞众人而攀折。我自顾悠悠而若云，
又安能保君皤皤之如雪。感破镜之分明，睹泪痕之馀血。
幸他人之既不我先，又安能使他人之终不我夺。已焉哉，
织女别黄姑。一年一度暂相见，彼此隔河何事无。
夜夜相抱眠，幽怀尚沉结。那堪一年事，长遣一宵说。
但感久相思，何暇暂相悦。虹桥薄夜成，龙驾侵晨列。
生憎野鹤性迟回，死恨天鸡识时节。曙色渐曛曛，
华星欲明灭。一去又一年，一年何可时彻。有此迢递期，
不如死生别。天公隔是妒相怜，何不便教相决绝。

· 全唐诗 ·

卷 422_6【櫻桃花】

元稹

櫻桃花，一枝兩枝千萬朵。花枝曾立摘花人，
窈窕破羅裙紅似火。

卷 422_7【曹十九舞綠鈿】

元稹

急管清弄頻，舞衣才攬結。含情獨搖手，雙袖參差列。
驪褱柳牽絲，炫轉風回雪。凝眄嬌不移，往往度繁節。

卷 422_8【閨晚】

元稹

紅裙委磚階，玉爪朱橘。素臆光如研，明瞳艷凝溢。
調弦不成曲，學書徒弄筆。夜色侵洞房，春煙透帘出。

· 全唐诗 ·

卷 422_9【晓将别】

元稹

风露晓凄凄，月下西墙西。行人帐中起，思妇枕前啼。
屑屑命僮御，晨装俨已齐。将去复携手，日高方解携。

卷 422_10【蔷薇架】

元稹

五色阶前架，一张笼上被。殷红稠叠花，半绿鲜明地。
风蔓罗裙带，露英莲脸泪。多逢走马郎，可惜帘边思。

卷 422_11【月暗】

元稹

月暗灯残面墙泣，罗缨斗重知啼湿。真珠帘断蝙蝠飞，
燕子巢空萤火入。深殿门重夜漏严，柔年急。
君王掌上容一人，更有轻身何处立。

· 全唐诗 ·

卷 422_12【新秋】

元稹

旦暮已凄凉，离人远思忙。夏衣临晓薄，秋影入檐长。
前事风随扇，归心燕在梁。殷勤寄牛女，河汉正相望。

卷 422_13【赠双文】

元稹

艳极翻含怨，怜多转自娇。有时还暂笑，闲坐爱无繆。
晓月行看堕，春酥见欲消。何因肯垂手，不敢望回腰。

卷 422_14【春别】

元稹

幽芳本未阑，君去蕙花残。河汉秋期远，关山世路难。
云屏留粉絮，风幌引香兰。肠断回文锦，春深独自看。

· 全唐诗 ·

卷 422_15【和乐天示杨琼】

元稹

我在江陵少年日，知有杨琼初唤出。腰身瘦小歌圆紧，
依约年应十六七。去年十月过苏州，琼来拜问郎不识。
青衫玉貌何处去，安得红旗遮头白。我语杨琼琼莫语，
汝虽笑我我笑汝。汝今无复小腰身，不似江陵时好女。
杨琼为我歌送酒，尔忆江陵县中否。江陵王令骨为灰，
车来嫁作尚书妇。卢戛及第严润在，其余死者十八九。
我今贺尔亦自多，尔得老成余白首。

卷 422_16【鱼中素】

元稹

重叠鱼中素，幽缄手自开。斜红馀泪迹，知著脸边来。

卷 422_17【代九九】

元稹

昔年桃李月，颜色共花宜。回脸莲初破，低蛾柳并垂。
望山多倚树，弄水爱临池。远被登楼识，潜因倒影窥。

· 全唐诗 ·

隔林徒想像，上砌转逶迤。谩掷庭中果，虚攀墙外枝。
强持文玉佩，求结麝香縈。阿母怜金重，亲兄要马骑。
把将娇小女，嫁与冶游儿。自隐勤勤索，相要事事随。
每常同坐卧，不省暂参差。才学羞兼妒，何言宠便移。
青春来易皎，白日誓先亏。僻性嗔来见，邪行醉后知。
别床铺枕席，当面指瑕疵。妾貌应犹在，君情遽若斯。
的成终世恨，焉用此宵为。鸾镜灯前扑，鸳衾手下隳。
参商半夜起，琴瑟一声离。努力新丛艳，狂风次第吹。

卷 422_18【卢十九子蒙吟卢七员外洛川怀古六韵，命余和】

元稹

闻道卢明府，闲行咏洛神。浪圆疑靥笑，波斗忆眉颦。
蹀躞桥头马，空濛水上尘。草芽犹犯雪，冰岸欲消春。
寓目终无限，通辞未有因。子蒙将此曲，吟似独眠人。

卷 422_19【刘、阮妻二首】

元稹

仙洞千年一度闲，等闲偷入又偷回。
桃花飞尽东风起，何处消沉去不来。
芙蓉脂肉绿云鬟，罨画楼台青黛山。
千树桃花万年药，不知何事忆人间。

· 全唐诗 ·

卷 422_20 【桃花】

元稹

桃花浅深处，似匀深浅妆。春风助肠断，吹落白衣裳。

卷 422_21 【暮秋】

元稹

看著墙西日又沉，步廊回合戟门深。

栖乌满树声声绝，小玉上床铺夜衾。

卷 422_22 【压墙花】

元稹

野性大都迷里巷，爱将高树记人家。

春来偏认平阳宅，为见墙头拂面花。

· 全唐诗 ·

卷 422_23 【舞腰】

元稹

裙裾旋旋手迢迢，不趁音声自趁娇。
未必诸郎知曲误，一时偷眼为回腰。

卷 422_24 【白衣裳二首】

元稹

雨湿轻尘隔院香，玉人初著白衣裳。
半含惆怅闲看绣，一朵梨花压象床。

藕丝衫子柳花裙，空著沈香慢火熏。
闲倚屏风笑周昉，枉抛心力画朝云。

卷 422_25 【忆事】

元稹

夜深闲到戟门边，却绕行廊又独眠。
明月满庭池水绿，桐花垂在翠帘前。

· 全唐诗 ·

卷 422_26 【寄旧诗与薛涛，因成长句】

元稹

诗篇调态人皆有，细腻风光我独知。月夜咏花怜暗澹，
雨朝题柳为欹垂。长教碧玉藏深处，总向红笺写自随。
老大不能收拾得，与君闲似好男儿。

卷 422_27 【友封体】

元稹

雨送浮凉夏簟清，小楼腰褥怕单轻。微风暗度香囊转，
胧月斜穿隔子明。桦烛焰高黄耳吠，柳堤风静紫骝声。
频频闻动中门锁，桃叶知嗔未敢迎。

卷 422_28 【看花】

元稹

努力少年求好官，好花须是少年看。
君看老大逢花树，未折一枝心已阑。

· 全唐诗 ·

卷 422_29【斑竹】

元稹

一枝斑竹渡湘沅，万里行人感别魂。
知是娥皇庙前物，远随风雨送啼痕。

卷 422_30【箏】

元稹

莫愁私地爱王昌，夜夜箏声怨隔墙。火凤有凰求不得，
春莺无伴啖空长。急挥舞破催飞燕，慢逐歌词弄小娘。
死恨相如新索妇，枉将心力为他狂。

卷 422_31【春晓】

元稹

半欲天明半未明，醉闻花气睡闻莺。
) 儿撼起钟声动，二十年前晓寺情。

· 全唐诗 ·

卷 422_32【所思二首】

元稹

庾亮楼中初见时，武昌春柳似腰肢。
相逢相失还如梦，为雨为云今不知。

鄂渚濛濛烟雨微，女郎魂逐暮云归。
只应长在汉阳渡，化作鸳鸯一只飞。

卷 422_33【莺莺诗】

元稹

殷红浅碧旧衣裳，取次梳头暗淡妆。夜合带烟笼晓日，
牡丹经雨泣残阳。低迷隐笑原非笑，散漫清香不似香。
频动横波嗔阿母，等闲教见小儿郎。

卷 422_34【离思五首】

元稹

自爱残妆晓镜中，环钗漫篸绿丝丛。
须臾日射燕脂颊，一朵红苏旋欲融。

· 全唐诗 ·

山泉散漫绕阶流，万树桃花映小楼。
闲读道书慵未起，水晶帘下看梳头。

红罗著压逐时新，吉了花纱嫩麝尘。
第一莫嫌材地弱，些些纰缪最宜人。

曾经沧海难为水，除却巫山不是云。
取次花丛懒回顾，半缘修道半缘君。

寻常百种花齐发，偏摘梨花与白人。
今日江头两三树，可怜和叶度残春。

卷 422_35【杂忆五首】

元稹

今年寒食月无光，夜色才侵已上床。
忆得双文通内里，玉笼深处暗闻香。

花笼微月竹笼烟，百尺丝绳拂地悬。
忆得双文人静后，潜教桃叶送秋千。

寒轻夜浅绕回廊，不辨花丛暗辨香。
忆得双文胧月下，小楼前后捉迷藏。

山榴似火叶相兼，亚拂砖阶半拂檐。

· 全唐诗 ·

忆得双文独披掩，满头花草倚新帘。

春冰消尽碧波湖，漾影残霞似有无。
忆得双文衫子薄，钿头云映褪红酥。

卷 422_36 【有所教】

元稹

莫画长眉画短眉，斜红伤竖莫伤垂。
人人总解争时势，都大须看各自宜。

卷 422_37 【襄阳为卢谏纪事】

元稹

帝下真符召玉真，偶逢游女暂相亲。
素书三卷留为赠，从向人间说向人。

风弄花枝月照阶，醉和春睡倚香怀。
依稀似觉双环动，潜被萧郎卸玉钗。

莺声撩乱曙灯残，暗觅金钗动晓寒。
犹带春醒懒相送，樱桃花下隔帘看。

· 全唐诗 ·

琉璃波面月笼烟，暂逐萧郎走上天。
今日归时最肠断，回江还是夜来船。

花枝临水复临堤，闲照江流亦照泥。
千万春风好抬举，夜来曾有凤凰栖。

卷 422_38 【会真诗三十韵】

元稹

微月透帘栊，萤光度碧空。遥天初缥缈，低树渐葱茏。
龙吹过庭竹，鸾歌拂井桐。罗绡垂薄雾，环佩响轻风。
绛节随金母，云心捧玉童。更深人悄悄，晨会雨濛濛。
珠莹光文履，花明隐绣栊。宝钗行彩凤，罗帔掩丹虹。
言自瑶华浦，将朝碧帝宫。因游李城北，偶向宋家东。
戏调初微拒，柔情已暗通。低鬟蝉影动，回步玉尘蒙。
转面流花雪，登床抱绮丛。鸳鸯交颈舞，翡翠合欢笼。
眉黛羞频聚，朱唇暖更融。气清兰蕊馥，肤润玉肌丰。
无力慵移腕，多娇爱敛躬。汗光珠点点，发乱绿松松。
方喜千年会，俄闻五夜穷。留连时有限，缱绻意难终。
慢脸含愁态，芳词誓素衷。赠环明运合，留结表心同。
啼粉流清镜，残灯绕暗虫。华光犹冉冉，旭日渐曈曈。
警乘还归洛，吹箫亦上嵩。衣香犹染麝，枕腻尚残红。
幂幂临塘草，飘飘思渚蓬。素琴鸣怨鹤，清汉望归鸿。
海阔诚难度，天高不易冲。行云无处所，萧史在楼中。

· 全唐诗 ·

卷 422_39【古艳诗二首】

元稹

春来频到宋家东，垂袖开怀待好风。
莺藏柳暗无人语，惟有墙花满树红。

深院无人草树光，娇莺不语趁阴藏。
等闲弄水浮花片，流出门前赚阮郎。

卷四百二十三

卷 423_1【奉和浙西大夫李德裕述梦四十韵，大夫本题言赠于梦中诗赋以寄一二僚友，故今所和者，亦止述翰院旧游而已，次本韵】

元稹

闻有池塘什，还因梦寐遭。攀禾工类蔡，咏豆敏过曹。
庄蝶玄言秘，罗禽藻思高。戈矛排笔阵，貔虎让文韬。
彩缋鸾凰颈，权奇驥騄髦。神枢千里应，华袞一言褒。
李广留飞箭，王祥得佩刀。传乘司隶马，继染翰林毫。
辨颖超脱，词锋岂足囊。金刚锥透玉，镢铁剑吹毛。
顾我曾陪附，思君正郁陶。近酬新乐录，仍寄续离骚。
阿阁偏随凤，方壶共跨鳌。借骑银杏叶，横赐锦垂萄。
冰井分珍果，金瓶贮御醪。独辞珠有戒，廉取玉非叨。
麦纸侵红点，兰灯焰碧高。代予言不易，承圣旨偏劳。
绕月同栖鹊，惊风比夜熬。吏传开锁契，神撼引铃绛。
渥泽深难报，危心过自操。犯颜诚恳恳，腾口惧忉忉。
佩宠虽綈纆，安贫尚葛袍。宾亲多谢绝，延荐必英豪。
分阻杯盘会，闲随寺观遨。祇园一林杏，仙洞万株桃。
解海沧波减，昆明劫火熬。未陪登鹤驾，已讫堕乌号。
痛泪过江浪，冤声出海涛。尚看恩诏湿，已梦寿宫牢。

· 全唐诗 ·

再造承天宝，新持济巨篙。犹怜弊簪履，重委旧旌旄。
北望心弥苦，西回首屡搔。九霄难就日，两浙仅容舠。
暮竹寒窗影，衰杨古郡濠。鱼虾集橘市，鹤鹑起亭皋。
朽刃休冲斗，良弓枉在弜。早弯摧虎兕，便铸垦蓬蒿。
渔艇宜孤棹，楼船称万艘。量材分用处，终不学滔滔。

卷 423_2 【自述】

元稹

延英引对碧衣郎，江砚宣毫各别床。
天子下帘亲考试，宫人手里过茶汤。

卷 423_3 【春分投简阳明洞天作】

元稹

中分春一半，今日半春徂。老惜光阴甚，慵牵兴绪孤。
偶成投秘简，聊得泛平湖。郡邑移仙界，山川展画图。
旌旗遮屿浦，士女满闾閭。似木吴儿劲，如花越女姝。
牛依惊力直，蚕妾笑睂盱。怪我携章甫，嘲人托鹧鸪。
闾阎随地胜，风俗与华殊。跣足沿流妇，丫头避役奴。
雕题虽少有，鸡卜尚多巫。乡味尤珍蛤，家神爱事乌。
舟船通海峤，田种绕城隅。栳比千艘合，袈裟万顷铺。
亥茶闾小市，渔父隔深芦。日脚斜穿浪，云根远曳蒲。

· 全唐诗 ·

凝风花气度，新雨草芽苏。粉坏梅辞萼，红含杏缀珠。
薤余秧渐长，烧后葑犹枯。绿綵高悬柳，青钱密辨榆。
驯鸥眠浅濑，惊雉迸平芜。水静王余见，山空谢豹呼。
燕狂捎蛱蝶，螟挂集蒲卢。浅碧鹤新卵，深黄鹅嫩雏。
村扉以白板，寺壁耀赭糊。禹庙才离郭，陈庄恰半途。
石帆何峭峣，龙瑞本萦纡。穴为探符坼，潭因失箭刳。
堤形弯熨斗，峰势踊香炉。幢盖迎三洞，烟霞贮一壶。
桃枝蟠复直，桑树亚还扶。鳖解称从事，松堪作大夫。
荣光飘殿阁，虚籁合笙竽。庭狎仙翁鹿，池游县令凫。
君心除健羨，扣寂入虚无。冈蹋翻星纪，章飞动帝枢。
东皇提白日，北斗下玄都。骑吏裙皆紫，科车幰尽朱。
地侯鞭社伯，海若跨天吴。雾喷雷公怒，烟扬灶鬼趋。
投壶怜玉女，噉饭笑麻姑。果实经千岁，衣裳重六铢。
琼杯传素液，金匕进雕胡。掌里承来露，桯中钓得鲈。
菌生悲局促，柯烂觉须臾。稊米休言圣，醯鸡益伏愚。
鼓鼙催暝色，簪组缚微躯。遂别真徒侣，还来世路衢。
题诗叹城郭，挥手谢妻孥。幸有桃源近，全家肯去无。

卷 423_4 【春游】

元稹

酒户年年减，山行渐渐难。欲终心懒慢，转恐兴阑散。
镜水波犹冷，稽峰雪尚残。不能辜物色，乍可怯春寒。
远目伤千里，新年思万端。无人知此意，闲凭小栏干。

· 全唐诗 ·

卷 423_5【除夜酬乐天】

元稹

引雏绶旆乱毵毵，戏罢人归思不堪。虚涨火尘龟浦北，
无由阿伞凤城南。休官期限元同约，除夜情怀老共谙。
莫道明朝始添岁，今年春在岁前三。

卷 423_6【酬乐天初冬早寒见寄】

元稹

乍起衣犹冷，微吟帽半欹。霜凝南屋瓦，鸡唱后园枝。
洛水碧云晓，吴宫黄叶时。两传千里意，书札不如诗。

卷 423_7【酬白乐天杏花园】

元稹

刘郎不用闲惆怅，且作花间共醉人。
算得贞元旧朝士，几人同见太和春。

· 全唐诗 ·

卷 423_8【过东都别乐天二首】

元稹

君应怪我留连久，我欲与君辞别难。
白头徒侣渐稀少，明日恐君无此欢。

自识君来三度别，这回白尽老髭须。
恋君不去君须会，知得后回相见无。

卷 423_9【逢白公】

元稹

远路事无限，相逢唯一言。月色照荣辱，长安千万门。

卷 423_10【酬白太傅】

元稹

太空秋色凉，独鸟下微阳。三径池塘静，六街车马忙。
渐能高酒户，始是入诗狂。官冷且无事，追陪慎莫忘。

· 全唐诗 ·

卷 423_11【和严给事闻唐昌观玉蕊花下有游仙】

元稹

弄玉潜过玉树时，不教青鸟出花枝。
的应未有诸人觉，只是严郎不得知。

卷 423_12【赠毛仙翁】

元稹

仙驾初从蓬海来，相逢又说向天台。一言亲授希微诀，
三夕同倾沆瀣杯。此日临风飘羽卫，他年嘉约指盐梅。
花前挥手迢遥去，目断霓旌不可陪。

卷 423_13【八月十四日夜玩月】

元稹

犹欠一宵轮未满，紫霞红衬碧云端。
谁能唤得姮娥下，引向堂前子细看。

· 全唐诗 ·

卷 423_14 【寒食夜】

元稹

红染桃花雪压梨，玲珑鸡子斗赢时。
今年不是明寒食，暗地秋千别期。

卷 423_15 【三月三十日程氏馆饯杜十四归京】

元稹

江春今日尽，程馆祖筵开。我正南冠縶，君寻北路回。
谋身诚太拙，从宦苦无媒。处困方明命，遭时不在才。
逾年长倚玉，连夜共衔杯。涸溜沾濡沫，余光照死灰。
行看鸿欲翥，敢惮酒相催。拍逐飞觥绝，香随舞袖来。
消梨抛五遍，娑葛，三台。已许尊前倒，临风泪莫颓。

卷 423_16 【酬张秘书因寄马赠诗】

元稹

丞相功高厌武名，牵将战马寄儒生。四蹄荀距藏虽尽，
六尺须头见尚惊。减粟偷儿憎未饱，骑驴诗客骂先行。
劝君还却司空著，莫遣衙参傍子城。

· 全唐诗 ·

卷 423_17【戏酬副使中丞见示四韵】

元稹

莫恨暂囊鞬，交游几个全。眼明相见日，肺病欲秋天。

五马虚盈枥，双蛾浪满船。可怜俱老大，无处用闲钱。

卷 423_18【赠柔之】

元稹

穷冬到乡国，正岁别京华。自恨风尘眼，常看远地花。

碧幢还照曜，红粉莫咨嗟。嫁得浮云婿，相随即是家。

卷 423_19【修龟山鱼池示众僧】

元稹

劝尔诸僧好护持，不须垂钓引青丝。

云山莫厌看经坐，便是浮生得道时。

· 全唐诗 ·

卷 423_20 【寄赠薛涛】

元稹

锦江滑腻蛾眉秀，幻出文君与薛涛。言语巧偷鹦鹉舌，
文章分得凤凰毛。纷纷辞客多停笔，个个公卿欲梦刀。
别后相思隔烟水，菖蒲花发五云高。

卷 423_21 【赠刘采春】

元稹

新妆巧样画双蛾，谩里常州透额罗。正面偷匀光滑笏，
缓行轻踏破纹波。言辞雅措风流足，举止低回秀媚多。
更有恼人肠断处，选词能唱望夫歌。

卷 423_22 【醉题东武】

元稹

役役行人事，纷纷碎簿书。功夫两衙尽，留滞七年馀。
病痛梅花发，亲情海岸疏。因循未归得，不是忆鲈鱼。

· 全唐诗 ·

卷 423_23 【崔徽歌】

元稹

崔徽本不是娼家，教歌按舞娼家长。使君知有不自由，
坐在头时立在掌。有客有客名丘夏，善写仪容得恣把。
为徽持此谢敬中，以死报郎为 。

卷 423_24 【一字至七字诗·茶】

元稹

茶，香叶，嫩芽。慕诗客，爱僧家。碾雕白玉，
罗织红纱。铤煎黄蕊色，碗转麴尘花。夜后邀陪明月，
晨前命对朝霞。洗尽古今人不倦，将知醉后岂堪夸。

卷 423_25 【句】

元稹

儿歌杨柳叶，妾拂石榴花。
松门待制应全远，药树监搜可得知。
髻鬟峨峨高一尺，门前立地看春风。

卷四百二十四

卷 424_1 【贺雨】

白居易

皇帝嗣宝历，元和三年冬。自冬及春暮，不雨旱燯燯。
上心念下民，惧岁成灾凶。遂下罪己诏，殷勤告万邦。
帝曰予一人，继天承祖宗。忧勤不遑宁，夙夜心忡忡。
元年诛刘辟，一举靖巴邛。二年戮李锜，不战安江东。
顾惟眇眇德，遽有巍巍功。或者天降沴，无乃儆予躬。
上思答天戒，下思致时邕。莫如率其身，慈和与俭恭。
乃命罢进献，乃命赈饥穷。宥死降五刑，责已宽三农。
宫女出宣徽，厩马减飞龙。庶政靡不举，皆出自宸衷。
奔腾道路人，伛偻田野翁。欢呼相告报，感泣涕沾胸。
顺人人心悦，先天天意从。诏下才七日，和气生冲融。
凝为油油云，散作习习风。昼夜三日雨，凄凄复濛濛。
万心春熙熙，百谷青芃芃。人变愁为喜，岁易俭为丰。
乃知王者心，忧乐与众同。皇天与后土，所感无不通。
冠珮何锵锵，将相及王公。蹈舞呼万岁，列贺明庭中。
小臣诚愚陋，职忝金銮宫。稽首再三拜，一言献天聪。
君以明为圣，臣以直为忠。敢贺有其始，亦愿有其终。

· 全唐诗 ·

卷 424_2【读张籍古乐府】

白居易

张君何为者，业文三十春。尤工乐府诗，举代少其伦。
为诗意如何，六义互铺陈。风雅比兴外，未尝著空文。
读君学仙诗，可讽放佚君。读君董公诗，可诲贪暴臣。
读君商女诗，可感悍妇仁。读君勤齐诗，可劝薄夫敦。
上可裨教化，舒之济万民。下可理情性，卷之善一身。
始从青衿岁，迨此白发新。日夜秉笔吟，心苦力亦勤。
时无采诗官，委弃如泥尘。恐君百岁后，灭没人无闻。
愿藏中秘书，百代不湮沦。愿播内乐府，时得闻至尊。
言者志之苗，行者文之根。所以读君诗，亦知君为人。
如何欲五十，官小身贱贫。病眼街西住，无人行到门。

卷 424_3【哭孔戡】

白居易

洛阳谁不死，戡死闻长安。我是知戡者，闻之涕泫然。
戡佐山东军，非义不可干。拂衣向西来，其道直如弦。
从事得如此，人人以为难。人言明明代，合置在朝端。
或望居谏司，有事戡必言。或望居宪府，有邪戡必弹。
惜哉两不谐，没齿为闲官。竟不得一日，謦謦立君前。
形骸随众人，敛葬北邙山。平生刚肠内，直气归其间。

· 全唐诗 ·

贤者为生民，生死悬在天。谓天不爱人，胡为生其贤。
谓天果爱民，胡为夺其年。茫茫元化中，谁执如此权。

卷 424_4 【凶宅】

白居易

长安多大宅，列在街西东。往往朱门内，房廊相对空。
泉鸣松桂树，狐藏兰菊丛。苍苔黄叶地，日暮多旋风。
前主为将相，得罪窜巴庸。后主为公卿，寝疾殁其中。
连延四五主，殃祸继相踵。自从十年来，不利主人翁。
风雨坏檐隙，蛇鼠穿墙墉。人疑不敢买，日毁土木功。
嗟嗟俗人心，甚矣其愚蒙。但恐灾将至，不思祸所从。
我今题此诗，欲悟迷者胸。凡为大官人，年禄多高崇。
权重持难久，位高势易穷。骄者物之盈，老者数之终。
四者如寇盗，日夜来相攻。假使居吉土，孰能保其躬。
因小以明大，借家可喻邦。周秦宅穀函，其宅非不同。
一兴八百年，一死望夷宫。寄语家与国，人凶非宅凶。

卷 424_5 【梦仙】

白居易

人有梦仙者，梦身升上清。坐乘一白鹤，前引双红旗。
羽衣忽飘飘，玉鸾俄铮铮。半空直下视，人世尘冥冥。

· 全唐诗 ·

渐失乡国处，才分山水形。东海一片白，列岳五点青。
须臾群仙来，相引朝玉京。安期羡门辈，列侍如公卿。
仰谒玉皇帝，稽首前致诚。帝言汝仙才，努力勿自轻。
却后十五年，期汝不死庭。再拜受斯言，既寤喜且惊。
秘之不敢泄，誓志居岩扃。恩爱舍骨肉，饮食断膻腥。
朝餐云母散，夜吸沆瀣精。空山三十载，日望輶辂迎。
前期过已久，鸾鹤无来声。齿发日衰白，耳目减聪明。
一朝同物化，身与粪壤并。神仙信有之，俗力非可营。
苟无金骨相，不列丹台名。徒传辟谷法，虚受烧丹经。
只自取勤苦，百年终不成。悲哉梦仙人，一梦误一生。

卷 424_6【观刈麦】

白居易

田家少闲月，五月人倍忙。夜来南风起，小麦覆陇黄。
妇姑荷簞食，童稚携壶浆。相随饷田去，丁壮在南冈。
足蒸暑土气，背灼炎天光。力尽不知热，但惜夏日长。
复有贫妇人，抱子在其傍。右手秉遗穗，左臂悬敝筐。
听其相顾言，闻者为悲伤。家田输税尽，拾此充饥肠。
今我何功德，曾不事农桑。吏禄三百石，岁晏有馀粮。
念此私自愧，尽日不能忘。

· 全唐诗 ·

卷 424_7【题海图屏风】

白居易

海水无风时，波涛安悠悠。鳞介无小大，遂性各沉浮。
突兀海底鳌，首冠三神丘。钓网不能制，其来非一秋。

或者不量力，谓兹鳌可求。赧赧牵不动，纶绝沉其钩。
一鳌既顿颔，诸鳌齐掉头。白涛与黑浪，呼吸绕咽喉。

喷风激飞廉，鼓波怒阳侯。鲸鲵得其便，张口欲吞舟。
万里无活鳞，百川多倒流。遂使江汉水，朝宗意亦休。
苍然屏风上，此画良有由。

卷 424_8【羸骏】

白居易

骅骝失其主，羸饿无人牧。向风嘶一声，莽苍黄河曲。
蹋冰水畔立，卧雪冢间宿。岁暮田野空，寒草不满腹。

岂无市骏者，尽是凡人目。相马失于瘦，遂遗千里足。
村中何扰扰，有吏征刍粟。输彼军厩中，化作驽骀肉。

· 全唐诗 ·

卷 424_9【废琴】

白居易

丝桐合为琴，中有太古声。古声澹无味，不称今人情。
玉徽光彩灭，朱弦尘土生。废弃来已久，遗音尚泠泠。
不辞为君弹，纵弹人不听。何物使之然，羌笛与秦箏。

卷 424_10【李都尉古剑】

白居易

古剑寒黯黯，铸来几千秋。白光纳日月，紫气排斗牛。
有客借一观，爱之不敢求。湛然玉匣中，秋水澄不流。
至宝有本性，精刚无与俦。可使寸寸折，不能绕指柔。
愿快直士心，将断佞臣头。不愿报小怨，夜半刺私仇。
劝君慎所用，无作神兵羞。

卷 424_11【云居寺孤桐】

白居易

一株青玉立，千叶绿云委。亭亭五丈馀，高意犹未已。
山僧年九十，清静老不死。自云手种时，一颗青桐子。

· 全唐诗 ·

直从萌芽拔，高自毫末始。四面无附枝，中心有通理。
寄言立身者，孤直当如此。

卷 424_12【京兆府新栽莲】

白居易

污沟贮浊水，水上叶田田。我来一长叹，知是东溪莲。
下有青泥污，馨香无复全。上有红尘扑，颜色不得鲜。

物性犹如此，人事亦宜然。托根非其所，不如遭弃捐。
昔在溪中日，花叶媚清涟。今来不得地，憔悴府门前。

卷 424_13【月夜登阁避暑】

白居易

旱久炎气盛，中人若燔烧。清风隐何处，草树不动摇。
何以避暑气，无如出尘嚣。行行都门外，佛阁正岧峣。

清凉近高生，烦热委静销。开襟当轩坐，意泰神飘飘。
回看归路傍，禾黍尽枯焦。独善诚有计，将何救旱苗。

· 全唐诗 ·

卷 424_14【初授拾遗】

白居易

奉诏登左掖，束带参朝议。何言初命卑，且脱风尘吏。
杜甫陈子昂，才名括天地。当时非不遇，尚无过斯位。

况余蹇薄者，宠至不自意。惊近白日光，惭非青云器。
天子方从谏，朝廷无忌讳。岂不思匪躬，适遇时无事。
受命已旬月，饱食随班次。谏纸忽盈箱，对之终自愧。

卷 424_15【赠元稹】

白居易

自我从宦游，七年在长安。所得惟元君，乃知定交难。
岂无山上苗，径寸无岁寒。岂无要津水，咫尺有波澜。

之子异于是，久处誓不谖。无波古井水，有节秋竹竿。
一为同心友，三及芳岁阑。花下鞍马游，雪中杯酒欢。

衡门相逢迎，不具带与冠。春风日高睡，秋月夜深看。
不为同登科，不为同署官。所合在方寸，心源无异端。

· 全唐诗 ·

卷 424_16 【哭刘敦质】

白居易

小树两株柏，新土三尺坟。苍苍白露草，此地哭刘君。
哭君岂无辞，辞云君子人。如何天不吊，穷悴至终身。
愚者多贵寿，贤者独贱违。龙亢彼无悔，蠖屈此不伸。
哭罢持此辞，吾将诘羲文。

卷 424_17 【答友问】

白居易

大圭廉不割，利剑用不缺。当其斩马时，良玉不如铁。
置铁在洪炉，铁消易如雪。良玉同其中，三日烧不热。
君疑才与德，咏此知优劣。

卷 424_18 【杂兴三首】

白居易

楚王多内宠，倾国选嫔妃。又爱从禽乐，驰骋每相随。
锦鞮臂花隼，罗袂控金羈。遂习宫中女，皆如马上儿。
色禽合为荒，刑政两已衰。云梦春仍猎，章华夜不归。

· 全唐诗 ·

东风二月天，春雁正离离。美人挟银镝，一发叠双飞。
飞鸿惊断行，敛翅避蛾眉。君王顾之笑，弓箭生光辉。

回眸语君曰，昔闻庄王时。有一愚夫人，其名曰樊姬。
不有此游乐，三载断鲜肥。

越国政初荒，越天旱不已。风日燥水田，水涸尘飞起。
国中新下令，官渠禁流水。流水不入田，壅入王宫里。

余波养鱼鸟，倒影浮楼雉。澹滟九折池，萦回十余里。
四月芰荷发，越王日游嬉。左右好风来，香动芙蓉蕊。
但爱芙蓉香，又种芙蓉子。不念阊门外，千里稻苗死。

吴王心日侈，服玩尽奇瑰。身卧翠羽帐，手持红玉杯。
冠垂明月珠，带束通天犀。行动自矜顾，数步一裴回。

小人知所好，怀宝四方来。奸邪得藉手，从此倖门开。
古称国之宝，谷米与贤才。今看君王眼，视之如尘埃。
伍员谏已死，浮尸去不回。姑苏台下草，麋鹿暗生麇。

卷 424_19【宿紫阁山北村】

白居易

晨游紫阁峰，暮宿山下村。村老见余喜，为余开一尊。
举杯未及饮，暴卒来入门。紫衣挟刀斧，草草十余人。

· 全唐诗 ·

夺我席上酒，掣我盘中飧。主人退后立，敛手反如宾。
中庭有奇树，种来三十春。主人惜不得，持斧断其根。
口称采造家，身属神策军。主人慎勿语，中尉正承恩。

卷 424_20【读汉书】

白居易

禾黍与稂莠，雨来同日滋。桃李与荆棘，霜降同夜萎。
草木既区别，荣枯那等夷。茫茫天地意，无乃太无私。
小人与君子，用置各有宜。奈何西汉末，忠邪并信之。
不然尽信忠，早绝邪臣窥。不然尽信邪，早使忠臣知。
优游两不断，盛业日已衰。痛矣萧京辈，终令陷祸机。
每读元成纪，愤愤令人悲。寄言为国者，不得学天时。
寄言为臣者，可以鉴于斯。

卷 424_21【赠樊著作】

白居易

阳城为谏议，以正事其君。其手如屈铁，举必指佞臣。
卒使不仁者，不得秉国钧。元稹为御史，以直立其身。
其心如肺石，动必达穷民。东川八十家，冤愤一言伸。
刘辟肆乱心，杀人正纷纷。其嫂曰庾氏，弃绝不为亲。
从史萌逆节，隐心潜负恩。其佐曰孔戡，舍去不为宾。

· 全唐诗 ·

凡此士与女，其道天下闻。常恐国史上，但记凤与麟。
贤者不为名，名彰教乃敦。每惜若人辈，身死名亦沦。
君为著作郎，职废志空存。虽有良史才，直笔无所申。
何不自著书，实录彼善人。编为一家言，以备史阙文。

卷 424_22【蜀路石妇】

白居易

道傍一石妇，无记复无铭。传是此乡女，为妇孝且贞。
十五嫁邑人，十六夫征行。夫行二十载，妇独守孤茆。
其夫有父母，老病不安宁。其妇执妇道，一一如礼经。
晨昏问起居，恭顺发心诚。药饵自调节，膳羞必甘馨。
夫行竟不归，妇德转光明。后人高其节，刻石像妇形。
俨然整衣巾，若立在闺庭。似见舅姑礼，如闻环珮声。
至今为妇者，见此孝心生。不比山头石，空有望夫名。

卷 424_23【折剑头】

白居易

拾得折剑头，不知折之由。一握青蛇尾，数寸碧峰头。
疑是斩鲸鲵，不然刺蛟虬。缺落泥土中，委弃无人收。
我有鄙介性，好刚不好柔。勿轻直折剑，犹胜曲全钩。

· 全唐诗 ·

卷 424_24 【登乐游园望】

白居易

独上乐游园，四望天日曛。东北何靄靄，宫阙入烟云。
爱此高处立，忽如遗垢氛。耳目暂清旷，怀抱郁不伸。
下视十二街，绿树间红尘。车马徒满眼，不见心所亲。
孔生死洛阳，元九谪荆门。可怜南北路，高盖者何人。

卷 424_25 【酬元九对新栽竹有怀见寄】

白居易

昔我十年前，与君始相识。曾将秋竹竿，比君孤且直。
中心一以合，外事纷无极。共保秋竹心，风霜侵不得。
始嫌梧桐树，秋至先改色。不爱杨柳枝，春来软无力。
怜君别我后，见竹长相忆。长欲在眼前，故栽庭户侧。
分首今何处，君南我在北。吟我赠君诗，对之心惻惻。

卷 424_26 【感鹤】

白居易

鹤有不群者，飞飞在野田。饥不啄腐鼠，渴不饮盗泉。

· 全唐诗 ·

贞姿自耿介，杂鸟何翩翩。同游不同志，如此十余年。
一兴嗜欲念，遂为矰缴牵。委质小池内，争食群鸡前。
不惟怀稻粱，兼亦竞腥膻。不惟恋主人，兼亦狎乌鸢。
物心不可知，天性有时迁。一饱尚如此，况乘大夫轩。

卷 424_27【春雪】

白居易

元和岁在卯，六年春二月。月晦寒食天，天阴夜飞雪。
连宵复竟日，浩浩殊未歇。大似落鹅毛，密如飘玉屑。
寒销春茫苍，气变风凜冽。上林草尽没，曲江水复结。
红乾杏花死，绿冻杨枝折。所怜物性伤，非惜年芳绝。
上天有时令，四序平分别。寒燠苟反常，物生皆天阙。
我观圣人意，鲁史有其说。或记水不冰，或书霜不杀。
上将儆政教，下以防灾孽。兹雪今如何，信美非时节。

卷 424_28【高仆射】

白居易

富贵人所爱，圣人去其泰。所以致仕年，著在礼经内。
玄元亦有训，知止则不殆。二疏独能行，遗迹东门外。
清风久销歇，迨此向千载。斯人古亦稀，何况今之代。
遑遑名利客，白首千百辈。惟有高仆射，七十悬车盖。

· 全唐诗 ·

我年虽未老，岁月亦云迈。预恐毫及时，贪荣不能退。
中心私自傲，何以为我戒。故作仆射诗，书之于大带。

卷 424_29【白牡丹】

白居易

城中看花客，旦暮走营营。素华人不顾，亦占牡丹名。
闭在深寺中，车马无来声。唯有钱学士，尽日绕丛行。
怜此皓然质，无人自芳馨。众嫌我独赏，移植在中庭。
留景夜不暝，迎光曙先明。对之心亦静，虚白相向生。
唐昌玉蕊花，攀玩众所争。折来比颜色，一种如瑶琼。
彼因稀见贵，此以多为轻。始知无正色，爱恶随人情。
岂惟花独尔，理与人事并。君看入时者，紫艳与红英。

卷 424_30【赠内】

白居易

生为同室亲，死为同穴尘。他人尚相勉，而况我与君。
黔娄固穷士，妻贤忘其贫。冀缺一农夫，妻敬俨如宾。
陶潜不营生，翟氏自爨薪。梁鸿不肯仕，孟光甘布裙。
君虽不读书，此事耳亦闻。至此千载后，传是何如人。
人生未死间，不能忘其身。所须者衣食，不过饱与温。
蔬食足充饥，何必膏粱珍。缁絮足御寒，何必锦绣文。

· 全唐诗 ·

君家有贍训，清白遗子孙。我亦贞苦士，与君新结婚。
庶保贫与素，偕老同欣欣。

卷 424_31【寄唐生】

白居易

贾谊哭时事，阮籍哭路岐。唐生今亦哭，异代同其悲。
唐生者何人，五十寒且饥。不悲口无食，不悲身无衣。
所悲忠与义，悲甚则哭之。太尉击贼日，尚书叱盗时。
大夫死凶寇，谏议谪蛮夷。每见如此事，声发涕辄随。
往往闻其风，俗士犹或非。怜君头半白，其志竟不衰。
我亦君之徒，郁郁何所为。不能发声哭，转作乐府诗。
篇篇无空文，句句必尽规。功高虞人箴，痛甚骚人辞。
非求宫律高，不务文字奇。惟歌生民病，愿得天子知。
未得天子知，甘受时人嗤。药良气味苦，琴澹音声稀。
不惧权豪怒，亦任亲朋讥。人竟无奈何，呼作狂男儿。
每逢群盗息，或遇云雾披。但自高声歌，庶几天听卑。
歌哭虽异名，所感则同归。寄君三十章，与君为哭词。

卷 424_32【伤唐衢二首】

白居易

自我心存道，外物少能逼。常排伤心事，不为长叹息。

· 全唐诗 ·

忽闻唐衢死，不觉动颜色。悲端从东来，触我心恻恻。
伊昔未相知，偶游滑台侧。同宿李翱家，一言如旧识。
酒酣出送我，风雪黄河北。日西并马头，语别至昏黑。

君归向东郑，我来游上国。交心不交面，从此重相忆。
怜君儒家子，不得诗书力。五十著青衫，试官无禄食。
遗文仅千首，六义无差忒。散在京洛间，何人为收拾。

忆昨元和初，忝备谏官位。是时兵革后，生民正憔悴。
但伤民病痛，不识时忌讳。遂作秦中吟，一吟悲一事。
贵人皆怪怒，闲人亦非訾。天高未及闻，荆棘生满地。
惟有唐衢见，知我平生志。一读兴叹嗟，再吟垂涕泗。

因和三十韵，手题远缄寄。致吾陈杜间，赏爱非常意。
此人无复见，此诗犹可贵。今日开箴看，蠹鱼损文字。
不知何处葬，欲问先歔歔。终去哭坟前，还君一掬泪。

卷 424_33 【问友】

白居易

种兰不种艾，兰生艾亦生。根荄相交长，茎叶相附荣。
香茎与臭叶，日夜俱长大。锄艾恐伤兰，溉兰恐滋艾。
兰亦未能溉，艾亦未能除。沉吟意不决，问君合何如。

· 全唐诗 ·

卷 424_34【悲哉行】

白居易

悲哉为儒者，力学不知疲。读书眼欲暗，秉笔手生胝。
十上方一第，成名常苦迟。纵有宦达者，两鬓已成丝。
可怜少壮日，适在穷贱时。丈夫老且病，焉用富贵为。
沉沉朱门宅，中有乳臭儿。状貌如妇人，光明膏粱肌。
手不把书卷，身不擐戎衣。二十袭封爵，门承勋戚资。
春来日日出，服御何轻肥。朝从博徒饮，暮有倡楼期。
平封还酒债，堆金选蛾眉。声色狗马外，其馀一无知。
山苗与涧松，地势随高卑。古来无奈何，非君独伤悲。

卷 424_35【紫藤】

白居易

藤花紫蒙茸，藤叶青扶疏。谁谓好颜色，而有害有余。
下如蛇屈盘，上若绳萦纆。可怜中间树，束缚成枯株。
柔蔓不自胜，袅袅挂空虚。岂知缠树木，千夫力不如。
先柔后为害，有似谗佞徒。附著君权势，君迷不肯诛。
又如妖妇人，绸缪蛊其夫。奇邪坏人室，夫惑不能除。
寄言邦与家，所慎在其初。毫末不早辨，滋蔓信难图。
愿以藤为戒，铭之于座隅。

· 全唐诗 ·

卷 424_36 【放鷹】

白居易

十月鷹出籠，草枯雉兔肥。下鞬隨指顧，百擲無一遺。
鷹翅疾如風，鷹爪利如錐。本為鳥所設，今為人所資。

孰能使之然，有術甚易知。取其向背性，制在飢飽時。
不可使長飽，不可使長飢。飢則力不足，飽則背人飛。

乘飢縱搏擊，未飽須繫維。所以爪翅功，而人坐收之。
聖明馭英雄，其術亦如斯。鄙語不可棄，吾聞諸獵師。

卷 424_37 【慈烏夜啼】

白居易

慈烏失其母，啞啞吐哀音。晝夜不飛去，經年守故林。
夜夜夜半啼，聞者為沾襟。聲中如告訴，未盡反哺心。

百鳥豈無母，爾獨哀怨深。應是母慈重，使爾悲不任。
昔有吳起者，母歿喪不臨。嗟哉斯徒輩，其心不如禽。
慈烏復慈烏，鳥中之曾參。

· 全唐诗 ·

卷 424_38【燕诗示刘叟】

白居易

梁上有双燕，翩翩雄与雌。衔泥两椽间，一巢生四儿。
四儿日夜长，索食声孜孜。青虫不易捕，黄口无饱期。

觜爪虽欲敝，心力不知疲。须臾十来往，犹恐巢中饥。
辛勤三十日，母瘦雏渐肥。喃喃教言语，一一刷毛衣。

一旦羽翼成，引上庭树枝。举翅不回顾，随风四散飞。
雌雄空中鸣，声尽呼不归。却入空巢里，啁啾终夜悲。

燕燕尔勿悲，尔当返自思。思尔为雏日，高飞背母时。
当时父母念，今日尔应知。

卷 424_39【采地黄者】

白居易

麦死春不雨，禾损秋早霜。岁晏无口食，田中采地黄。
采之将何用，持以易馕粮。凌晨荷锄去，薄暮不盈筐。

携来朱门家，卖与白面郎。与君啖肥马，可使照地光。
愿易马残粟，救此苦饥肠。

· 全唐诗 ·

卷 424_40 【初入太行路】

白居易

天冷日不光，太行峰苍莽。尝闻此中险，今我方独往。
马蹄冻且滑，羊肠不可上。若比世路难，犹自平于掌。

卷 424_41 【邓鲂、张彻落第】

白居易

古琴无俗韵，奏罢无人听。寒松无妖花，枝下无人行。
春风十二街，轩骑不暂停。奔车看牡丹，走马听秦筝。
众目悦芳艳，松独守其贞。众耳喜郑卫，琴亦不改声。
怀哉二夫子，念此无自轻。

卷 424_42 【送王处士】

白居易

王门岂无酒，侯门岂无肉。主人贵且骄，待客礼不足。
望尘而拜者，朝夕走碌碌。王生独拂衣，遐举如云鹄。
宁归白云外，饮水卧空谷。不能随众人，敛手低眉目。
扣门与我别，酤酒留君宿。好去采薇人，终南山正绿。

· 全唐诗 ·

卷 424_43 【村居苦寒】

白居易

八年十二月，五日雪纷纷。竹柏皆冻死，况彼无衣民。
回观村闾间，十室八九贫。北风利如剑，布絮不蔽身。
唯烧蒿棘火，愁坐夜待晨。乃知大寒岁，农者尤苦辛。
顾我当此日，草堂深掩门。褐裘覆絺被，坐卧有余温。
幸免饥冻苦，又无垄亩勤。念彼深可愧，自问是何人。

卷 424_44 【纳粟】

白居易

有吏夜叩门，高声催纳粟。家人不待晓，场上张灯烛。
扬簸净如珠，一车三十斛。犹忧纳不中，鞭责及僮仆。
昔余谬从事，内愧才不足。连授四命官，坐尸十年禄。
常闻古人语，损益周必复。今日谅甘心，还他太仓谷。

卷 424_45 【薛中丞】

白居易

百人无一直，百直无一遇。借问遇者谁，正人行得路。

· 全唐诗 ·

中丞薛存诚，守直心甚固。皇明烛如日，再使秉王度。
奸豪与佞巧，非不憎且惧。直道渐光明，邪谋难盖覆。
每因匪躬节，知有匡时具。张为坠网纲，倚作颓檐柱。
悠哉上天意，报施纷回互。自古已冥茫，从今尤不谕。
岂与小人意，昏然同好恶。不然君子人，何反如朝露。
裴相昨已夭，薛君今又去。以我惜贤心，五年如旦暮。
况闻善人命，长短系运数。今我一涕零，岂为中丞故。

卷 424_46【秋池二首】

白居易

前池秋始半，卉物多摧坏。欲暮槿先萎，未霜荷已败。
默然有所感，可以从兹诫。本不种松筠，早凋何足怪。

凿池贮秋水，中有蘋与芰。天旱水暗消，塌然委空地。
有似泛泛者，附离权与贵。一旦恩势移，相随共憔悴。

卷 424_47【夏旱】

白居易

太阴不离毕，太岁仍在午。旱日与炎风，枯焦我田亩。
金石欲销铄，况兹禾与黍。嗷嗷万族中，唯农最辛苦。
惘然望岁者，出门何所睹。但见棘与茨，罗生遍场圃。

· 全唐诗 ·

恶苗承沴气，欣然得其所。感此因问天，可能长不雨。

卷 424_48【谕友】

白居易

昨夜霜一降，杀君庭中槐。干叶不待黄，索索飞下来。
怜君感节物，晨起步前阶。临风蹋叶立，半日颜色衰。
西望长安城，歌钟十二街。何人不欢乐，君独心悠哉。
白日头上走，朱颜镜中颓。平生青云心，销化成死灰。
我今赠一言，胜饮酒千杯。其言虽甚鄙，可破悒悒怀。
朱门有勋贵，陋巷有颜回。穷通各问命，不系才不才。
推此自豁豁，不必待安排。

卷 424_49【丘中有一士二首】

白居易

丘中有一士，不知其姓名。面色不忧苦，血气常和平。
每选隙地居，不蹋要路行。举动无尤悔，物莫与之争。
藜藿不充肠，布褐不蔽形。终岁守穷饿，而无嗟叹声。
岂是爱贫贱，深知时俗情。勿矜罗弋巧，鸾鹤在冥冥。
丘中有一士，守道岁月深。行披带索衣，坐拍无弦琴。
不饮浊泉水，不息曲木阴。所逢苟非义，粪土千黄金。
乡人化其风，熏如兰在林。智愚与强弱，不忍相欺侵。

· 全唐诗 ·

我欲访其人，将行复沉吟。何必见其面，但在学其心。

卷 424_50 【新制布裘】

白居易

桂布白似雪，吴绵软于云。布重绵且厚，为裘有余温。
朝拥坐至暮，夜覆眠达晨。谁知严冬月，支体暖如春。

中夕忽有念，抚裘起逡巡。丈夫贵兼济，岂独善一身。
安得万里裘，盖裹周四垠。稳暖皆如我，天下无寒人。

卷 424_51 【杏园中枣树】

白居易

人言百果中，唯枣凡且鄙。皮皴似龟手，叶小如鼠耳。
胡为不自知，生花此园里。岂宜遇攀玩，幸免遭伤毁。

二月曲江头，杂英红旖旎。枣亦在其间，如嫫对西子。
东风不择木，吹煦长未已。眼看欲合抱，得尽生生理。

寄言游春客，乞君一回视。君爱绕指柔，从君怜柳杞。
君求悦目艳，不敢争桃李。君若作大车，轮轴材须此。

· 全唐诗 ·

卷 424_52【虾蟆】

白居易

嘉鱼荐宗庙，灵龟贡邦家。应龙能致雨，润我百谷芽。
蠢蠢水族中，无用者虾蟆。形秽肌肉腥，出没于泥沙。

六月七月交，时雨正滂沱。虾蟆得其志，快乐无以加。
地既蕃其生，使之族类多。天又与其声，得以相喧哗。

岂惟玉池上，污君清冷波。可独瑶瑟前，乱君鹿鸣歌。
常恐飞上天，跳跃随姮娥。往往蚀明月，遣君无奈何。

卷 424_53【寄隐者】

白居易

卖药向都城，行憩青门树。道逢驰驿者，色有非常惧。
亲族走相送，欲别不敢住。私怪问道旁，何人复何故。

云是右丞相，当国握枢务。禄厚食万钱，恩深日三顾。
昨日延英对，今日崖州去。由来君臣间，宠辱在朝暮。
青青东郊草，中有归山路。归去卧云人，谋身计非误。

· 全唐诗 ·

卷 424_54 【放鱼】

白居易

晓日提竹篮，家僮买春蔬。青青芹蕨下，叠卧双白鱼。
无声但呀呀，以气相煦濡。倾篮写地上，拨刺长尺馀。

岂唯刀机忧，坐见蝼蚁图。脱泉虽已久，得水犹可苏。
放之小池中，且用救干枯。水小池窄狭，动尾触四隅。

一时幸苟活，久远将何如。怜其不得所，移放于南湖。
南湖连西江，好去勿踟蹰。施恩即望报，吾非斯人徒。
不须泥沙底，辛苦觅明珠。

卷 424_55 【文柏床】

白居易

陵上有老柏，柯叶寒苍苍。朝为风烟树，暮为宴寝床。
以其多奇文，宜升君子堂。刮削露节目，拂拭生辉光。

玄斑状狸首，素质如截肪。虽充悦目玩，终乏周身防。
华彩诚可爱，生理苦已伤。方知自残者，为有好文章。

· 全唐诗 ·

卷 424_56【浔阳三题·庐山桂】

白居易

偃蹇月中桂，结根依青天。天风绕月起，吹子下人间。
飘零委何处，乃落匡庐山。生为石上桂，叶如翦碧鲜。
枝干日长大，根荄日牢坚。不归天上月，空老山中年。
庐山去咸阳，道里三四千。无人为移植，得入上林园。
不及红花树，长栽温室前。

卷 424_57【浔阳三题·湓浦竹】

白居易

浔阳十月天，天气仍温燠。有霜不杀草，有风不落木。
玄冥气力薄，草木冬犹绿。谁肯湓浦头，回眼看修竹。
其有顾盼者，持刀斩且束。剖劈青琅玕，家家盖墙屋。
吾闻汾晋间，竹少重如玉。胡为取轻贱，生此西江曲。

卷 424_58【浔阳三题·东林寺白莲】

白居易

东林北塘水，湛湛见底清。中生白芙蓉，菡萏三百茎。

· 全唐诗 ·

白日发光彩，清飙散芳馨。泄香银囊破，泻露玉盘倾。
我惭尘垢眼，见此琼瑶英。乃知红莲花，虚得清净名。

夏萼敷未歇，秋房结才成。夜深众僧寝，独起绕池行。
欲收一颗子，寄向长安城。但恐出山去，人间种不生。

卷 424_59【大水】

白居易

浔阳郊郭间，大水岁一至。闾阎半飘荡，城堞多倾坠。
苍茫生海色，渺漫连空翠。风卷白波翻，日煎红浪沸。

工商彻屋去，牛马登山避。况当率税时，颇害农桑事。
独有佣舟子，鼓枻生意气。不知万人灾，自觅锥刀利。
吾无奈尔何，尔非久得志。九月霜降后，水涸为平地。

· 全唐诗 ·

卷四百二十五

卷 425_1【续古诗十首】

白居易

戚戚复戚戚，送君远行役。行役非中原，海外黄沙碛。
伶俜独居妾，迢递长征客。君望功名归，妾忧生死隔。
谁家无夫妇，何人不离坼。所恨薄命身，嫁迟别日迫。
妾身有存殁，妾心无改易。生作闺中妇，死作山头石。

掩泪别乡里，飘飖将远行。茫茫绿野中，春尽孤客情。
驱马上丘陇，高低路不平。风吹棠梨花，啼鸟时一声。
古墓何代人，不知姓与名。化作路傍土，年年春草生。
感彼忽自悟，今我何营营。

朝采山上薇，暮采山上薇。岁晏薇亦尽，饥来何所为。
坐饮白石水，手把青松枝。击节独长歌，其声清且悲。
枥马非不肥，所苦常絳维。豢豕非不饱，所忧竟为牺。
行行歌此曲，以慰常苦饥。

雨露长纤草，山苗高入云。风雪折劲木，涧松摧为薪。
风摧此何意，雨长彼何因。百丈涧底死，寸茎山上春。

· 全唐诗 ·

可怜苦节士，感此涕盈巾。

窈窕双鬟女，容德俱如玉。昼居不逾阃，夜行常秉烛。
气如含露兰，心如贯霜竹。宜当备嫔御，胡为守幽独。
无媒不得选，年忽过三六。岁暮望汉宫，谁在黄金屋。
邯郸进倡女，能唱黄花曲。一曲称君心，恩荣连九族。

栖栖远方士，读书三十年。业成无知己，徒步来入关。
长安多王侯，英俊竞攀援。幸随众宾末，得厕门馆间。
东阁有旨酒，中堂有管弦。何为向隅客，对此不开颜。
富贵无是非，主人终日欢。贫贱多悔尤，客子中夜叹。
归去复归去，故乡贫亦安。

凉风飘嘉树，日夜减芳华。下有感秋妇，攀条苦悲嗟。
我本幽闲女，结发事豪家。豪家多婢仆，门内颇骄奢。
良人近封侯，出入鸣玉珂。自从富贵来，恩薄谗言多。

冢妇独守礼，群妾互奇邪。但信言有玷，不察心无瑕。
容光未销歇，欢爱忽蹉跎。何意掌上玉，化为眼中砂。
盈盈一尺水，浩浩千丈河。勿言小大异，随分有风波。
闺房犹复尔，邦国当如何。

心亦无所迫，身亦无所拘。何为肠中气，郁郁不得舒。
不舒良有以，同心久离居。五年不见面，三年不得书。
念此令人老，抱膝坐长吁。岂无盈尊酒，非君谁与娱。

揽衣出门行，游观绕林渠。澹澹春水暖，东风生绿蒲。

· 全唐诗 ·

上有和鸣雁，下有掉尾鱼。飞沉一何乐，鳞羽各有徒。
而我方独处，不与之子俱。顾彼自伤己，禽鱼之不如。
出游欲遣忧，孰知忧有余。
春旦日初出，曈曈耀晨辉。草木照未远，浮云已蔽之。
天地黯以晦，当午如昏时。虽有东南风，力微不能吹。
中园何所有，满地青青葵。阳光委云上，倾心欲何依。

卷 425_2【秦中吟十首·议婚】

白居易

天下无正声，悦耳即为娱。人间无正色，悦目即为姝。
颜色非相远，贫富则有殊。贫为时所弃，富为时所趋。
红楼富家女，金缕绣罗襦。见人不敛手，娇痴二八初。
母兄未开口，已嫁不须臾。绿窗贫家女，寂寞二十余。
荆钗不直钱，衣上无真珠。几回人欲聘，临日又踟蹰。
主人会良媒，置酒满玉壶。四座且勿饮，听我歌两途。
富家女易嫁，嫁早轻其夫。贫家女难嫁，嫁晚孝于姑。
闻君欲娶妇，娶妇意何如。

卷 425_3【秦中吟十首·重赋】

白居易

厚地植桑麻，所要济生民。生民理布帛，所求活一身。

· 全唐诗 ·

身外充征赋，上以奉君亲。国家定两税，本意在爱人。
厥初防其淫，明敕内外臣。税外加一物，皆以枉法论。
奈何岁月久，贪吏得因循。浚我以求宠，敛索无冬春。
织绢未成匹，缲丝未盈斤。里胥迫我纳，不许暂逡巡。
岁暮天地闭，阴风生破村。夜深烟火尽，霰雪白纷纷。
幼者形不蔽，老者体无温。悲喘与寒气，并入鼻中辛。
昨日输残税，因窥官库门。缗帛如山积，丝絮如云屯。
号为羨馀物，随月献至尊。夺我身上暖，买尔眼前恩。
进入琼林库，岁久化为尘。

卷 425_4【秦中吟十首·伤宅】

白居易

谁家起甲第，朱门大道边。丰屋中栊比，高墙外回环。
累累六七堂，栋宇相连延。一堂费百万，郁郁起青烟。
洞房温且清，寒暑不能干。高堂虚且迥，坐卧见南山。
绕廊紫藤架，夹砌红药栏。攀枝摘樱桃，带花移牡丹。
主人此中坐，十载为大官。厨有臭败肉，库有贯朽钱。
谁能将我语，问尔骨肉间。岂无穷贱者，忍不救饥寒。
如何奉一身，直欲保千年。不见马家宅，今作奉诚园。

· 全唐诗 ·

卷 425_5【秦中吟十首·伤友】

白居易

陋巷孤寒士，出门苦恹恹。虽云志气高，岂免颜色低。
平生同门友，通籍在金闺。曩者胶漆契，迩来云雨睽。
正逢下朝归，轩骑五门西。是时天久阴，三日雨凄凄。
蹇驴避路立，肥马当风嘶。回头忘相识，占道上沙堤。
昔年洛阳社，贫贱相提携。今日长安道，对面隔云泥。
近日多如此，非君独惨凄。死生不变者，唯闻任与黎。

卷 425_6【秦中吟十首·不致仕】

白居易

七十而致仕，礼法有明文。何乃贪荣者，斯言如不闻。
可怜八九十，齿堕双眸昏。朝露贪名利，夕阳忧子孙。
挂冠顾翠绶，悬车惜朱轮。金章腰不胜，伛偻入君门。
谁不爱富贵，谁不恋君恩。年高须告老，名遂合退身。
少时共嗤诮，晚岁多因循。贤哉汉二疏，彼独是何人。
寂寞东门路，无人继去尘。

· 全唐诗 ·

卷 425_7【秦中吟十首·立碑】

白居易

勋德既下衰，文章亦陵夷。但见山中石，立作路旁碑。
铭勋悉太公，叙德皆仲尼。复以多为贵，千言直万贄。

为文彼何人，想见下笔时。但欲愚者悦，不思贤者嗤。
岂独贤者嗤，仍传后代疑。古石苍苔字，安知是愧词。

我闻望江县，黜令抚茆嫠。在官有仁政，名不闻京师。
身歿欲归葬，百姓遮路岐。攀辕不得归，留葬此江湄。
至今道其名，男女涕皆垂。无人立碑碣，唯有邑人知。

卷 425_8【秦中吟十首·轻肥】

白居易

意气骄满路，鞍马光照尘。借问何为者，人称是内臣。
朱绂皆大夫，紫绶或将军。夸赴军中宴，走马去如云。
尊罍溢九酝，水陆罗八珍。果擘洞庭橘，脍切天池鳞。
食饱心自若，酒酣气益振。是岁江南旱，衢州人食人。

· 全唐诗 ·

卷 425_9【秦中吟十首·五弦】

白居易

清歌且罢唱，红袂亦停舞。赵叟抱五弦，宛转当胸抚。
大声粗若散，飒飒风和雨。小声细欲绝，切切鬼神语。
又如鹊报喜，转作猿啼苦。十指无定音，颠倒宫徵羽。
坐客闻此声，形神若无主。行客闻此声，驻足不能举。
嗟嗟俗人耳，好今不好古。所以绿窗琴，日日生尘土。

卷 425_10【秦中吟十首·歌舞】

白居易

秦中岁云暮，大雪满皇州。雪中退朝者，朱紫尽公侯。
贵有风雪兴，富无饥寒忧。所营唯第宅，所务在追游。
朱门车马客，红烛歌舞楼。欢酣促密坐，醉暖脱重裘。
秋官为主人，廷尉居上头。日中为一乐，夜半不能休。
岂知阍乡狱，中有冻死囚。

卷 425_11【秦中吟十首·买花】

白居易

帝城春欲暮，喧喧车马度。共道牡丹时，相随买花去。

· 全唐诗 ·

贵贱无常价，酬直看花数。灼灼百朵红，戋戋五束素。
上张幄幕庇，旁织巴篱护。水洒复泥封，移来色如故。
家家习为俗，人人迷不悟。有一田舍翁，偶来买花处。
低头独长叹，此叹无人喻。一丛深色花，十户中人赋。

卷 425_12【赠友五首】

白居易

一年十二月，每月有常令。君出臣奉行，谓之握金镜。
由兹六气顺，以遂万物性。时令一反常，生灵受其病。
周汉德下衰，王风始不竞。又从斩晁错，诸侯益强盛。
百里不同禁，四时自为政。盛夏兴土功，方春斲人命。
谁能救其失，待君佐邦柄。峨峨象魏门，悬法彝伦正。
银生楚山曲，金生鄱溪滨。南人弃农业，求之多苦辛。
披砂复凿石，矻矻无冬春。手足尽皴胝，爱利不爱身。
畚田既慵斫，稻田亦懒耘。相携作游手，皆道求金银。
毕竟金与银，何殊泥与尘。且非衣食物，不济饥寒人。
弃本以趋末，日富而岁贫。所以先圣王，弃藏不为珍。
谁能反古风，待君秉国钧。捐金复抵璧，勿使劳生民。
私家无钱炉，平地无铜山。胡为秋夏税，岁岁输铜钱。
钱力日已重，农力日已殫。贱糴粟与麦，贱贸丝与绵。
岁暮衣食尽，焉得无饥寒。吾闻国之初，有制垂不刊。
庸必算丁口，租必计桑田。不求土所无，不强人所难。
量入以为出，上足下亦安。兵兴一变法，兵息遂不还。
使我农桑人，憔悴畎亩间。谁能革此弊，待君秉利权。

· 全唐诗 ·

复彼租庸法，令如贞观年。
京师四方则，王化之本根。长吏久于政，然后风教敦。
如何尹京者，迁次不逡巡。请君屈指数，十年十五人。
科条日相矫，吏力亦已勤。宽猛政不一，民心安得淳。
九州雍为首，群牧之所遵。天下率如此，何以安吾民。
谁能变此法，待君赞弥纶。慎择循良吏，令其长子孙。

三十男有室，二十女有归。近代多离乱，婚姻多过期。
嫁娶既不早，生育常苦迟。儿女未成人，父母已衰羸。
凡人贵达日，多在长大时。欲报亲不待，孝心无所施。
哀哉三牲养，少得及庭闱。惜哉万钟粟，多用饱妻儿。
谁能正婚礼，待君张国维。庶使孝子心，皆无风树悲。

卷 425_13【寓意诗五首】

白居易

豫樟生深山，七年而后知。挺高二百尺，本末皆十围。
天子建明堂，此材独中规。匠人执斤墨，采度将有期。
孟冬草木枯，烈火燎山陂。疾风吹猛焰，从根烧到枝。
养材三十年，方成栋梁姿。一朝为灰烬，柯叶无子遗。
地虽生尔材，天不与尔时。不如粪土英，犹有人掇之。
已矣勿重陈，重陈令人悲。不悲焚烧苦，但悲采用迟。

赫赫京内史，炎炎中书郎。昨传征拜日，恩赐颇殊常。
貂冠水苍玉，紫绶黄金章。佩服身未暖，已闻窜遐荒。

· 全唐诗 ·

亲戚不得别，吞声泣路旁。宾客亦已散，门前雀罗张。
富贵来不久，倏如瓦沟霜。权势去尤速，瞥若石火光。
不如守贫贱，贫贱可久长。传语宦游子，且来归故乡。

促织不成章，提壶但闻声。嗟哉虫与鸟，无实有虚名。
与君定交日，久要如弟兄。何以示诚信，白水指为盟。
云雨一为别，飞沉两难并。君为得风鹏，我为失水鲸。
音信日已疏，恩分日已轻。穷通尚如此，何况死与生。
乃知择交难，须有知人明。莫将山上松，结托水上萍。

翩翩两玄鸟，本是同巢燕。分飞来几时，秋夏炎凉变。
一宿蓬荜庐，一栖明光殿。偶因衔泥处，复得重相见。
彼矜杏梁贵，此嗟茅栋贱。眼看秋社至，两处俱难恋。
所托各暂时，胡为相叹羨。

婆娑园中树，根株大合围。蠢尔树间虫，形质一何微。
孰谓虫之微，虫蠢已无期。孰谓树之大，花叶有衰时。
花衰夏未实，叶病秋先萎。树心半为土，观者安得知。
借问虫何在，在身不在枝。借问虫何食，食心不食皮。
岂无啄木鸟，觜长将何为。

卷 425_14【读史五首】

白居易

楚怀放灵均，国政亦荒淫。彷徨未忍决，绕泽行悲吟。

· 全唐诗 ·

汉文疑贾生，谪置湘之阴。是时刑方措，此去难为心。
士生一代间，谁不有浮沉。良时真可惜，乱世何足钦。
乃知汨罗恨，未抵长沙深。

祸患如棼丝，其来无端绪。马迁下蚕室，嵇康就囹圄。
抱冤志气屈，忍耻形神沮。当彼戮辱时，奋飞无翅羽。
商山有黄绮，颍川有巢许。何不从之游，超然离网罟。
山林少羁鞅，世路多艰阻。寄谢伐檀人，慎勿嗟穷处。

汉日大将军，少为乞食子。秦时故列侯，老作锄瓜土。
春华何嗟晬，园中发桃李。秋风忽萧条，堂上生荆杞。
深谷变为岸，桑田成海水。势去未须悲，时来何足喜。
寄言荣枯者，反复殊未已。

含沙射人影，虽病人不知。巧言构人罪，至死人不疑。
掇蜂杀爱子，掩鼻戮宠姬。弘恭陷萧望，赵高谋李斯。
阴德既必报，阴祸岂虚施。人事虽可罔，天道终难欺。
明则有刑辟，幽则有神祇。苟免勿私喜，鬼得而诛之。

季子憔悴时，妇见不下机。买臣负薪日，妻亦弃如遗。
一朝黄金多，佩印衣锦归。去妻不敢视，妇嫂强依依。
富贵家人重，贫贱妻子欺。奈何贫富间，可移亲爱志。
遂使中人心，汲汲求富贵。又令下人力，各竞锥刀利。
随分归舍来，一取妻孥意。

· 全唐诗 ·

卷 425_15【和答诗十首·和思归乐】

白居易

山中不栖鸟，夜半声嚶嚶。似道思归乐，行人掩泣听。
皆疑此山路，迁客多南征。忧愤气不散，结化为精灵。
我谓此山鸟，本不因人生。人心自怀土，想作思归鸣。
孟尝平居时，娱耳琴泠泠。雍门一言感，未奏泪沾缨。
魏武铜雀妓，日与欢乐并。一旦西陵望，欲歌先涕零。
峡猿亦何意，陇水复何情。为入愁人耳，皆为肠断声。
请看元侍御，亦宿此邮亭。因听思归鸟，神气独安宁。
问君何以然，道胜心自平。虽为南迁客，如在长安城。
云得此道来，何虑复何营。穷达有前定，忧喜无交争。
所以事君日，持宪立大庭。虽有回天力，挠之终不倾。
况始三十馀，年少有直名。心中志气大，眼前爵禄轻。
君恩若雨露，君威若雷霆。退不苟免难，进不曲求荣。
在火辨玉性，经霜识松贞。展禽任三黜，灵均长独醒。
获戾自东洛，贬官向南荆。再拜辞阙下，长揖别公卿。
荆州又非远，驿路半月程。汉水照天碧，楚山插云青。
江陵橘似珠，宜城酒如饴。谁谓谴谪去，未妨游赏行。
人生百岁内，天地暂寓形。太仓一稊米，大海一浮萍。
身委逍遥篇，心付头陀经。尚达死生观，宁为宠辱惊。
中怀苟有主，外物安能萦。任意思归乐，声声啼到明。

· 全唐诗 ·

卷 425_16【和答诗十首·和阳城驿】

白居易

商山阳城驿，中有叹者谁。云是元监察，江陵谪去时。
忽见此驿名，良久涕欲垂。何故阳道州，名姓同于斯。
怜君一寸心，宠辱誓不移。疾恶若巷伯，好贤如缙衣。
沉吟不能去，意者欲改为。改为避贤驿，大署于门楣。
荆人爱羊祜，户曹改为辞。一字不忍道，况兼姓呼之。
因题八百言，言直文甚奇。诗成寄与我，锵若金和丝。
上言阳公行，友悌无等夷。骨肉同衾裯，至死不相离。
次言阳公迹，夏邑始栖迟。乡人化其风，少长皆孝慈。
次言阳公道，终日对酒卮。兄弟笑相顾，醉貌红怡怡。
次言阳公节，謇謇居谏司。誓心除国蠹，决死犯天威。
终言阳公命，左迁天一涯。道州炎瘴地，身不得生归。
一一皆实录，事事无遗。凡是为善者，闻之惻然悲。
道州既已矣，往者不可追。何世无其人，来者亦可思。
愿以君子文，告彼大乐师。附于雅歌末，奏之白玉墀。
天子闻此章，教化如法施。直谏从如流，佞臣恶如疵。
宰相闻此章，政柄端正持。进贤不知倦，去邪勿复疑。
宪臣闻此章，不敢怀依违。谏官闻此章，不忍纵诡随。
然后告史氏，旧史有前规。若作阳公传，欲令后世知。
不劳叙世家，不用费文辞。但于国史上，全录元稹诗。

· 全唐诗 ·

卷 425_17【和答诗十首·答桐花】

白居易

山木多蓊郁，兹桐独亭亭。叶重碧云片，花簇紫霞英。
是时三月天，春暖山雨晴。夜色向月浅，暗香随风轻。
行者多商贾，居者悉黎氓。无人解赏爱，有客独屏营。
手攀花枝立，足蹋花影行。生怜不得所，死欲扬其声。
截为天子琴，刻作古人形。云待我成器，荐之于穆清。
诚是君子心，恐非草木情。胡为爱其华，而反伤其生。
老龟被刳肠，不如无神灵。雄鸡自断尾，不愿为牺牲。
况此好颜色，花紫叶青青。宜遂天地性，忍加刀斧刑。
我思五丁力，拔入九重城。当君正殿栽，花叶生光晶。
上对月中桂，下覆阶前蓂。泛拂香炉烟，隐映斧藻屏。
为君布绿阴，当暑荫轩楹。沉沉绿满地，桃李不敢争。
为君发清韵，风来如叩琼。泠泠声满耳，郑卫不足听。
受君封植力，不独吐芬馨。助君行春令，开花应晴明。
受君雨露恩，不独含芳荣。戒君无戏言，翦叶封弟兄。
受君岁月功，不独资生成。为君长高枝，凤凰上头鸣。
一鸣君万岁，寿如山不倾。再鸣万人泰，泰阶为之平。
如何有此用，幽滞在岩坳。岁月不尔驻，孤芳坐凋零。
请向桐枝上，为余题姓名。待余有势力，移尔献丹庭。

· 全唐诗 ·

卷 425_18【和答诗十首·和大觜乌】

白居易

乌者种有二，名同性不同。觜小者慈孝，觜大者贪庸。
觜大命又长，生来十余冬。物老颜色变，头毛白茸茸。
飞来庭树上，初但惊儿童。老巫生奸计，与乌意潜通。
云此非凡鸟，遥见起敬恭。千岁乃一出，喜贺主人翁。
祥瑞来白日，神圣占知风。阴作北斗使，能为人吉凶。
此乌所止家，家产日夜丰。上以致寿考，下可宜田农。
主人富家子，身老心童蒙。随巫拜复祝，妇姑亦相从。
杀鸡荐其肉，敬若禋六宗。乌喜张大觜，飞接在虚空。
乌既饱膾腥，巫亦飧甘浓。乌巫互相利，不复两西东。
日日营巢窟，稍稍近房栊。虽生八九子，谁辨其雌雄。
群雏又成长，众觜逞残凶。探巢吞燕卵，入簇啄蚕虫。
岂无乘秋隼，羁绊委高墉。但食乌残肉，无施搏击功。
亦有能言鹦，翅碧觜距红。暂曾说乌罪，囚闭在深笼。
青青窗前柳，郁郁井上桐。贪乌占栖息，慈乌独不容。
慈乌尔奚为，来往何憧憧。晓去先晨鼓，暮归后昏钟。
辛苦尘土间，飞啄禾黍丛。得食将哺母，饥肠不自充。
主人憎慈乌，命子削弹弓。弦续会稽竹，丸铸荆山铜。
慈乌求母食，飞下尔庭中。数粒未入口，一丸已中胸。
仰天号一声，似欲诉苍穹。反哺日未足，非是惜微躬。
谁能持此冤，一为问化工。胡然大觜乌，竟得天年终。

· 全唐诗 ·

卷 425_19【和答诗十首·答四皓庙】

白居易

天下有道见，无道卷怀之。此乃圣人语，吾闻诸仲尼。
矫矫四先生，同稟希世资。随时有显晦，秉道无磷缁。
秦皇肆暴虐，二世遭乱离。先生相随去，商岭采紫芝。
君看秦狱中，戮辱者李斯。刘项争天下，谋臣竟悦随。
先生如鸾鹤，去入冥冥飞。君看齐鼎中，焦烂者郈其。
子房得沛公，自谓相遇迟。八难掉舌枢，三略役心机。
辛苦十数年，昼夜形神疲。竟杂霸者道，徒称帝者师。
子房尔则能，此非吾所宜。汉高之季年，嬖宠钟所私。
冢嫡欲废夺，骨肉相忧疑。岂无子房口，口舌无所施。
亦有陈平心，心计将何为。皤皤四先生，高冠危映眉。
从容下南山，顾盼入东闱。前瞻惠太子，左右生羽仪。
却顾戚夫人，楚舞无光辉。心不画一计，口不吐一词。
闇定天下本，遂安刘氏危。子房吾则能，此非尔所知。
先生道既光，太子礼甚卑。安车留不住，功成弃如遗。
如彼旱天云，一雨百谷滋。泽则在天下，云复归希夷。
勿高巢与由，勿尚吕与伊。巢由往不返，伊吕去不归。
岂如四先生，出处两逶迤。何必长隐逸，何必长济时。
由来圣人道，无朕不可窥。卷之不盈握，舒之亘八陲。
先生道甚明，夫子犹或非。愿子辨其惑，为予吟此诗。

· 全唐诗 ·

卷 425_20 【和答诗十首 · 和雉媒】

白居易

吟君雉媒什，一哂复一叹。和之一何晚，今日乃成篇。
岂唯鸟有之，抑亦人复然。张陈刎颈交，竟以势不完。
至今不平气，塞绝泚水源。赵襄骨肉亲，亦以利相残。
至今不善名，高于磨笄山。况此笼中雉，志在饮啄间。
稻粱暂入口，性已随人迁。身苦亦自忘，同族何足言。
但恨为媒拙，不足以自全。劝君今日后，养鸟养青鸾。
青鸾一失侣，至死守孤单。劝君今日后，结客结任安。
主人宾客去，独住在门阑。

卷 425_21 【和答诗十首 · 和松树】

白居易

亭亭山上松，一一生朝阳。森耸上参天，柯条百尺长。
漠漠尘中槐，两两夹康庄。婆娑低覆地，枝干亦寻常。
八月白露降，槐叶次第黄。岁暮满山雪，松色郁青苍。
彼如君子心，秉操贯冰霜。此如小人面，变态随炎凉。
共知松胜槐，诚欲栽道傍。粪土种瑶草，瑶草终不芳。
尚可以斧斤，伐之为栋梁。杀身获其所，为君构明堂。
不然终天年，老死在南冈。不愿亚枝叶，低随槐树行。

· 全唐诗 ·

卷 425_22【和答诗十首·答箭镞】

白居易

矢人职司忧，为箭恐不精。精在利其镞，错磨锋镝成。
插以青竹箬，羽之赤雁翎。勿言分寸铁，为用乃长兵。
闻有狗盗者，昼伏夜潜行。摩弓拭箭镞，夜射不待明。
一盗既流血，百犬同吠声。狺狺嗥不已，主人为之惊。
盗心憎主人，主人不知情。反责镞太利，矢人获罪名。
寄言控弦者，愿君少留听。何不向西射，西天有狼星。
何不向东射，东海有长鲸。不然学仁贵，三矢平虏庭。
不然学仲连，一发下燕城。胡为射小盗，此用无乃轻。
徒沾一点血，虚污箭头腥。

卷 425_23【和答诗十首·和古社】

白居易

废村多年树，生在古社隈。为作妖狐窟，心空身未摧。
妖狐变美女，社树成楼台。黄昏行人过，见者心裴回。
饥雕竟不捉，老犬反为媒。岁媚少年客，十去九不回。
昨夜云雨合，烈风驱迅雷。风拔树根出，雷劈社坛开。
飞电化为火，妖狐烧作灰。天明至其所，清旷无氛埃。
旧地葺村落，新田辟荒莱。始知天降火，不必常为灾。
勿谓神默默，勿谓天恢恢。勿喜犬不捕，勿夸雕不猜。

· 全唐诗 ·

寄言狐媚者，天火有时来。

卷 425_24【和答诗十首·和分水岭】

白居易

高岭峻棱棱，细泉流亹亹。势分合不得，东西随所委。
悠悠草蔓底，溅溅石罅里。分流来几年，昼夜两如此。
朝宗远不及，去海三千里。浸润小无功，山苗长旱死。
萦纡用无所，奔迫流不已。唯作呜咽声，夜入行人耳。
有源殊不竭，无坎终难止。同出而异流，君看何所似。
有似骨肉亲，派别从兹始。又似势利交，波澜相背起。
所以赠君诗，将君何所比。不比山上泉，比君井中水。

卷 425_25【有木诗八首】

白居易

有木名弱柳，结根近清池。风烟借颜色，雨露助华滋。
峨峨白雪花，袅袅青丝枝。渐密阴自庇，转高梢四垂。
截枝扶为杖，软弱不自持。折条用樊圃，柔脆非其宜。
为树信可玩，论材何所施。可惜金堤地，栽之徒尔为。

有木名樱桃，得地早滋茂。叶密独承日，花繁偏受露。
迎风闇摇动，引鸟潜来去。鸟啄子难成，风来枝莫住。

· 全唐诗 ·

低软易攀玩，佳人屡回顾。色求桃李饶，心向松筠妒。
好是映墙花，本非当轩树。所以姓萧人，曾为伐樱赋。

有木秋不凋，青青在江北。谓为洞庭橘，美人自移植。
上受顾盼恩，下勤浇灌力。实成乃是枳，臭苦不堪食。
物有似是者，真伪何由识。美人默无言，对之长叹息。
中含害物意，外矫凌霜色。仍向枝叶间，潜生刺如棘。

有木名杜梨，阴森覆丘壑。心蠹已空朽，根深尚盘薄。
狐媚言语巧，鸟妖声音恶。凭此为巢穴，往来互栖托。
四傍五六本，叶枝相交错。借问因何生，秋风吹子落。
为长社坛下，无人敢芟斫。几度野火来，风回烧不著。

有木香苒苒，山头生一蕨。主人不知名，移种近轩闥。
爱其有芳味，因以调麴蘖。前后曾饮者，十人无一活。
岂徒悔封植，兼亦误采掇。试问识药人，始知名野葛。
年深已滋蔓，刀斧不可伐。何时猛风来，为我连根拔。

有木名水怪，远望青童童。根株非劲挺，柯叶多蒙笼。
彩翠色如柏，鳞皴皮似松。为同松柏类，得列嘉树中。
枝弱不胜雪，势高常惧风。雪压低还举，风吹西复东。
柔芳甚杨柳，早落先梧桐。惟有一堪赏，中心无蠹虫。

有木名凌霄，擢秀非孤标。偶依一株树，遂抽百尺条。
托根附树身，开花寄树梢。自谓得其势，无因有动摇。
一旦树摧倒，独立暂飘飘。疾风从东起，吹折不终朝。
朝为拂云花，暮为委地樵。寄言立身者，勿学柔弱苗。

· 全唐诗 ·

有木名丹桂，四时香馥馥。花团夜雪明，叶翦春云绿。
风影清似水，霜枝冷如玉。独占小山幽，不容凡鸟宿。
匠人爱芳直，裁截为厦屋。干细力未成，用之君自速。
重任虽大过，直心终不曲。纵非梁栋材，犹胜寻常木。

卷 425_26【叹鲁二首】

白居易

季桓心岂忠，其富过周公。阳货道岂正，其权执国命。
由来富与权，不系才与贤。所托得其地，虽愚亦获安。
彘肥因粪壤，鼠稳依社坛。虫兽尚如是，岂谓无因缘。

展禽胡为者，直道竟三黜。颜子何如人，屡空聊过日。
皆怀王佐道，不践陪臣秩。自古无奈何，命为时所屈。
有如草木分，天各与其一。荔枝非名花，牡丹无甘实。

卷 425_27【反鲍明远白头吟】

白居易

炎炎者烈火，营营者小蝇。火不热贞玉，蝇不点清冰。
此苟无所受，彼莫能相仍。乃知物性中，各有能不能。
古称怨恨死，则人有所惩。惩淫或应可，在道未为弘。
譬如蝮鸺徒，啾啾啁龙鹏。宜当委之去，寥廓高飞腾。

· 全唐诗 ·

岂能泥尘下，区区酬怨憎。胡为坐自苦，吞悲仍抚膺。

卷 425_28【青冢】

白居易

上有饥鹰号，下有枯蓬走。茫茫边雪里，一掬沙培塿。
传是昭君墓，埋闭蛾眉久。凝脂化为泥，铅黛复何有。
唯有阴怨气，时生坟左右。郁郁如苦雾，不随骨销朽。
妇人无他才，荣枯系妍否。何乃明妃命，独悬画工手。
丹青一诖误，白黑相纷纠。遂使君眼中，西施作嫫母。
同侪倾宠幸，异类为配偶。祸福安可知，美颜不如丑。
何言一时事，可戒千年后。特报后来姝，不须倚眉首。
无辞插荆钗，嫁作贫家妇。不见青冢上，行人为浇酒。

卷 425_29【杂感】

白居易

君子防悔尤，贤人戒行藏。嫌疑远瓜李，言动慎毫芒。
立教固如此，抚事有非常。为君持所感，仰面问苍苍。
犬啮桃树根，李树反见伤。老龟烹不烂，延祸及枯桑。
城门自焚蕪，池鱼罹其殃。阳货肆凶暴，仲尼畏于匡。
鲁酒薄如水，邯郸开战场。伯禽鞭见血，过失由成王。
都尉身降虏，宫刑加子长。吕安兄不道，都市杀嵇康。

· 全唐诗 ·

斯人死已久，其事甚昭彰。是非不由己，祸患安可防。
使我千载后，涕泗满衣裳。

· 全唐诗 ·

卷四百二十六

卷 426_1【七德舞 - 美拨乱，陈王业也】

白居易

七德舞，七德歌，传自武德至元和。元和小臣白居易，
观舞听歌知乐意，乐终稽首陈其事。太宗十八举义兵，
白旄黄钺定两京。擒充戮窦四海清，二十有四功业成。
二十有九即帝位，三十有五致太平。功成理定何神速，
速在推心置人腹。亡卒遗骸散帛收，饥人卖子分金赎。
魏徵梦见子夜泣，张谨哀闻辰日哭。怨女三千放出宫，
死囚四百来归狱。剪须烧药赐功臣，李勣呜咽思杀身。
含血吮创抚战士，思摩奋呼乞效死。则知不独善战善乘时，
以心感人人心归。尔来一百九十载，天下至今歌舞之。
歌七德，舞七德，圣人有作垂无极。岂徒耀神武，
岂徒夸圣文。太宗意在陈王业，王业艰难示子孙。

卷 426_2【法曲 - 美列圣，正华声也】

白居易

法曲法曲歌大定，积德重熙有余庆。永徽之人舞而咏，

· 全唐诗 ·

法曲法曲舞霓裳。政和世理音洋洋，开元之人乐且康。
法曲法曲歌堂堂，堂堂之庆垂无疆。中宗肃宗复鸿业，
唐祚中兴万万叶。法曲法曲合夷歌，夷声邪乱华声和。
以乱干和天宝末，明年胡尘犯宫阙。乃知法曲本华风，
苟能审音与政通。一从胡曲相参错，不辨兴衰与哀乐。
愿求牙旷正华音，不令夷夏相交侵。

卷 426_3【二王后 - 明祖宗之意也】

白居易

二王后，彼何人，介公酈公为国宾，周武隋文之子孙。
古人有言天下者，非是一人之天下。周亡天下传于隋，
隋人失之唐得之。唐兴十叶岁二百，介公酈公世为客。
明堂太庙朝享时，引居宾位备威仪。备威仪，助郊祭，
高祖太宗之遗制。不独兴灭国，不独继绝世。
欲令嗣位守文君，亡国子孙取为戒。

卷 426_4【海漫漫 - 戒求仙也】

白居易

海漫漫，直下无底傍无边。云涛烟浪最深处，
人传中有三神山。山上多生不死药，服之羽化为天仙。
秦皇汉武信此语，方士年年采药去。蓬莱今古但闻名，

· 全唐诗 ·

烟水茫茫无觅处。海漫漫，风浩浩，眼穿不见蓬莱岛。
不见蓬莱不敢归，童男丱女舟中老。徐福文成多诳诞，
上元太一虚祈祷。君看骊山顶上茂陵头，毕竟悲风吹蔓草。
何况玄元圣祖五千言，不言药，不言仙，不言白日升青天。

卷 426_5【立部伎 - 刺雅乐之替也】

白居易

立部伎，鼓笛喧。舞双剑，跳七丸。袅巨索，掉长竿。
太常部伎有等级，堂上者坐堂下立。堂上坐部笙歌清，
堂下立部鼓笛鸣。笙歌一声众侧耳，鼓笛万曲无人听。
立部贱，坐部贵，坐部退为立部伎，击鼓吹笙和杂戏。
立部又退何所任，始就乐悬操雅音。雅音替坏一至此，
长令尔辈调宫徵。圆丘后土郊祀时，言将此乐感神祇。
欲望凤来百兽舞，何异北辕将适楚。工师愚贱安足云，
太常三卿尔何人。

卷 426_6【华原磬 - 刺乐工非其人也】

白居易

华原磬，华原磬，古人不听今人听。泗滨石，泗滨石，
今人不击古人击。今人古人何不同，用之舍之由乐工。
乐工虽在耳如壁，不分清浊即为聋。梨园弟子调律吕，

· 全唐诗 ·

知有新声不如古。古称浮磬出泗滨，立辨致死声感人。
宫悬一听华原石，君心遂忘封疆臣。果然胡寇从燕起，
武臣少肯封疆死。始知乐与时政通，岂听铿锵而已矣。
磬囊入海去不归，长安市儿为乐师。华原磬与泗滨石，
清浊两声谁得知。

卷 426_7【上阳白发人 - 愍怨旷也】

白居易

上阳人，红颜闇老白发新。绿衣监使守宫门，
一闭上阳多少春。玄宗末岁初选入，入时十六今六十。
同时采择百余人，零落年深残此身。忆昔吞悲别亲族，
扶入车中不教哭。皆云入内便承恩，脸似芙蓉胸似玉。
未容君王得见面，已被杨妃遥侧目。妒令潜配上阳宫，
一生遂向空房宿。宿空房，秋夜长，夜长无寐天不明。
耿耿残灯背壁影，萧萧暗雨打窗声。春日迟，
日迟独坐天难暮。宫莺百啭愁厌闻，梁燕双栖老休妒。
莺归燕去长悄然，春往秋来不记年。唯向深宫望明月，
东西四五百回圆。今日宫中年最老，大家遥赐尚书号。
小头鞋履窄衣裳，青黛点眉眉细长。外人不见见应笑，
天宝末年时世妆。上阳人，苦最多。少亦苦，老亦苦，
少苦老苦两如何。君不见昔时吕向美人赋，
又不见今日上阳白发歌。

· 全唐诗 ·

卷 426_8【胡旋女 - 戒近习也】

白居易

胡旋女，胡旋女。心应弦，手应鼓。弦鼓一声双袖举，
回雪飘飘转蓬舞。左旋右转不知疲，千匝万周无已时。
人间物类无可比，奔车轮缓旋风迟。曲终再拜谢天子，
天子为之微启齿。胡旋女，出康居，徒劳东来万里余。
中原自有胡旋者，斗妙争能尔不如。天宝季年时欲变，
臣妾人人学圜转。中有太真外禄山，二人最道能胡旋。
梨花园中册作妃，金鸡障下养为儿。禄山胡旋迷君眼，
兵过黄河疑未反。贵妃胡旋惑君心，死弃马嵬念更深。
从兹地轴天维转，五十年来制不禁。胡旋女，莫空舞，
数唱此歌悟明主。

卷 426_9【新丰折臂翁 - 戒边功也】

白居易

新丰老翁八十八，头鬓眉须皆似雪。玄孙扶向店前行，
左臂凭肩右臂折。问翁臂折来几年，兼问致折何因缘。
翁云贯属新丰县，生逢圣代无征战。惯听梨园歌管声，
不识旗枪与弓箭。无何天宝大征兵，户有三丁点一丁。
点得驱将何处去，五月万里云南行。闻道云南有泸水，
椒花落时瘴烟起。大军徒涉水如汤，未过十人二三死。

· 全唐诗 ·

村南村北哭声哀，儿别爷娘夫别妻。皆云前后征蛮者，
千万人行无一回。是时翁年二十四，兵部牒中有名字。
夜深不敢使人知，偷将大石捶折臂。张弓簸旗俱不堪，
从兹始免征云南。骨碎筋伤非不苦，且图拣退归乡土。
此臂折来六十年，一肢虽废一身全。至今风雨阴寒夜，
直到天明痛不眠。痛不眠，终不悔，且喜老身今独在。
不然当时泸水头，身死魂孤骨不收。应作云南望乡鬼，
万人冢上哭呦呦。老人言，君听取。
君不闻开元宰相宋开府，不赏边功防黥武。
又不闻天宝宰相杨国忠，欲求恩幸立边功。
边功未立生人怨，请问新丰折臂翁。

卷 426_10【太行路 - 借夫妇以讽君臣之不终也】

白居易

太行之路能摧车，若比人心是坦途。巫峡之水能覆舟，
若比人心是安流。人心好恶苦不常，好生毛羽恶生疮。
与君结发未五载，岂期牛女为参商。古称色衰相弃背，
当时美人犹怨悔。何况如今鸾镜中，妾颜未改君心改。
为君熏衣裳，君闻兰麝不馨香。为君盛容饰，
君看金翠无颜色。行路难，难重陈。人生莫作妇人身，
百年苦乐由他人。行路难，难于山，险于水。
不独人间夫与妻，近代君臣亦如此。君不见左纳言，
右纳史，朝承恩，暮赐死。行路难，不在水，不在山，
只在人情反覆间。

· 全唐诗 ·

卷 426_11【司天台 - 引古以儆今也】

白居易

司天台，仰观俯察天人际。羲和死来职事废，
官不求贤空取艺。昔闻西汉元成间，上陵下替谪见天。
北辰微闇少光色，四星煌煌如火赤。耀芒动角射三台，
上台半灭中台坼。是时非无太史官，眼见心知不敢言。
明朝趋入明光殿，唯奏庆云寿星见。天文时变两如斯，
九重天子不得知。不得知，安用台高百尺为。

卷 426_12【捕蝗 - 刺长吏也】

白居易

捕蝗捕蝗谁家子，天热日长饥欲死。兴元兵后伤阴阳，
和气蛊蠹化为蝗。始自两河及三辅，荐食如蚕飞似雨。
雨飞蚕食千里间，不见青苗空赤土。河南长吏言忧农，
课人昼夜捕蝗虫。是时粟斗钱三百，蝗虫之价与粟同。
捕蝗捕蝗竟何利，徒使饥人重劳费。一虫虽死百虫来，
岂将人力定天灾。我闻古之良吏有善政，以政驱蝗蝗出境。
又闻贞观之初道欲昌，文皇仰天吞一蝗。
一人有庆兆民赖，是岁虽蝗不为害。

· 全唐诗 ·

卷 426_13【昆明春 - 思王泽之广被也】

白居易

昆明春，昆明春，春池岸古春流新。影浸南山青滉漾，
波沉西日红瀟沔。往年因旱池枯竭，龟尾曳涂鱼煦沫。
诏开八水注恩波，千介万鳞同日活。今来净绿水照天，
游鱼鱗鱗莲田田。洲香杜若抽心短，沙暖鸳鸯铺翅眠。
动植飞沉皆遂性，皇泽如春无不被。渔者仍丰网罟资，
贫人久获菰蒲利。诏以昆明近帝城，官家不得收其征。
菰蒲无租鱼无税，近水之人感君惠。感君惠，独何人，
吾闻率土皆王民，远民何疏近何亲。愿推此惠及天下，
无远无近同欣欣。吴兴山中罢榷茗，鄱阳坑里休封银。
天涯地角无禁利，熙熙同似昆明春。

卷 426_14【城盐州 - 美圣谟而诮边将也】

白居易

城盐州，城盐州，城在五原原上头。蕃东节度钵阐布，
忽见新城当要路。金鸟飞传赞普闻，建牙传箭集群臣。
君臣赧面有忧色，皆言勿谓唐无人。自筑盐州十馀载，
左衽毡裘不犯塞。昼牧牛羊夜捉生，长去新城百里外。
诸边急警劳戍人，唯此一道无烟尘。灵夏潜安谁复辨，
秦原暗通何处见。鄜州驿路好马来，长安药肆黄蓍贱。

· 全唐诗 ·

城盐州，盐州未城天子忧。德宗按图自定计，
非关将略与庙谋。吾闻高宗中宗世，北虏猖狂最难制。
韩公创筑受降城，三城鼎峙屯汉兵。东西亘绝数千里，
耳冷不闻胡马声。如今边将非无策，心笑韩公筑城壁。
相看养寇为身谋，各握强兵固恩泽。愿分今日边将恩，
褒赠韩公封子孙。谁能将此盐州曲，翻作歌词闻至尊。

卷 426_15【道州民 - 美臣遇明主也】

白居易

道州民，多侏儒，长者不过三尺余。市作矮奴年进送，
号为道州任土贡。任土贡，宁若斯，不闻使人生别离，
老翁哭孙母哭儿。一自阳城来守郡，不进矮奴频诏问。
城云臣按六典书，任土贡有不贡无。道州水土所生者，
只有矮民无矮奴。吾君感悟玺书下，岁贡矮奴宜悉罢。
道州民，老者幼者何欣欣。父兄子弟始相保，
从此得作良人身。道州民，民到于今受其赐，
欲说使君先下泪。仍恐儿孙忘使君，生男多以阳为字。

卷 426_16【驯犀 - 感为政之难终也】

白居易

驯犀驯犀通天犀，躯貌骇人角骇鸡。海蛮闻有明天子，

· 全唐诗 ·

驱犀乘传来万里。一朝得谒大明宫，欢呼拜舞自论功。
五年驯养始堪献，六译语言方得通。上嘉人兽俱来远，
蛮馆四方犀入苑。秣以瑶刍锁以金，故乡迢递君门深。
海鸟不知钟鼓乐，池鱼空结江湖心。驯犀生处南方热，
秋无白露冬无雪。一入上林三四年，又逢今岁苦寒月。
饮冰卧霰苦蜷跼，角骨冻伤鳞甲蹙。驯犀死，蛮儿啼，
向阙再拜颜色低。奏乞生归本国去，恐身冻死似驯犀。
君不见建中初，驯象生还放林邑。君不见贞元末，
驯犀冻死蛮儿泣。所嗟建中异贞元，象生犀死何足言。

卷 426_17【五弦弹 - 恶郑之夺雅也】

白居易

五弦弹，五弦弹，听者倾耳心寥寥。赵璧知君入骨爱，
五弦一一为君调。第一第二弦索索，秋风拂松疏韵落。
第三第四弦泠泠，夜鹤忆子笼中鸣。第五弦声最掩抑，
陇水冻咽流不得。五弦并奏君试听，凄凄切切复铮铮。
铁击珊瑚一两曲，冰泻玉盘千万声。铁声杀，冰声寒。
杀声入耳肤血慄，寒气中人肌骨酸。曲终声尽欲半日，
四坐相对愁无言。座中有一远方士，唧唧咨咨声不已。
自叹今朝初得闻，始知孤负平生耳。唯忧赵璧白发生，
老死人间无此声。远方士，尔听五弦信为美，
吾闻正始之音不如是。正始之音其若何，朱弦疏越清庙歌。
一弹一唱再三叹，曲澹节稀声不多。融融曳曳召元气，
听之不觉心平和。人情重今多贱古，古琴有弦人不抚。

· 全唐诗 ·

更从赵璧艺成来，二十五弦不如五。

卷 426_18【蛮子朝 - 刺将骄而相备位也】

白居易

蛮子朝，泛皮船兮渡绳桥，来自嵩州道路遥。
入界先经蜀川过，蜀将收功先表贺。臣闻云南六诏蛮，
东连牂牁西连蕃。六诏星居初琐碎，合为一诏渐强大。
开元皇帝虽圣神，唯蛮倔强不来宾。鲜于仲通六万卒，
征蛮一阵全军没。至今西洱河岸边，箭孔刀痕满枯骨。
谁知今日慕华风，不劳一人蛮自通。诚由陛下休明德，
亦赖微臣诱谕功。德宗省表知如此，笑令中使迎蛮子。
蛮子导从者谁何，摩挲俗羽双隈伽。清平官持赤藤杖，
大将军系金呿嗟。异牟寻男寻阁劝，特敕召对延英殿。
上心贵在怀远蛮，引临玉座近天颜。冕旒不垂亲劳俦。
赐衣赐食移时对。移时对，不可得，大臣相看有羞色。
可怜宰相拖紫佩金章，朝日唯闻对一刻。

卷 426_19【骠国乐 - 欲王化之先迩后远也】

白居易

骠国乐，骠国乐，出自大海西南角。雍羌之子舒难陀，
来献南音奉正朔。德宗立仗御紫庭，氍毹不塞为尔听。

· 全唐诗 ·

玉螺一吹椎髻耸，铜鼓一击文身踊。珠缨炫转星宿摇，
花鬘斗薊龙蛇动。曲终王子启圣人，臣父愿为唐外臣。
左右欢呼何翕习，至尊德广之所及。须臾百辟诣阁门，
俯伏拜表贺至尊。伏见骠人献新乐，请书国史传子孙。
时有击壤老农父，暗测君心闲独语。闻君政化甚圣明，
欲感人心致太平。感人在近不在远，太平由实非由声。
观身理国国可济，君如心兮民如体。体生疾苦心慙凄，
民得和平君恺悌。贞元之民若未安，骠乐虽闻君不叹。
贞元之民苟无病，骠乐不来君亦圣。骠乐骠乐徒喧喧，
不如闻此刍蕘言。

卷 426_20【缚戎人 - 达穷民之情也】

白居易

缚戎人，缚戎人，耳穿面破驱入秦。天子矜怜不忍杀，
诏徙东南吴与越。黄衣小使录姓名，领出长安乘递行。
身被金创面多瘡，扶病徒行日一驿。朝餐饥渴费杯盘，
夜卧腥臊污床席。忽逢江水忆交河，垂手齐声呜咽歌。
其中一虏语诸虏，尔苦非多我苦多。同伴行人因借问，
欲说喉中气愤愤。自云乡管本凉原，大历年中没落蕃。
一落蕃中四十载，遣著皮裘系毛带。唯许正朝服汉仪，
敛衣整巾潜泪垂。誓心密定归乡计，不使蕃中妻子知。
暗思幸有残筋力，更恐年衰归不得。蕃候严兵鸟不飞，
脱身冒死奔逃归。昼伏宵行经大漠，云阴月黑风沙恶。
惊藏青冢寒草疏，偷渡黄河夜冰薄。忽闻汉军鼙鼓声，

· 全唐诗 ·

路傍走出再拜迎。游骑不听能汉语，将军遂缚作蕃生。
配向东南卑湿地，定无存恤空防备。念此吞声仰诉天，
若为辛苦度残年。凉原乡井不得见，胡地妻儿虚弃捐。
没蕃被囚思汉土，归汉被劫为蕃虏。早知如此悔归来，
两地宁如一处苦。缚戎人，戎人之中我苦辛。
自古此冤应未有，汉心汉语吐蕃身。

· 全唐诗 ·

卷四百二十七

卷 427_1【骊宫高 - 美天子重惜人之财力也】

白居易

高高骊山上有宫，朱楼紫殿三四重。迟迟兮春日，
玉甃暖兮温泉溢。袅袅兮秋风，山蝉鸣兮宫树红。
翠华不来岁月久，墙有衣兮瓦有松。吾君在位已五载，
何不一幸乎其中。西去都门几多地，吾君不游有深意。
一人出兮不容易，六宫从兮百司备。八十一车千万骑，
朝有宴饫暮有赐。中人之产数百家，未足充君一日费。
吾君修己人不知，不自逸兮不自嬉。吾君爱人人不识，
不伤财兮不伤力。骊宫高兮高入云，君之来兮为一身，
君之不来兮为万人。

卷 427_2【百炼镜 - 辨皇王鉴也】

白居易

百炼镜，镕范非常规，日辰处所灵且祇。江心波上舟中铸，

· 全唐诗 ·

五月五日午时。琼粉金膏磨莹已，化为一片秋潭水。
镜成将献蓬莱宫，扬州长吏手自封。人间臣妾不合照，
背有九五飞天龙。人人呼为天子镜，我有一言闻太宗。
太宗常以人为镜，鉴古鉴今不鉴容。四海安危居掌内，
百王治乱悬心中。乃知天子别有镜，不是扬州百炼铜。

卷 427_3【青石 - 激忠烈也】

白居易

青石出自蓝田山，兼车运载来长安。工人磨琢欲何用，
石不能言我代言。不愿作人家墓前神道碣，
坟土未干名已灭。不愿作官家道旁德政碑，
不镌实录镌虚辞。愿为颜氏段氏碑，雕镂太尉与太师。
刻此两片坚贞质，状彼二人忠烈姿。义心如石屹不转，
死节如石确不移。如观奋击朱泚日，似见叱诃希烈时。
各于其上题名谥，一置高山一沉水。陵谷虽迁碑独存，
骨化为尘名不死。长使不忠不烈臣，观碑改节慕为人。
慕为人，劝事君。

卷 427_4【两朱阁 - 刺佛寺浸多也】

白居易

两朱阁，南北相对起。借问何人家，贞元双帝子。

· 全唐诗 ·

帝子吹箫双得仙，五云飘飘飞上天。第宅亭台不将去，
化为佛寺在人间。妆阁伎楼何寂静，柳似舞腰池似镜。
花落黄昏悄悄时，不闻歌吹闻钟磬。寺门敕榜金字书，
尼院佛庭宽有余。青苔明月多闲地，比屋疲人无处居。
忆昨平阳宅初置，吞并平人几家地。仙去双双作梵宫，
渐恐人间尽为寺。

卷 427_5【西凉伎 - 刺封疆之臣也】

白居易

西凉伎，假面胡人假狮子。刻木为头丝作尾，
金镀眼睛银帖齿。奋迅毛衣摆双耳，如从流沙来万里。
紫髯深目两胡儿，鼓舞跳梁前致辞。应似凉州未陷日，
安西都护进来时。须臾云得新消息，安西路绝归不得。
泣向狮子涕双垂，凉州陷没知不知。狮子回头向西望，
哀吼一声观者悲。贞元边将爱此曲，醉坐笑看看不足。
娱宾犒士宴监军，狮子胡儿长在目。有一征夫年七十，
见弄凉州低面泣。泣罢敛手白将军，主忧臣辱昔所闻。
自从天宝兵戈起，犬戎日夜吞西鄙。凉州陷来四十年，
河陇侵将七千里。平时安西万里疆，今日边防在凤翔。
缘边空屯十万卒，饱食温衣闲过日。遗民肠断在凉州，
将卒相看无意收。天子每思长痛惜，将军欲说合惭羞。
奈何仍看西凉伎，取笑资欢无所愧。纵无智力未能收，
忍取西凉弄为戏。

· 全唐诗 ·

卷 427_6【八骏图 - 戒奇物、惩佚游也】

白居易

穆王八骏天马驹，后人爱之写为图。背如龙兮颈如象，
骨耸筋高脂肉壮。日行万里疾如飞，穆王独乘何所之。
四荒八极蹋欲遍，三十二蹄无歇时。属车轴折趁不及，
黄屋草生弃若遗。瑶池西赴王母宴，七庙经年不亲荐。
璧台南与盛姬游，明堂不复朝诸侯。白云黄竹歌声动，
一人荒乐万人愁。周从后稷至文武，积德累功世勤苦。
岂知才及四代孙，心轻王业如灰土。由来尤物不在大，
能荡君心则为害。文帝却之不肯乘，千里马去汉道兴。
穆王得之不为戒，八骏驹来周室坏。至今此物尚称珍，
不知房星之精下为怪。八骏图，君莫爱。

卷 427_7【涧底松 - 念寒俊也】

白居易

有松百尺大十围，生在涧底寒且卑。涧深山险人路绝，
老死不逢工度之。天子明堂欠梁木，此求彼有两不知。
谁喻苍苍造物意，但与之材不与地。金张世禄原宪贫，
牛衣寒贱貂蝉贵。貂蝉与牛衣，高下虽有殊。高者未必贤，
下者未必愚。君不见沉沉海底生珊瑚，历历天上种白榆。

· 全唐诗 ·

卷 427_8【牡丹芳 - 美天子忧农也】

白居易

牡丹芳，牡丹芳，黄金蕊绽红玉房。千片赤英霞烂烂，
百枝绛点灯煌煌。照地初开锦绣段，当风不结兰麝囊。
仙人琪树白无色，王母桃花小不香。宿露轻盈泛紫艳，
朝阳照耀生红光。红紫二色间深浅，向背万态随低昂。
映叶多情隐羞面，卧丛无力含醉妆。低娇笑容疑掩口，
凝思怨人如断肠。秾姿贵彩信奇绝，杂卉乱花无比方。
石竹金钱何细碎，芙蓉芍药苦寻常。遂使王公与卿士，
游花冠盖日相望。庖车软舆贵公主，香衫细马豪家郎。
卫公宅静闭东院，西明寺深开北廊。戏蝶双舞看人久，
残莺一声春日长。共愁日照芳难驻，仍张帷幕垂阴凉。
花开花落二十日，一城之人皆若狂。三代以还文胜质，
人心重华不重实。重华直至牡丹芳，其来有渐非今日。
元和天子忧农桑，恤下动天天降祥。去岁嘉禾生九穗，
田中寂寞无人至。今年瑞麦分两歧，君心独喜无人知。
无人知，可叹息。我愿暂求造化力，减却牡丹妖艳色。
少回卿士爱花心，同似吾君忧稼穡。

卷 427_9【红线毯 - 忧蚕桑之费也】

白居易

红线毯，择茧缫丝清水煮，拣丝练线红蓝染。

· 全唐诗 ·

染为红线红于蓝，织作披香殿上毯。披香殿广十丈余，
红线织成可殿铺。彩丝茸茸香拂拂，线软花虚不胜物。
美人蹋上歌舞来，罗袜绣鞋随步没。太原毯涩毳缕硬，
蜀都褥薄锦花冷，不如此毯温且柔，年年十月来宣州。
宣城太守加样织，自谓为臣能竭力。百夫同担进宫中，
线厚丝多卷不得。宣城太守知不知，一丈毯，千两丝。
地不知寒人要暖，少夺人衣作地衣。

卷 427_10【杜陵叟 - 伤农夫之困也】

白居易

杜陵叟，杜陵居，岁种薄田一顷余。三月无雨旱风起，
麦苗不秀多黄死。九月降霜秋早寒，禾穗未熟皆青干。
长吏明知不申破，急敛暴征求考课。典桑卖地纳官租，
明年衣食将何如。剥我身上帛，夺我口中粟。
虐人害物即豺狼，何必钩爪锯牙食人肉。不知何人奏皇帝，
帝心恻隐知人弊。白麻纸上书德音，京畿尽放今年税。
昨日里胥方到门，手持尺牒榜乡村。十家租税九家毕，
虚受吾君蠲免恩。

卷 427_11【缭绫 - 念女工之劳也】

白居易

缭绫缭绫何所似，不似罗绡与纨绮。应似天台山上月明前，

· 全唐诗 ·

四十五尺瀑布泉。中有文章又奇绝，地铺白烟花簇雪。
织者何人衣者谁，越溪寒女汉宫姬。去年中使宣口敕，
天上取样人间织。织为云外秋雁行，染作江南春水色。
广裁衫袖长制裙，金斗熨波刀翦纹。异彩奇文相隐映，
转侧看花花不定。昭阳舞人恩正深，春衣一对直千金。
汗沾粉污不再著，曳土蹋泥无惜心。缭绫织成费功绩，
莫比寻常缁与帛。丝细绿多女手疼，扎扎千声不盈尺。
昭阳殿里歌舞人。若见织时应也惜。

卷 427_12【卖炭翁 - 苦官市也】

白居易

卖炭翁，伐薪烧炭南山中。满面尘灰烟火色，
两鬓苍苍十指黑。卖炭得钱何所营，身上衣裳口中食。

可怜身上衣正单，心忧炭贱愿天寒。夜来城上一尺雪，
晓驾炭车辗冰辙。牛困人饥日已高，市南门外泥中歇。

翩翩两骑来是谁，黄衣使者白衫儿。手把文书口称敕，
回车叱牛牵向北。一车炭，千馀斤，官使驱将惜不得。
半匹红纱一丈绫，系向牛头充炭直。

· 全唐诗 ·

卷 427_13【母别子 - 刺新闻旧也】

白居易

母别子，子别母，白日无光哭声苦。关西骠骑大将军，
去年破虏新策勋。敕赐金钱二百万，洛阳迎得如花人。
新人迎来旧人弃，掌上莲花眼中刺。迎新弃旧未足悲，
悲在君家留两儿。一始扶行一初坐，坐啼行哭牵人衣。
以汝夫妇新燕婉，使我母子生别离。不如林中乌与鹊，
母不失雏雄伴雌。应似园中桃李树，花落随风子在枝。
新人新人听我语，洛阳无限红楼女。但愿将军重立功，
更有新人胜于汝。

卷 427_14【阴山道 - 疾贪虏也】

白居易

阴山道，阴山道，纥逻敦肥水泉好。每至戎人送马时，
道旁千里无纤草。草尽泉枯马病羸，飞龙但印骨与皮。
五十匹缣易一匹，缣去马来无了日。养无所用去非宜，
每岁死伤十六七。缣丝不足女工苦，疏织短截充匹数。
藕丝蛛网三丈余，回纥诉称无用处。咸安公主号可敦，
远为可汗频奏论。元和二年下新敕，内出金帛酬马直。
仍诏江淮马价缣，从此不令疏短织。合罗将军呼万岁，
捧授金银与缣彩。谁知黠虏启贪心，明年马多来一倍。

· 全唐诗 ·

缣渐好，马渐多。阴山虏，奈尔何。

卷 427_15【时世妆 - 倣戎也】

白居易

时世妆，时世妆，出自城中传四方。时世流行无远近，
腮不施朱面无粉。乌膏注唇唇似泥，双眉画作八字低。
妍媸黑白失本态，妆成尽似含悲啼。圆鬟无鬓堆髻样，
斜红不晕赭面状。昔闻被发伊川中，辛有见之知有戎。
元和妆梳君记取，髻堆面赭非华风。

卷 427_16【李夫人 - 鉴嬖惑也】

白居易

汉武帝，初丧李夫人。夫人病时不肯别，死后留得生前恩。
君恩不尽念未已，甘泉殿里令写真。丹青画出竟何益，
不言不笑愁杀人。又令方士合灵药，玉釜煎炼金炉焚。
九华帐深夜悄悄，反魂香降夫人魂。夫人之魂在何许，
香烟引到焚香处。既来何苦不须臾，缥缈悠扬还灭去。
去何速兮来何迟，是耶非耶两不知。翠蛾仿佛平生貌，
不似昭阳寝疾时。魂之不来君心苦，魂之来兮君亦悲。
背灯隔帐不得语，安用暂来还见违。伤心不独汉武帝，
自古及今皆若斯。君不见穆王三日哭，重璧台前伤盛姬。

· 全唐诗 ·

又不见泰陵一掬泪，马嵬坡下念杨妃。
纵令妍姿艳质化为土，此恨长在无销期。
生亦惑，死亦惑，尤物惑人忘不得。
人非木石皆有情，不如不遇倾城色。

卷 427_17【陵园妾 - 怜幽闭也】

白居易

陵园妾，颜色如花命如叶。命如叶薄将奈何，
一奉寝宫年月多。年月多，时光换，春愁秋思知何限。
青丝发落丛鬓疏，红玉肤销系裙慢。忆昔宫中被妒猜，
因谗得罪配陵来。老母啼呼趁车别，中官监送锁门回。
山宫一闭无开日，未死此身不令出。松门到晓月裴回，
柏城尽日风萧瑟。松门柏城幽闭深，闻蝉听燕感光阴。
眼看菊蕊重阳泪，手把梨花寒食心。把花掩泪无人见，
绿芜墙绕青苔院。四季徒支妆粉钱，三朝不识君王面。
遥想六宫奉至尊，宣徽雪夜浴堂春。雨露之恩不及者，
犹闻不啻三千人。三千人，我尔君恩何厚薄。
愿令轮转直陵园，三岁一来均苦乐。

卷 427_18【盐商妇 - 恶幸人也】

白居易

盐商妇，多金帛，不事田农与蚕绩。南北东西不失家，

· 全唐诗 ·

风水为乡船作宅。本是扬州小家女，嫁得西江大商客。
绿鬟富去金钗多，皓腕肥来银钏窄。前呼苍头后叱婢，
问尔因何得如此。婿作盐商十五年，不属州县属天子。
每年盐利入官时，少入官家多入私。官家利薄私家厚，
盐铁尚书远不知。何况江头鱼米贱，红脰黄橙香稻饭。
饱食浓妆倚柁楼，两朵红腮花欲绽。盐商妇，有幸嫁盐商。
终朝美饭食，终岁好衣裳。好衣美食来何处，
亦须惭愧桑弘羊。桑弘羊，死已久，不独汉时今亦有。

卷 427_19【杏为梁 - 刺居处僭也】

白居易

右为梁，桂为柱，何人堂室李开府。碧砌红轩色未干，
去年身歿今移主。高其墙，大其门，谁家第宅卢将军。
素泥朱版光未灭，今日官收别赐人。开府之堂将军宅，
造未成时头已白。逆旅重居逆旅中，心是主人身是客。
更有愚夫念身后，心虽甚长计非久。穷奢极丽越规模，
付子传孙令保守。莫教门外过客闻，抚掌回头笑杀君。
君不见马家宅，尚犹存，宅门题作奉诚园。君不见魏家宅，
属他人，诏赎赐还五代孙。俭存奢失今在目，
安用高墙围大屋。

· 全唐诗 ·

卷 427_20 【井底引银瓶 - 止淫奔也】

白居易

井底引银瓶，银瓶欲上丝绳绝。石上磨玉簪，
玉簪欲成中央折。瓶沉簪折知奈何，似妾今朝与君别。
忆昔在家为女时，人言举动有殊姿。婣娟两鬓秋蝉翼，
宛转双蛾远山色。笑随戏伴后园中，此时与君未相识。
妾弄青梅凭短墙，君骑白马傍垂杨。墙头马上遥相顾，
一见知君即断肠。知君断肠共君语，君指南山松柏树。
感君松柏化为心，闇合双鬟逐君去。到君家舍五六年，
君家大人频有言。聘则为妻奔是妾，不堪主祀奉蘋蘩。
终知君家不可住，其奈出门无去处。岂无父母在高堂，
亦有亲情满故乡。潜来更不通消息，今日悲羞归不得。
为君一日恩，误妾百年身。寄言痴小人家女，
慎勿将身轻许人。

卷 427_21 【官牛 - 讽执政也】

白居易

官牛官牛驾官车，浚水岸边般载沙。一石沙，几斤重，
朝载暮载将何用。载向五门官道西，绿槐阴下铺沙堤。
昨来新拜右丞相，恐怕泥涂污马蹄。右丞相，
马蹄蹋沙虽净洁，牛领牵车欲流血。右丞相，

· 全唐诗 ·

但能济人治国调阴阳，官牛领穿亦无妨。

卷 427_22【紫毫笔 - 讥失职也】

白居易

紫毫笔，尖如锥兮利如刀。江南石上有老兔，
吃竹饮泉生紫毫。宣城之人采为笔，千万毛中拣一毫。
毫虽轻，功甚重。管勒工名充岁贡，君兮臣兮勿轻用。
勿轻用，将何如，愿赐东西府御史，愿颁左右台起居。
搦管趋入黄金阙，抽毫立在白玉除。臣有奸邪正衙奏，
君有动言直笔书。起居郎，侍御史，尔知紫毫不易致。
每岁宣城进笔时，紫毫之价如金贵。慎勿空将弹失仪，
慎勿空将录制词。

卷 427_23【隋堤柳 - 悯亡国也】

白居易

隋堤柳，岁久年深尽衰朽。风飘飘兮雨萧萧，
三株两株汴河口。老枝病叶愁杀人，曾经大业年中春。
大业年中炀天子，种柳成行夹流水。西自黄河东至淮，
绿阴一千三百里。大业末年春暮月，柳色如烟絮如雪。
南幸江都恣佚游，应将此柳系龙舟。紫髯郎将护锦缆，
青娥御史直迷楼。海内财力此时竭，舟中歌笑何日休。

· 全唐诗 ·

上荒下困势不久，宗社之危如缀旒。炀天子，
自言福祚长无穷，岂知皇子封酈公。龙舟未过彭城阁，
义旗已入长安宫。萧墙祸生人事变，晏驾不得归秦中。
土坟数尺何处葬，吴公台下多悲风。二百年来汴河路，
沙草和烟朝复暮。后王何以鉴前王，请看隋堤亡国树。

卷 427_24【草茫茫 - 愆厚葬也】

白居易

草茫茫，土苍苍。苍苍茫茫在何处，骊山脚下秦皇墓。
墓中下涸二重泉，当时自以为深固。下流水银象江海，
上缀珠光作乌兔。别为天地于其间，拟将富贵随身去。
一朝盗掘坟陵破，龙椁神堂三月火。可怜宝玉归人间，
暂借泉中买身祸。奢者狼藉俭者安，一凶一吉在眼前。
凭君回首向南望，汉文葬在霸陵原。

卷 427_25【古冢狐 - 戒艳色也】

白居易

古冢狐，妖且老，化为妇人颜色好。头变云鬟面变妆，
大尾曳作长红裳。徐徐行傍荒村路，日欲暮时人静处。
或歌或舞或悲啼，翠眉不举花颜低。忽然一笑千万态，
见者十人八九迷。假色迷人犹若是，真色迷人应过此。

· 全唐诗 ·

彼真此假俱迷人，人心恶假贵重真。狐假女妖害犹浅，
一朝一夕迷人眼。女为狐媚害即深，日长月增溺人心。
何况褒姒之色善蛊惑，能丧人家覆人国。
君看为害浅深间，岂将假色同真色。

卷 427_26【黑潭龙 - 疾贪吏也】

白居易

黑潭水深黑如墨，传有神龙人不识。潭上架屋官立祠，
龙不能神人神之。丰凶水旱与疾疫，乡里皆言龙所为。
家家养豚漉清酒，朝祈暮赛依巫口。神之来兮风飘飘，
纸钱动兮锦伞摇。神之去兮风亦静，香火灭兮杯盘冷。
肉堆潭岸石，酒泼庙前草。不知龙神享几多，
林鼠山狐长醉饱。狐何幸，豚何辜，年年杀豚将喂狐。
狐假龙神食豚尽，九重泉底龙知无。

卷 427_27【天可度 - 恶诈人也】

白居易

天可度，地可量，唯有人心不可防。但见丹诚赤如血，
谁知伪言巧似簧。劝君掩鼻君莫掩，使君夫妇为参商。
劝君掇蜂君莫掇，使君父子成豺狼。海底鱼今天上鸟，
高可射兮深可钓。唯有人心相对时，咫尺之间不能料。

· 全唐诗 ·

君不见李义府之辈笑欣欣，笑中有刀潜杀人。
阴阳神变皆可测，不测人间笑是瞋。

卷 427_28【秦吉了 - 哀冤民也】

白居易

秦吉了，出南中，彩毛青黑花颈红。耳聪心慧舌端巧，
鸟语人言无不通。昨日长爪鸂，今朝大觜乌。
鸂捎乳燕一窠覆，乌啄母鸡双眼枯。鸡号堕地燕惊去，
然后拾卵攫其雏。岂无雕与鹗，嚙中肉饱不肯搏。
亦有鸾鹤群，闲立高飏如不闻。秦吉了，人云尔是能言鸟，
岂不见鸡燕之冤苦。吾闻凤凰百鸟主，
尔竟不为凤凰之前致一言，安用噪噪闲言语。

卷 427_29【鸦九剑 - 思决壅也】

白居易

欧冶子死千年后，精灵闇授张鸦九。鸦九铸剑吴山中，
天与日时神借功。金铁腾精火翻焰，踊跃求为镞铎剑。
剑成未试十余年，有客持金买一观。谁知闭匣长思用，
三尺青蛇不肯蟠。客有心，剑无口，客代剑言告鸦九。
君勿矜我玉可切，君勿夸我钟可剉。不如持我决浮云，
无令漫漫蔽白日。为君使无私之光及万物，

· 全唐诗 ·

蛰虫昭苏萌草出。

卷 427_30【采诗官 - 监前王乱亡之由也】

白居易

采诗官，采诗听歌导人言。言者无罪闻者诫，
下流上通上下泰。周灭秦兴至隋氏，十代采诗官不置。
郊庙登歌赞君美，乐府艳词悦君意。若求兴谕规刺言，
万句千章无一字。不是章句无规刺，渐及朝廷绝讽议。
谏臣杜口为冗员，谏鼓高悬作虚器。一人负扆常端默，
百辟入门两自媚。夕郎所贺皆德音，春官每奏唯祥瑞。
君之堂兮千里远，君之门兮九重闑。君耳唯闻堂上言，
君眼不见门前事。贪吏害民无所忌，奸臣蔽君无所畏。
君不见厉王胡亥之末年，群臣有利君无利。
君兮君兮愿听此，欲开壅蔽达人情，先向歌诗求讽刺。

· 全唐诗 ·

卷四百二十八

卷 428_1【常乐里闲居偶题十六韵，兼寄刘十五公舆、王十一
起、吕二炅、吕四颖、崔十八玄亮、元九稹、刘三十二敦质、
张十五仲元，时为校书郎】

白居易

帝都名利场，鸡鸣无安居。独有懒慢者，日高头未梳。
工拙性不同，进退迹遂殊。幸逢太平代，天子好文儒。
小才难大用，典校在秘书。三旬两入省，因得养顽疏。
茅屋四五间，一马二仆夫。俸钱万六千，月给亦有余。
既无衣食牵，亦少人事拘。遂使少年心，日日常晏如。
勿言无知己，躁静各有徒。兰台七八人，出处与之俱。
旬时阻谈笑，旦夕望轩车。谁能黜校闲，解带卧吾庐。
窗前有竹玩，门处有酒酤。何以待君子，数竿对一壶。

卷 428_2【答元八宗简同游曲江后明日见赠】

白居易

长安千万人，出门各有营。唯我与夫子，信马悠悠行。

· 全唐诗 ·

行到曲江头，反照草树明。南山好颜色，病客有心情。
水禽翻白羽，风荷袅翠茎。何必沧浪去，即此可濯缨。
时景不重来，赏心难再并。坐愁红尘里，夕鼓咚咚声。
归来经一宿，世虑稍复生。赖闻瑶华唱，再得尘襟清。

卷 428_3【感时】

白居易

朝见日上天，暮见日入地。不觉明镜中，忽年三十四。
勿言身未老，冉冉行将至。白发虽未生，朱颜已先悴。
人生讵几何，在世犹如寄。虽有七十期，十人无一二。
今我犹未悟，往往不适意。胡为方寸间，不贮浩然气。
贫贱非不恶，道在何足避。富贵非不爱，时来当自致。
所以达人心，外物不能累。唯当饮美酒，终日陶陶醉。
斯言胜金玉，佩服无失坠。

卷 428_4【首夏同诸校正游开元观，因宿玩月】

白居易

我与二三子，策名在京师。官小无职事，闲于为客时。
沉沉道观中，心赏期在兹。到门车马回，入院巾杖随。
清和四月初，树木正华滋。风清新叶影，鸟恋残花枝。
向夕天又晴，东南余霞披。置酒西廊下，待月杯行迟。

· 全唐诗 ·

须臾金魄生，若与吾徒期。光华一照耀，殿角相参差。
终夜清景前，笑歌不知疲。长安名利地，此兴几人知。

卷 428_5【永崇里观居】

白居易

季夏中气候，烦暑自此收。萧飒风雨天，蝉声暮啾啾。
永崇里巷静，华阳观院幽。轩车不到处，满地槐花秋。
年光忽冉冉，世事本悠悠。何必待衰老，然后悟浮休。
真隐岂长远，至道在冥搜。身虽世界住，心与虚无游。
朝饥有蔬食，夜寒有布裘。幸免冻与馁，此外复何求。
寡欲虽少病，乐天心不忧。何以明吾志，周易在床头。

卷 428_6【早送举人入试】

白居易

夙驾送举人，东方犹未明。自谓出太早，已有车马行。
骑火高低影，街鼓参差声。可怜早朝者，相看意气生。
日出尘埃飞，群动互营营。营营各何求，无非利与名。
而我常晏起，虚住长安城。春深官又满，日有归山情。

· 全唐诗 ·

卷 428_7【招王质夫】

白居易

濯足云水客，折腰簪笏身。喧闲迹相背，十里别经旬。
忽因乘逸兴，莫惜访嚣尘。窗前故栽竹，与君为主人。

卷 428_8【祇役骆口，因与王质夫同游秋山，偶题三韵】

白居易

石拥百泉合，云破千峰开。平生烟霞侣，此地重裴回。
今日勤王意，一半为山来。

卷 428_9【见萧侍御忆旧山草堂诗，因以继和】

白居易

琢玉以为架，缀珠以为笼。玉架绊野鹤，珠笼锁冥鸿。
鸿思云外天，鹤忆松上风。珠玉信为美，鸟不恋其中。
台中萧侍御，心与鸿鹤同。晚起慵冠豸，闲行厌避骢。
昨见忆山诗，诗思浩无穷。归梦杳何处，旧居茫水东。
秋闲杉桂林，春老芝朮丛。自云别山后，离抱常忡忡。
衣绣非不荣，持宪非不雄。所乐不在此，怅望草堂空。

· 全唐诗 ·

卷 428_10 【病假中南亭闲望】

白居易

欹枕不视事，两日门掩关。始知吏役身，不病不得闲。
闲意不在远，小亭方丈间。西檐竹梢上，坐见太白山。
遥愧峰上云，对此尘中颜。

卷 428_11 【仙游寺独宿】

白居易

沙鹤上阶立，潭月当户开。此中留我宿，两夜不能回。
幸与静境遇，喜无归侣催。从今独游后，不拟共人来。

卷 428_12 【前庭凉夜】

白居易

露簟色似玉，风幌影如波。坐愁树叶落，中庭明月多。

· 全唐诗 ·

卷 428_13 【官舍小亭闲望】

白居易

风竹散清韵，烟槐凝绿姿。日高人吏去，闲坐在茅茨。
葛衣御时暑，蔬饭疗朝饥。持此聊自足，心力少营为。
亭上独吟罢，眼前无事时。数峰太白雪，一卷陶潜诗。
人心各自是，我是良在兹。回谢争名客，甘从君所嗤。

卷 428_14 【早秋独夜】

白居易

井梧凉叶动，邻杵秋声发。独向檐下眠，觉来半床月。

卷 428_15 【听弹古渌水】

白居易

闻君古渌水，使我心和平。欲识慢流意，为听疏泛声。
西窗竹阴下，竟日有余清。

· 全唐诗 ·

卷 428_16 【松斋自题】

白居易

非老亦非少，年过三纪余。非贱亦非贵，朝登一命初。
才小分易足，心宽体长舒。充肠皆美食，容膝即安居。
况此松斋下，一琴数帙书。书不求甚解，琴聊以自娱。
夜直入君门，晚归卧吾庐。形骸委顺动，方寸付空虚。
持此将过日，自然多晏如。昏昏复默默，非智亦非愚。

卷 428_17 【冬夜与钱员外同直禁中】

白居易

夜深草诏罢，霜月凄凛凛。欲卧暖残杯，灯前相对饮。
连铺青缣被，封置通中枕。仿佛百余宵，与君同此寝。

卷 428_18 【和钱员外禁中夙兴见示】

白居易

窗白星汉曙，窗暖灯火馀。坐卷朱里幕，看封紫泥书。
窅窅钟漏尽，曈曈霞景初。楼台红照曜，松竹青扶疏。
君爱此时好，回头特谓余。不知上清界，晓景复何如。

· 全唐诗 ·

卷 428_19【夏日独直，寄萧侍御】

白居易

宪台文法地，翰林清切司。鹰猜课野鹤，骥德责山麋。
课责虽不同，同归非所宜。是以方寸内，忽忽暗相思。

夏日独上直，日长何所为。澹然无他念，虚静是吾师。
形委有事牵，心与无事期。中臆一以旷，外累都若遗。

地贵身不觉，意闲境来随。但对松与竹，如在山中时。
情性聊自适，吟咏偶成诗。此意非夫子，余人多不知。

卷 428_20【松声】

白居易

月好好独坐，双松在前轩。西南微风来，潜入枝叶间。
萧寥发为声，半夜明月前。寒山飒飒雨，秋琴泠泠弦。

一闻涤炎暑，再听破昏烦。竟夕遂不寐，心体俱翛然。
南陌车马动，西邻歌吹繁。谁知兹檐下，满耳不为喧。

· 全唐诗 ·

卷 428_21 【禁中】

白居易

门严九重静，窗幽一室闲。好是修心处，何必在深山。

卷 428_22 【赠吴丹】

白居易

巧者力苦劳，智者心苦忧。爱君无巧智，终岁闲悠悠。
尝登御史府，亦佐东诸侯。手操纠谬简，心运决胜筹。
宦途似风水，君心如虚舟。泛然而不有，进退得自由。
今来脱豸冠，时往侍龙楼。官曹称心静，居处随迹幽。
冬负南荣日，支体甚温柔。夏卧北窗风，枕席如凉秋。
南山入舍下，酒瓮在床头。人间有闲地，何必隐林丘。
顾我愚且昧，劳生殊未休。一入金门直，星霜三四周。
主恩信难报，近地徒久留。终当乞闲官，退与夫子游。

卷 428_23 【初除户曹，喜而言志】

白居易

诏授户曹掾，捧诏感君恩。感恩非为己，禄养及吾亲。

· 全唐诗 ·

弟兄俱簪笏，新妇俨衣巾。罗列高堂下，拜庆正纷纷。
俸钱四五万，月可奉晨昏。廪禄二百石，岁可盈仓囷。
喧喧车马来，贺客满我们。不以我为贫，知我家内贫。
置酒延宾客，客容亦欢欣。笑云今日后，不复忧空尊。
答云如君言，愿君少逡巡。我有平生志，醉后为君陈。
人生百岁期，七十有几人。浮荣及虚位，皆是身之宾。
唯有衣与食，此事粗关身。苟免饥寒外，余物尽浮云。

卷 428_24【秋居书怀】

白居易

门前少宾客，阶下多松竹。秋景下西墙，凉风入东屋。
有琴慵不弄，有书闲不读。尽日方寸中，澹然无所欲。
何须广居处，不用多积蓄。丈室可容身，斗储可充腹。
况无治道术，坐受官家禄。不种一株桑，不锄一垄谷。
终朝饱饭餐，卒岁丰衣服。持此知愧心，自然易为足。

卷 428_25【禁中晓卧，因怀王起居】

白居易

迟迟禁漏尽，悄悄暝鸦喧。夜雨槐花落，微凉卧北轩。
曙灯残未灭，风帘闲自翻。每一得静境，思与故人言。

· 全唐诗 ·

卷 428_26 【养拙】

白居易

铁柔不为剑，木曲不为辕。今我亦如此，愚蒙不及门。
甘心谢名利，灭迹归丘园。坐卧茅茨中，但对琴与尊。
身去缰锁累，耳辞朝市喧。逍遥无所为，时窥五千言。
无忧乐性场，寡欲清心源。始知不才者，可以探道根。

卷 428_27 【寄李十一建】

白居易

外事牵我形，外物诱我情。李君别来久，徧客从中生。
忆昨访君时，立马扣柴荆。有时君未起，稚子喜先迎。
连步笑出门，衣翻冠或倾。扫阶苔纹绿，拂榻藤阴清。
家酝及春熟，园葵乘露烹。看山东亭坐，待月南原行。
门静唯鸟语，坊远少鼓声。相对尽日言，不及利与名。
分手来几时，明月三四盈。别时残花落，及此新蝉鸣。
芳岁忽已晚，离抱怅未平。岂不思命驾，吏职坐相萦。
前时君有期，访我来山城。心赏久云阻，言约无自轻。
相去幸非远，走马一日程。

· 全唐诗 ·

卷 428_28【旅次华州，赠袁右丞】

白居易

渭水绿溶溶，华山青崇崇。山水一何丽，君子在其中。
才与世会合，物随诚感通。德星降人福，时雨助岁功。
化行人无讼，囹圄千日空。政顺气亦和，黍稷三年丰。
客自帝城来，驱马出关东。爱此一郡人，如见太古风。
方今天子心，忧人正忡忡。安得天下守，尽得如袁公。

卷 428_29【酬杨九弘贞长安病中见寄】

白居易

伏枕君寂寂，折腰我营营。所嗟经时别，相去一宿程。
携手昨何时，昆明春水平。离郡来几日，太白夏云生。
之子未得意，贫病客帝城。贫坚志士节，病长高人情。
隐几自恬澹，闭门无送迎。龙卧心有待，鹤瘦貌弥清。
清机发为文，投我如振琼。何以慰饥渴，捧之吟一声。

卷 428_30【禁中寓直梦游仙游寺】

白居易

西轩草诏暇，松竹深寂寂。月出清风来，忽似山中夕。

· 全唐诗 ·

因成西南梦，梦作游仙客。觉闻宫漏声，犹谓山泉滴。

卷 428_31 【赠王山人】

白居易

闻君减寝食，日听神仙说。暗待非常人，潜求长生诀。
言长本对短，未离生死辙。假使得长生，才能胜夭折。

松树千年朽，槿花一日歇。毕竟共虚空，何须夸岁月。
彭殤徒自异，生死终无别。不如学无生，无生即无灭。

卷 428_32 【秋山】

白居易

久病旷心赏，今朝一登山。山秋云物冷，称我清羸颜。
白石卧可枕，青萝行可攀。意中如有得，尽日不欲还。

人生无几何，如寄天地间。心有千载忧，身无一日闲。
何时解尘网，此地来掩关。

· 全唐诗 ·

卷 428_33【赠能七伦】

白居易

涧松高百寻，四时寒森森。临风有清韵，向日无曲阴。
如何时俗人，但赏桃李林。岂不知坚贞，芳馨诱其心。
能生学为文，气高功亦深。手中一百篇，句句披沙金。
苦节二十年，无人振陆沉。今我尚贫贱，徒为尔知音。

卷 428_34【题杨颖士西亭】

白居易

静得亭上境，远谐尘外踪。凭轩东南望，鸟灭山重重。
竹露冷烦襟，杉风清病容。旷然宜真趣，道与心相逢。
即此可遗世，何必蓬壶峰。

卷 428_35【题赠郑秘书征君石沟溪隐居】

白居易

郑君得自然，虚白生心胸。吸彼沆瀣精，凝为冰雪容。
大君贞元初，求贤致时雍。蒲轮入翠微，迎下天台峰。
赤城别松乔，黄阁交夔龙。俯仰受三命，从容辞九重。

· 全唐诗 ·

出笼鹤翩翩，归林凤雍雍。在火辨良玉，经霜识贞松。
新居寄楚山，山碧溪溶溶。丹灶烧烟煴，黄精花丰茸。
蕙帐夜琴澹，桂尊春酒浓。时人不到处，苔石无尘踪。
我今何为者，趋世身龙钟。不向林壑访，无由朝市逢。
终当解尘缨，卜筑来相从。

卷 428_36 【及第后归觐，留别诸同年】

白居易

十年常苦学，一上谬成名。擢第未为贵，贺亲方始荣。
时辈六七人，送我出帝城。轩车动行色，丝管举离声。
得意减别恨，半酣轻远程。翩翩马蹄疾，春日归乡情。

卷 428_37 【清夜琴兴】

白居易

月出鸟栖尽，寂然坐空林。是时心境闲，可以弹素琴。
清泠由木性，恬澹随人心。心积和平气，木应正始音。
响馀群动息，曲罢秋夜深。正声感元化，天地清沉沉。

· 全唐诗 ·

卷 428_38【郊陶潜体诗十六首】

白居易

不动者厚地，不息者高天。无穷者日月，长在者山川。
松柏与龟鹤，其寿皆千年。嗟嗟群物中，而人独不然。
早出向朝市，暮已归下泉。形质及寿命，危脆若浮烟。
尧舜与周孔，古来称圣贤。借问今何在，一去亦不还。

我无不死药，万万随化迁。所未定知者，修短迟速间。
幸及身健日，当歌一尊前。何必待人劝，持此自为欢。
翳翳逾月阴，沉沉连日雨。开帘望天色，黄云暗如土。
行潦毁我墉，疾风坏我宇。蓬莠生庭院，泥涂失场圃。
村深绝宾客，窗晦无俦侣。尽日不下床，跳蛙时入户。

出门无所往，入室还独处。不以酒自娱，块然与谁语。
朝饮一杯酒，冥心合元化。兀然无所思，日高尚闲卧。
暮读一卷书，会意如嘉话。欣然有所遇，夜深犹独坐。
又得琴上趣，安弦有余暇。复多诗中狂，下笔不能罢。
唯兹三四事，持用度昼夜。所以阴雨中，经旬不出舍。
始悟独往人，心安时亦过。

东家采桑妇，雨来苦愁悲。蒺藜北堂前，雨冷不成丝。
西家荷锄叟，雨来亦怨咨。种豆南山下，雨多落为萁。
而我独何幸，酝酒本无期。及此多雨日，正遇新熟时。
开瓶泻尊中，玉液黄金脂。持玩已可悦，欢尝有馀滋。

· 全唐诗 ·

一酌发好容，再酌开愁眉。连延四五酌，酣畅入四肢。
忽然遗我物，谁复分是非。是时连夕雨，酩酊无所知。
人心苦颠倒，反为忧者嗤。

朝亦独醉歌，暮亦独醉睡。未尽一壶酒，已成三独醉。
勿嫌饮太少，且喜欢易致。一杯复两杯，多不过三四。
便得心中适，尽忘身外事。更复强一杯，陶然遗万累。
一饮一石者，徒以多为贵。及其酩酊时，与我亦无异。
笑谢多饮者，酒钱徒自费。

天秋无片云，地静无纤尘。团团新晴月，林外生白轮。
忆昨阴霖天，连连三四旬。赖逢家酝熟，不觉过朝昏。
私言雨霁后，可以罢余尊。及对新月色，不醉亦愁人。
床头残酒榼，欲尽味弥淳。携置南檐下，举酌自殷勤。
清光入杯杓，白露生衣巾。乃知阴与晴，安可无此君。
我有乐府诗，成来人未闻。今宵醉有兴，狂咏惊四邻。
独赏犹复尔，何况有交亲。

中秋三五夜，明月在前轩。临觞忽不饮，忆我平生欢。
我有同心人，邈邈崔与钱。我有忘形友，迢迢李与元。
或飞青云上，或落江湖间。与我不相见，于今四五年。

我无缩地术，君非驭风仙。安得明月下，四人来晤言。
良夜信难得，佳期杳无缘。明月又不驻，渐下西南天。
岂无他时会，惜此清景前。

家酝饮已尽，村中无酒酤。坐愁今夜醒，其奈秋怀何。

· 全唐诗 ·

有客忽叩门，言语一何佳。云是南村叟，挈榼来相过。
且喜尊不燥，安问少与多。重阳虽已过，篱菊有残花。
欢来苦昼短，不觉夕阳斜。老人勿遽起，且待新月华。
客去有馀趣，竟夕独酣歌。

原生衣百结，颜子食一簞。欢然乐其志，有以忘饥寒。
今我何人哉，德不及先贤。衣食幸相属，胡为不自安。
况兹清渭曲，居处安且闲。榆柳百余树，茅茨十数间。
寒负檐下日，热濯涧底泉。日出犹未起，日入已复眠。
西风满村巷，清凉八月天。但有鸡犬声，不闻车马喧。
时倾一尊酒，坐望东南山。稚侄初学步，牵衣戏我前。
即此自可乐，庶几颜与原。

湛湛尊中酒，有功不自伐。不伐人不知，我今代其说。
良将临大敌，前驱千万卒。一簞投河饮，赴死心如一。
壮士磨匕首，勇愤气蓬勃。一酣忘报讎，四体如无骨。
东海杀孝妇，天旱逾年月。一酌酹其魂，通宵雨不歇。
咸阳秦狱气，冤痛结为物。千岁不肯散，一沃亦销失。
况兹儿女恨，及彼幽忧疾。快饮无不消，如霜得春日。
方知麴蘖灵，万物无与匹。

烟霞隔悬圃，风波限瀛洲。我岂不欲往，大海路阻修。
神仙但闻说，灵药不可求。长生无得者，举世如蜉蝣。
逝者不重回，存者难久留。踟蹰未死间，何苦怀百忧。
念此忽内热，坐看成白头。举杯还独饮，顾影自献酬。
心与口相约，未醉勿言休。今朝不尽醉，知有明朝不。
不见郭门外，累累坟与丘。月明愁杀人，黄蒿风飕飕。

· 全唐诗 ·

死者若有知，悔不秉烛游。

吾闻浔阳郡，昔有陶征君。爱酒不爱名，忧醒不忧贫。
尝为彭泽令，在官才八旬。愀然忽不乐，挂印著公门。
口吟归去来，头戴漉酒巾。人吏留不得，直入故山云。
归来五柳下，还以酒养真。人间荣与利，摆落如泥尘。
先生去已久，纸墨有遗文。篇篇劝我饮，此外无所云。
我从老大来，窃慕其为人。其他不可及，且效醉昏昏。

楚王疑忠臣，江南放屈平。晋朝轻高士，林下弃刘伶。
一人常独醉，一人常独醒。醒者多苦志，醉者多欢情。
欢情信独善，苦志竟何成。兀傲瓮间卧，憔悴泽畔行。
彼忧而此乐，道理甚分明。愿君且饮酒，勿思身后名。

有一燕赵士，言貌甚奇瑰。日日酒家去，脱衣典数杯。
问君何落拓，云仆生草莱。地寒命且薄，徒抱王佐才。
岂无济时策，君门乏良媒。三献寝不报，迟迟空手回。
亦有同门生，先升青云梯。贵贱交道绝，朱门叩不开。
及归种禾黍，三岁旱为灾。入山烧黄白，一旦化为灰。
蹉跎五十余，生世苦不谐。处处去不得，却归酒中来。

南巷有贵人，高盖驷马车。我问何所苦，四十垂白须。
答云君不知，位重多忧虞。北里有寒士，瓮牖绳为枢。
出扶桑枣杖，入卧蜗牛庐。散贱无忧患，心安体亦舒。
东邻有富翁，藏货遍五都。东京收粟帛，西市鬻金珠。
朝营暮计算，昼夜不安居。西舍有贫者，匹妇配匹夫。
布裙行赁舂，短褐坐佣书。以此求口食，一饱欣有余。

· 全唐诗 ·

贵贱与贫富，高下虽有殊。忧乐与利害，彼此不相逾。
是以达人观，万化同一途。但未知生死，胜负两何如。
迟疑未知间，且以酒为娱。

济水澄而洁，河水浑而黄。交流列四渎，清浊不相伤。
太公战牧野，伯夷饿首阳。同时号贤圣，进退不相妨。
谓天不爱民，胡为生稻粱。谓天果爱民，胡为生豺狼。
谓神福善人，孔圣竟栖遑。谓神祸淫人，暴秦终霸王。
颜回与黄宪，何辜早夭亡。蝮蛇与鸩鸟，何得寿延长。
物理不可测，神道亦难量。举头仰问天，天色但苍苍。
唯当多种黍，日醉手中觞。

· 全唐诗 ·

卷四百二十九

卷 429_1 【自题写真】

白居易

我貌不自识，李放写我真。静观神与骨，合是山中人。
蒲柳质易朽，麋鹿心难驯。何事赤墀上，五年为侍臣。
况多刚狷性，难与世同尘。不惟非贵相，但恐生祸因。
宜当早罢去，收取云泉身。

卷 429_2 【遣怀】

白居易

寓心身体中，寓性方寸内。此身是外物，何足苦忧爱。
况有假饰者，华簪及高盖。此又疏于身，复在外物外。
操之多惴栗，失之又悲悔。乃知名与器，得丧俱为害。
颓然环堵客，萝薜为巾带。自得此道来，身穷心甚泰。

· 全唐诗 ·

卷 429_3【渭上偶钓】

白居易

渭水如镜色，中有鲤与鲂。偶持一竿竹，悬钓在其傍。
微风吹钓丝，袅袅十尺长。谁知对鱼坐，心在无何乡。
昔有白头人，亦钓此渭阳。钓人不钓鱼，七十得文王。
况我垂钓意，人鱼又兼忘。无机两不得，但弄秋水光。
兴尽钓亦罢，归来饮我觞。

卷 429_4【隐几】

白居易

身适忘四支，心适忘是非。既适又忘适，不知吾是谁。
百体如槁木，兀然无所知。方寸如死灰，寂然无所思。
今日复明日，身心忽两遗。行年三十九，岁暮日斜时。
四十心不动，吾今其庶几。

卷 429_5【春眠】

白居易

新浴肢体畅，独寝神魂安。况因夜深坐，遂成日高眠。

· 全唐诗 ·

春被薄亦暖，朝窗深更闲。却忘人间事，似得枕上仙。
至适无梦想，大和难名言。全胜彭泽醉，欲敌曹溪禅。
何物呼我觉，伯劳声关关。起来妻子笑，生计春茫然。

卷 429_6【闲居】

白居易

空腹一盏粥，饥食有余味。南檐半床日，暖卧因成睡。
绵袍拥两膝，竹几支双臂。从旦直至昏，身心一无事。

心足即为富，身闲乃当贵。富贵在此中，何必居高位。
君看裴相国，金紫光照地。心苦头尽白，才年四十四。
乃知高盖车，乘者多忧畏。

卷 429_7【夏日】

白居易

东窗晚无热，北户凉有风。尽日坐复卧，不离一室中。
中心本无系，亦与出门同。

· 全唐诗 ·

卷 429_8【适意二首】

白居易

十年为旅客，常有饥寒愁。三年作谏官，复多尸素羞。
有酒不暇饮，有山不得游。岂无平生志，拘牵不自由。
一朝归渭上，泛如不系舟。置心世事外，无喜亦无忧。
终日一蔬食，终年一布裘。寒来弥懒放，数日一梳头。
朝睡足始起，夜酌醉即休。人心不过适，适外复何求。

早岁从旅游，颇谙时俗意。中年忝班列，备见朝廷事。
作客诚已难，为臣尤不易。况余方且介，举动多忤累。
直道速我尤，诡遇非吾志。胸中十年内，消尽浩然气。
自从返田亩，顿觉无忧愧。蟠木用难施，浮云心易遂。
悠悠身与世，从此两相弃。

卷 429_9【首夏病间】

白居易

我生来几时，万有四千日。自省于其间，非忧即有疾。
老去虑渐息，年来病初愈。忽喜身与心，泰然两无苦。
况兹孟夏月，清和好时节。微风吹袷衣，不寒复不热。
移榻树阴下，竟日何所为。或饮一瓯茗，或吟两句诗。
内无忧患迫，外无职役羁。此日不自适，何时是适时。

· 全唐诗 ·

卷 429_10 【晚春酤酒】

白居易

百花落如雪，两鬓垂作丝。春去有来日，我老无少时。
人生待富贵，为乐常苦迟。不如贫贱日，随分开愁眉。
卖我所乘马，典我旧朝衣。尽将酤酒饮，酩酊步行归。
名姓日隐晦，形骸日变衰。醉卧黄公肆，人知我是谁。

卷 429_11 【兰若寓居】

白居易

名宦老慵求，退身安草野。家园病懒归，寄居在兰若。
薜衣换簪组，藜杖代车马。行止辄自由，甚觉身潇洒。
晨游南坞上，夜息东庵下。人间千万事，无有关心者。

卷 429_12 【麴生访宿】

白居易

西斋寂已暮，叩门声橐橐。知是君宿来，自拂尘埃席。
村家何所有，茶果迎来客。贫静似僧居，竹林依四壁。
厨灯斜影出，檐雨余声滴。不是爱闲人，肯来同此夕。

· 全唐诗 ·

卷 429_13【闻庾七左降，因咏所怀】

白居易

我病卧渭北，君老谪巴东。相悲一长叹，薄命与君同。
既叹还自哂，哂叹两未终。后心诮前意，所见何迷蒙。
人生大块间，如鸿毛在风。或飘青云上，或落泥涂中。
袞服相天下，倘来非我通。布衣委草莽，偶去非吾穷。
外物不可必，中怀须自空。无令怏怏气，留滞在心胸。

卷 429_14【答卜者】

白居易

病眼昏似夜，衰鬓飒如秋。除却须衣食，平生百事休。
知君善易者，问我决疑不。不卜非他故，人间无所求。

卷 429_15【归田三首】

白居易

人生何所欲，所欲唯两端。中人爱富贵，高士慕神仙。
神仙须有籍，富贵亦在天。莫恋长安道，莫寻方丈山。
西京尘浩浩，东海浪漫漫。金门不可入，琪树何由攀。

· 全唐诗 ·

不如归山下，如法种春田。

种田意已决，决意复何如。卖马买犊使，徒步归田庐。
迎春治耒耜，候雨辟菑畲。策杖田头立，躬亲课仆夫。
吾闻老农言，为稼慎在初。所施不卤莽，其报必有馀。
上求奉王税，下望备家储。安得放慵惰，拱手而曳裾。
学农未为鄙，亲友勿笑余。更待明年后，自拟执犁锄。

三十为近臣，腰间鸣佩玉。四十为野夫，田中学锄谷。
何言十年内，变化如此速。此理固是常，穷通相倚伏。
为鱼有深水，为鸟有高木。何必守一方，窘然自牵束。
化吾足为马，吾因以行陆。化吾手为弹，吾因以求肉。
形骸为异物，委顺心犹足。幸得且归农，安知不为福。
况吾行欲老，瞥若风前烛。孰能俄顷间，将心系荣辱。

卷 429_16【秋游原上】

白居易

七月行已半，早凉天气清。清晨起巾栉，徐步出柴荆。
露杖筇竹冷，风襟越蕉轻。闲携弟侄辈，同上秋原行。
新枣未全赤，晚瓜有余馨。依依田家叟，设此相逢迎。
自我到此村，往来白发生。村中相识久，老幼皆有情。
留连向暮归，树树风蝉声。是时新雨足，禾黍夹道青。
见此令人饱，何必待西成。

· 全唐诗 ·

卷 429_17【九日登西原宴望】

白居易

病爱枕席凉，日高眠未辍。弟兄呼我起，今日重阳节。
起登西原望，怀抱同一豁。移座就菊丛，糕酒前罗列。
虽无丝与管，歌笑随情发。白日未及倾，颜酡耳已热。

酒酣四向望，六合何空阔。天地自久长，斯人几时活。
请看原下村，村人死不歇。一村四十家，哭葬无虚月。
指此各相勉，良辰且欢悦。

卷 429_18【寄同病者】

白居易

三十生二毛，早衰为沉疴。四十官七品，拙宦非由他。
年颜日枯槁，时命日蹉跎。岂独我如此，圣贤无奈何。

回观亲旧中，举目尤可嗟。或有终老者，沉贱如泥沙。
或有始壮者，飘忽如风花。穷饿与夭促，不如我者多。
以此反自慰，常得心平和。寄言同病者，回叹且为歌。

· 全唐诗 ·

卷 429_19 【游蓝田山卜居】

白居易

脱置腰下组，摆落心中尘。行歌望山去，意似归乡人。
朝蹋玉峰下，暮寻蓝水滨。拟求幽僻地，安置疏慵身。
本性便山寺，应须旁悟真。

卷 429_20 【村雪夜坐】

白居易

南窗背灯坐，风霰暗纷纷。寂寞深村夜，残雁雪中闻。

卷 429_21 【东园玩菊】

白居易

少年昨已去，芳岁今又阑。如何寂寞意，复此荒凉园。
园中独立久，日澹风露寒。秋蔬尽芜没，好树亦凋残。
唯有数丛菊，新开篱落间。携觞聊就酌，为尔一留连。
忆我少小日，易为兴所牵。见酒无时节，未饮已欣然。
近从年长来，渐觉取乐难。常恐更衰老，强饮亦无欢。
顾谓尔菊花，后时何独鲜。诚知不为我，借尔暂开颜。

· 全唐诗 ·

卷 429_22 【观稼】

白居易

世役不我牵，身心常自若。晚出看田亩，闲行旁村落。
累累绕场稼，啧啧群飞雀。年丰岂独人，禽鸟声亦乐。

田翁逢我喜，默起具尊杓。敛手笑相延，社酒有残酌。
愧兹勤且敬，藜杖为淹泊。言动任天真，未觉农人恶。

停杯问生事，夫种妻儿获。筋力苦疲劳，衣食常单薄。
自惭禄仕者，曾不营农作。饥食无所劳，何殊卫人鹤。

卷 429_23 【闻哭者】

白居易

昨日南邻哭，哭声一何苦。云是妻哭夫，夫年二十五。
今朝北里哭，哭声又何切。云是母哭儿，儿年十七八。

四邻尚如此，天下多夭折。乃知浮世人，少得垂白发。
余今过四十，念彼聊自悦。从此明镜中，不嫌头似雪。

· 全唐诗 ·

卷 429_24【新构亭台，示诸弟侄】

白居易

平台高数尺，台上结茅茨。东西疏二牖，南北开两扉。
芦帘前后卷，竹簟当中施。清冷白石枕，疏凉黄葛衣。

开襟向风坐，夏日如秋时。啸傲颇有趣，窥临不知疲。
东窗对华山，三峰碧参差。南檐当渭水，卧见云帆飞。

仰摘枝上果，俯折畦中葵。足以充饥渴，何必慕甘肥。
况有好群从，旦夕相追随。

卷 429_25【自吟拙什，因有所怀】

白居易

懒病每多暇，暇来何所为。未能抛笔砚，时作一篇诗。
诗成淡无味，多被众人嗤。上怪落声韵，下嫌拙言词。

时时自吟咏，吟罢有所思。苏州及彭泽，与我不同时。
此外复谁爱，唯有元微之。谪向江陵府，三年作判司。
相去二千里，诗成远不知。

· 全唐诗 ·

卷 429_26 【东坡秋意，寄元八】

白居易

寥落野陂畔，独行思有馀。秋荷病叶上，白露大如珠。
忽忆同赏地，曲江东北隅。秋池少游客，唯我与君俱。

啼蛩隐红蓼，瘦马蹋青芜。当时与今日，俱是暮秋初。
节物苦相似，时景亦无余。唯有人分散，经年不得书。

卷 429_27 【闲居】

白居易

深闭竹间扉，静扫松下地。独啸晚风前，何人知此意。
看山尽日坐，枕帙移时睡。谁能从我游，使君心无事。

卷 429_28 【咏拙】

白居易

所禀有巧拙，不可改者性。所赋有厚薄，不可移者命。
我性愚且蠢，我命薄且屯。问我何以知，所知良有因。

· 全唐诗 ·

亦曾举两足，学人蹋红尘。从兹知性拙，不解转如轮。
亦曾奋六翮，高飞到青云。从兹知命薄，摧落不逡巡。

慕贵而厌贱，乐富而恶贫。同此天地间，我岂异于人。
性命苟如此，反则成苦辛。以此自安分，虽穷每欣欣。

葺茅为我庐，编蓬为我门。缝布作袍被，种谷充盘飧。
静读古人书，闲钓清渭滨。优哉复游哉，聊以终吾身。

卷 429_29【咏慵】

白居易

有官慵不选，有田慵不农。屋穿慵不葺，衣裂慵不缝。
有酒慵不酌，无异尊常空。有琴慵不弹，亦与无弦同。

家人告饭尽，欲炊慵不舂。亲朋寄书至，欲读慵开封。
尝闻嵇叔夜，一生在慵中。弹琴复锻铁，比我未为慵。

卷 429_30【冬夜】

白居易

家贫亲爱散，身病交游罢。眼前无一人，独掩村斋卧。
冷落灯火暗，离披帘幕破。策策窗户前，又闻新雪下。

· 全唐诗 ·

长年渐省睡，夜半起端坐。不学坐忘心，寂莫安可过。
兀然身寄世，浩然心委化。如此来四年，一千三百夜。

卷 429_31 【村中留李三固言宿】

白居易

平生早游宦，不道无亲故。如我与君心，相知应有数。
春明门前别，金氏陂中遇。村酒两三杯，相留寒日暮。
勿嫌村酒薄，聊酌论心素。请君少踟蹰，系马门前树。
明年身若健，便拟江湖去。他日纵相思，知君无觅处。
后会既茫茫，今宵君且住。

卷 429_32 【友人夜访】

白居易

檐间清风簟，松下明月杯。幽意正如此，况乃故人来。

卷 429_33 【游悟真寺诗】

白居易

元和九年秋，八月月上弦。我游悟真寺，寺在王顺山。

· 全唐诗 ·

去山四五里，先闻水潺湲。自兹舍车马，始涉蓝溪湾。
手拄青竹杖，足蹋白石滩。渐怪耳目旷，不闻人世喧。
山下望山上，初疑不可攀。谁知中有路，盘折通岩巔。
一息幡竿下，再休石龕边。龕间长丈余，门户无扃关。
仰窥不见人，石发垂若鬢。惊出白蝙蝠，双飞如雪翻。
回首寺门望，青崖夹朱轩。如擘山腹开，置寺于其间。
入门无平地，地窄虚空宽。房廊与台殿，高下随峰峦。
岩罅无撮土，树木多瘦坚。根株抱石长，屈曲虫蛇蟠。
松桂乱无行，四时郁芊芊。枝梢袅青翠，韵若风中弦。
日月光不透，绿阴相交延。幽鸟时一声，闻之似寒蝉。
首憩宾位亭，就坐未及安。须臾开北户，万里明豁然。
拂檐虹霏微，绕栋云回旋。赤日间白雨，阴晴同一川。
野绿簇草树，眼界吞秦原。渭水细不见，汉陵小于拳。
却顾来时路，萦纡映朱栏。历历上山人，一一遥可观。
前对多宝塔，风铎鸣四端。栾栌与户牖，恰恰金碧繁。
云昔迦叶佛，此地坐涅槃。至今铁钵在，当底手迹穿。
西开玉像殿，白佛森比肩。斗薊尘埃衣，礼拜冰雪颜。
叠霜为袈裟，贯雹为华鬘。遍观疑鬼功，其迹非雕镌。
次登观音堂，未到闻栴檀。上阶脱双履，敛足升净筵。
六楹排玉镜，四座敷金钿。黑夜自光明，不待灯烛燃。
众宝互低昂，碧珮珊瑚幡。风来似天乐，相触声珊珊。
白珠垂露凝，赤珠滴血殷。点缀佛髻上，合为七宝冠。
双瓶白琉璃，色若秋水寒。隔瓶见舍利，圆转如金丹。
玉笛何代物，天人施祇园。吹如秋鹤声，可以降灵仙。
是时秋方中，三五月正圆。宝堂豁三门，金魄当其前。
月与宝相射，晶光争鲜妍。照人心骨冷，竟夕不欲眠。
晓寻南塔路，乱竹低婵娟。林幽不逢人，寒蝶飞翩翩。

· 全唐诗 ·

山果不识名，离离夹道蕃。足以疗饥乏，摘尝味甘酸。
道南蓝谷神，紫伞白纸钱。若岁有水旱，诏使修蘋蘩。
以地清净故，献奠无荤膻。危石叠四五，^①嵬欹且刳。
造物者何意，堆在岩东偏。冷滑无人迹，苔点如花笺。
我来登上头，下临不测渊。目眩手足掉，不敢低头看。
风从石下生，薄人而上抟。衣服似羽翮，开张欲飞鸢。
%% 三面峰，峰尖刀剑攒。往往白云过，决开露青天。
西北日落时，夕晖红团团。千里翠屏外，走下丹砂丸。
东南月上时，夜气青漫漫。百丈碧潭底，写出黄金盘。
蓝水色似蓝，日夜长潺潺。周回绕山转，下视如青环。
或铺为慢流，或激为奔湍。泓澄最深处，浮出蛟龙涎。
侧身入其中，悬磴尤险艰。扪萝蹋樛木，下逐饮涧猿。
雪迸起白鹭，锦跳惊红鳊。歇定方盥漱，濯去支体烦。
浅深皆洞彻，可照脑与肝。但爱清见底，欲寻不知源。
东崖饶怪石，积甃苍琅玕。温润发于外，其间韞玕璠。
卞和死已久，良玉多弃捐。或时泄光彩，夜与星月连。
中顶最高峰，拄天青玉竿。^{6 7}上不得，岂我能攀援。
上有白莲池，素葩覆清澜。闻名不可到，处所非人寰。
又有一片石，大如方尺砖。插在半壁上，其下万仞悬。
云有过去师，坐得无生禅。号为定心石，长老世相传。
却上谒仙祠，蔓草生绵绵。昔闻王氏子，羽化升上玄。
其西晒药台，犹对芝朮田。时复明月夜，上闻黄鹤言。
回寻画龙堂，二叟鬓发斑。想见听法时，欢喜礼印坛。
复归泉窟下，化作龙蜿蜒。阶前石孔在，欲雨生白烟。
往有写经僧，身静心精专。感彼云外鹄，群飞千翩翩。
来添砚中水，去吸岩底泉。一日三往复，时节长不愆。
经成号圣僧，弟子名杨难。诵此莲花偈，数满百亿千。

· 全唐诗 ·

身坏口不坏，舌根如红莲。颅骨今不见，石函尚存焉。
粉壁有吴画，笔彩依旧鲜。素屏有褚书，墨色如新干。
灵境与异迹，周览无不殚。一游五昼夜，欲返仍盘桓。
我本山中人，误为时网牵。牵率使读书，推挽令效官。
既登文字科，又忝谏诤员。拙直不合时，无益同素餐。
以此自惭惕，戚戚常寡欢。无成心力尽，未老形骸残。
今来脱簪组，始觉离忧患。及为山水游，弥得纵疏顽。
野麋断羁绊，行走无拘挛。池鱼放入海，一往何时还。
身著居士衣，手把南华篇。终来此山住，永谢区中缘。
我今四十馀，从此终身闲。若以七十期，犹得三十年。

卷 429_34【酬张十八访宿见赠】

白居易

昔我为近臣，君常稀到门。今我官职冷，君君来往频。
我受狷介性，立为顽拙身。平生虽寡合，合即无缁磷。
况君秉高义，富贵视如云。五侯三相家，眼冷不见君。
问其所与游，独言韩舍人。其次即及我，我愧非其伦。
胡为谬相爱，岁晚逾勤勤。落然颓檐下，一话夜达晨。
床单食味薄，亦不嫌我贫。日高上马去，相顾犹逡巡。
长安久无雨，日赤风昏昏。怜君将病眼，为我犯埃尘。
远从延康里，来访曲江滨。所重君子道，不独愧相亲。

· 全唐诗 ·

卷 429_35【朝归书寄元八】

白居易

进入阁前拜，退就廊下餐。归来昭国里，人卧马歇鞍。
却睡至日午，起坐心浩然。况当好时节，雨后清和天。
柿树绿阴合，王家庭院宽。瓶中鄠县酒，墙上终南山。
独眠仍独坐，开襟当风前。禅师与诗客，次第来相看。
要语连夜语，须眠终日眠。除非奉朝谒，此外无别牵。
年长身且健，官贫心甚安。幸无急病痛，不至苦饥寒。
自此聊以适，外缘不能干。唯应静者信，难为动者言。
台中元侍御，早晚作郎官。未作郎官际，无人相伴闲。

卷 429_36【酬吴七见寄】

白居易

曲江有病客，寻常多掩关。又闻马死来，不出身更闲。
闻有送书者，自起出门看。素绫署丹字，中有琼瑶篇。
口吟耳自听，当暑忽翛然。似漱寒玉冰，如闻商风弦。
首章叹时节，末句思笑言。懒慢不相访，隔街如隔山。
尝闻陶潜语，心远地自偏。君住安邑里，左右车徒喧。
竹药闭深院，琴尊开小轩。谁知市南地，转作壶中天。
君本上清人，名在石堂间。不知有何过，谪作人间仙。
常恐岁月满，飘然归紫烟。莫忘蟪蛄内，进士有同年。

· 全唐诗 ·

卷 429_37【昭国闲居】

白居易

贫闲日高起，门巷昼寂寂。时暑放朝参，天阴少人客。
槐花满田地，仅绝人行迹。独在一床眠，清凉风雨夕。
勿嫌坊曲远，近即多牵役。勿嫌禄俸薄，厚即多忧责。
平生尚恬旷，老大宜安适。何以养吾真，官闲居处僻。

卷 429_38【喜陈兄至】

白居易

黄鸟啼欲歇，青梅结半成。坐怜春物尽，起入东园行。
携觞懒独酌，忽闻叩门声。闲人犹喜至，何况是陈兄。
从容尽日语，稠叠长年情。勿轻一盏酒，可以话平生。

卷 429_39【赠杓直】

白居易

世路重禄位，栖栖者孔宣。人情爱年寿，天死者颜渊。
二人如何人，不奈命与天。我今信多幸，抚己愧前贤。
已年四十四，又为五品官。况兹知足外，别有所安焉。

· 全唐诗 ·

早年以身代，直赴逍遥篇。近岁将心地，回向南宗禅。
外顺世间法，内脱区中缘。进不厌朝市，退不恋人寰。
自吾得此心，投足无不安。体非导引适，意无江湖闲。
有兴或饮酒，无事多掩关。寂静夜深坐，安稳日高眠。
秋不苦长夜，春不惜流年。委形老小外，忘怀生死间。
昨日共君语，与余心膺然。此道不可道，因君聊强言。

卷 429_40【寄张十八】

白居易

饥止一簋食，渴止一壶浆。出入止一马，寝兴止一床。
此外无长物，于我有若亡。胡然不知足，名利心遑遑。
念兹弥懒放，积习遂为常。经旬不出门，竟日不下堂。
同病者张生，贫僻住延康。慵中每相忆，此意未能忘。
迢迢青槐街，相去八九坊。秋来未相见，应有新诗章。
早晚来同宿，天气转清凉。

卷 429_41【题玉泉寺】

白居易

湛湛玉泉色，悠悠浮云身。闲心对定水，清净两无尘。
手把青筇杖，头戴白纶巾。兴尽下山去，知我是谁人。

· 全唐诗 ·

卷 429_42 【朝回游城南】

白居易

朝退马未困，秋初日犹长。回辔城南去，郊野正清凉。
水竹夹小径，萦回绕川冈。仰看晚山色，俯弄秋泉光。
青松系我马，白石为我床。常时簪组累，此日和身忘。
旦随鹧鸪末，暮游鸥鹤旁。机心一以尽，两处不乱行。
谁辨心与迹，非行亦非藏。

卷 429_43 【舟行】

白居易

帆影日渐高，闲眠犹未起。起问鼓枻人，已行三十里。
船头有行灶，炊稻烹红鲤。饱食起婆娑，盥漱秋江水。
平生沧浪意，一旦来游此。何况不失家，舟中载妻子。

卷 429_44 【湓浦早冬】

白居易

浔阳孟冬月，草木未全衰。祇抵长安陌，凉风八月时。
日西湓水曲，独行吟旧诗。蓼花始零落，蒲叶稍离披。

· 全唐诗 ·

但作城中想，何异曲江池。

卷 429_45【江州雪】

白居易

新雪满前山，初晴好天气。日西骑马出，忽有京都意。
城柳方缀花，檐冰才结穗。须臾风日暖，处处皆飘坠。
行吟赏未足，坐叹销何易。犹胜岭南看，雰雰不到地。

· 全唐诗 ·

卷四百三十

卷 430_1 【题浔阳楼】

白居易

常爱陶彭泽，文思何高玄。又怪韦江州，诗情亦清闲。
今朝登此楼，有以知其然。大江寒见底，匡山青倚天。
深夜湓浦月，平旦炉峰烟。清辉与灵气，日夕供文篇。
我无二人才，孰为来其间。因高偶成句，俯仰愧江山。

卷 430_2 【访陶公旧宅】

白居易

垢尘不污玉，灵凤不啄膺。呜呼陶靖节，生彼晋宋间。
心实有所守，口终不能言。永惟孤竹子，拂衣首阳山。
夷齐各一身，穷饿未为难。先生有五男，与之同饥寒。
肠中食不充，身上衣不完。连征竟不起，斯可谓真贤。
我生君之后，相去五百年。每读五柳传，目想心拳拳。
昔常咏遗风，著为十六篇。今来访故宅，森若君在前。
不慕尊有酒，不慕琴无弦。慕君遗荣利，老死此丘园。

· 全唐诗 ·

柴桑古村落，栗里旧山川。不见篱下菊，但馀墟中烟。
子孙虽无闻，族氏犹未迁。每逢姓陶人，使我心依然。

卷 430_3【北亭】

白居易

庐宫山下州，湓浦沙边宅。宅北倚高冈，迢迢数千尺。
上有青青竹，竹间多白石。茅亭居上头，豁达门四辟。
前楹卷帘箔，北牖施床席。江风万里来，吹我凉淅淅。
日高公府归，巾笏随手掷。脱衣恣搔首，坐卧任所适。
时倾一杯酒，旷望湖天夕。口咏独酌谣，目送归飞翮。
惭无出尘操，未免折腰役。偶获此闲居，谬似高人迹。

卷 430_4【泛湓水】

白居易

四月未全热，麦凉江气秋。湖山处处好，最爱湓水头。
湓水从东来，一派入江流。可怜似萦带，中有随风舟。
命酒一临泛，舍鞍扬棹讴。放回岸傍马，去逐波间鸥。
烟浪始渺渺，风襟亦悠悠。初疑上河汉，中若寻瀛洲。
汀树绿拂地，沙草芳未休。青萝与紫葛，枝蔓垂相繆。
系缆步平岸，回头望江州。城雉映水见，隐隐如蜃楼。
日入意未尽，将归复少留。到官行半岁，今日方一游。

· 全唐诗 ·

此地来何暮，可以写吾忧。

卷 430_5【答故人】

白居易

故人对酒叹，叹我在天涯。见我昔荣遇，念我今蹉跎。
问我为司马，官意复如何。答云且勿叹，听我为君歌。
我本蓬蒿人，鄙贱剧泥沙。读书未百卷，信口嘲风花。
自从筮仕来，六命三登科。顾惭虚劣姿，所得亦已多。
散员足庇身，薄俸可资家。省分辄自愧，岂为不遇耶。
烦君对杯酒，为我一咨磋。

卷 430_6【官舍内新凿小池】

白居易

帘下开小池，盈盈水方积。中底铺白沙，四隅甃青石。
勿言不深广，但取幽人适。泛滟微雨朝，泓澄明月夕。
岂无大江水，波浪连天白。未如床席间，方丈深盈尺。
清浅可狎弄，昏烦聊漱涤。最爱晓暝时，一片秋天碧。

· 全唐诗 ·

卷 430_7【宿简寂观】

白居易

岩白云尚屯，林红叶初陨。秋光引闲步，不知身远近。
夕投灵洞宿，卧觉尘机泯。名利心既忘，市朝梦亦尽。
暂来尚如此，况乃终身隐。何以疗夜饥，一匙云母粉。

卷 430_8【读谢灵运诗】

白居易

吾闻达士道，穷通顺冥数。通乃朝廷来，穷即江湖去。
谢公才廓落，与世不相遇。壮志郁不用，须有所泄处。
泄为山水诗，逸韵谐奇趣。大必笼天海，细不遗草树。
岂惟玩景物，亦欲摅心素。往往即事中，未能忘兴谕。
因知康乐作，不独在章句。

卷 430_9【北亭独宿】

白居易

悄悄壁下床，纱笼耿残烛。夜半独眠觉，疑在僧房宿。

· 全唐诗 ·

卷 430_10 【约心】

白居易

黑鬓丝雪侵，青袍尘土浣。兀兀复腾腾，江城一上佐。
朝就高斋上，熏然负暄卧。晚下小池前，澹然临水坐。
已约终身心，长如今日过。

卷 430_11 【晚望】

白居易

江城寒角动，沙洲夕鸟还。独在高亭上，西南望远山。

卷 430_12 【早春】

白居易

雪消冰又释，景和风复暄。满庭田地湿，荠叶生墙根。
官舍悄无事，日西斜掩门。不开庄老卷，欲与何人言。

· 全唐诗 ·

卷 430_13 【春寝】

白居易

何处春暄来，微和生血气。气熏肌骨畅，东窗一昏睡。
是时正月晦，假日无公事。烂熯不能休，自午将及未。
缅思少健日，甘寝常自恣。一从衰疾来，枕上无此味。

卷 430_14 【睡起晏坐】

白居易

后亭昼眠足，起坐春景暮。新觉眼犹昏，无思心正住。
澹寂归一性，虚闲遗万虑。了然此时心，无物可譬喻。
本是无有乡，亦名不用处。行禅与坐忘，同归无异路。

卷 430_15 【咏怀】

白居易

尽日松下坐，有时池畔行。行立与坐卧，中怀澹无营。
不觉流年过，亦任白发生。不为世所薄，安得遂闲情。

· 全唐诗 ·

卷 430_16 【春游二林寺】

白居易

下马二林寺，悠然进轻策。朝为公府吏，暮作灵山客。
二月匡庐北，冰雪始消释。阳丛抽茗芽，阴窦泄泉脉。
熙熙风土暖，蔼蔼云岚积。散作万壑春，凝为一气碧。
身闲易飘泊，官散无牵迫。缅彼十八人，古今同此适。
是年淮寇起，处处兴兵革。智士劳思谋，戎臣苦征役。
独有不才者，山中弄泉石。

卷 430_17 【出山吟】

白居易

朝咏游仙诗，暮歌采薇曲。卧云坐白石，山中十五宿。
行随出涧水，回别缘岩竹。早晚重来游，心期瑶草绿。

卷 430_18 【岁暮】

白居易

已任时命去，亦从岁月除。中心一调伏，外累尽空虚。
名宦意已矣，林泉计何如。拟近东林寺，溪边结一庐。

· 全唐诗 ·

卷 430_19 【闻早莺】

白居易

日出眠未起，屋头闻早莺。忽如上林晓，万年枝上鸣。
忆为近臣时，秉笔直承明。春深视草暇，旦暮闻此声。
今闻在何处，寂寞浔阳城。鸟声信如一，分别在人情。
不作天涯意，岂殊禁中听。

卷 430_20 【栽杉】

白居易

劲叶森利剑，孤茎挺端标。才高四五尺，势若干青霄。
移栽东窗前，爱尔寒不凋。病夫卧相对，日夕闲萧萧。
昨为山中树，今为檐下条。虽然遇赏玩，无乃近尘嚣。
犹胜涧谷底，埋没随众樵。不见郁郁松，委质山上苗。

卷 430_21 【过李生】

白居易

蘋小蒲叶短，南湖春水生。子近湖边住，静境称高情。
我为郡司马，散拙无所营。使君知性野，衙退任闲行。

· 全唐诗 ·

行携小榼出，逢花辄独倾。半酣到子舍，下马扣柴荆。
何以引我步，绕篱竹万茎。何以醒我酒，吴音吟一声。
须臾进野饭，饭稻茹芹英。白瓯青竹箸，俭洁无膻腥。
欲去复裴回，夕鸦已飞鸣。何当重游此，待君湖水平。

卷 430_22【咏意】

白居易

常闻南华经，巧劳智忧愁。不如无能者，饱食但遨游。
平生爱慕道，今日近此流。自来浔阳郡，四序忽已周。
不分物黑白，但与时沉浮。朝餐夕安寝，用是为身谋。
此外即闲放，时寻山水幽。春游慧远寺，秋上庾公楼。
或吟诗一章，或饮茶一瓯。身心一无系，浩浩如虚舟。
富贵亦有苦，苦在心危忧。贫贱亦有乐，乐在身自由。

卷 430_23【食笋】

白居易

此州乃竹乡，春笋满山谷。山夫折盈抱，抱来早市鬻。
物以多为贱，双钱易一束。置之炊甑中，与饭同时熟。
紫箨坼故锦，素肌擘新玉。每日遂加餐，经时不思肉。
久为京洛客，此味常不足。且食勿踟蹰，南风吹作竹。

· 全唐诗 ·

卷 430_24 【游石门涧】

白居易

石门无旧径，披榛访遗迹。时逢山水秋，清辉如古昔。
常闻慧远辈，题诗此岩壁。云覆莓苔封，苍然无处觅。
萧疏野生竹，崩剥多年石。自从东晋后，无复人游历。
独有秋涧声，潺湲空旦夕。

卷 430_25 【招东邻】

白居易

小榼二升酒，新簟六尺床。能来夜话否，池畔欲秋凉。

卷 430_26 【题元十八溪亭】

白居易

怪君不喜仕，又不游州里。今日到幽居，了然知所以。
宿君石溪亭，潺湲声满耳。饮君螺杯酒，醉卧不能起。
见君五老峰，益悔居城市。爱君三男儿，始叹身无子。
余方炉峰下，结室为居士。山北与山东，往来从此始。

· 全唐诗 ·

卷 430_27【香炉峰下新置草堂，即事咏怀，题于石上】

白居易

香炉峰北面，遗爱寺西偏。白石何凿凿，清流亦潺潺。
有松数十株，有竹千馀竿。松张翠伞盖，竹倚青琅玕。
其下无人居，悠哉多岁年。有时聚猿鸟，终日空风烟。
时有沉冥子，姓白字乐天。平生无所好，见此心依然。
如获终老地，忽乎不知还。架岩结茅宇，斫壑开茶园。
何以洗我耳，屋头飞落泉。何以净我眼，砌下生白莲。
左手携一壶，右手挈五弦。傲然意自足，箕踞于其间。
兴酣仰天歌，歌中聊寄言。言我本野夫，误为世网牵。
时来昔捧日，老去今归山。倦鸟得茂树，涸鱼返清源。
舍此欲焉往，人间多险艰。

卷 430_28【草堂前新开一池，养鱼种荷，日有幽趣】

白居易

淙淙三峡水，浩浩万顷陂。未如新塘上，微风动涟漪。
小萍加泛泛，初蒲正离离。红鲤二三寸，白莲八九枝。
绕水欲成径，护堤方插篱。已被山中客，呼作白家池。

· 全唐诗 ·

卷 430_29【白云期】

白居易

三十气太壮，胸中多是非。六十身太老，四体不支持。
四十至五十，正是退闲时。年长识命分，心慵少营为。
见酒兴犹在，登山力未衰。吾年幸当此，且与白云期。

卷 430_30【登香炉峰顶】

白居易

迢迢香炉峰，心存耳目想。终年牵物役，今日方一往。
攀萝蹋危石，手足劳俯仰。同游三四人，两人不敢上。
上到峰之顶，目眩神恍惚。高低有万寻，阔狭无数丈。
不穷视听界，焉识宇宙广。江水细如绳，湓城小于掌。
纷吾何屑屑，未能脱尘鞅。归去思自嗟，低头入蚁壤。

卷 430_31【答崔侍郎、钱舍人书，因继以诗】

白居易

旦暮两蔬食，日中一闲眠。便是了一日，如此已三年。
心不择时适，足不拣地安。穷通与远近，一贯无两端。

· 全唐诗 ·

常见今之人，其心或不然。在劳则念息，处静已思喧。
如是用身心，无乃自伤残。坐输烦恼便，安得形神全。
吾有二道友，蔼蔼崔与钱。同飞青云路，独堕黄泥泉。
岁暮物万变，故情何不迁。应为平生心，与我同一源。
帝乡远于日，美人高在天。谁谓万里别，常若在目前。
泥泉乐者鱼，云路游者鸾。勿言云泥异，同在逍遥间。
因君问心地，书后偶成篇。慎勿说向人，人多笑此言。

卷 430_32【烹葵】

白居易

昨卧不夕食，今起乃朝饥。贫厨何所有，炊稻烹秋葵。
红粒香复软，绿英滑且肥。饥来止于饱，饱后复何思。
忆昔荣遇日，迨今穷退时。今亦不冻馁，昔亦无馀资。
口既不减食，身又不减衣。抚心私自问，何者是荣衰。
勿学常人意，其间分是非。

卷 430_33【小池二首】

白居易

昼倦前斋热，晚爱小池清。映林馀景没，近水微凉生。
坐把蒲葵扇，闲吟三两声。

· 全唐诗 ·

有意不在大，湛湛方丈余。荷侧泻清露，萍开见游鱼。
每一临此坐，忆归青溪居。

卷 430_34【闭关】

白居易

我心忘世久，世亦不我干。遂成一无事，因得长掩关。
掩关来几时，仿佛二三年。著书已盈帙，生子欲能言。
始悟身向老，复悲世多艰。回顾趋时者，役役尘壤间。
岁暮竟何得，不如且安闲。

卷 430_35【弄龟罗】

白居易

有侄始六岁，字之为阿龟。有女生三年，其名曰罗儿。
一始学笑语，一能诵歌诗。朝戏抱我足，夜眠枕我衣。
汝生何其晚，我年行已衰。物情小可念，人意老多慈。
酒美竟须坏，月圆终有亏。亦如恩爱缘，乃是忧恼资。
举世同此累，吾安能去之。

· 全唐诗 ·

卷 430_36 【截树】

白居易

种树当前轩，树高柯叶繁。惜哉远山色，隐此蒙笼间。
一朝持斧斤，手自截其端。万叶落头上，千峰来面前。
忽似决云雾，豁达睹青天。又如所念人，久别一款颜。
始有清风至，稍见飞鸟还。开怀东南望，目远心辽然。
人各有偏好，物莫能两全。岂不爱柔条，不如见青山。

卷 430_37 【望江楼上作】

白居易

江畔百尺楼，楼前千里道。凭高望平远，亦足舒怀抱。
驿路使憧憧，关防兵草草。及兹多事日，尤觉闲人好。
我年过不惑，休退诚非早。从此拂尘衣，归山未为老。

卷 430_38 【题座隅】

白居易

手不任执殳，肩不能荷锄。量力揆所用，曾不敌一夫。
幸因笔砚功，得升仕进途。历官凡五六，禄俸及妻孥。

· 全唐诗 ·

左右有兼仆，出入有单车。自奉虽不厚，亦不至饥劬。
若有人及此，傍观为何如。虽贤亦为幸，况我鄙且愚。
伯夷古贤人，鲁山亦其徒。时哉无奈何，俱化为饿殍。
念彼益自愧，不敢忘斯须。平生荣利心，破灭无遗馀。
犹恐坐妄起，题此于座隅。

卷 430_39【昔与微之在朝日，同蓄休退之心，迨今十年，
沦落老大，追寻前约，且结后期】

白居易

往子为御史，伊余忝拾遗。皆逢盛明代，俱登清近司。
予系玉为佩，子曳绣为衣。从容香烟下，同侍白玉墀。
朝见宠者辱，暮见安者危。纷纷无退者，相顾令人悲。
宦情君早厌，世事我深知。常于荣显日，已约林泉期。
况今各流落，身病齿发衰。不作卧云计，携手欲何之。
待君女嫁后，及我官满时。稍无骨肉累，粗有渔樵资。
岁晚青山路，白首期同归。

卷 430_40【垂钓】

白居易

临水一长啸，忽思十年初。三登甲乙第，一入承明庐。
浮生多变化，外事有盈虚。今来伴江叟，沙头坐钓鱼。

· 全唐诗 ·

卷 430_41 【晚燕】

白居易

百鸟乳雏毕，秋燕独蹉跎。去社日已近，衔泥意如何。
不悟时节晚，徒施工用多。人间事亦尔，不独燕营窠。

卷 430_42 【赎鸡】

白居易

清晨临江望，水禽正喧繁。凫雁与鸥鹭，游飏戏朝暾。
适有鬻鸡者，挈之来远村。飞鸣彼何乐，窘束此何冤。
喔喔十四雏，罩缚同一樊。足伤金距缩，头抢花冠翻。
经宿废饮啄，日高诣屠门。迟回未死间，饥渴欲相吞。
常慕古人道，仁信及鱼豚。见兹生恻隐，赎放双林园。
开笼解索时，鸡鸡听我言。与尔镒三百，小惠何足论。
莫学衔环雀，崎岖谩报恩。

卷 430_43 【秋日怀杓直】

白居易

晚来天色好，独出江边步。忆与李舍人，曲江相近住。

· 全唐诗 ·

常云遇清景，必约同幽趣。若不访我来，还须觅君去。
开眉笑相见，把手期何处。西寺老胡僧，南园乱松树。
携持小酒榼，吟咏新诗句。同出复同归，从朝直至暮。
风雨忽消散，江山眇回互。浔阳与潯阳，相望空云雾。
心期自乖旷，时景还如故。今日郡斋中，秋光谁共度。

卷 430_44 【食后】

白居易

食罢一觉睡，起来两瓯茶。举头看日影，已复西南斜。
乐人惜日促，忧人厌年赊。无忧无乐者，长短任生涯。

卷 430_45 【齐物二首】

白居易

青松高百尺，绿蕙低数寸。同生大块间，长短各有分。
长者不可退，短者不可进。若用此理推，穷通两无闷。

椿寿八千春，槿花不经宿。中间复何有，冉冉孤生竹。
竹身三年老，竹色四时绿。虽谢椿有馀，犹胜槿不足。

· 全唐诗 ·

卷 430_46 【山下宿】

白居易

独到山下宿，静向月中行。何处水边碓，夜舂云母声。

卷 430_47 【题旧写真图】

白居易

我昔三十六，写貌在丹青。我今四十六，衰悴卧江城。
岂比十年老，曾与众苦并。一照旧图画，无复昔仪形。
形影默相顾，如弟对老兄。况使他人见，能不昧平生。
羲和鞭日走，不为我少停。形骸属日月，老去何足惊。
所恨凌烟阁，不得画功名。

卷 430_48 【闲居】

白居易

肺病不饮酒，眼昏不读书。端然无所作，身意闲有馀。
鸡栖篱落晚，雪映林木疏。幽独已云极，何必山中居。

· 全唐诗 ·

卷 430_49【对酒示行简】

白居易

今旦一尊酒，欢畅何怡怡。此乐从中来，他人安得知。
兄弟唯二人，远别恒苦悲。今春自巴峡，万里平安归。
复有双幼妹，笄年未结褵。昨日嫁娶毕，良人皆可依。
忧患两消释，如刀断羈縻。身轻心无系，忽欲凌空飞。
人生苟有累，食肉常如饥。我心既无苦，饮水亦可肥。
行简劝尔酒，停杯听我辞。不叹乡国远，不嫌官禄微。
但愿我与尔，终老不相离。

卷 430_50【咏怀】

白居易

冉牛与颜渊，卞和与马迁。或罹天六极，或被人刑残。
顾我信为幸，百骸且完全。五十不为夭，吾今欠数年。
知分心自足，委顺身常安。故虽穷退日，而无戚戚颜。
昔有荣先生，从事于其间。今我不量力，举心欲攀援。
穷通不由己，欢戚不由天。命即无奈何，心可使泰然。
且务由己者，省躬谅非难。勿问由天者，天高难与言。

· 全唐诗 ·

卷 430_51【夜琴】

白居易

蜀桐木性实，楚丝音韵清。调慢弹且缓，夜深十数声。
入耳澹无味，惬心潜有情。自弄还自罢，亦不要人听。

卷 430_52【山中独吟】

白居易

人各有一癖，我癖在章句。万缘皆已消，此病独未去。
每逢美风景，或对好亲故。高声咏一篇，恍若与神遇。
自为江上客，半在山中住。有时新诗成，独上东岩路。
身倚白石崖，手攀青桂树。狂吟惊林壑，猿鸟皆窥觑。
恐为世所嗤，故就无人处。

卷 430_53【达理二首】

白居易

何物壮不老，何时穷不通。如彼音与律，宛转旋为宫。
我命独何薄，多悴而少丰。当壮已先衰，暂泰还长穷。
我无奈命何，委顺以待终。命无奈我何，方寸如虚空。

· 全唐诗 ·

懵然与化俱，混然与俗同。谁能坐自苦，齟齬于其中。
舒姑化为泉，牛哀病作虎。或柳生肘间，或男变为女。
鸟兽及水木，本不与民伍。胡然生变迁，不待死归土。
百骸是己物，尚不能为主。况彼时命间，倚伏何足数。
时来不可遏，命去焉能取。唯当养浩然，吾闻达人语。

卷 430_54【湖亭晚望残水】

白居易

湖上秋沈寥，湖边晚萧瑟。登亭望湖水，水缩湖底出。
清渟得早霜，明灭浮残日。流注随地势，洼坳无定质。
泓澄白龙卧，宛转青蛇屈。破镜折剑头，光芒又非一。
久为山水客，见尽幽奇物。及来湖亭望，此状难谈悉。
乃知天地间，胜事殊未毕。

卷 430_55【郭虚舟相访】

白居易

朝暖就南轩，暮寒归后屋。晚酒一两杯，夜棋三数局。
寒灰埋暗火，晓焰凝残烛。不嫌贫冷人，时来同一宿。

· 全唐诗 ·

卷四百三十一

卷 431_1 【长庆二年七月自中书舍人出守杭州，路次蓝溪作】

白居易

太原一男子，自顾庸且鄙。老逢不次恩，洗拔出泥滓。
既居可言地，愿助朝廷理。伏阁三上章，戇愚不称旨。
圣人存大体，优贷容不死。凤诏停舍人，鱼书除刺史。
冥怀齐宠辱，委顺随行止。我自得此心，于兹十年矣。
余杭乃名郡，郡郭临江汜。已想海门山，潮声来入耳。
昔予贞元末，羁旅曾游此。甚觉太守尊，亦谙鱼酒美。
因生江海兴，每羨沧浪水。尚拟拂衣行，况今兼禄仕。
青山峰峦接，白日烟尘起。东道既不通，改辕遂南指。
自秦穷楚越，浩荡五千里。闻有贤主人，而多好山水。
是行颇为惬，所历良可纪。策马度蓝溪，胜游从此始。

卷 431_2 【初出城留别】

白居易

朝从紫禁归，暮出青门去。勿言城东陌，便是江南路。

· 全唐诗 ·

扬鞭簇车马，挥手辞亲故。我生本无乡，心安是归处。

卷 431_3【过骆山人野居小池】

白居易

茅覆环堵亭，泉添方丈沼。红芳照水荷，白颈观鱼鸟。
拳石苔苍翠，尺波烟杳渺。但问有意无，勿论池大小。

门前车马路，奔走无昏晓。名利驱人心，贤愚同扰扰。
善哉骆处士，安置身心了。何乃独多君，丘园居者少。

卷 431_4【宿清源寺】

白居易

往谪浔阳去，夜憩辋溪曲。今为钱塘行，重经兹寺宿。
尔来几何岁，溪草二八绿。不见旧房僧，苍然新树木。

虚空走日月，世界迁陵谷。我生寄其间，孰能逃倚伏。
随缘又南去，好住东廊竹。

· 全唐诗 ·

卷 431_5【宿蓝溪对月】

白居易

昨夜凤池头，今夜蓝溪口。明月本无心，行人自回首。
新秋松影下，半夜钟声后。清影不宜昏，聊将茶代酒。

卷 431_6【自秦望赴五松驿，马上偶睡，睡觉成吟】

白居易

长途发已久，前馆行未至。体倦目已昏，瞋然遂成睡。
右袂尚垂鞭，左手暂委辔。忽觉问仆夫，才行百步地。
形神分处所，迟速相乖异。马上几多时，梦中无限事。
诚哉达人语，百龄同一寐。

卷 431_7【邓州路中作】

白居易

萧萧谁家村，秋梨叶半坼。漠漠谁家园，秋韭花初白。
路逢故里物，使我嗟行役。不归渭北村，又作江南客。
去乡徒自苦，济世终无益。自问波上萍，何如涧中石。

· 全唐诗 ·

卷 431_8【朱藤杖紫骢吟】

白居易

拄上山之上，骑下山之下。江州去日朱藤杖，
忠州归日紫骢马。天生二物济我穷，我生合是栖栖者。

卷 431_9【桐树馆重题】

白居易

阶前下马时，梁上题诗处。惨澹病使君，萧疏老松树。
自嗟还自哂，又向杭州去。

卷 431_10【过紫霞兰若】

白居易

我爱此山头，及此三登历。紫霞旧精舍，寥落空泉石。
朝市日喧隘，云林长悄寂。犹存住寺僧，肯有归山客。

· 全唐诗 ·

卷 431_11【感旧纱帽】

白居易

昔君乌纱帽，赠我白头翁。帽今在顶上，君已归泉中。
物故犹堪用，人亡不可逢。岐山今夜月，坟树正秋风。

卷 431_12【思竹窗】

白居易

不忆西省松，不忆南宫菊。惟忆新昌堂，萧萧北窗竹。
窗间枕簟在，来后何人宿。

卷 431_13【马上作】

白居易

处世非不遇，荣身颇有余。勋为上柱国，爵乃朝大夫。
自问有何才，两入承明庐。又问有何政，再驾朱轮车。
矧予东山人，自惟朴且疏。弹琴复有酒，且慕嵇阮徒。
暗被乡里荐，误上贤能书。一列朝士籍，遂为世网拘。
高有璽缴忧，下有陷阱虞。每觉宇宙窄，未尝心体舒。
蹉跎二十年，颌下生白须。何言左迁去，尚获专城居。

· 全唐诗 ·

杭州五千里，往若投渊鱼。虽未脱簪组，且来泛江湖。
吴中多诗人，亦不少酒酺。高声咏篇什，大笑飞杯盂。

五十未全老，尚可且欢娱。用兹送日月，君以为何如。
秋风起江上，白日落路隅。回首语五马，去矣勿踟蹰。

卷 431_14【秋蝶】

白居易

秋花紫蒙蒙，秋蝶黄茸茸。花低蝶新小，飞戏丛西东。
日暮凉风来，纷纷花落丛。夜深白露冷，蝶已死丛中。
朝生夕俱死，气类各相从。不见千年鹤，多栖百丈松。

卷 431_15【登商山最高顶】

白居易

高高此山顶，四望唯烟云。下有一条路，通达楚与秦。
或名诱其心，或利牵其身。乘者及负者，来去何云云。
我亦斯人徒，未能出嚣尘。七年三往复，何得笑他人。

· 全唐诗 ·

卷 431_16 【枯桑】

白居易

道傍老枯树，枯来非一朝。皮黄外尚活，心黑中先焦。
有似多忧者，非因外火烧。

卷 431_17 【山路偶兴】

白居易

筋力未全衰，仆马不至弱。又多山水趣，心赏非寂寞。
扪萝上烟岭，蹋石穿云壑。谷鸟晚仍啼，洞花秋不落。

提笼复携榼，遇胜时停泊。泉憩茶数瓯，岚行酒一酌。
独吟还独啸，此兴殊未恶。假使在城时，终年有何乐。

卷 431_18 【山雉】

白居易

五步一啄草，十步一饮水。适性遂其生，时哉山梁雉。
梁上无罾缴，梁下无鹰鹯。雌雄与群雏，皆得终天年。
嗟嗟笼下鸡，及彼池中雁。既有稻粱恩，必有牺牲患。

· 全唐诗 ·

卷 431_19【初下汉江舟中作，寄两省给舍】

白居易

秋水淅红粒，朝烟烹白鳞。一食饱至夜，一卧安达晨。
晨无朝谒劳，夜无直宿勤。不知两掖客，何似扁舟人。
尚想到郡日，且称守土臣。犹须副忧寄，恤隐安疲民。
期年底报政，三年当退身。终使沧浪水，濯吾缨上尘。

卷 431_20【自蜀江至洞庭湖口有感而作】

白居易

江从西南来，浩浩无旦夕。长波逐若泻，连山凿如劈。
千年不壅溃，万姓无垫溺。不尔民为鱼，大哉禹之绩。
导岷既艰远，距海无咫尺。胡为不讫功，余水斯委积。
洞庭与青草，大小两相敌。混合万丈深，淼茫千里白。
每岁秋夏时，浩大吞七泽。水族窟穴多，农人土地窄。
我今尚嗟叹，禹岂不爱惜。邈未究其由，想古观遗迹。
疑此苗人顽，恃险不终役。帝亦无奈何，留患与今昔。
水流天地内，如身有血脉。滞则为疽疣，治之在针石。
安得禹复生，为唐水官伯。手提倚天剑，重来亲指画。
疏河似翦纸，决壅同裂帛。渗作膏腴田，蹋平鱼鳖宅。
龙宫变闾里，水府生禾麦。坐添百万户，书我司徒籍。

· 全唐诗 ·

卷 431_21 【初领郡政，衙退登东楼作】

白居易

鰓虢心所念，简牍手自操。何言符竹贵，未免州县劳。
赖是余杭郡，台榭绕官曹。凌晨亲政事，向晚恣游遨。
山冷微有雪，波平未生涛。水心如镜面，千里无纤毫。
直下江最阔，近东楼更高。烦襟与滞念，一望皆遁逃。

卷 431_22 【清调吟】

白居易

索索风戒寒，沈沈日藏耀。劝君饮浊醪，听我吟清调。
芳节变穷阴，朝光成夕照。与君生此世，不合长年少。
今晨从此过，明日安能料。若不结跏禅，即须开口笑。

卷 431_23 【狂歌词】

白居易

明月照君席，白露沾我衣。劝君酒杯满，听我狂歌词。
五十已后衰，二十已前痴。昼夜又分半，其间几何时。
生前不欢乐，死后有余赀。焉用黄墟下，珠衾玉匣为。

· 全唐诗 ·

卷 431_24 【郡亭】

白居易

平旦起视事，亭午卧掩关。除亲簿领外，多在琴书前。
况有虚白亭，坐见海门山。潮来一凭槛，宾至一开筵。
终朝对云水，有时听管弦。持此聊过日，非忙亦非闲。
山林太寂寞，朝阙空喧烦。唯兹郡阁内，器静得中间。

卷 431_25 【咏怀】

白居易

昔为凤阁郎，今为二千石。自觉不如今，人言不如昔。
昔虽居近密，终日多忧惕。有诗不敢吟，有酒不敢吃。
今虽在疏远，竟岁无牵役。饱食坐终朝，长歌醉通夕。
人生百年内，疾速如过隙。先务身安闲，次要心欢适。
事有得而失，物有损而益。所以见道人，观心不观迹。

卷 431_26 【立春后五日】

白居易

立春后五日，春态纷婀娜。白日斜渐长，碧云低欲堕。

· 全唐诗 ·

残冰坼玉片，新萼排红颗。遇物尽欣欣，爱春非独我。
迎芳后园立，就暖前檐坐。还有惆怅心，欲别红炉火。

卷 431_27【郡中即事】

白居易

漫漫潮初平，熙熙春日至。空阔远江山，晴明好天气。
外有适意物，中无系心事。数篇对竹吟，一杯望云醉。
行携杖扶力，卧读书取睡。久养病形骸，深谙闲气味。
遥思九城陌，扰扰趋名利。今朝是双日，朝谒多轩骑。
宠者防悔尤，权者怀忧畏。为报高车盖，恐非真富贵。

卷 431_28【郡斋暇日，辱常州陈郎中使君早春晚坐水西馆书
事诗十六韵见寄，亦以十六韵酬之】

白居易

新年多暇日，晏起褰帘坐。睡足心更慵，日高头未裹。
徐倾下药酒，稍爇煎茶火。谁伴寂寥身，无弦琴在左。
遥思毗陵馆，春深物袅娜。波拂黄柳梢，风摇白梅朵。
衙门排晓戟，铃阁开朝锁。太守水西来，朱衣垂素舸。
良辰不易得，佳会无由果。五马正相望，双鱼忽前堕。
鱼中获瑰宝，持玩何磊砢。一百六十言，字字灵珠颗。
上申心款曲，下叙时坎坷。才富不如君，道孤还似我。

· 全唐诗 ·

敢辞官远慢，且贵身安妥。忽复问荣枯，冥心无不可。

卷 431_29【官舍】

白居易

高树换新叶，阴阴覆地隅。何言太守宅，有似幽人居。
太守卧其下，闲慵两有余。起尝一瓯茗，行读一卷书。

早梅结青实，残樱落红珠。稚女弄庭果，嬉戏牵人裾。
是日晚弥静，巢禽下相呼。啧啧护儿鹊，哑哑母子乌。
岂唯云鸟尔，吾亦引吾雏。

卷 431_30【吾雏】

白居易

吾雏字阿罗，阿罗才七龄。嗟吾不才子，怜尔无弟兄。
抚养虽骄骜，性识颇聪明。学母画眉样，效吾咏诗声。

我齿今欲堕，汝齿昨始生。我头发尽落，汝顶髻初成。
老幼不相待，父衰汝孩婴。缅想古人心，慈爱亦不轻。
蔡邕念文姬，于公叹缙萦。敢求得汝力，但未忘父情。

· 全唐诗 ·

卷 431_31 【题小桥前新竹招客】

白居易

雁齿小红桥，垂檐低白屋。桥前何所有，苒苒新生竹。
皮开坼褐锦，节露抽青玉。筠翠如可餐，粉霜不忍触。
闲吟声未已，幽玩心难足。管领好风烟，轻欺凡草木。
谁能有月夜，伴我林中宿。为君倾一杯，狂歌竹枝曲。

卷 431_32 【病中逢秋，招客夜酌】

白居易

不见诗酒客，卧来半月余。合和新药草，寻检旧方书。
晚霁烟景度，早凉窗户虚。雪生衰鬓久，秋入病心初。
卧簟蕲竹冷，风襟邛葛疏。夜来身校健，小饮复何如。

卷 431_33 【食饱】

白居易

食饱拂枕卧，睡足起闲吟。浅酌一杯酒，缓弹数弄琴。
既可畅情性，亦足傲光阴。谁知利名尽，无复长安心。

· 全唐诗 ·

卷 431_34【严十八郎中在郡日，改制东南楼，因名清辉，未立标榜，征归郎署。予即到郡，性爱楼居，宴游其间，颇有幽致，聊成十韵，兼戏寄严】

白居易

严郎置兹楼，立名曰清辉。未及署花榜，遽征还粉闱。
去来三四年，尘土登者稀。今春新太守，洒扫施帘帏。
院柳烟婀娜，檐花雪霏微。看山倚前户，待月阐东扉。
碧窗戛瑶瑟，朱栏飘舞衣。烧香卷幕坐，风燕双双飞。
君作不得住，我来幸因依。始知天地间，灵境有所归。

卷 431_35【南亭对酒送春】

白居易

含桃实已落，红薇花尚熏。冉冉三月尽，晚莺城上闻。
独持一杯酒，南亭送残春。半酣忽长歌，歌中何所云。
云我五十馀，未是苦老人。刺史二千石，亦不为贱贫。
天下三品官，多老于我身。同年登第者，零落无一分。
亲故半为鬼，僮仆多见孙。念此聊自解，逢酒且欢欣。

· 全唐诗 ·

卷 431_36【玩新庭树，因咏所怀】

白居易

霏霏四月初，新树叶成阴。动摇风景丽，盖覆庭院深。
下有无事人，竟日此幽寻。岂惟玩时物，亦可开烦襟。
时与道人语，或听诗客吟。度春足芳色，入夜多鸣禽。
偶得幽闲境，遂忘尘俗心。始知真隐者，不必在山林。

卷 431_37【仲夏斋戒月】

白居易

仲夏斋戒月，三旬断腥膻。自觉心骨爽，行起身翩翩。
始知绝粒人，四体更轻便。初能脱病患，久必成神仙。
御寇驭冷风，赤松游紫烟。常疑此说谬，今乃知其然。
我今过半百，气衰神不全。已垂两鬓丝，难补三丹田。
但减荤血味，稍结清净缘。脱巾且修养，聊以终天年。

卷 431_38【除官去未间】

白居易

除官去未间，半月恣游讨。朝寻霞外寺，暮宿波上岛。

· 全唐诗 ·

新树少于松，平湖半连草。跻攀有次第，赏玩无昏早。

有时骑马醉，兀兀冥天造。穷通与生死，其奈吾怀抱。

江山信为美，齿发行将老。在郡诚未厌，归乡去亦好。

卷 431_39【三年为刺史二首】

白居易

三年为刺史，无政在人口。唯向城郡中，题诗十余首。
惭非甘棠咏，岂有思人不。

三年为刺史，饮冰复食檠。唯向天竺山，取得两片石。
此抵有千金，无乃伤清白。

卷 431_40【别萱桂】

白居易

使君竟不住，萱桂徒栽种。桂有留人名，萱无忘忧用。
不如江畔月，步步来相送。

· 全唐诗 ·

卷 431_41 【自余杭归宿淮口作】

白居易

为郡已多暇，犹少勤吏职。罢郡更安闲，无所劳心力。
舟行明月下，夜泊清淮北。岂止吾一身，举家同燕息。
三年请禄俸，颇有余衣食。乃至僮仆间，皆无冻馁色。
行行弄云水，步步近乡国。妻子在我前，琴书在我侧。
此外吾不知，于焉心自得。

卷 431_42 【舟中李山人访宿】

白居易

日暮舟悄悄，烟生水沈沈。何以延宿客，夜酒与秋琴。
来客道门子，来自嵩高岑。轩轩举云貌，豁豁开清襟。
得意言语断，入玄滋味深。默然相顾哂，心适而忘心。

卷 431_43 【洛下卜居】

白居易

三年典郡归，所得非金帛。天竺石两片，华亭鹤一支。
饮啄供稻粱，包裹用茵席。诚知是劳费，其奈心爱惜。

· 全唐诗 ·

远从余杭郭，同到洛阳陌。下担拂云根，开笼展霜翮。
贞姿不可杂，高性宜其适。遂就无尘坊，仍求有水宅。
东南得幽境，树老寒泉碧。池畔多竹阴，门前少人迹。
未请中庶禄，且脱双骖易。岂独为身谋，安吾鹤与石。

卷 431_44【洛中偶作】

白居易

五年职翰林，四年莅浔阳。一年巴郡守，半年南宫郎。
二年直纶阁，三年刺史堂。凡此十五载，有诗千余章。
境兴周万象，土风备四方。独无洛中作，能不心悵悵。
今为青宫长，始来游此乡。裴回伊涧上，睥睨嵩少傍。
遇物辄一咏，一咏倾一觞。笔下成释憾，卷中同补亡。
往往顾自哂，眼昏须鬓苍。不知老将至，犹自放诗狂。

卷 431_45【赠苏少府】

白居易

籍甚二十年，今日方款颜。相送嵩洛下，论心杯酒间。
河亚懒出入，府寮多闭关。苍发彼此老，白日寻常闲。
朝从携手出，暮思联骑还。何当挈一榼，同宿龙门山。

· 全唐诗 ·

卷 431_46【移家入新宅】

白居易

移家入新宅，罢郡有馀赀。既可避燥湿，复免忧寒饥。
疾平未还假，官闲得分司。幸有俸禄在，而无职役羁。

清旦盥漱毕，开轩卷帘帟。家人及鸡犬，随我亦熙熙。
取兴或寄酒，放情不过诗。何必苦修道，此即是无为。

外累信已遣，中怀时有思。有思一何远，默坐低双眉。
十载囚窜客，万时征戍儿。春朝锁笼鸟，冬夜支床龟。

驿马走四蹄，痛酸无歇期。础牛封两目，昏闭何人知。
谁能脱放去，四散任所之。各得适其性，如吾今日时。

卷 431_47【琴】

白居易

置琴曲几上，慵坐但含情。何烦故挥弄，风弦自有声。

· 全唐诗 ·

卷 431_48【鹤】

白居易

人各有所好，物固无常宜。谁谓尔能舞，不如闲立时。

卷 431_49【自咏】

白居易

夜镜隐白发，朝酒发红颜。可怜假年少，自笑须臾间。
朱砂贱如土，不解烧为丹。玄鬓化为雪，未闻休得官。
咄哉个丈夫，心性何堕顽。但遇诗与酒，便忘寝与餐。
高声发一吟，似得诗中仙。引满饮一盏，尽忘身外缘。
昔有醉先生，席地而幕天。于今居处在，许我当中眠。
眠罢又一酌，酌罢又一篇。回面顾妻子，生计方落然。
诚知此事非，又过知非年。岂不欲自改，改即心不安。
且向安处去，其余皆老闲。

卷 431_50【林下闲步，寄皇甫庶子】

白居易

扶杖起病初，策马力未任。既懒出门去，亦无客来寻。

· 全唐诗 ·

以此遂成闲，闲步绕园林。天晓烟景澹，树寒鸟雀深。
一酌池上酒，数声竹间吟。寄言东曹长，当知幽独心。

卷 431_51【晏起】

白居易

鸟鸣庭树上，日照屋檐时。老去慵转极，寒来起尤迟。
厚薄被适性，高低枕得宜。神安体稳暖，此味何人知。
睡足仰头坐，兀然无所思。如未凿七窍，若都遗四肢。
缅想长安客，早朝霜满衣。彼此各自适，不知谁是非。

卷 431_52【池畔二首】

白居易

结构池西廊，疏理池东树。此意人不知，欲为待月处。
持刀* 密竹，竹少风来多。此意人不会，欲令池有波。

卷 431_53【春葺新居】

白居易

江州司马日，忠州刺史时。栽松满后院，种柳荫前墀。

· 全唐诗 ·

彼皆非吾土，栽种尚忘疲。况兹是我宅，葺艺固其宜。
平旦领仆使，乘春亲指挥。移花夹暖室，徙竹覆寒池。
池水变绿色，池芳动清辉。寻芳弄水坐，尽日心熙熙。
一物苟可适，万缘都若遗。设如宅门外，有事吾不知。

卷 431_54【赠言】

白居易

捧籛献千金，彼金何足道。临觴赠一言，此言真可宝。
流光我已晚，适意君不早。况君春风面，柔促如芳草。
二十方长成，三十向衰老。镜中桃李色，不得十年好。
胡为坐脉脉，不肯倾怀抱。

卷 431_55【泛春池】

白居易

白蘋湘渚曲，绿筱剡溪口。各在天一涯，信美非吾有。
何如此庭内，水竹交左右。霜竹百千竿，烟波六七亩。
泓澄动阶砌，澹泞映户牖。蛇皮细有纹，镜面清无垢。
主人过桥来，双童扶一叟。恐污清冷波，尘缨先抖擞。
波上一叶舟，舟中一尊酒。酒开舟不系，去去随所偶。
或绕蒲浦前，或泊桃岛后。未拨落杯花，低冲拂面柳。
半酣迷所在，倚榜兀回首。不知此何处，复是人寰否。

· 全唐诗 ·

谁知始疏凿，几主相传受。杨家去云远，田氏将非久。
天与爱水人，终焉落吾手。

· 全唐诗 ·

卷四百三十二

卷 432_1【西明寺牡丹花时忆元九】

白居易

前年题名处，今日看花来。一作芸香吏，三见牡丹开。

岂独花堪惜，方知老暗催。何况寻花伴，东都去未回。

讵知红芳侧，春尽思悠哉。

卷 432_2【伤杨弘贞】

白居易

颜子昔短命，仲尼惜其贤。杨生亦好学，不幸复徒然。

谁识天地意，独与龟鹤年。

· 全唐诗 ·

卷 432_3【权摄昭应，早秋书事，寄元拾遗，兼呈李司录】

白居易

夏闰秋候早，七月风骚骚。渭川烟景晚，骊山宫殿高。
丹殿子司谏，赤县我徒劳。相去半日程，不得同游遨。
到官来十日，览镜生二毛。可怜趋走吏，尘土满青袍。
邮传拥两驿，簿书堆六曹。为问纲纪掾，何必使铅刀。

卷 432_4【新栽竹】

白居易

佐邑意不适，闭门秋草生。何以娱野性，种竹百余茎。
见此溪上色，忆得山中情。有时公事暇，尽日绕栏行。
勿言根未固，勿言阴未成。已觉庭宇内，稍稍有余清。
最爱近窗卧，秋风枝有声。

卷 432_5【秋霖中过尹纵之仙游山居】

白居易

惨惨八月暮，连连三日霖。邑居尚愁寂，况乃在山林。
林下有志士，苦学惜光阴。岁晚千万虑，并入方寸心。

· 全唐诗 ·

岩鸟共旅宿，草虫伴愁吟。秋天床席冷，夜雨灯火深。
怜君寂寞意，携酒一相寻。

卷 432_6【寄江南兄弟】

白居易

分散骨肉恋，趋驰名利牵。一奔尘埃马，一泛风波船。
忽忆分手时，惘默秋风前。别来朝复夕，积日成七年。

花落城中池，春深江上天。登楼东南望，鸟灭烟苍然。
相去复几许，道里近三千。平地犹难见，况乃隔山川。

卷 432_7【曲江早秋】

白居易

秋波红蓼水，夕照青芜岸。独信马蹄行，曲江池四畔。
早凉晴后至，残暑暝来散。方喜炎燠销，复嗟时节换。

我年三十六，冉冉昏复旦。人寿七十稀，七十新过半。
且当对酒笑，勿起临风叹。

· 全唐诗 ·

卷 432_8【寄题整屋厅前双松】

白居易

忆昨为吏日，折腰多苦辛。归家不自适，无计慰心神。
手栽两树松，聊以当嘉宾。乘春日一溉，生意渐欣欣。
清韵度秋在，绿茸随日新。始怜涧底色，不忆城中春。
有时昼掩关，双影对一身。尽日不寂寞，意中如三人。
忽奉宣室诏，征为文苑臣。闲来一惆怅，恰似别交亲。
早知烟翠前，攀玩不逡巡。悔从白云里，移尔落嚣尘。

卷 432_9【翰林院中感秋怀王质夫】

白居易

何处感时节，新蝉禁中闻。宫槐有秋意，风夕花纷纷。
寄迹鸳鹭行，归心鸥鹤群。唯有王居士，知予忆白云。
何日仙游寺，潭前秋见君。

卷 432_10【禁中月】

白居易

海水明月出，禁中清夜长。东南楼殿白，稍稍上宫墙。

· 全唐诗 ·

净落金塘水，明浮玉砌霜。不比人间见，尘土污清光。

卷 432_11【赠卖松者】

白居易

一束苍苍色，知从涧底来。劚掘经几日，枝叶满尘埃。
不买非他意，城中无地栽。

卷 432_12【初见白发】

白居易

白发生一茎，朝来明镜里。勿言一茎少，满头从此始。
青山方远别，黄绶初从仕。未料容鬓间，蹉跎忽如此。

卷 432_13【别元九后咏所怀】

白居易

零落桐叶雨，萧条槿花风。悠悠早秋意，生此幽闲中。
况与故人别，中怀正无惊。勿云不相送，心到青门东。
相知岂在多，但问同不同。同心一人去，坐觉长安空。

· 全唐诗 ·

卷 432_14【禁中秋宿】

白居易

风翻朱里幕，雨冷通中枕。耿耿背斜灯，秋床一人寝。

卷 432_15【早秋曲江感怀】

白居易

离离暑云散，袅袅凉风起。池上秋又来，荷花半成子。
朱颜易销歇，白日无穷已。人寿不如山，年光忽于水。
青芜与红蓼，岁岁秋相似。去岁此悲秋，今秋复来此。

卷 432_16【寄元九】

白居易

身为近密拘，心为名检缚。月夜与花时，少逢杯酒乐。
唯有元夫子，闲来同一酌。把手或酣歌，展眉时笑谑。
今春除御史，前月之东洛。别来未开颜，尘埃满尊杓。
蕙风晚香尽，槐雨余花落。秋意一萧条，离容两寂寞。
况随白日老，共负青山约。谁识相念心，鞚鹰与笼鹤。

· 全唐诗 ·

卷 432_17【暮春寄元九】

白居易

梨花结成实，燕卵化为雏。时物又若此，道情复何如。
但觉日月促，不嗟年岁徂。浮生都是梦，老小亦何殊。
唯与故人别，江陵初谪居。时时一相见，此意未全除。

卷 432_18【早梳头】

白居易

夜沐早梳头，窗明秋镜晓。飒然握中发，一沐知一少。
年事渐蹉跎，世缘方缴绕。不学空门法，老病何由了。
未得无生心，白头亦为夭。

卷 432_19【出关路】

白居易

山川函谷路，尘土游子颜。萧条去国意，秋风生故关。

· 全唐诗 ·

卷 432_20 【别舍弟后月夜】

白居易

悄悄初别夜，去住两盘桓。行子孤灯店，居人明月轩。
平生共贫苦，未必日成欢。及此暂为别，怀抱已忧烦。
况是庭叶尽，复思山路寒。如何为不念，马瘦衣裳单。

卷 432_21 【新丰路逢故人】

白居易

尘土长路晚，风烟废宫秋。相逢立马语，尽日此桥头。
知君不得意，郁郁来西游。惆怅新丰店，何人识马周。

卷 432_22 【金銮子晬日】

白居易

行年欲四十，有女曰金銮。生来始周岁，学坐未能言。
惭非达者怀，未免俗情怜。从此累身外，徒云慰目前。
若无夭折患，则有婚嫁牵。使我归山计，应迟十五年。

· 全唐诗 ·

卷 432_23 【青龙寺早夏】

白居易

尘埃经小雨，地高倚长坡。日西寺门外，景气含清和。
闲有老僧立，静无凡客过。残莺意思尽，新叶阴凉多。
春去来几日，夏云忽嵯峨。朝朝感时节，年鬓暗蹉跎。
胡为恋朝市，不去归烟萝。青山寸步地，自问心如何。

卷 432_24 【秋题牡丹丛】

白居易

晚丛白露夕，衰叶凉风朝。红艳久已歇，碧芳今亦销。
幽人坐相对，心事共萧条。

卷 432_25 【劝酒寄元九】

白居易

薤叶有朝露，槿枝无宿花。君今亦如此，促促生有涯。
既不逐禅僧，林下学楞伽。又不随道士，山中炼丹砂。
百年夜分半，一岁春无多。何不饮美酒，胡然自悲嗟。
俗号销愁药，神速无以加。一杯驱世虑，两杯反天和。

· 全唐诗 ·

三杯即酩酊，或笑任狂歌。陶陶复兀兀，吾孰知其他。
况在名利途，平生有风波。深心藏陷阱，巧言织网罗。
举目非不见，不醉欲如何。

卷 432_26【曲江感秋】

白居易

沙草新雨地，岸柳凉风枝。三年感秋意，并在曲江池。
早蝉已嘹唳，晚荷复离披。前秋去秋思，一一生此时。
昔人三十二，秋兴已云悲。我今欲四十，秋怀亦可知。
岁月不虚设，此身随日衰。暗老不自觉，直到鬓成丝。

卷 432_27【酬张太祝晚秋卧病见寄】

白居易

高才淹礼寺，短羽翔禁林。西街居处远，北阙官曹深。
君病不来访，我忙难往寻。差池终日别，寥落经年心。
露湿绿芜地，月寒红树阴。况兹独愁夕，闻彼相思吟。
上叹言笑阻，下嗟时岁侵。容衰晓窗镜，思苦秋弦琴。
一章锦绣段，八韵琼瑶音。何以报珍重，惭无双南金。

· 全唐诗 ·

卷 432_28【立秋日曲江忆元九】

白居易

下马柳阴下，独上堤上行。故人千万里，新蝉三两声。
城中曲江水，江上江陵城。两地新秋思，应同此日情。

卷 432_29【早朝贺雪寄陈山人】

白居易

长安盈尺雪，早朝贺君喜。将赴银台门，始出新昌里。
上堤马蹄滑，中路蜡烛死。十里向北行，寒风吹破耳。
待漏午门外，候对三殿里。须鬓冻生冰，衣裳冷如水。
忽思仙游谷，暗谢陈居士。暖覆褐裘眠，日高应未起。

卷 432_30【初与元九别后，忽梦见之，及寤而书适至，兼寄桐花诗，怅然感怀，因以此寄】

白居易

永寿寺中语，新昌坊北分。归来数行泪，悲事不悲君。
悠悠蓝田路，自去无消息。计君食宿程，已过商山北。
昨夜云四散，千里同月色。晓来梦见君，应是君相忆。

· 全唐诗 ·

梦中握君手，问君意何如。君言苦相忆，无人可寄书。
觉来未及说，叩门声冬冬。言是商州使，送君书一封。
枕上忽惊起，颠倒著衣裳。开缄见手札，一纸十三行。
上论迁谪心，下说离别肠。心肠都未尽，不暇叙炎凉。
云作此书夜，夜宿商州东。独对孤灯坐，阳城山馆中。
夜深作书毕，山月向西斜。月下何所有，一树紫桐花。
桐花半落时，复道正相思。殷勤书背后，兼寄桐花诗。
桐花诗八韵，思绪一何深。以我今朝意，忆君此夜心。
一章三遍读，一句十回吟。珍重八十字，字字化为金。

卷 432_31 【和元九悼往】

白居易

美人别君去，自去无处寻。旧物零落尽，此情安可任。
唯有襜纱幌，尘埃日夜侵。馨香与颜色，不似旧时深。
透影灯耿耿，笼光月沈沈。中有孤眠客，秋凉生夜衾。
旧宅牡丹院，新坟松柏林。梦中咸阳泪，觉后江陵心。
含此隔年恨，发为中夜吟。无论君自感，闻者欲沾襟。

卷 432_32 【重到渭上旧居】

白居易

旧居清渭曲，开门当蔡渡。十年方一还，几欲迷归路。

· 全唐诗 ·

追思昔日行，感伤故游处。插柳作高林，种桃成老树。
因惊成人者，尽是旧童孺。试问旧老人，半为绕村墓。
浮生同过客，前后递来去。白日如弄珠，出没光不住。
人物日改变，举目悲所遇。回念念我身，安得不衰暮。
朱颜销不歇，白发生无数。唯有山门外，三峰色如故。

卷 432_33【白发】

白居易

白发知时节，暗与我有期。今朝日阳里，梳落数茎丝。
家人不惯见，悯默为我悲。我云何足怪，此意尔不知。
凡人年三十，外壮中已衰。但思寝食味，已减二十时。
况我今四十，本来形貌羸。书魔昏两眼，酒病沉四肢。
亲爱日零落，在者仍别离。身心久如此，白发生已迟。
由来生老死，三病长相随。除却念无生，人间无药治。

卷 432_34【秋日】

白居易

池残寥落水，窗下悠扬日。袅袅秋风多，槐花半成实。
下有独立人，年来四十一。

· 全唐诗 ·

卷 432_35【将之饶州，江浦夜泊】

白居易

明月满深浦，愁人卧孤舟。烦冤寝不得，夏夜长于秋。
苦乏衣食资，远为江海游。光阴坐迟暮，乡国行阻修。
身病向鄱阳，家贫寄徐州。前事与后事，岂堪心并忧。
忧来起长望，但见江水流。云树霭苍苍，烟波澹悠悠。
故园迷处所，一念堪白头。

卷 432_36【思归】

白居易

养无晨昏膳，隐无伏腊资。遂求及亲禄，黽勉来京师。
薄俸未及亲，别家已经时。冬积温席恋，春违采兰期。
夏至一阴生，稍稍夕漏迟。块然抱愁者，长夜独先知。
悠悠乡关路，梦去身不随。坐惜时节变，蝉鸣槐花枝。

卷 432_37【冀城北原作】

白居易

野色何莽苍，秋声亦萧疏。风吹黄埃起，落日驱征车。

· 全唐诗 ·

何代此开国，封疆百里余。古今不相待，朝市无常居。
昔人城邑中，今变为丘墟。昔人墓田中，今化为里闾。
废兴相催迫，日月互居诸。世变无遗风，焉能知其初。
行人千载后，怀古空踌躇。

卷 432_38【客路感秋，寄明准上人】

白居易

日暮天地冷，雨霁山河清。长风从西来，草木凝秋声。
已感岁倏忽，复伤物凋零。孰能不慙凄，天时牵人情。
借问空门子，何法易修行。使我忘得心，不教烦恼生。

卷 432_39【游襄阳怀孟浩然】

白居易

楚山碧岩岩，汉水碧汤汤。秀气结成象，孟氏之文章。
今我讽遗文，思人至其乡。清风无人继，日暮空襄阳。
南望鹿门山，蔼若有余芳。旧隐不知处，云深树苍苍。

· 全唐诗 ·

卷 432_40 【秋暮西归途中书情】

白居易

耿耿旅灯下，愁多常少眠。思乡贵早发，发在鸡鸣前。
九月草木落，平芜连远山。秋阴和曙色，万木苍苍然。
去秋偶东游，今秋始西旋。马瘦衣裳破，别家来二年。
忆归复愁归，归无一囊钱。心虽非兰膏，安得不自然。

卷 432_41 【秋怀】

白居易

月出照北堂，光华满阶墀。凉风从西至，草木日夜衰。
桐柳减绿阴，蕙兰消碧滋。感物私自念，我心亦如之。
安得长少壮，盛衰迫天时。人生如石火，为乐长苦迟。

卷 432_42 【别杨颖士、卢克柔、殷尧藩】

白居易

倦鸟暮归林，浮云晴归山。独有行路子，悠悠不知还。
人生苦营营，终日群动间。所务虽不同，同归于不闲。
扁舟来楚乡，匹马往秦关。离忧绕心曲，宛转如循环。

· 全唐诗 ·

且持一杯酒，聊以开愁颜。

卷 432_43【题赠定光上人】

白居易

二十身出家，四十心离尘。得径入大道，乘此不退轮。
一坐十五年，林下秋复春。春花与秋气，不感无情人。

我来如有悟，潜以心照身。误落闻见中，忧喜伤形神。
安得遗耳目，冥然反天真。

卷 432_44【祇役骆口驿，喜萧侍御书至，兼睹新诗，吟讽通宵，因寄八韵】

白居易

日暮心无憀，吏役正营营。忽惊芳信至，复与新诗并。
是时天无云，山馆有月明。月下读数遍，风前吟一声。

一吟三四叹，声尽有余清。雅哉君子文，咏性不咏情。
使我灵府中，鄙吝不得生。始知听韶濩，可使心和平。

· 全唐诗 ·

卷 432_45 【酬李少府曹长官舍见赠】

白居易

低腰复敛手，心体不遑安。一落风尘下，方知为吏难。
公事与日长，宦情随岁阑。惆怅青袍袖，芸香无半残。
赖有李夫子，此怀聊自宽。两心如止水，彼此无波澜。
往往簿书暇，相劝强为欢。白马晚蹋雪，绿觞春暖寒。
恋月夜同宿，爱山晴共看。野性自相近，不是为同官。

卷 432_46 【留别】

白居易

秋凉卷朝簾，春暖撤夜衾。虽是无情物，欲别尚沉吟。
况与有情别，别随情浅深。二年欢笑意，一旦东西心。
独留诚可念，同行力不任。前事讵能料，后期谅难寻。
唯有潺湲泪，不惜共沾襟。

卷 432_47 【晓别】

白居易

晓鼓声已半，离筵坐难久。请君断肠歌，送我和泪酒。

· 全唐诗 ·

月落欲明前，马嘶初别后。浩浩暗尘中，何由见回首。

卷 432_48【北园】

白居易

北园东风起，杂花次第开。心知须臾落，一日三四来。
花下岂无酒，欲酌复迟回。所思眇千里，谁劝我一杯。

卷 432_49【惜栊李花】

白居易

树小花鲜妍，香繁条软弱。高低二三尺，重叠千万萼。
朝艳蔼霏霏，夕凋纷漠漠。辞枝朱粉细，覆地红绡薄。
由来好颜色，常苦易销铄。不见茝荡花，狂风吹不落。

卷 432_50【照镜】

白居易

皎皎青铜镜，斑斑白丝鬓。岂复更藏年，实年君不信。

· 全唐诗 ·

卷 432_51【新秋】

白居易

西风飘一叶，庭前飒已凉。风池明月水，衰莲白露房。

其奈江南夜，绵绵自此长。

卷 432_52【夜雨】

白居易

早蛩啼复歇，残灯灭又明。隔窗知夜雨，芭蕉先有声。

卷 432_53【秋江送客】

白居易

秋鸿次第过，哀猿朝夕闻。是日孤舟客，此地亦离群。

濛濛润衣雨，漠漠冒帆云。不醉浔阳酒，烟波愁杀人。

· 全唐诗 ·

卷 432_54【感逝寄远】

白居易

昨日闻甲死，今朝闻乙死。知识三分中，二分化为鬼。
逝者不复见，悲哉长已矣。存者今如何，去我皆万里。
平生知心者，屈指能有几。通果澧凤州，眇然四君子。
相思俱老大，浮世如流水。应叹旧交游，凋零日如此。
何当一杯酒，开眼笑相视。

卷 432_55【秋月】

白居易

夜初色苍然，夜深光浩然。稍转西廊下，渐满南窗前。
况是绿芜地，复兹清露天。落叶声策策，惊鸟影翩翩。
栖禽尚不稳，愁人安可眠。

卷四百三十三

卷 433_1【朱陈村】

白居易

徐州古丰县，有村曰朱陈。去县百余里，桑麻青氛氲。
机梭声札札，牛驴走纍纍。女汲涧中水，男采山上薪。
县远官事少，山深人俗淳。有财不行商，有丁不入军。
家家守村业，头白不出门。生为村之民，死为村之尘。
田中老与幼，相见何欣欣。一村唯两姓，世世为婚姻。
亲疏居有族，少长游有群。黄鸡与白酒，欢会不隔旬。
生者不远别，嫁娶先近邻。死者不远葬，坟墓多绕村。
既安生与死，不苦形与神。所以多寿考，往往见玄孙。
我生礼义乡，少小孤且贫。徒学辨是非，只自取辛勤。
世法贵名教，士人重冠婚。以此自桎梏，信为大谬人。
十岁解读书，十五能属文。二十举秀才，三十为谏臣。
下有妻子累，上有君亲恩。承家与事国，望此不肖身。
忆昨旅游初，迨今十五春。孤舟三适楚，羸马四经秦。
昼行有饥色，夜寝无安魂。东西不暂住，来往若浮云。
离乱失故乡，骨肉多散分。江南与江北，各有平生亲。
平生终日别，逝者隔年闻。朝忧卧至暮，夕哭坐达晨。
悲火烧心曲，愁霜侵鬓根。一生苦如此，长羡村中民。

· 全唐诗 ·

卷 433_2【读邓鲂诗】

白居易

尘架多文集，偶取一卷披。未及看姓名，疑是陶潜诗。
看名知是君，恻恻令我悲。诗人多蹇厄，近日诚有之。
京兆杜子美，犹得一拾遗。襄阳孟浩然，亦闻鬓成丝。
嗟君两不如，三十在布衣。擢第禄不及，新婚妻未归。
少年无疾患，溘死于路歧。天不与爵寿，唯与好文词。
此理勿复道，巧历不能推。

卷 433_3【寄元九】

白居易

晨鸡才发声，夕雀俄敛翼。昼夜往复来，疾如出入息。
非徒改年貌，渐觉无心力。自念因念君，俱为老所逼。
君年虽校少，憔悴谪南国。三年不放归，炎瘴消颜色。
山无杀草霜，水有含沙蜮。健否远不知，书多隔年得。
愿君少愁苦，我亦加餐食。各保金石躯，以慰长相忆。

· 全唐诗 ·

卷 433_4【秋夕】

白居易

叶声落如雨，月色白似霜。夜深方独卧，谁为拂尘床。

卷 433_5【夜雨】

白居易

我有所念人，隔在远远乡。我有所感事，结在深深肠。
乡远去不得，无日不瞻望。肠深解不得，无夕不思量。
况此残灯夜，独宿在空堂。秋天殊未晓，风雨正苍苍。
不学头陀法，前心安可忘。

卷 433_6【秋霁】

白居易

金火不相待，炎凉雨中变。林晴有残蝉，巢冷无留燕。
沉吟卷长簟，怆恻收团扇。向夕稍无泥，闲步青苔院。
月出砧杵动，家家捣秋练。独对多病妻，不能理针线。
冬衣殊未制，夏服行将绽。何以迎早秋，一杯聊自劝。

· 全唐诗 ·

卷 433_7【叹老三首】

白居易

晨兴照青镜，形影两寂寞。少年辞我去，白发随梳落。
万化成于渐，渐衰看不觉。但恐镜中颜，今朝老于昨。
人年少满百，不得长欢乐。谁会天地心，千龄与龟鹤。
吾闻善医者，今古称扁鹊。万病皆可治，唯无治老药。
我有一握发，梳理何稠直。昔似玄云光，今如素丝色。
匣中有旧镜，欲照先叹息。自从头白来，不欲明磨拭。
鸦头与鹤颈，至老常如墨。独有人鬓毛，不得终身黑。
前年种桃核，今岁成花树。去岁新婴儿，今年已学步。
但惊物长成，不觉身衰暮。去矣欲何如，少年留不住。
因书今日意，遍寄诸亲故。壮岁不欢娱，长年当悔悟。

卷 433_8【送兄弟回雪夜】

白居易

日晦云气黄，东北风切切。时从村南还，新与兄弟别。
离襟泪犹湿，回马嘶未歇。欲归一室坐，天阴多无月。
夜长火消尽，岁暮雨凝结。寂寞满炉灰，飘零上阶雪。
对雪画寒灰，残灯明复灭。灰死如我心，雪白如我发。
所遇皆如此，顷刻堪愁绝。回念入坐忘，转忧作禅悦。
平生洗心法，正为今宵设。

· 全唐诗 ·

卷 433_9【溪中早春】

白居易

南山雪未尽，阴岭留残白。西涧冰已消，春溜含新碧。
东风来几日，蛰动萌草坼。潜知阳和功，一日不虚掷。
爱此天气暖，来拂溪边石。一坐欲忘归，暮禽声啧啧。
蓬蒿隔桑枣，隐映烟火夕。归来问夜餐，家人烹荠麦。

卷 433_10【同友人寻涧花】

白居易

闻有涧底花，赏得村中酒。与君来校迟，已逢摇落后。
临觞有遗恨，怅望空溪口。记取花发时，期君重携手。
我生日日老，春色年年有。且作来岁期，不知身健否。

卷 433_11【登村东古冢】

白居易

高低古时冢，上有牛羊道。独立最高头，悠哉此怀抱。
回头向村望，但见荒田草。村人不爱花，多种栗与枣。
自来此村住，不觉风光好。花少莺亦稀，年年春暗老。

· 全唐诗 ·

卷 433_12【梦裴相公】

白居易

五年生死隔，一夕魂梦通。梦中如往日，同直金銮宫。
仿佛金紫色，分明冰玉容。勤勤相眷意，亦与平生同。
既寤知是梦，惘然情未终。追想当时事，何殊昨夜中。
自我学心法，万缘成一空。今朝为君子，流涕一沾胸。

卷 433_13【昼寝】

白居易

坐整白单衣，起穿黄草履。朝食盥漱毕，徐下阶前步。
暑风微变候，昼刻渐加数。院静地阴阴，鸟鸣新叶树。
独行还独卧，夏景殊未暮。不作午时眠，日长安可度。

卷 433_14【别行简】

白居易

漠漠病眼花，星星愁鬓雪。筋骸已衰惫，形影仍分诀。
梓州二千里，剑门五六月。岂是远行时，火云烧栈热。
何言巾上泪，乃是肠中血。念此早归来，莫作经年别。

· 全唐诗 ·

卷 433_15【观儿戏】

白居易

髻髻七八岁，绮纨三四儿。弄尘复斗草，尽日乐嬉嬉。
堂上长年客，鬓间新有丝。一看竹马戏，每忆童騃时。
童騃饶戏乐，老大多忧悲。静念彼与此，不知谁是痴。

卷 433_16【叹常生】

白居易

西村常氏子，卧疾不须臾。前旬犹访我，今日忽云殂。
时我病多暇，与之同野居。园林青蔼蔼，相去数里余。
村邻无好客，所遇唯农夫。之子何如者，往还犹胜无。
于今亦已矣，可为一长吁。

卷 433_17【寄元九】

白居易

一病经四年，亲朋书信断。穷通合易交，自笑知何晚。
元君在荆楚，去日唯云远。彼独是何人，心如石不转。
忧我贫病身，书来唯劝勉。上言少愁苦，下道加餐饭。

· 全唐诗 ·

怜君为谪吏，穷薄家贫徧。三寄衣食资，数盈二十万。
岂是贪衣食，感君心缱绻。念我口中食，分君身上暖。
不因身病久，不因命多蹇。平生亲友心，岂得知深浅。

卷 433_18【以镜赠别】

白居易

人言似明月，我道胜明月。明月非不明，一年十二缺。
岂如玉匣里，如水常澄澈。月破天暗时，圆明独不歇。
我惭貌丑老，绕鬓斑斑雪。不如赠少年，回照青丝发。
因君千里去，持此将为别。

卷 433_19【城上对月，期友人不至】

白居易

古人惜昼短，劝令秉烛游。况此迢迢夜，明月满西楼。
复有盈尊酒，置在城上头。期君君不至，人月两悠悠。
照水烟波白，照人肌发秋。清光正如此，不醉即须愁。

· 全唐诗 ·

卷 433_20【念金銮子二首】

白居易

衰病四十身，娇痴三岁女。非男犹胜无，慰情时一抚。
一朝舍我去，魂影无处所。况念天札时，呕哑初学语。
始知骨肉爱，乃是忧悲聚。唯思未有前，以理遣伤苦。
忘怀日已久，三度移寒暑。今日一伤心，因逢旧乳母。

与尔为父子，八十有六旬。忽然又不见，迩来三四春。
形质本非实，气聚偶成身。恩爱元是妄，缘合暂为亲。
念兹庶有悟，聊用遣悲辛。暂将理自夺，不是忘情人。

卷 433_21【对酒】

白居易

人生一百岁，通计三万日。何况百岁人，人间百无一。
贤愚共零落，贵贱同埋没。东岱前后魂，北邙新旧骨。
复闻药误者，为爱延年术。又有忧死者，为贪政事笔。
药误不得老，忧死非因疾。谁言人最灵，知得不知失。
何如会亲友，饮此杯中物。能沃烦虑消，能陶真性出。
所以刘阮辈，终年醉兀兀。

· 全唐诗 ·

卷 433_22 【渭村雨归】

白居易

渭水寒渐落，离离蒲稗苗。闲傍沙边立，看人刈苇苕。
近水风景冷，晴明犹寂寥。复兹夕阴起，野色重萧条。
萧条独归路，暮雨湿村桥。

卷 433_23 【谕怀】

白居易

黑头日已白，白面日已黑。人生未死间，变化何终极。
常言在己者，莫若形与色。一朝改变来，止遏不能得。
况彼身外事，悠悠通与塞。

卷 433_24 【喜友至留宿】

白居易

村中少宾客，柴门多不开。忽闻车马至，云是故人来。
况值风雨夕，愁心正悠哉。愿君且同宿，尽此手中杯。
人生开口笑，百年都几回。

· 全唐诗 ·

卷 433_25【西原晚望】

白居易

花菊引闲行，行上西原路。原上晚无人，因高聊四顾。
南阡有烟火，北陌连墟墓。村邻何萧疏，近者犹百步。
吾庐在其下，寂寞风日暮。门外转枯蓬，篱根伏寒兔。
故园汴水上，离乱不堪去。近岁始移家，飘然此村住。
新屋五六间，古槐八九树。便是衰病身，此生终老处。

卷 433_26【感镜】

白居易

美人与我别，留镜在匣中。自从花颜去，秋水无芙蓉。
经年不开匣，红埃覆青铜。今朝一拂拭，自照憔悴容。
照罢重惆怅，背有双盘龙。

卷 433_27【村居卧病三首】

白居易

戚戚抱羸病，悠悠度朝暮。夏木才结阴，秋兰已含露。
前日巢中卵，化作雏飞去。昨日穴中虫，蜕为蝉上树。

· 全唐诗 ·

四时未尝歇，一物不暂住。唯有病客心，沉然独如故。

新秋久病容，起步村南道。尽日不逢人，虫声遍荒草。
西风吹白露，野绿秋仍早。草木犹未伤，先伤我怀抱。
朱颜与玄鬓，强健几时好。况为忧病侵，不得依年老。

种黍三十亩，雨来苗渐大。种薤二十畦，秋来欲堪刈。
望黍作冬酒，留薤为春菜。荒村百物无，待此养衰瘵。
蓐庐备阴雨，补褐防寒岁。病身知几时，且作明年计。

卷 433_28【沐浴】

白居易

经年不沐浴，尘垢满肌肤。今朝一澡濯，衰瘦颇有馀。
老色头鬓白，病形支体虚。衣宽有剩带，发少不胜梳。
自问今年几，春秋四十初。四十已如此，七十复何知。

卷 433_29【栽松二首】

白居易

小松未盈尺，心爱手自移。苍然涧底色，云湿烟霏霏。
栽植我年晚，长成君性迟。如何过四十，种此数寸枝。
得见成阴否，人生七十稀。

· 全唐诗 ·

爱君抱晚节，怜君含直文。欲得朝朝见，阶前故种君。
知君死则已，不死会凌云。

卷 433_30 【病中友人相访】

白居易

卧久不记日，南窗昏复昏。萧条草檐下，寒雀朝夕闻。
强扶床前杖，起向庭中行。偶逢故人至，便当一逢迎。
移榻就斜日，披裘倚前楹。闲谈胜服药，稍觉有心情。

卷 433_31 【自觉二首】

白居易

四十未为老，忧伤早衰恶。前岁二毛生，今年一齿落。
形骸日损耗，心事同萧索。夜寝与朝餐，其间味亦薄。
同岁崔舍人，容光方灼灼。始知年与貌，衰盛随忧乐。
畏老老转迫，忧病病弥缚。不畏复不忧，是除老病药。
朝哭心所爱，暮哭心所亲。亲爱零落尽，安用身独存。
几许平生欢，无限骨肉恩。结为肠间痛，聚作鼻头辛。
悲来四支缓，泣尽双眸昏。所以年四十，心如七十人。
我闻浮屠教，中有解脱门。置心为止水，视身如浮云。
斗擞垢秽衣，度脱生死轮。胡为恋此苦，不去犹逡巡。
回念发弘愿，愿此见在身。但受过去报，不结将来因。

· 全唐诗 ·

誓以智慧水，永洗烦恼尘。不将恩爱子，更种悲忧根。

卷 433_32【夜雨有念】

白居易

以道治心气，终岁得晏然。何乃戚戚意，忽来风雨天。
既非慕荣显，又不恤饥寒。胡为悄不乐，抱膝残灯前。
形影暗相问，心默对以言。骨肉能几人，各在天一端。
吾兄寄宿州，吾弟客东川。南北五千里，吾身在中间。
欲去病未能，欲住心不安。有如波上舟，此缚而彼牵。
自我向道来，于今六七年。炼成不二性，消尽千万缘。
唯有恩爱火，往往犹熬煎。岂是药无效，病多难尽蠲。

卷 433_33【寄杨六】

白居易

青宫官冷静，赤县事繁剧。一闲复一忙，动作经时隔。
清觞久废酌，白日顿虚掷。念此忽踟蹰，悄然心不适。
岂无旧交结，久别或迁易。亦有新往还，相见多形迹。
唯君于我分，坚久如金石。何况老大来，人情重姻戚。
会稀岁月急，此事真可惜。几回开口笑，便到髭须白。
公门苦鞅掌，尽日无闲隙。犹冀乘暝来，静言同一夕。

· 全唐诗 ·

卷 433_34【送春】

白居易

三月三十日，春归日复暮。惆怅问春风，明朝应不住。
送春曲江上，眷眷东西顾。但见扑水花，纷纷不知数。
人生似行客，两足无停步。日日进前程，前程几多路。
兵刀与水火，尽可违之去。唯有老到来，人间无避处。
感时良为已，独倚池南树。今日送春心，心如别亲故。

卷 433_35【哭李三】

白居易

去年渭水曲，秋时访我来。今年常乐里，春日哭君回。
哭君仰问天，天意安在哉。若必夺其寿，何如不与才。
落然身后事，妻病女婴孩。

卷 433_36【别李十一后重寄】

白居易

秋日正萧条，驱车出蓬荜。回望青门道，目极心郁郁。
岂独恋乡土，非关慕簪绂。所怜别李君，平生同道术。

· 全唐诗 ·

俱承金马诏，联秉谏臣笔。共上青云梯，中途一相失。
江湖我方往，朝廷君不出。蕙带与华簪，相逢是何日。

卷 433_37【初出蓝田路作】

白居易

停骖问前路，路在秋云里。苍苍县南道，去途从此始。
绝顶忽上盘，众山皆下视。下视千万峰，峰头如浪起。

朝经韩公坡，夕次蓝桥水。浔阳近四千，始行七十里。
人烦马蹄跼，劳苦已如此。

卷 433_38【仙娥峰下作】

白居易

我为东南行，始登商山道。商山无数峰，最爱仙娥好。
参差树若插，匳匝云如抱。渴望寒玉泉，香闻紫芝草。

青崖屏削碧，白石床铺缟。向无如此物，安足留四皓。
感彼私自问，归山何不早。可能尘土中，还随众人老。

· 全唐诗 ·

卷 433_39 【微雨夜行】

白居易

漠漠秋云起，稍稍夜寒生。但觉衣裳湿，无点亦无声。

卷 433_40 【再到襄阳访问旧居】

白居易

昔到襄阳日，髭髯初有髭。今过襄阳日，髭鬓半成丝。
旧游都是梦，乍到忽如归。东郭蓬蒿宅，荒凉今属谁。
故知多零落，閤井亦迁移。独有秋江水，烟波似旧时。

卷 433_41 【寄微之三首】

白居易

江州望通州，天涯与地末。有山万丈高，有江千里阔。
间之以云雾，飞鸟不可越。谁知千古险，为我二人设。
通州君初到，郁郁愁如结。江州我方去，迢迢行未歇。
道路日乖隔，音信日断绝。因风欲寄语，地远声不彻。
生当复相逢，死当从此别。

· 全唐诗 ·

君游襄阳日，我在长安住。今君在通州，我过襄阳去。
襄阳九里郭，楼堞连云树。顾此稍依依，是君旧游处。
苍茫蒹葭水，中有浔阳路。此去更相思，江西少亲故。

去国日已远，喜逢物似人。如何含此意，江上坐思君。
有如河岳气，相合方氛氲。狂风吹中绝，两处成孤云。
风回终有时，云合岂无因。努力各自爱，穷通我尔身。

卷 433_42【舟中雨夜】

白居易

江云暗悠悠，江风冷修修。夜雨滴船背，风浪打船头。
船中有病客，左降向江州。

卷 433_43【夜闻歌者】

白居易

夜泊鹦鹉洲，江月秋澄澈。邻船有歌者，发词堪愁绝。
歌罢继以泣，泣声通复咽。寻声见其人，有妇颜如雪。
独倚帆樯立，娉婷十七八。夜泪如真珠，双双堕明月。
借问谁家妇，歌泣何凄切。一问一沾襟，低眉终不说。

· 全唐诗 ·

卷 433_44 【江楼闻砧】

白居易

江人授衣晚，十月始闻砧。一夕高楼月，万里故园心。

卷 433_45 【宿东林寺】

白居易

经窗灯焰短，僧炉火气深。索落庐山夜，风雪宿东林。

卷 433_46 【忆洛下故园】

白居易

浔阳迁谪地，洛阳离乱年。烟尘三川上，炎瘴九江边。
乡心坐如此，秋风仍飒然。

卷 433_47 【赠别崔五】

白居易

朝送南去客，暮迎北来宾。孰云当大路，少遇心所亲。

· 全唐诗 ·

劳者念息肩，热者思濯身。何如愁独日，忽见平生人。
平生已不浅，是日重殷勤。问从何处来，及此江亭春。

江天春多阴，夜月隔重云。移尊树间饮，灯照花纷纷。
一会不易得，馀事何足云。明旦又分手，今夕且欢忻。

卷 433_48【春晚寄微之】

白居易

三月江水阔，悠悠桃花波。年芳与心事，此地共蹉跎。
南国方谴谪，中原正兵戈。眼前故人少，头上白发多。
通州更迢递，春尽复如何。

卷 433_49【渐老】

白居易

今朝复明日，不觉年齿暮。白发逐梳落，朱颜辞镜去。
当春颇愁寂，对酒寡欢趣。遇境多怆辛，逢人益敦故。
形质属天地，推迁从不住。所怪少年心，销磨落何处。

· 全唐诗 ·

卷 433_50【送幼史】

白居易

淮右寇未散，江西岁再徂。故里干戈地，行人风雪途。
此时与尔别，江畔立踟蹰。

卷 433_51【夜雪】

白居易

已讶衾枕冷，复见窗户明。夜深知雪重，时闻折竹声。

卷 433_52【寄行简】

白居易

郁郁眉多敛，默默口寡言。岂是愿如此，举目谁与欢。
去春尔西征，从事巴蜀间。今春我南谪，抱疾江海壖。

相去六千里，地绝天邈然。十书九不达，何以开忧颜。
渴人多梦饮，饥人多梦餐。春来梦何处，合眼到东川。

· 全唐诗 ·

卷 433_53【首夏】

白居易

孟夏百物滋，动植一时好。麋鹿乐深林，虫蛇喜丰草。
翔禽爱密叶，游鳞悦新藻。天和遗漏处，而我独枯槁。

一身在天末，骨肉皆远道。旧国无来人，寇戎尘浩浩。
沉忧竟何益，只自劳怀抱。不如放身心，冥然任天造。

浔阳多美酒，可使杯不燥。湔鱼贱如泥，烹炙无昏早。
朝饭山下寺，暮醉湖中岛。何必归故乡，兹焉可终老。

卷 433_54【孟夏思渭村旧居寄舍弟】

白居易

啧啧雀引雏，稍稍笋成竹。时物感人情，忆我故乡曲。
故园渭水上，十载事樵牧。手种榆柳成，阴阴覆墙屋。

兔隐豆苗肥，鸟鸣桑椹熟。前年当此时，与尔同游瞩。
诗书课弟侄，农圃资童仆。日暮麦登场，天晴蚕坼簇。

弄泉南涧坐，待月东亭宿。兴发饮数杯，闷来棋一局。
一朝忽分散，万里仍羁束。井鲋思反泉，笼莺悔出谷。

· 全唐诗 ·

九江地卑湿，四月天炎燠。苦雨初入梅，瘴云稍含毒。
泥秧水畦稻，灰种畚田粟。已讶殊岁时，仍嗟异风俗。

闲登郡楼望，日落江山绿。归雁拂乡心，平湖断人目。
殊方我漂泊，旧里君幽独。何时同一瓢，饮水心亦足。

卷 433_55【早蝉】

白居易

六月初七日，江头蝉始鸣。石楠深叶里，薄暮两三声。
一催衰鬓色，再动故园情。西风殊未起，秋思先秋生。
忆昔在东掖，宫槐花下听。今朝无限思，云树绕湓城。

卷 433_56【感情】

白居易

中庭晒服玩，忽见故乡履。昔赠我者谁，东邻婣娟子。
因思赠时语，特用结终始。永愿如履綦，双行复双止。
自吾谪江郡，漂荡三千里。为感长情人，提携同到此。
今朝一惆怅，反覆看未已。人只履犹双，何曾得相似。
可嗟复可惜，锦表绣为里。况经梅雨来，色黯花草死。

· 全唐诗 ·

卷 433_57【南湖晚秋】

白居易

八月白露降，湖中水方老。旦夕秋风多，衰荷半倾倒。
手攀青枫树，足蹋黄芦草。惨澹老容颜，冷落秋怀抱。
有兄在淮楚，有弟在蜀道。万里何时来，烟波白浩浩。

卷 433_58【郡厅有树，晚荣早凋，人不识名，因题其上】

白居易

浔阳郡厅后，有树不知名。秋先梧桐落，春后桃李荣。
五月始萌动，八月已凋零。左右皆松桂，四时郁青青。
岂量雨露恩，沾濡不均平。荣枯各有分，天地本无情。
顾我亦相类，早衰向晚成。形骸少多病，三十不丰盈。
毛鬓早改变，四十白髭生。谁教两萧索，相对此江城。

卷 433_59【感秋怀微之】

白居易

叶下湖又波，秋风此时至。谁知濩落心，先纳萧条气。
推移感流岁，漂泊思同志。昔为烟霄侣，今作泥涂吏。

· 全唐诗 ·

白鸥毛羽弱，青凤文章异。各闭一笼中，岁晚同憔悴。

卷 433_60【因沐感发，寄朗上人二首】

白居易

年长身转慵，百事无所欲。乃至头上发，经年方一沐。
沐稀发苦落，一沐仍半秃。短鬓经霜蓬，老面辞春木。

强年过犹近，衰相来何速。应是烦恼多，心焦血不足。
渐少不满把，渐短不盈尺。况兹短少中，日夜落复白。

既无神仙术，何除老死籍。只有解脱门，能度衰苦厄。
掩镜望东寺，降心谢禅客。衰白何足言，剃落犹不惜。

卷 433_61【早蝉】

白居易

月出先照山，风生先动水。亦如早蝉声，先入闲人耳。
一闻愁意结，再听乡心起。渭上新蝉声，先听浑相似。
衡门有谁听，日暮槐花里。

· 全唐诗 ·

卷 433_62【苦热喜凉】

白居易

经时苦炎暑，心体但烦倦。白日一何长，清秋不可见。
岁功成者去，天数极则变。潜知寒燠间，迁次如乘传。
火云忽朝敛，金风俄夕扇。枕簟遂清凉，筋骸稍轻健。
因思望月侣，好卜迎秋宴。竟夜无客来，引杯还自劝。

卷 433_63【早秋晚望，兼呈韦侍郎】

白居易

九派绕孤城，城高生远思。人烟半在船，野水多于地。
穿霞日脚直，驱雁风头利。去国来几时，江上秋三至。
夫君亦沦落，此地同飘寄。悯默向隅心，摧颓触笼翅。
且谋眼前计，莫问胸中事。浔阳酒甚浓，相劝时时醉。

卷 433_64【司马宅】

白居易

雨径绿芜合，霜园红叶多。萧条司马宅，门巷无人过。
唯对大江水，秋风朝夕波。

· 全唐诗 ·

卷 433_65【司马厅独宿】

白居易

荒凉满庭草，偃亚侵檐竹。府吏下厅帘，家僮开被襖。
数声城上漏，一点窗间烛。官曹冷似冰，谁肯来同宿。

卷 433_66【梦与李七、庾三十三同访元九】

白居易

夜梦归长安，见我故亲友。损之在我左，顺之在我右。
云是二月天，春风出携手。同过靖安里，下马寻元九。
元九正独坐，见我笑开口。还指西院花，仍开北亭酒。
如言各有故，似惜欢难久。神合俄顷间，神离欠伸后。
觉来疑在侧，求索无所有。残灯影闪墙，斜月光穿牖。
天明西北望，万里君知否。老去无见期，踟蹰搔白首。

卷 433_67【秋槿】

白居易

风露飒已冷，天色亦黄昏。中庭有槿花，荣落同一晨。
秋开已寂寞，夕陨何纷纷。正怜少颜色，复叹不逡巡。

· 全唐诗 ·

感此因念彼，怀哉聊一陈。男儿老富贵，女子晚婚姻。
头白始得志，色衰方事人。后时不获已，安得如青春。

卷 433_68【答元郎中、杨员外喜乌见寄】

白居易

南宫鸳鸯地，何忽乌来止。故人锦帐郎，闻乌笑相视。
疑乌报消息，望我归乡里。我归应待乌头白，
惭愧元郎误欢喜。

· 全唐诗 ·

卷四百三十四

卷 434_1 【初入峡有感】

白居易

上有万仞山，下有千丈水。苍苍两岸间，阔狭容一苇。
瞿唐呀直泻，滟滪屹中峙。未夜黑岩昏，无风白浪起。
大石如刀剑，小石如牙齿。一步不可行，况千三百里。
苒箬竹箴/，欹危楫师趾。一跌无完舟，吾生系于此。
常闻仗忠信，蛮貊可行矣。自古漂沉人，岂尽非君子。
况吾时与命，蹇舛不足恃。常恐不才身，复作无名死。

卷 434_2 【过昭君村】

白居易

灵珠产无种，彩云出无根。亦如彼姝子，生此遐陋村。
至丽物难掩，遽选入君门。独美众所嫉，终弃出塞垣。
唯此希代色，岂无一顾恩。事排势须去，不得由至尊。
白黑既可变，丹青何足论。竟埋代北骨，不返巴东魂。
惨澹晚云水，依稀旧乡园。妍姿化已久，但有村名存。

· 全唐诗 ·

村中有遗老，指点为我言。不取往者戒，恐贻来者冤。
至今村女面，烧灼成瘢痕。

卷 434_3【自江州至忠州】

白居易

前在浔阳日，已叹宾朋寡。忽忽抱忧怀，出门无处写。
今来转深僻，穷峡巅山下。五月断行舟，滟堆正如马。
巴人类猿狖，鬻铄满山野。敢望见交亲，喜逢似人者。

卷 434_4【初到忠州登东楼，寄万州杨八使君】

白居易

山束邑居窄，峡牵气候偏。林峦少平地，雾雨多阴天。
隐隐煮盐火，漠漠烧畬烟。赖此东楼夕，风月时翛然。

凭轩望所思，目断心涓涓。背春有去雁，上水无来船。
我怀巴东守，本是关西贤。平生已不浅，流落重相怜。

水梗漂万里，笼禽囚五年。新恩同雨露，远郡邻山川。
书信虽往复，封疆徒接连。其如美人面，欲见杳无缘。

· 全唐诗 ·

卷 434_5【郡中】

白居易

乡路音信断，山城日月迟。欲知州近远，阶前摘荔枝。

卷 434_6【西楼夜】

白居易

悄悄复悄悄，城隅隐林杪。山郭灯火稀，峡天星汉少。

年光东流水，生计南枝鸟。月没江沈沈，西楼殊未晓。

卷 434_7【东楼晓】

白居易

脉脉复脉脉，东楼无宿客。城暗云雾多，峡深田地窄。

宵灯尚留焰，晨禽初展翮。欲知山高低，不见东方白。

· 全唐诗 ·

卷 434_8【寄王质夫】

白居易

忆始识君时，爱君世缘薄。我亦吏王畿，不为名利著。
春寻仙游洞，秋上云居阁。楼观水潺潺，龙潭花漠漠。
吟诗石上坐，引酒泉边酌。因话出处心，心期老岩壑。
忽从风雨别，遂被簪纆缚。君作出山云，我为入笼鹤。
笼深鹤残悴，山远云飘泊。去处虽不同，同负平生约。
今来各何在，老去随所托。我守巴南城，君佐征西幕。
年颜渐衰飒，生计仍萧索。方含去国愁，且羨从军乐。
旧游疑是梦，往事思如昨。相忆春又深，故山花正落。

卷 434_9【南宾郡斋即事，寄杨万州】

白居易

山上巴子城，山下巴江水。中有穷独人，强名为刺史。
时时窃自哂，刺史岂如是。仓粟喂家人，黄缣裹妻子。
莓苔翳冠带，雾雨霾楼雉。衙鼓暮复朝，郡斋卧还起。
回头望南浦，亦在烟波里。而我复何嗟，夫君犹滞此。

· 全唐诗 ·

卷 434_10 【招萧处士】

白居易

峡内岂无人，所逢非所思。门前亦有客，相对不相知。
仰望但云树，俯顾惟妻儿。寝食起居外，端然无所为。
东郊萧处士，聊可与开眉。能饮满杯酒，善吟长句诗。
庭前吏散后，江畔路乾时。请君携竹杖，一赴郡斋期。

卷 434_11 【庭槐】

白居易

南方饶竹树，唯有青槐稀。十种七八死，纵活亦支离。
何此郡庭下，一株独华滋。蒙蒙碧烟叶，袅袅黄花枝。
我家渭水上，此树荫前墀。忽向天涯见，忆在故园时。
人生有情感，遇物牵所思。树木犹复尔，况见旧亲知。

卷 434_12 【送客回晚兴】

白居易

城上云雾开，沙头风浪定。参差乱山出，澹泞平江净。
行客舟已远，居人酒初醒。袅袅秋竹梢，巴蝉声似磬。

· 全唐诗 ·

卷 434_13【东楼竹】

白居易

潇洒城东楼，绕楼多修竹。森然一万竿，白粉封青玉。
卷帘睡初觉，欹枕看未足。影转色入楼，床席生浮绿。
空城绝宾客，向夕弥幽独。楼上夜不归，此君留我宿。

卷 434_14【九日登巴台】

白居易

黍香酒初熟，菊暖花未开。闲听竹枝曲，浅酌茱萸杯。
去年重阳日，漂泊湓城隈。今岁重阳日，萧条巴子台。
旅鬓寻已白，乡书久不来。临觞一搔首，座客亦裴回。

卷 434_15【东城寻春】

白居易

老色日上面，欢情日去心。今既不如昔，后当不如今。
今犹未甚衰，每事力可任。花时仍爱出，酒后尚能吟。
但恐如此兴，亦随日销沉。东城春欲老，勉强一来寻。

· 全唐诗 ·

卷 434_16 【江上送客】

白居易

江花已萎绝，江草已消歇。远客何处归，孤舟今日发。
杜鹃声似哭，湘竹斑如血。共是多感人，仍为此中别。

卷 434_17 【桐花】

白居易

春令有常候，清明桐始发。何此巴峡中，桐花开十月。
岂伊物理变，信是土宜别。地气反寒暄，天时倒生杀。
草木坚强物，所禀固难夺。风候一参差，荣枯遂乖刺。
况吾北人性，不耐南方热。强羸寿夭间，安得依时节。

卷 434_18 【早祭风伯，因怀李十一舍人】

白居易

远郡虽褊陋，时祀奉朝经。夙兴祭风伯，天气晓冥冥。
导骑与从吏，引我出东坰。水雾重如雨，山火高于星。
忽忆早朝日，与君趋紫庭。步登龙尾道，却望终南青。
一别身向老，所思心未宁。至今想在耳，玉音尚玲玲。

· 全唐诗 ·

卷 434_19【花下对酒二首】

白居易

蔼蔼江气春，南宾闰正月。梅樱与桃杏，次第城上发。
红房烂簇火，素艳纷团雪。香惜委风飘，愁牵压枝折。
楼中老太守，头上新白发。冷澹病心情，暄和好时节。
故园音信断，远郡亲宾绝。欲问花前尊，依然为谁设。

引手攀红樱，红樱落似霰。仰首看白日，白日走如箭。
年芳与时景，顷刻犹衰变。况是血肉身，安能长强健。
人心苦迷执，慕贵忧贫贱。愁色常在眉，欢容不上面。
况吾头半白，把镜非不见。何必花下杯，更待他人劝。

卷 434_20【不二门】

白居易

两眼日将暗，四肢渐衰瘦。束带剩昔围，穿衣妨宽袖。
流年似江水，奔注无昏昼。志气与形骸，安得长依旧。
亦曾登玉陛，举措多纰缪。至今金阙籍，名姓独遗漏。
亦曾烧大药，消息乖火候。至今残丹砂，烧乾不成就。
行藏事两失，忧恼心交斗。化作憔悴翁，抛身在荒陋。
坐看老病逼，须得医王救。唯有不二门，其间无夭寿。

· 全唐诗 ·

卷 434_21 【我身】

白居易

我身何所似，似彼孤生蓬。秋霜剪根断，浩浩随长风。
昔游秦雍间，今落巴蛮中。昔为意气郎，今作寂寥翁。
外貌虽寂寞，中怀颇冲融。赋命有厚薄，委心任穷通。
通当为大鹏，举翅摩苍穹。穷则为鹪鹩，一枝足自容。
苟知此道者，身穷心不穷。

卷 434_22 【哭王质夫】

白居易

仙游寺前别，别来十年余。生别犹怏怏，死别复何如。
客从梓潼来，道君死不虚。惊疑心未信，欲哭复踟蹰。
踟蹰寝门侧，声发涕亦俱。衣上今日泪，篋中前月书。
怜君古人风，重有君子儒。篇咏陶谢辈，风流嵇阮徒。
出身既蹇屯，生世仍须臾。诚知天至高，安得不一呼。
江南有毒蟒，江北有妖狐。皆享千年寿，多于王质夫。
不知彼何德，不识此何辜。

· 全唐诗 ·

卷 434_23【东坡种花二首】

白居易

持钱买花树，城东坡上栽。但购有花者，不限桃杏梅。
百果参杂种，千枝次第开。天时有早晚，地力无高低。
红者霞艳艳，白者雪皑皑。游蜂逐不去，好鸟亦来栖。
前有长流水，下有小平台。时拂台上石，一举风前杯。
花枝荫我头，花蕊落我怀。独酌复独咏，不觉月平西。
巴俗不爱花，竟春无人来。唯此醉太守，尽日不能回。

东坡春向暮，树木今何如。漠漠花落尽，翳翳叶生初。
每日领童仆，荷锄仍决渠。划土壅其本，引泉溉其枯。
小树低数尺，大树长丈余。封植来几时，高下随扶疏。
养树既如此，养民亦何殊。将欲茂枝叶，必先救根株。
云何救根株，劝农均赋租。云何茂枝叶，省事宽刑书。
移此为郡政，庶几甿俗苏。

卷 434_24【登城东古台】

白居易

迢迢东郊上，有土青崔嵬。不知何代物，疑是巴王台。
巴歌久无声，巴宫没黄埃。靡靡春草合，牛羊缘四隈。

· 全唐诗 ·

我来一登眺，目极心悠哉。始见江山势，峰叠水环回。
凭高视听旷，向远胸襟开。唯有故园念，时时东北来。

卷 434_25【哭诸故人，因寄元八】

白居易

昨日哭寝门，今日哭寝门。借问所哭谁，无非故交亲。
伟卿既长往，质夫亦幽沦。屈指数年世，收涕自思身。
彼皆少于我，先为泉下人。我今头半白，焉得身久存。
好狂元郎中，相识二十春。昔见君生子，今闻君抱孙。
存者尽老大，逝者已成尘。早晚升平宅，开眉一见君。

卷 434_26【郡中春宴，因赠诸客】

白居易

仆本儒家子，待诏金马门。尘忝亲近地，孤负圣明恩。
一旦奉优诏，万里牧远人。可怜岛夷帅，自称为使君。
身骑牂牁马，口食涂江鳞。暗澹绯衫故，斓斑白发新。
是时岁二月，玉历布春分。颁条示皇泽，命宴及良辰。
冉冉趋府吏，蚩蚩聚州民。有如蛰虫鸟，亦应天地春。
薰草席铺坐，藤枝酒注樽。中庭无平地，高下随所陈。
蛮鼓声坎坎，巴女舞蹲蹲。使君居上头，掩口语众宾。
勿笑风俗陋，勿欺官府贫。蜂巢与蚁穴，随分有君臣。

· 全唐诗 ·

卷 434_27【开元寺东池早春】

白居易

池水暖温暾，水清波潋潋。簇簇青泥中，新蒲叶如剑。
梅房小白裹，柳彩轻黄染。顺气草熏熏，适情鸥泛泛。
旧游成梦寐，往事随阳焱。芳物感幽怀，一动平生念。

卷 434_28【东溪种柳】

白居易

野性爱栽植，植柳水中坻。乘春持斧斫，裁截而树之。
长短既不一，高下随所宜。倚岸埋大干，临流插小枝。

松柏不可待，楸楠固难移。不如种此树，此树易荣滋。
无根亦可活，成阴况非迟。三年未离郡，可以见依依。

种罢水边憩，仰头闲自思。富贵本非望，功名须待时。
不种东溪柳，端坐欲何为。

· 全唐诗 ·

卷 434_29 【卧小斋】

白居易

朝起视事毕，晏坐饱食终。散步长廊下，卧退小斋中。
拙政自多暇，幽情谁与同。孰云二千石，心如田野翁。

卷 434_30 【步东坡】

白居易

朝上东坡步，夕上东坡步。东坡何所爱，爱此新成树。
种植当岁初，滋荣及春暮。信意取次栽，无行亦无数。
绿阴斜景转，芳气微风度。新叶鸟下来，萎花蝶飞去。
闲携斑竹杖，徐曳黄麻屦。欲识往来频，青芜成白路。

卷 434_31 【征秋税毕，题郡南亭】

白居易

高城直下视，蠢蠢见巴蛮。安可施政教，尚不通语言。
且喜赋敛毕，幸闻闾井安。岂伊循良化，赖此丰登年。
案牍既简少，池馆亦清闲。秋雨檐果落，夕钟林鸟还。
南亭日潇洒，偃卧恣疏顽。

· 全唐诗 ·

卷 434_32 【蚊蟆】

白居易

巴徼炎毒早，二月蚊蟆生。咂肤拂不去，绕耳薨薨声。
斯物颇微细，中人初甚轻。如有肤受讐，久则疮痍成。
痍成无奈何，所要防其萌。么虫何足道，潜喻傲人情。

卷 434_33 【登龙昌上寺望江南山，怀钱舍人】

白居易

骑马出西郭，悠悠欲何之。独上高寺去，一与白云期。
虚槛晚潇洒，前山碧参差。忽似青龙阁，同望玉峰时。
因咏松雪句，永怀鸾鹤姿。六年不相见，况乃隔荣衰。

卷 434_34 【郊下】

白居易

西日照高树，树头子规鸣。东风吹野水，水畔江蓠生。
尽日看山立，有时寻涧行。兀兀长如此，何许似专城。

· 全唐诗 ·

卷 434_35 【遣怀】

白居易

乐往必悲生，泰来由否极。谁言此数然，吾道何终塞。
尝求詹尹卜，拂龟竟默默。亦曾仰问天，天但苍苍色。
自兹唯委命，名利心双息。近日转安闲，乡园亦休忆。
回看世间苦，苦在求不得。我今无所求，庶离忧悲域。

卷 434_36 【岁晚】

白居易

霜降水返壑，风落木归山。冉冉岁将宴，物皆复本源。
何此南迁客，五年独未还。命屯分已定，日久心弥安。
亦尝心与口，静念私自言。去国固非乐，归乡未必欢。
何须自生苦，舍易求其难。

卷 434_37 【负冬日】

白居易

杲杲冬日出，照我屋南隅。负暄闭目坐，和气生肌肤。
初似饮醇醪，又如蛰者苏。外融百骸畅，中适一念无。

· 全唐诗 ·

旷然忘所在，心与虚空俱。

卷 434_38【委顺】

白居易

山城虽荒芜，竹树有嘉色。郡俸诚不多，亦足充衣食。
外累由心起，心宁累自息。尚欲忘家乡，谁能算官职。
宜怀齐远近，委顺随南北。归去诚可怜，天涯住亦得。

卷 434_39【宿溪翁】

白居易

众心爱金玉，众口贪酒肉。何如此溪翁，饮瓢亦自足。
溪南刈薪草，溪北修墙屋。岁种一顷田，春驱两黄犊。
于中甚安适，此外无营欲。溪畔偶相逢，庵中遂同宿。
醉翁向朝市，问我何官禄。虚言笑杀翁，郎官应列宿。

卷 434_40【重过寿泉，忆与杨九别时，因题店壁】

白居易

商州南十里，有水名寿泉。涌出石崖下，流经山店前。

· 全唐诗 ·

忆昔相送日，我去君言还。寒波与老泪，此地共潺湲。
一去历万里，再来经六年。形容已变改，处所犹依然。
他日君过此，殷勤吟此篇。

卷 434_41【西掖早秋直夜书意】

白居易

凉风起禁掖，新月生宫沼。夜半秋暗来，万年枝袅袅。
炎凉递时节，钟鼓交昏晓。遇圣惜年衰，报恩愁力小。
素餐无补益，朱绶虚缠绕。冠盖栖野云，稻粱养山鸟。
量能私自省，所得已非少。五品不为贱，五十不为夭。
若无知足心，贪求何日了。

卷 434_42【庭松】

白居易

堂下何所有，十松当我阶。乱立无行次，高下亦不齐。
高者三丈长，下者十尺低。有如野生物，不知何人栽。
接以青瓦屋，承之白沙台。朝昏有风月，燥湿无尘泥。
疏韵秋槭槭，凉阴夏凄凄。春深微雨夕，满叶珠蓂蓂。
岁暮大雪天，压枝玉皑皑。四时各有趣，万木非其侪。
去年买此宅，多为人所诮。一家二十口，移转就松来。
移来有何得，但得烦襟开。即此是益友，岂必交贤才。

· 全唐诗 ·

顾我犹俗士，冠带走尘埃。未称为松主，时时一愧怀。

卷 434_43【竹窗】

白居易

常爱辋川寺，竹窗东北廊。一别十余载，见竹未曾忘。
今春二月初，卜居在新昌。未暇作廐库，且先营一堂。
开窗不糊纸，种竹不依行。意取北檐下，窗与竹相当。
绕屋声淅淅，逼人色苍苍。烟通杳霭气，月透玲珑光。
是时三伏天，天气热如汤。独此竹窗下，朝回解衣裳。
轻纱一幅巾，小簟六尺床。无客尽日静，有风终夜凉。
乃知前古人，言事颇谙详。清风北窗卧，可以傲羲皇。

卷 434_44【同韩侍郎游郑家池吟诗小饮】

白居易

野艇容三人，晚池流浣浣。悠然依棹坐，水思如江海。
宿雨洗沙尘，晴风荡烟霭。残阳上竹树，枝叶生光彩。
我本偶然来，景物如相待。白鸥惊不起，绿芡行堪采。
齿发虽已衰，性灵未云改。逢诗遇杯酒，尚有心情在。

· 全唐诗 ·

卷 434_45 【晚归有感】

白居易

朝吊李家孤，暮问崔家疾。回马独归来，低眉心郁郁。
平生所善者，多不过六七。如何十年间，零落三无一。
刘曾梦中见，元向花前失。渐老与谁游，春城好风日。

卷 434_46 【曲江感秋二首】

白居易

元和二年秋，我年三十七。长庆二年秋，我年五十一。
中间十四年，六年居谴黜。穷通与荣悴，委运随外物。
遂师庐山远，重吊湘江屈。夜听竹枝愁，秋看滟堆没。
近辞巴郡印，又秉纶闾笔。晚遇何足言，白发映朱绂。
销沉昔意气，改换旧容质。独有曲江秋，风烟如往日。
疏芜南岸草，萧飒西风树。秋到未几时，蝉声又无数。
莎平绿茸合，莲落青房露。今日临望时，往年感秋处。
池中水依旧，城上山如故。独我鬓间毛，昔黑今垂素。
荣名与壮齿，相避如朝暮。时命始欲来，年颜已先去。
当春不欢乐，临老徒惊误。故作咏怀诗，题于曲江路。

· 全唐诗 ·

卷 434_47【玩松竹二首】

白居易

龙蛇隐大泽，麋鹿游丰草。栖凤安于梧，潜鱼乐于藻。
吾亦爱吾庐，庐中乐吾道。前松后修竹，偃卧可终老。
各附其所安，不知他物好。

坐爱前檐前，卧爱北窗北。窗竹多好风，檐松有嘉色。
幽怀一以合，俗含随缘息。在尔虽无情，于予即有得。
乃知性相近，不必动与植。

卷 434_48【衰病无趣，因吟所怀】

白居易

朝餐多不饱，夜卧常少睡。自觉寝食间，多无少年味。
平生好诗酒，今亦将舍弃。酒唯下药饮，无复曾欢醉。
诗多听人吟，自不题一字。病姿与衰相，日夜相继至。
况当尚少朝，弥惭居近侍。终当求一郡，聚少渔樵费。
合口便归山，不问人间事。

· 全唐诗 ·

卷 434_49【逍遥咏】

白居易

亦莫恋此身，亦莫厌此身。此身何足恋，万劫烦恼根。
此身何足厌，一聚虚空尘。无恋亦无厌，始是逍遥人。

· 全唐诗 ·

卷四百三十五

卷 435_1【短歌行】

白居易

曈曈太阳如火色，上行千里下一刻。出为白昼入为夜，
圆转如珠住不得。住不得，可奈何，为君举酒歌短歌。
歌声苦，词亦苦，四座少年君听取。今夕未竟明夕催，
秋风才往春风回。人无根蒂时不驻，朱颜白日相隳颓。
劝君且强笑一面，劝君且强饮一杯。人生不得长欢乐，
年少须臾老到来。

卷 435_2【生离别】

白居易

食檠不易食梅难，檠能苦兮梅能酸。未如生别之为难，
苦在心兮酸在肝。晨鸡再鸣残月没，征马连嘶行人出。
回看骨肉哭一声，梅酸檠苦甘如蜜。黄河水白黄云秋，
行人河边相对愁。天寒野旷何处宿，棠梨叶战风飕飕。
生离别，生离别，忧从中来无断绝。忧极心劳血气衰，

· 全唐诗 ·

末年三十生白发。

卷 435_3【浩歌行】

白居易

天长地久无终毕，昨夜今朝又明日。鬓发苍浪牙齿疏，
不觉身年四十七。前去五十有几年，把镜照面心茫然。
既无长绳系白日，又无大药驻朱颜。朱颜日渐不如故，
青史功名在何处。欲留年少待富贵，富贵不来年少去。
去复去兮如长河，东流赴海无回波。贤愚贵贱同归尽，
北邙冢墓高嵯峨。古来如此非独我，未死有酒且高歌。
颜回短命伯夷饿，我今所得亦已多。功名富贵须待命，
命若不来知奈何。

卷 435_4【王夫子】

白居易

王夫子，送君为一尉，东南三千五百里。道途虽远位虽卑，
月俸犹堪活妻子。男儿口读古人书，束带敛手来从事。
近将徇禄给一家，远则行道佐时理，行道佐时须待命，
委身下位无为耻。命苟未来且求食，官无卑高及远迩。
男儿上既未能济天下，下又不至饥寒死。吾观九品至一品，
其间气味都相似。紫绶朱绂青布衫，颜色不同而已矣。

· 全唐诗 ·

王夫子，别有一事欲劝君，遇酒逢春且欢喜。

卷 435_5【江南遇天宝乐叟】

白居易

白头病叟泣且言，禄山未乱入梨园。能弹琵琶和法曲，
多在华清随至尊。是时天下太平久，年年十月坐朝元。
千官起居环珮合，万国会同车马奔。金钿照耀石瓮寺，
兰麝熏煮温汤源。贵妃宛转侍君侧，体弱不胜珠翠繁。
冬雪飘飘锦袍暖，春风荡漾霓裳翻。欢娱未足燕寇至，
弓劲马肥胡语喧。幽土人迁避夷狄，鼎湖龙去哭轩辕。
从此漂沦落南土，万人死尽一身存。秋风江上浪无限，
暮雨舟中酒一尊。涸鱼久失风波势，枯草曾沾雨露恩。
我自秦来君莫问，骊山渭水如荒村。新丰树老笼明月，
长生殿暗锁春云。红叶纷纷盖欹瓦，绿苔重重封坏垣。
唯有中官作宫使，每年寒食一开门。

卷 435_6【送张山人归嵩阳】

白居易

黄昏惨惨天微雪，修行坊西鼓声绝。张生马瘦衣且单，
夜扣柴门与我别。愧君冒寒来别我，为君酤酒张灯火。
酒酣火暖与君言，何事入关又出关。答云前年偶下山，

· 全唐诗 ·

四十馀月客长安。长安古来名利地，空手无金行路难。
朝游九城陌，肥马轻车欺杀客。暮宿五侯门，
残茶冷酒愁杀人。春明门，门前便是嵩山路。
幸有云泉容此身，明日辞君且归去。

卷 435_7【醉后走笔酬刘五主簿长句之赠，兼简张大、贾二十四先辈昆季】

白居易

刘兄文高行孤立，十五年前名翕习。是时相遇在符离，
我年二十君三十。得意忘年心迹亲，寓居同县日知闻。
衡门寂寞朝寻我，古寺萧条暮访君。朝来暮去多携手，
穷巷贫居何所有。秋灯夜写联句诗，春雪朝倾暖寒酒。
陴湖绿爱白鸥飞，濉水清怜红鲤肥。偶语闲攀芳树立，
相扶醉蹋落花归。张贾弟兄同里巷，乘闲数数来相访，
雨天连宿草堂中，月夜徐行石桥上。我年渐长忽自惊，
镜中冉冉髭须生。心畏后时同励志，身牵前事各求名。
问我栖栖何所适，乡人荐为鹿鸣客。二千里别谢交游，
三十韵诗慰行役。出门可怜唯一身，敝裘瘦马入咸秦。
冬冬街鼓红尘暗，晚到长安无主人。二贾二张与余弟，
驱车迢迢来相继。操词握赋为干戈，锋锐森然胜气多。
齐入文场同苦战，五人十载九登科。二张得隽名居甲，
美退争雄重告捷。棠棣辉荣并桂枝，芝兰芳馥和荆叶。
唯有沅犀屈未伸，握中自谓骇鸡珍。三年不鸣鸣必大，
岂独骇鸡当骇人。元和运启千年圣，同遇明时余最幸。

· 全唐诗 ·

始辞秘阁吏王畿，遽列谏垣升禁闱。蹇步何堪鸣珮玉，
衰容不称著朝衣。阊阖晨开朝百辟，冕旒不动香烟碧。
步登龙尾上虚空，立去天颜无咫尺。宫花似雪从乘舆，
禁月如霜坐直庐。身贱每惊随内宴，才微常愧草天书。
晚松寒竹新昌第，职居密近门多闭。日暮银台下直回，
故人到门门暂开。回头下马一相顾，尘土满衣何处来。
敛手炎凉叙未毕，先说旧山今悔出。岐阳旅宦少欢娱，
江左羁游费时日。赠我一篇行路吟，吟之句句披沙金。
岁月徒催白发貌，泥涂不屈青云心。谁会茫茫天地意，
短才获用长才弃。我随鸛鹭入烟云，谬上丹墀为近臣。
君同鸾凤栖荆棘，犹著青袍作选人。惆怅知贤不能荐，
徒为出入蓬莱殿。月惭谏纸二百张，岁愧俸钱三十万。
大底浮荣何足道，几度相逢即身老。且倾斗酒慰羁愁，
重话符离问旧游。北巷邻居几家去，东林旧院何人住。
武里村花落复开，流沟山色应如故。感此酬君千字诗，
醉中分手又何之。须知通塞寻常事，莫叹浮沉先后时。
慷慨临歧重相勉，殷勤别后加餐饭。
君不见买臣衣锦还故乡，五十身荣未为晚。

卷 435_8 【和钱员外答卢员外早春独游曲江见寄长句】

白居易

春来有色暗融融，先到诗情酒思中。柳岸霏微裊尘雨，
杏园澹荡开花风。闻君独游心郁郁，薄晚新晴骑马出。
醉思诗侣有同年，春叹翰林无暇日。云夫首倡寒玉音，

· 全唐诗 ·

蔚章继和春搜吟。此时我亦闭门坐，一日风光三处心。

卷 435_9【东墟晚歇】

白居易

凉风冷露萧索天，黄蒿紫菊荒凉田。绕冢秋花少颜色，
细虫小蝶飞翩翩。中有腾腾独行者，手拄渔竿不骑马。
晚从南涧钓鱼回，歇此墟中白杨下。褐衣半故白发新，
人逢知我是何人。谁言渭浦栖迟客，曾作甘泉侍从臣。

卷 435_10【客中月】

白居易

客从江南来，来时月上弦。悠悠行旅中，三见清光圆。
晓随残月行，夕与新月宿。谁谓月无情，千里远相逐。
朝发渭水桥，暮入长安陌。不知今夜月，又作谁家客。

卷 435_11【挽歌词】

白居易

丹旌何飞扬，素骖亦悲鸣。晨光照闾巷，輶车俨欲行。

· 全唐诗 ·

萧条九月天，哀挽出重城。借问送者谁，妻子与弟兄。
苍苍上古原，峨峨开新茔。含酸一恸哭，异口同哀声。
旧陇转芜绝，新坟日罗列。春风草绿北邙山，
此地年年生死别。

卷 435_12【长相思】

白居易

九月西风兴，月冷露华凝。思君秋夜长，一夜魂九升。
二月东风来，草拆花心开。思君春日迟，一日肠九回。
妾住洛桥北，君住洛桥南。十五即相识，今年二十三。
有如女萝草，生在松之侧。蔓短枝苦高，萦回上不得。
人言人有愿，愿至天必成。愿作远方兽，步步比肩行。
愿作深山木，枝枝连理生。

卷 435_13【山鹧鸪】

白居易

山鹧鸪，朝朝暮暮啼复啼，啼时露白风凄凄。
黄茅冈头秋日晚，苦竹岭下寒月低。畚田有粟何不啄，
石楠有枝何不栖。迢迢不缓复不急，楼上舟中声暗入。
梦乡迁客展转卧，抱儿寡妇彷徨立。山鹧鸪，
尔本此乡鸟，生不辞巢不别群，何苦声声啼到晓。

· 全唐诗 ·

啼到晓，唯能愁北人，南人惯闻如不闻。

卷 435_14【放旅雁】

白居易

九江十年冬大雪，江水生冰树枝折。百鸟无食东西飞，
中有旅雁声最饥。雪中啄草冰上宿，翅冷腾空飞动迟。
江童持网捕将去，手携入市生卖之。我本北人今谴谪，
人鸟虽殊同是客。见此客鸟伤客人，赎汝放汝飞入云。
雁雁汝飞向何处，第一莫飞西北去。淮西有贼讨未平，
百万甲兵久屯聚。官军贼军相守老，食尽兵穷将及汝。
健儿饥饿射汝吃，拔汝翎为箭羽。

卷 435_15【送春归】

白居易

送春归，三月尽日日暮时。去年杏园花飞御沟绿，
何处送春曲江曲。今年杜鹃花落子规啼，送春何处西江西。
帝城送春犹怏怏，天涯送春能不加惆怅。莫惆怅，
送春人。冗员无替五年罢，应须准拟再送浔阳春。
五年炎凉凡十变，又知此身健不健。好去今年江上春，
明年未死还相见。

· 全唐诗 ·

卷 435_16【山石榴寄元九】

白居易

山石榴，一名山踯躅，一名杜鹃花，杜鹃啼时花扑扑。
九江三月杜鹃来，一声催得一枝开。江城上佐闲无事，
山下劬得厅前栽。烂熳一阑十八树，根株有数花无数。
千房万叶一时新，嫩紫殷红鲜麝尘。泪痕裛损燕支脸，
剪刀裁破红绡巾。谪仙初堕愁在世，姹女新嫁娇泥春。
日射血珠将滴地，风翻火焰欲烧人。闲折两枝持在手，
细看不似人间有。花中此物似西施，芙蓉芍药皆嫫母。
奇芳绝艳别者谁，通州迁客元拾遗。拾遗初贬江陵去，
去时正值青春暮。商山秦岭愁杀君，山石榴花红夹路。
题诗报我何所云，苦云色似石榴裙。当时丛畔唯思我，
今日阑前只忆君。忆君不见坐销落，日西风起红纷纷。

卷 435_17【画竹歌】

白居易

植物之中竹难写，古今虽画无似者。萧郎下笔独逼真，
丹青以来唯一人。人画竹身肥拥肿，萧画茎瘦节节竦。
人画竹梢死羸垂，萧画枝活叶叶动。不根而生从意生，
不笋而成由笔成。野塘水边碣岸侧，森森两丛十五茎。
婵娟不失筠粉态，萧飒尽得风烟情。举头忽看不似画，

· 全唐诗 ·

低耳静听疑有声。西丛七茎劲而健，省向天竺寺前石上见。
东丛八茎疏且寒，忆曾湘妃庙里雨中看。幽姿远思少人别，
与君相顾空长叹。萧郎萧郎老可惜，手颤眼昏头雪色。
自言便是绝笔时，从今此竹尤难得。

卷 435_18【真娘墓】

白居易

真娘墓，虎丘道。不识真娘镜中面，唯见真娘墓头草。
霜摧桃李风折莲，真娘死时犹少年。脂肤蕙手不牢固，
世间尤物难留连。难留连，易销歇。塞北花，江南雪。

卷 435_19【长恨歌】

白居易

汉皇重色思倾国，御宇多年求不得。杨家有女初长成，
养在深闺人未识。天生丽质难自弃，一朝选在君王侧。
回眸一笑百媚生，六宫粉黛无颜色。春寒赐浴华清池，
温泉水滑洗凝脂。侍儿扶起娇无力，始是新承恩泽时。
云鬓花颜金步摇，芙蓉帐暖度春宵。春宵苦短日高起，
从此君王不早朝。承欢侍宴无闲暇，春从春游夜专夜。
后宫佳丽三千人，三千宠爱在一身。金屋妆成娇侍夜，
玉楼宴罢醉和春。姊妹弟兄皆列土，可怜光彩生门户。

· 全唐诗 ·

遂令天下父母心，不重生男重生女。骊宫高处入青云，
仙乐风飘处处闻。缓歌慢舞凝丝竹，尽日君王看不足。
渔阳鞞鼓动地来，惊破霓裳羽衣曲。九重城阙烟尘生，
千乘万骑西南行。翠华摇摇行复止，西出都门百余里。
六军不发无奈何，宛转蛾眉马前死。花钿委地无人收，
翠翘金雀玉搔头。君王掩面救不得，回看血泪相和流。
黄埃散漫风萧索，云栈萦纡登剑阁。峨嵋山下少人行，
旌旗无光日色薄。蜀江水碧蜀山青，圣主朝朝暮暮情。
行宫见月伤心色，夜雨闻铃肠断声。天旋日转回龙驭，
到此踌躇不能去。马嵬坡下泥土中，不见玉颜空死处。
君臣相顾尽沾衣，东望都门信马归。归来池苑皆依旧，
太液芙蓉未央柳。芙蓉如面柳如眉，对此如何不泪垂。
春风桃李花开夜，秋雨梧桐叶落时。西宫南苑多秋草，
宫叶满阶红不扫。梨园弟子白发新，椒房阿监青娥老。
夕殿萤飞思悄然，孤灯挑尽未成眠。迟迟钟鼓初长夜，
耿耿星河欲曙天。鸳鸯瓦冷霜华重，翡翠衾寒谁与共。
悠悠生死别经年，魂魄不曾来入梦。临邛道士鸿都客，
能以精诚致魂魄。为感君王展转思，遂教方士殷勤觅。
排空驭气奔如电，升天入地求之遍。上穷碧落下黄泉，
两处茫茫皆不见。忽闻海上有仙山，山在虚无缥缈间。
楼阁玲珑五云起，其中绰约多仙子。中有一人字太真，
雪肤花貌参差是。金阙西厢叩玉扃，转教小玉报双成。
闻道汉家天子使，九华帐里梦魂惊。揽衣推枕起裴回，
珠箔银屏迤迤开。云鬓半偏新睡觉，花冠不整下堂来。
风吹仙袂飘飘举，犹似霓裳羽衣舞。玉容寂寞泪阑干，
梨花一枝春带雨。含情凝睇谢君王，一别音容两渺茫。
昭阳殿里恩爱绝，蓬莱宫中日月长。回头下望人寰处，

· 全唐诗 ·

不见长安见尘雾。唯将旧物表深情，钿合金钗寄将去。
钗留一股合一扇，钗擘黄金合分钿。但教心似金钿坚，
天上人间会相见。临别殷勤重寄词，词中有誓两心知。
七月七日长生殿，夜半无人私语时。在天愿作比翼鸟，
在地愿为连理枝。天长地久有时尽，此恨绵绵无绝期。

卷 435_20 【妇人苦】

白居易

蝉鬓加意梳，蛾眉用心扫。几度晓妆成，君看不言好。
妾身重同穴，君意轻偕老。惆怅去年来，心知未能道。
今朝一开口，语少意何深。愿引他时事，移君此日心。
人言夫妇亲，义合如一身。及至死生际，何曾苦乐均。
妇人一丧夫，终身守孤子。有如林中竹，忽被风吹折。
一折不重生，枯死犹抱节。男儿若丧妇，能不暂伤情。
应似门前柳，逢春易发荣。风吹一枝折，还有一枝生。
为君委曲言，愿君再三听。须知妇人苦，从此莫相轻。

卷 435_21 【长安道】

白居易

花枝缺处青楼开，艳歌一曲酒一杯。美人劝我急行乐，
自古朱颜不再来。君不见外州客，长安道，一回来，

· 全唐诗 ·

一回老。

卷 435_22【潜别离】

白居易

不得哭，潜别离。不得语，暗相思。两心之外无人知。
深笼夜锁独栖鸟，利剑春断连理枝。河水虽浊有清日，
乌头虽黑有白时。唯有潜离与暗别，彼此甘心无后期。

卷 435_23【隔浦莲】

白居易

隔浦爱红莲，昨日看犹在。夜来风吹落，只得一回采。
花开虽有明年期，复愁明年还暂时。

卷 435_24【寒食野望吟】

白居易

丘墟郭门外，寒食谁家哭。风吹旷野纸钱飞，
古墓累累春草绿。棠梨花映白杨树，尽是死生离别处。
冥冥重泉哭不闻，萧萧墓雨人归去。

· 全唐诗 ·

卷 435_25【琵琶引】

白居易

浔阳江头夜送客，枫叶荻花秋索索。主人下马客在船，
举酒欲饮无管弦。醉不成欢惨将别，别时茫茫江浸月。
忽闻水上琵琶声，主人忘归客不发。寻声暗问弹者谁，
琵琶声停欲语迟。移船相近邀相见，添酒回灯重开宴。
千呼万唤始出来，犹抱琵琶半遮面。转轴拨弦三两声，
未成曲调先有情。弦弦掩抑声声思，似诉平生不得意。
低眉信手续续弹，说尽心中无限事。轻拢慢捻抹复挑，
初为霓裳后六么。大弦嘈嘈如急雨，小弦切切如私语。
嘈嘈切切错杂弹，大珠小珠落玉盘。间关莺语花底滑，
幽咽泉流水下滩。水泉冷涩弦疑绝，疑绝不通声暂歇。
别有幽愁暗恨生，此时无声胜有声。银瓶乍破水浆迸，
铁骑突出刀枪鸣。曲终收拨当心画，四弦一声如裂帛。
东舟西舫悄无言，唯见江心秋月白。沉吟放拨插弦中，
整顿衣裳起敛容。自言本是京城女，家在虾蟆陵下住。
十三学得琵琶成，名属教坊第一部。曲罢曾教善才伏，
妆成每被秋娘妒。五陵年少争缠头，一曲红绡不知数。
钿头云篦击节碎，血色罗裙翻酒污。今年欢笑复明年，
秋月春风等闲度。弟走从军阿姨死，暮去朝来颜色故。
门前冷落鞍马稀，老大嫁作商人妇。商人重利轻别离，
前月浮梁买茶去。去来江口守空船，绕船月明江水寒。
夜深忽梦少年事，梦啼妆泪红阑干。我闻琵琶已叹息，
又闻此语重唧唧。同是天涯沦落人，相逢何必曾相识。

· 全唐诗 ·

我从去年辞帝京，谪居卧病浔阳城。浔阳小处无音乐，
终岁不闻丝竹声。住近湓江地低湿，黄芦苦竹绕宅生。
其间旦暮闻何物，杜鹃啼血猿哀鸣。春江花朝秋月夜，
往往取酒还独倾。岂无山歌与村笛，呕哑嘲哳难为听。
今夜闻君琵琶语，如听仙乐耳暂明。莫辞更坐弹一曲，
为君翻作琵琶行。感我此言良久立，却坐促弦弦转急。
凄凄不似向前声，满座重闻皆掩泣。座中泣下谁最多，
江州司马青衫湿。

卷 435_26【简简吟】

白居易

苏家小女名简简，芙蓉花腮柳叶眼。十一把镜学点妆，
十二抽针能绣裳。十三行坐事调品，不肯迷头白地藏。
玲珑云髻生花样，飘飘风袖蔷薇香。殊姿异态不可状，
忽忽转动如有光。二月繁霜杀桃李，明年欲嫁今年死。
丈人阿母勿悲啼，此女不是凡夫妻。恐是天仙谪人世，
只合人间十三岁。大都好物不坚牢，彩云易散琉璃脆。

卷 435_27【花非花】

白居易

花非花，雾非雾。夜半来，天明去。来如春梦几多时，

· 全唐诗 ·

去似朝云无觅处。

卷 435_28【醉后狂言，酬赠萧、殷二协律】

白居易

余杭邑客多羈贫，其间甚者萧与殷。天寒身上犹衣葛，
日高甌中未拂尘。江城山寺十一月，北风吹沙雪纷纷。
宾客不见绨袍惠，黎庶未沾襦袴恩。此时太守自惭愧，
重衣复衾有余温。因命染人与针女，先制两裘赠二君。
吴绵细软桂布密，柔如狐腋白似云。劳将诗书投赠我，
如此小惠何足论。我有大裘君未见，宽广和暖如阳春。
此裘非缁亦非纁，裁以法度絮以仁。刀尺钝拙制未毕，
出亦不独裹一身。若令在郡得五考，与君展覆杭州人。

卷 435_29【醉歌】

白居易

罢胡琴，掩秦瑟，玲珑再拜歌初毕。谁道使君不解歌，
听唱黄鸡与白日。黄鸡催晓丑时鸣，白日催年酉前没。

腰间红绶系未稳，镜里朱颜看已失。玲珑玲珑奈老何，
使君歌了汝更歌。

· 全唐诗 ·

有如女萝草，生在松之侧。蔓短枝苦高，萦回上不得。
人言人有愿，愿至天必成。愿作远方兽，步步比肩行。
愿作深山木，枝枝连理生。

· 全唐诗 ·

卷四百三十六

卷 436_1 【代书诗一百韵寄微之】

白居易

忆在贞元岁，初登典校司。身名同日授，心事一言知。
肺腑都无隔，形骸两不羁。疏狂属年少，闲散为官卑。
分定金兰契，言通药石规。交贤方汲汲，友直每依依。
有月多同赏，无杯不共持。秋风拂琴匣，夜雪卷书帷。
高上慈恩塔，幽寻皇子陂。唐昌玉蕊会，崇敬牡丹期。
笑劝迂辛酒，闲吟短李诗。儒风爱敦质，佛理赏玄师。
度日曾无闷，通宵靡不为。双声联律句，八面对宫棋。
往往游三省，腾腾出九逵。寒销直城路，春到曲江池。
树暖枝条弱，山晴彩翠奇。峰攒石绿点，柳宛麴尘丝。
岸草烟铺地，园花雪压枝。早光红照耀，新溜碧逶迤。
幄幕侵堤布，盘筵占地施。征伶皆绝艺，选伎悉名姬。
粉黛凝春态，金钿耀水嬉。风流夸堕髻，时世斗啼眉。
密坐随欢促，华尊逐胜移。香飘歌袂动，翠落舞钗遗。
筹插红螺碗，觥飞白玉卮。打嫌调笑易，饮讶卷波迟。
残席喧哗散，归鞍酩酊骑。酡颜乌帽侧，醉袖玉鞭垂。
紫陌传钟鼓，红尘塞路岐。几时曾暂别，何处不相随。

· 全唐诗 ·

荏苒星霜换，回环节候催。两衙多请告，三考欲成资。
运启千年圣，天成万物宜。皆当少壮日，同惜盛明时。
光景嗟虚掷，云霄窃暗窥。攻文朝矻矻，讲学夜孜孜。
策目穿如札，锋毫锐若锥。繁张获鸟网，坚守钓鱼坻。
并受夔龙荐，齐陈晁董词。万言经济略，三策太平基。
中第争无敌，专场战不疲。辅车排胜阵，犄角拏降旗。
双阙纷容卫，千僚俨等衰。恩随紫泥降，名向白麻披。
既在高科选，还从好爵縻。东垣君谏诤，西邑我驱驰。
再喜登乌府，多惭侍赤墀。官班分内外，游处遂参差。
每列鹓鸾序，偏瞻獬豸姿。简威霜凛冽，衣彩绣葳蕤。
正色摧强御，刚肠嫉喔咻。常憎持禄位，不拟保妻儿。
养勇期除恶，输忠在灭私。下鞬惊燕雀，当道慑狐狸。
南国人无怨，东台吏不欺。理冤多定国，切谏甚辛毗。
造次行于是，平生志在兹。道将心共直，言与行兼危。
水暗波翻覆，山藏路险巇。未为明主识，已被倖臣疑。
木秀遭风折，兰芳遇露萎。千钧势易压，一柱力难支。
腾口因成瘡，吹毛遂得疵。忧来吟贝锦，谪去咏江蓠。
邂逅尘中遇，殷勤马上辞。贾生离魏阙，王粲向荆夷。
水过清源寺，山经绮季祠。心摇汉皋珮，泪堕岷亭碑。
驿路缘云际，城楼枕水湄。思乡多绕泽，望阙独登陴。
林晚青萧索，江平绿渺瀰。野秋鸣蟋蟀，沙冷聚鸕鶒。
官舍黄茅屋，人家苦竹篱。白醪充夜酌，红粟备晨炊。
寡鹤摧风翮，鳏鱼失水髻。暗雏啼渴旦，凉叶坠相思。
一点寒灯灭，三声晓角吹。蓝衫经雨故，骢马卧霜羸。
念涸谁濡沫，嫌醒自歔醺。耳垂无伯乐，舌在有张仪。
负气冲星剑，倾心向日葵。金言自销铄，玉性肯磷缁。
伸屈须看蠖，穷通莫问龟。定知身是患，应用道为医。

· 全唐诗 ·

想子今如彼，嗟予独在斯。无憀当岁杪，有梦到天涯。
坐阻连襟带，行乖接履綦。润销衣上雾，香散室中芝。
念远缘迁贬，惊时为别离。素书三往复，明月七盈亏。
旧里非难到，馀欢不可追。树依兴善老，草傍静安衰。
前事思如昨，中怀写向谁。北村寻古柏，南宅访辛夷。
此日空搔首，何人共解颐。病多知夜永，年长觉秋悲。
不饮长如醉，加餐亦似饥。狂吟一千字，因使寄微之。

卷 436_2 【和郑元及第后秋归洛下闲居】

白居易

勤苦成名后，优游得意间。玉怜同匠琢，桂恨隔年攀。
山静豹难隐，谷幽莺暂还。微吟诗引步，浅酌酒开颜。
门迥暮临水，窗深朝对山。云衢日相待，莫误许身闲。

卷 436_3 【与诸同年贺座主侍郎新拜太常，同宴萧尚书亭子】

白居易

宠新卿典礼，会盛客征文。不失迁莺侣，因成贺燕群。
池台晴间雪，冠盖暮和云。共仰曾攀处，年深桂尚熏。

· 全唐诗 ·

卷 436_4【东都冬日会诸同年宴郑家林亭】

白居易

盛时陪上第，暇日会群贤。桂折因同树，莺迁各异年。
宾阶纷组佩，妓席俨花钿。促膝齐荣贱，差肩次后先。
助歌林下水，销酒雪中天。他日升沉者，无忘共此筵。

卷 436_5【叙德书情四十韵，上宣歙翟中丞】

白居易

元圣生乘运，忠贤出应期。还将稽古力，助立太平基。
土控吴兼越，州连歙与池。山河地襟带，军镇国藩维。
廉察安江甸，澄清肃海夷。股肱分外守，耳目付中司。
楚老歌来暮，秦人咏去思。望如时雨至，福是岁星移。
政静民无讼，刑行吏不欺。撝谦惊主宠，阴德畏人知。
白玉惭温色，朱绳让直辞。行为时领袖，言作世蓍龟。
盛幕招贤士，连营训锐师。光华下鹤鹭，气色动熊羆。
出入麾幢引，登临剑戟随。好风迎解榻，美景待攀帷。
晴野霞飞绮，春郊柳宛丝。城乌惊画角，江雁避红旗。
藉草朱轮驻，攀花紫绶垂。山宜谢公屐，洲称柳家诗。
酒气和芳杜，弦声乱子规。分球齐马首，列舞匝蛾眉。
醉惜年光晚，欢怜日影迟。回塘排玉棹，归路拥金羁。
自顾龙钟者，尝蒙噢咻之。仰山尘不让，涉海水难为。

· 全唐诗 ·

身忝乡人荐，名因国士推。提携增善价，拂拭长妍姿。
射策端心术，迁乔整羽仪。幸穿杨远叶，谬折桂高枝。
佩德潜书带，铭仁暗勒肌。饬躬趋馆舍，拜手挹阶墀。
霄汉程虽在，风尘迹尚卑。敝衣羞布素，败屋厌茅茨。
养乏晨昏膳，居无伏腊资。盛时贫可耻，壮岁病堪嗤。
擢第名方立，耽书力未疲。磨铅重剗割，策蹇再奔驰。
相马须怜瘦，呼鹰正及饥。扶摇重即事，会有答恩时。

436_6【和渭北刘大夫借便秋遮虏，寄朝中亲友】

白居易

巨镇为邦屏，全材作国桢。韬铃汉上将，文墨鲁诸生。
豹虎关西卒，金汤渭北城。宠深初受檄，威重正扬兵。
阵占山河布，军谙水草行。夏苗侵虎落，宵遁失蕃营。
云队攒戈戟，风行卷旆旌。堠空烽火灭，气胜鼓鼙鸣。
胡马辞南牧，周师罢北征。回头问天下，何处有欃枪。

卷 436_7【题故曹王宅】

白居易

甲第何年置，朱门此地开。山当宾阁出，溪绕妓堂回。
覆井桐新长，阴窗竹旧栽。池荒红菡萏，砌老绿莓苔。
捐馆梁王去，思人楚客来。西园飞盖处，依旧月裴回。

· 全唐诗 ·

卷 436_8【自江陵之徐州路上寄兄弟】

白居易

岐路南将北，离忧弟与兄。关河千里别，风雪一身行。
夕宿劳乡梦，晨装惨旅情。家贫忧后事，日短念前程。
烟雁翻寒渚，霜乌聚古城。谁怜陟冈者，西楚望南荆。

卷 436_9【酬哥舒大见赠】

白居易

去岁欢游何处去，曲江西岸杏园东。花下忘归因美景，
尊前劝酒是春风。各从微宦风尘里，共度流年离别中。
今日相逢愁又喜，八人分散两人同。

卷 436_10【和谈校书秋夜感怀，呈朝中亲友】

白居易

遥夜凉风楚客悲，清砧繁漏月高时。秋霜似鬓年空长，
春草如袍位尚卑。词赋擅名来已久，烟霄得路去何迟。
汉庭卿相皆知己，不荐扬雄欲荐谁。

· 全唐诗 ·

卷 436_11 【感秋寄远】

白居易

惆怅时节晚，两情千里同。离忧不散处，庭树正秋风。

燕影动归翼，蕙香销故丛。佳期与芳岁，牢落两成空。

卷 436_12 【春题华阳观】

白居易

帝子吹箫逐凤凰，空留仙洞号华阳。

落花何处堪惆怅，头白宫人扫影堂。

卷 436_13 【秋雨中赠元九】

白居易

不堪红叶青苔地，又是凉风暮雨天。

莫怪独吟秋思苦，比君校近二毛年。

· 全唐诗 ·

卷 436_14 【城东闲游】

白居易

宠辱忧欢不到情，任他朝市自营营。

独寻秋景城东去，白鹿原头信马行。

卷 436_15 【答韦八】

白居易

丽句劳相赠，佳期恨有违。早知留酒待，悔不趁花归。

春尽绿醅老，雨多红萼稀。今朝如一醉，犹得及芳菲。

卷 436_16 【华阳观桃花时招李六拾遗饮】

白居易

华阳观里仙桃发，把酒看花心自知。

争忍开时不同醉，明朝后日即空枝。

· 全唐诗 ·

卷 436_17【和友人洛中春感】

白居易

莫悲金谷园中月，莫叹天津桥上春。

若学多情寻往事，人间何处不伤神。

卷 436_18【送张南简入蜀】

白居易

昨日诏书下，求贤访陆沉。无论能与否，皆起徇名心。

君独南游去，云山蜀路深。

卷 436_19【寄陆补阙】

白居易

忽忆前年科第后，此时鸡鹤暂同群。

秋风惆怅须吹散，鸡在中庭鹤在云。

· 全唐诗 ·

卷 436_20 【华阳观中八月十五日夜招友玩月】

白居易

人道秋中明月好，欲邀同赏意如何。

华阳洞里秋坛上，今夜清光此处多。

卷 436_21 【曲江忆元九】

白居易

春来无伴闲游少，行乐三分减二分。

何况今朝杏园里，闲人逢尽不逢君。

卷 436_22 【过刘三十二故宅】

白居易

不见刘君来近远，门前两度满枝花。

朝来惆怅宣平过，柳巷当头第一家。

· 全唐诗 ·

卷 436_23 【下邳庄南桃花】

白居易

村南无限桃花发，唯我多情独自来。

日暮风吹红满地，无人解惜为谁开。

卷 436_24 【三月三十日题慈恩寺】

白居易

慈恩春色今朝尽，尽日裴回倚寺门。

惆怅春归留不得，紫藤花下渐黄昏。

卷 436_25 【看恽家牡丹花戏赠李二十】

白居易

香胜烧兰红胜霞，城中最数令公家。

人人散后君须看，归到江南无此花。

· 全唐诗 ·

卷 436_26 【春中与卢四周谅华阳观同居】

白居易

性情懒慢好相亲，门巷萧条称作邻。背烛共怜深夜月，
蹋花同惜少年春。杏坛住僻虽宜病，芸阁官微不救贫。
文行如君尚憔悴，不知霄汉待何人。

卷 436_27 【自城东至以诗代书，戏招李六拾遗、崔二十六先辈】

白居易

青门走马趁心期，惆怅归来已校迟。应过唐昌玉蕊后，
犹当崇敬牡丹时。暂游还忆崔先辈，欲醉先邀李拾遗。
尚残半月芸香俸，不作归粮作酒资。

卷 436_28 【盩厔县北楼望山】

白居易

一为趋走吏，尘土不开颜。孤负平生眼，今朝始见山。

· 全唐诗 ·

卷 436_29【县西郊秋寄赠马造】

白居易

紫阁峰西清渭东，野烟深处夕阳中。风荷老叶萧条绿，
水蓼残花寂寞红。我厌宦游君失意，可怜秋思两心同。

卷 436_30【别韦苏州】

白居易

百年愁里过，万感醉中来。惆怅城西别，愁眉两不开。

卷 436_31【戏题新栽蔷薇】

白居易

移根易地莫憔悴，野外庭前一种春。
少府无妻春寂寞，花开将尔当夫人。

· 全唐诗 ·

卷 436_32 【酬王十八、李大见招游山】

白居易

自怜幽会心期阻，复愧嘉招书信频。

王事牵身去不得，满山松雪属他人。

卷 436_33 【县南花下醉中留刘五】

白居易

百岁几回同酩酊，一年今日最芳菲。

愿将花赠天台女，留取刘郎到夜归。

卷 436_34 【宿杨家】

白居易

杨氏弟兄俱醉卧，披衣独起下高斋。

夜深不语中庭立，月照藤花影上阶。

· 全唐诗 ·

卷 436_35 【醉中留别杨六兄弟】

白居易

春初携手春深散，无日花间不醉狂。

别后何人堪共醉，犹残十日好风光。

卷 436_36 【醉中归盩厔】

白居易

金光门外昆明路，半醉腾腾信马回。

数日非关王事系，牡丹花尽始归来。

卷 436_37 【游云居寺，赠穆三十六地主】

白居易

乱峰深处云居路，共蹋花行独惜春。

胜地本来无定主，大都山属爱山人。

· 全唐诗 ·

卷 436_38 【和王十八蔷薇涧花时有怀萧侍御兼见赠】

白居易

霄汉风尘俱是系，蔷薇花委故山深。

怜君独向涧中立，一把红芳三处心。

卷 436_39 【再因公事到骆口驿】

白居易

今年到时夏云白，去年来时秋树红。

两度见山心有愧，皆因王事到山中。

卷 436_40 【期李二十文略、王十八质夫不至，独宿仙游寺】

白居易

文略也从牵吏役，质夫何故恋嚣尘。

始知解爱山中宿，千万人中无一人。

· 全唐诗 ·

卷 436_41 【酬赵秀才赠新登科诸先辈】

白居易

莫羨蓬萊鸞鶴侶，道成羽翼自生身。

君看名在丹台者，盡是人間修道人。

卷 436_42 【过天门街】

白居易

雪盡終南又欲春，遙憐翠色對紅塵。

千車萬馬九衢上，回首看山無一人。

卷 436_43 【惜玉蕊花，有懷集賢王校書起】

白居易

芳意將闌風又吹，白雲離葉雪辭枝。

集賢雖校無閑日，落盡瑤花君不知。

· 全唐诗 ·

卷 436_44 【春送卢秀才下第游太原谒严尚书】

白居易

未将时会合，且与俗浮沉。鸿养青冥翮，蛟潜云雨心。

烟郊春别远，风磧暮程深。墨客投何处，并州旧翰林。

卷 436_45 【长安送柳大东归】

白居易

白社羁游伴，青门远别离。浮名相引住，归路不同归。

卷 436_46 【送文畅上人东游】

白居易

得道即无著，随缘西复东。貌依年腊老，心到夜禅空。

山宿驯溪虎，江行滤水虫。悠悠尘客思，春满碧云中。

· 全唐诗 ·

卷 436_47【社日关路作】

白居易

晚景函关路，凉风社日天。青岩新有燕，红树欲无蝉。

愁立驿楼上，厌行官堠前。萧条秋兴苦，渐近二毛年。

卷 436_48【重到毓村宅有感】

白居易

欲入中门泪满巾，庭花无主两回春。

轩窗帘幕皆依旧，只是堂前欠一人。

卷 436_49【乱后过流沟寺】

白居易

九月徐州新战后，悲风杀气满山河。

唯有流沟山下寺，门前依旧白云多。

· 全唐诗 ·

卷 436_50 【叹发落】

白居易

多病多愁心自知，行年未老发先衰。

随梳落去何须惜，不落终须变作丝。

卷 436_51 【留别吴七正字】

白居易

成名共记甲科上，署吏同登芸阁间。

唯是尘心殊道性，秋蓬常转水长闲。

卷 436_52 【除夜宿洛州】

白居易

家寄关西住，身为河北游。萧条岁除夜，旅泊在洛州。

· 全唐诗 ·

卷 436_53 【邯郸冬至夜思家】

白居易

邯郸驿里逢冬至，抱膝灯前影伴身。

想得家中夜深坐，还应说著远行人。

卷 436_54 【冬至夜怀湘灵】

白居易

艳质无由见，寒衾不可亲。何堪最长夜，俱作独眠人。

卷 436_55 【感故张仆射诸妓】

白居易

黄金不惜买蛾眉，拣得如花三四枝。

歌舞教成心力尽，一朝身去不相随。

· 全唐诗 ·

卷 436_56 【游仙游山】

白居易

暗将心地出人间，五六年来人怪闲。

自嫌恋著未全尽，犹爱云泉多在山。

卷 436_57 【见尹公亮新诗，偶赠绝句】

白居易

袖里新诗十首馀，吟看句句是琼琚。

如何持此将干谒，不及公卿一字书。

卷 436_58 【长安闲居】

白居易

风竹松烟昼掩关，意中长似在深山。

无人不怪长安住，何独朝朝暮暮间。

· 全唐诗 ·

卷 436_59【早春独游曲江】

白居易

散职无羁束，羸骖少送迎。朝从直城出，春傍曲江行。
风起池东暖，云开山北晴。冰销泉脉动，雪尽草芽生。
露杏红初坼，烟杨绿未成。影迟新度雁，声涩欲啼莺。
闲地心俱静，韶光眼共明。酒狂怜性逸，药效喜身轻。
慵慢疏人事，幽栖逐野情。回看芸阁笑，不似有浮名。

卷 436_60【秘书省中忆旧山】

白居易

厌从薄宦校青简，悔别故山思白云。
犹喜兰台非傲吏，归时应免动移文。

卷 436_61【凉夜有怀】

白居易

清风吹枕席，白露湿衣裳。好是相亲夜，漏迟天气凉。

· 全唐诗 ·

卷 436_62【送武士曹归蜀】

白居易

花落鸟嚶嚶，南归称野情。月宜秦岭宿，春好蜀江行。
乡路通云栈，郊扉近锦城。乌台陟冈送，人羨别时荣。

卷 436_63【江南送北客，因凭寄徐州兄弟书】

白居易

故园望断欲何如，楚水吴山万里余。
今日因君访兄弟，数行乡泪一封书。

卷 436_64【赋得古原草送别】

白居易

离离原上草，一岁一枯荣。野火烧不尽，春风吹又生。
远芳侵古道，晴翠接荒城。又送王孙去，萋萋满别情。

· 全唐诗 ·

卷 436_65【夜哭李夷道】

白居易

逝者绝影响，空庭朝复昏。家人哀临毕，夜锁寿堂门。

无妻无子何人葬，空见铭旌向月翻。

卷 436_66【病中作】

白居易

久为劳生事，不学摄生道。年少已多病，此身岂堪老。

卷 436_67【秋江晚泊】

白居易

扁舟泊云岛，倚棹念乡国。四望不见人，烟江澹秋色。

客心贫易动，日入愁未息。

· 全唐诗 ·

卷 436_68 【旅次景空寺宿幽上人院】

白居易

不与人境接，寺门开向山。暮钟寒鸟聚，秋雨病僧闲。
月隐云树外，萤飞廊宇间。幸投花界宿，暂得静心颜。

卷 436_69 【长安正月十五日】

白居易

喧喧车骑帝王州，羈病无心逐胜游。
明月春风三五夜，万人行乐一人愁。

卷 436_70 【过高将军墓】

白居易

原上新坟委一身，城中旧宅有何人。妓堂宾阁无归日，
野草山花又欲春。门客空将感恩泪，白杨风里一沾巾。

· 全唐诗 ·

卷 436_71 【寒食卧病】

白居易

病逢佳节长叹息，春雨濛濛榆柳色。羸坐全非旧日容，
扶行半是他人力。喧喧里巷蹋青归，笑闭柴门度寒食。

卷 436_72 【宿桐庐馆，同崔存度醉后作】

白居易

江海飘飘共旅游，一尊相劝散穷愁。
夜深醒后愁还在，雨滴梧桐山馆秋。

卷 436_73 【江楼望归】

白居易

满眼云水色，月明楼上人。旅愁春入越，乡梦夜归秦。
道路通荒服，田园隔虏尘。悠悠沧海畔，十载避黄巾。

· 全唐诗 ·

卷 436_74【除夜寄弟妹】

白居易

感时思弟妹，不寐百忧生。万里经年别，孤灯此夜情。

病容非旧日，归思逼新正。早晚重欢会，羁离各长成。

卷 436_75【寒食月夜】

白居易

风香露重梨花湿，草舍无灯愁未入。

南邻北里歌吹时，独倚柴门月中立。

卷 436_76【感芍药花，寄正一上人】

白居易

今日阶前红芍药，几花欲老几花新。开时不解比色相，

落后始知如幻身。空门此去几多地，欲把残花问上人。

· 全唐诗 ·

卷 436_77【晚秋闲居】

白居易

地僻门深少送迎，披衣闲坐养幽情。

秋庭不扫携藤杖，闲蹋梧桐黄叶行。

卷 436_78【秋暮郊居书怀】

白居易

郊居人事少，昼卧对林峦。穷巷厌多雨，贫家愁早寒。

葛衣秋未换，书卷病仍看。若问生涯计，前溪一钓竿。

卷 436_79【为薛台悼亡】

白居易

半死梧桐老病身，重泉一念一伤神。

手携稚子夜归院，月冷空房不见人。

· 全唐诗 ·

卷 436_80【途中寒食】

白居易

路旁寒食行人尽，独占春愁在路旁。

马上垂鞭愁不语，风吹百草野田香。

卷 436_81【题流沟寺古松】

白居易

烟叶葱茏苍麈尾，霜皮剥落紫龙鳞。

欲知松老看尘壁，死却题诗几许人。

卷 436_82【感月悲逝者】

白居易

存亡感月一潸然，月色今宵似往年。

何处曾经同望月，樱桃树下后堂前。

· 全唐诗 ·

卷 436_83【代邻叟言怀】

白居易

人生何事心无定，宿昔如今意不同。
宿昔愁身不得老，如今恨作白头翁。

卷 436_84【自河南经乱，关内阻饥，兄弟离散，各在一处，因望月有感，聊书所怀，寄上浮梁大兄、于潜七兄，乌江十五兄，兼示符离及下邳弟妹】

白居易

时难年饥世业空，弟兄羁旅各西东。田园寥落干戈后，
骨肉流离道路中。吊影分为千里雁，辞根散作九秋蓬。
共看明月应垂泪，一夜乡心五处同。

卷 436_85【长安早春旅怀】

白居易

轩车歌吹喧都邑，中有一人向隅立。夜深明月卷帘愁，
日暮青山望乡泣。风吹新绿草芽坼，雨洒轻黄柳条湿。
此生知负少年春，不展愁眉欲三十。

· 全唐诗 ·

卷 436_86【寒闺夜】

白居易

夜半衾裯冷，孤眠懒未能。笼香销尽火，巾泪滴成冰。

为惜影相伴，通宵不灭灯。

卷 436_87【寄湘灵】

白居易

泪眼凌寒冻不流，每经高处即回头。

遥知别后西楼上，应凭栏干独自愁。

卷 436_88【冬至宿杨梅馆】

白居易

十一月中长至夜，三千里外远行人。

若为独宿杨梅馆，冷枕单床一病身。

· 全唐诗 ·

卷 436_89 【临江送夏瞻】

白居易

悲君老别我沾巾，七十无家万里身。

愁见舟行风又起，白头浪里白头人。

卷 436_90 【冬夜示敏巢】

白居易

炉火欲销灯欲尽，夜长相对百忧生。

他时诸处重相见，莫忘今宵灯下情。

卷 436_91 【客中守岁】

白居易

守岁尊无酒，思乡泪满巾。始知为客苦，不及在家贫。

畏老偏惊节，防愁预恶春。故园今夜里，应念未归人。

· 全唐诗 ·

卷 436_92【问淮水】

白居易

自嗟名利客，扰扰在人间。何事长淮水，东流亦不闲。

卷 436_93【宿樟亭驿】

白居易

夜半樟亭驿，愁人起望乡。月明何所见，潮水白茫茫。

卷 436_94【及第后忆旧山】

白居易

偶献子虚登上第，却吟招隐忆中林。

春萝秋桂莫惆怅，纵有浮名不系心。

· 全唐诗 ·

卷 436_95【题李次云窗竹】

白居易

不用裁为鸣凤管，不须截作钓鱼竿。

千花百草凋零后，留向纷纷雪里看。

卷 436_96【花下自劝酒】

白居易

酒盏酌来须满满，花枝看即落纷纷。

莫言三十是年少，百岁三分已一分。

卷 436_97【题李十一东亭】

白居易

相思夕上松台立，蛩思蝉声满耳秋。

惆怅东亭风月好，主人今夜在鄜州。

· 全唐诗 ·

卷 436_98【春村】

白居易

二月村园暖，桑间戴胜飞。农夫春旧谷，蚕妾捣新衣。

牛马因风远，鸡豚过社稀。黄昏林下路，鼓笛赛神归。

卷 436_99【题施山人野居】

白居易

得道应无著，谋生亦不妨。春泥秧稻暖，夜火焙茶香。

水巷风尘少，松斋日月长。高闲真是贵，何处觅侯王。

· 全唐诗 ·

卷四百三十七

卷 437_1 【翰林中送独孤二十七起居罢职出院】

白居易

碧落留云住，青冥放鹤还。银台向南路，从此到人间。

卷 437_2 【重寻杏园】

白居易

忽忆芳时频酩酊，却寻醉处重裴回。
杏花结子春深后，谁解多情又独来。

卷 437_3 【曲江独行】

白居易

独来独去何人识，厩马朝衣野客心。
闲爱无风水边坐，杨花不动树阴阴。

· 全唐诗 ·

卷 437_4【同李十一醉忆元九】

白居易

花时同醉破春愁，醉折花枝当酒筹。

忽忆故人天际去，计程今日到凉州。

卷 437_5【同钱员外题绝粮僧巨川】

白居易

三十年来坐对山，唯将无事化人间。

斋时往往闻钟笑，一食何如不食闲。

卷 437_6【绝句代书赠钱员外】

白居易

欲寻秋景闲行去，君病多慵我兴孤。

可惜今朝山最好，强能骑马出来无。

· 全唐诗 ·

卷 437_7【晚秋有怀郑中旧隐】

白居易

天高风袅袅，乡思绕关河。寥落归山梦，殷勤采蕨歌。
病添心寂寞，愁入鬓蹉跎。晚树蝉鸣少，秋阶日上多。
长闲羨云鹤，久别愧烟萝。其奈丹墀上，君恩未报何。

卷 437_8【禁中九日对菊花酒忆元九】

白居易

赐酒盈杯谁共持，宫花满把独相思。
相思只傍花边立，尽日吟君咏菊诗。

卷 437_9【送王十八归山，寄题仙游寺】

白居易

曾于太白峰前住，数到仙游寺里来。黑水澄时潭底出，
白云破处洞门开。林间暖酒烧红叶，石上题诗扫绿苔。
惆怅旧游那复到，菊花时节羨君回。

· 全唐诗 ·

卷 437_10【答张籍，因以代书】

白居易

怜君马瘦衣裘薄，许到江东访鄙夫。

今日正闲天又暖，可能扶病暂来无。

卷 437_11【曲江早春】

白居易

曲江柳条渐无力，杏园伯劳初有声。

可怜春浅游人少，好傍池边下马行。

卷 437_12【见元九悼亡诗，因以此寄】

白居易

夜泪暗销明月幌，春肠遥断牡丹庭。

人间此病治无药，唯有楞伽四卷经。

· 全唐诗 ·

卷 437_13【寒食夜】

白居易

无月无灯寒食夜，夜深犹立暗花前。

忽因时节惊年几，四十如今欠一年。

卷 437_14【杏园花落时招钱员外同醉】

白居易

花园欲去去应迟，正是风吹狼藉时。

近西数树犹堪醉，半落春风半在枝。

卷 437_15【重题西明寺牡丹】

白居易

往年君向东都去，曾叹花时君未回。今年况作江陵别，

惆怅花前又独来。只愁离别长如此，不道明年花不开。

· 全唐诗 ·

卷 437_16 【同钱员外禁中夜直】

白居易

宫漏三声知半夜，好风凉月满松筠。
此时闲坐寂无语，药树影中唯两人。

卷 437_17 【禁中夜作，书与元九】

白居易

心绪万端书两纸，欲封重读意迟迟。
五声宫漏初鸣夜，一点窗灯欲灭时。

卷 437_18 【八月十五日夜禁中独直，对月忆元九】

白居易

银台金阙夕沈沈，独宿相思在翰林。三五夜中新月色，
二千里外故人心。渚宫东面烟波冷，浴殿西头钟漏深。
犹恐清光不同见，江陵卑湿足秋阴。

· 全唐诗 ·

卷 437_19【寄陈式五兄】

白居易

年来白发两三茎，忆别君时髭未生。
惆怅料君应满鬓，当初是我十年兄。

卷 437_20【庾顺之以紫霞绮远赠，以诗答之】

白居易

千里故人心郑重，一端香绮紫氛氲。开缄日映晚霞色，
满幅风生秋水纹。为褥欲裁怜叶破，制裘将翦惜花分。
不如缝作合欢被，寤寐相思如对君。

卷 437_21【送元八归凤翔】

白居易

莫道岐州三日程，其如风雪一身行。
与君况是经年别，暂到城来又出城。

· 全唐诗 ·

卷 437_22【雨雪放朝，因怀微之】

白居易

归骑纷纷满九衢，放朝三日为泥涂。
不知雨雪江陵府，今日排衙得免无。

卷 437_23【咏怀】

白居易

岁去年来尘土中，眼看变作白头翁。
如何办得归山计，两顷村田一亩宫。

卷 437_24【闻微之江陵卧病，以大通中散、碧腴垂云膏寄之，因题四韵】

白居易

已题一帖红消散，又封一合碧云英。凭人寄向江陵去，
道路迢迢一月程。未必能治江上瘴，且图遥慰病中情。
到时想得君拈得，枕上开看眼暂明。

· 全唐诗 ·

卷 437_25 【酬钱员外雪中见寄】

白居易

松雪无尘小院寒，闭门不似住长安。

烦君想我看心坐，报道心空无可看。

卷 437_26 【重酬钱员外】

白居易

雪中重寄雪山偈，问答殷勤四句中。

本立空名缘破妄，若能无妄亦无空。

卷 437_27 【独酌忆微之】

白居易

独酌花前醉忆君，与君春别又逢春。

惆怅银杯来处重，不曾盛酒劝闲人。

· 全唐诗 ·

卷 437_28【微之宅残牡丹】

白居易

残红零落无人赏，雨打风摧花不全。

诸处见时犹怅望，况当元九小亭前。

卷 437_29【新磨镜】

白居易

衰容常晚栺，秋镜偶新磨。一与清光对，方知白发多。

鬓毛从幻化，心地付头陀。任意浑成雪，其如似梦何。

卷 437_30【感发落】

白居易

昔日愁头白，谁知未白衰。眼看应落尽，无可变成丝。

· 全唐诗 ·

卷 437_31【八月十五日夜，闻崔大员外翰林独直，对酒玩月，因怀禁中清景，偶题是诗】

白居易

秋月高悬空碧外，仙郎静玩禁闱间。岁中唯有今宵好，
海内无如此地闲。皓色分明双阙榜，清光深到九门关。
遥闻独醉还惆怅，不见金波照玉山。

卷 437_32【酬王十八见寄】

白居易

秋思太白峰头雪，晴忆仙游洞口云。
未报皇恩归未得，惭君为寄北山文。

卷 437_33【立春日酬钱员外曲江同行见赠】

白居易

下直遇春日，垂鞭出禁闱。两人携手语，十里看山归。
柳色早黄浅，水文新绿微。风光向晚好，车马近南稀。
机尽笑相顾，不惊鸥鹭飞。

· 全唐诗 ·

卷 437_34 【和钱员外青龙寺上方望旧山】

白居易

旧峰松雪旧溪云，怅望今朝遥属君。
共道使臣非俗吏，南山莫动北山文。

卷 437_35 【宴周皓大夫光福宅】

白居易

何处风光最可怜，妓堂阶下砌台前。轩车拥路光照地，
丝管入门声沸天。绿蕙不香饶桂酒，红樱无色让花钿。
野人不敢求他事，唯借泉声伴醉眠。

卷 437_36 【晚秋夜】

白居易

碧空溶溶月华静，月里愁人吊孤影。花开残菊傍疏篱，
叶下衰桐落寒井。塞鸿飞急觉秋尽，邻鸡鸣迟知夜永。
凝情不语空所思，风吹白露衣裳冷。

· 全唐诗 ·

卷 437_37 【惜牡丹花二首】

白居易

惆怅阶前红牡丹，晚来唯有两枝残。
明朝风起应吹尽，夜惜衰红把火看。

寂寞萎红低向雨，离披破艳散随风。
晴明落地犹惆怅，何况飘零泥土中。

卷 437_38 【答元九礼同宿见赠】

白居易

相逢俱叹不闲身，直日常多斋日频。
晓鼓一声分散去，明朝风景属何人。

卷 437_39 【答马侍御见赠】

白居易

谬入金门侍玉除，烦君问我意何如。
蟠木讵堪明主用，笼禽徒与故人疏。
苑花似雪同随辇，宫月如眉伴直庐。
浅薄求贤思自代，嵇康莫寄绝交书。

· 全唐诗 ·

卷 437_40 【上巳日恩赐曲江宴会即事】

白居易

赐欢仍许醉，此会兴如何。翰苑主恩重，曲江春意多。
花低羞艳妓，莺散让清歌。共道升平乐，元和胜永和。

卷 437_41 【夜惜禁中桃花，因怀钱员外】

白居易

前日归时花正红，今夜宿时枝半空。
坐惜残芳君不见，风吹狼藉月明中。

卷 437_42 【和钱员外早冬玩禁中新菊】

白居易

禁署寒气迟，孟冬菊初坼。新黄间繁绿，烂若金照碧。
仙郎小隐日，心似陶彭泽。秋怜潭上看，日惯篱边摘。
今来此地赏，野意潜自适。金马门内花，玉山峰下客。
寒芳引清句，吟玩烟景夕。赐酒色偏宜，握兰香不敌。
凄凄百卉死，岁晚冰霜积。唯有此花开，殷勤助君惜。

· 全唐诗 ·

卷 437_43【答刘戒之早秋别墅见寄】

白居易

凉风木槿篱，暮雨槐花枝。并起新秋思，为得故人诗。

避地鸟择木，升朝鱼在池。城中与山下，喧静暗相思。

卷 437_44【凉夜有怀】

白居易

念别感时节，早蛩闻一声。风帘夜凉入，露簟秋意生。

灯尽梦初罢，月斜天未明。暗凝无限思，起傍药阑行。

卷 437_45【秋思】

白居易

病眠夜少梦，闲立秋多思。寂寞余雨晴，萧条早寒至。

鸟栖红叶树，月照青苔地。何况镜中年，又过三十二。

· 全唐诗 ·

卷 437_46 【禁中闻蛩】

白居易

悄悄禁门闭，夜深无月明。西窗独暗坐，满耳新蛩声。

卷 437_47 【秋虫】

白居易

切切暗窗下，嘒嘒深草里。秋天思妇心，雨夜愁人耳。

卷 437_48 【赠别宣上人】

白居易

上人处世界，清净何所似。似彼白莲花，在水不著水。

性真悟泡幻，行洁离尘滓。修道来几时，身心俱到此。

嗟余牵世网，不得长依止。离念与碧云，秋来朝夕起。

· 全唐诗 ·

卷 437_49【春夜喜雪，有怀王二十二】

白居易

夜雪有佳趣，幽人出书帷。微寒生枕席，轻素对阶墀。
坐罢楚弦曲，起吟班扇诗。明宜灭烛后，净爱褰帘时。
窗引曙色早，庭销春气迟。山阴应有兴，不卧待徽之。

卷 437_50【酬和元九东川路诗十二首·骆口驿旧题诗】

白居易

拙诗在壁无人爱，鸟污苔侵文字残。
唯有多情元侍御，绣衣不惜拂尘看。

卷 437_51【酬和元九东川路诗十二首·南秦雪】

白居易

往岁曾为西邑吏，惯从骆口到南秦。三时云冷多飞雪，
二月山寒少有春。我思旧事犹惆怅，君作初行定苦辛。
仍赖愁猿寒不叫，若闻猿叫更愁人。

· 全唐诗 ·

卷 437_52 【酬和元九东川路诗十二首·山枇杷花二首】

白居易

万重青嶂蜀门口，一树红花山顶头。
春尽忆家归未得，低红如解替君愁。

叶如裙色碧绡浅，花似芙蓉红粉轻。
若使此花兼解语，推囚御史定违程。

卷 437_53 【酬和元九东川路诗十二首·江楼月】

白居易

嘉陵江曲曲江池，明月虽同人别离。一宵光景潜相忆，
两地阴晴远不知。谁料江边怀我夜，正当池畔望君时。
今朝共语方同悔，不解多情先寄诗。

卷 437_54 【酬和元九东川路诗十二首·亚枝花】

白居易

山邮花木似平阳，愁杀多情骢马郎。
还似升平池畔坐，低头向水自看妆。

· 全唐诗 ·

卷 437_55 【酬和元九东川路诗十二首·江上笛】

白居易

江上何人夜吹笛，声声似忆故园春。
此时闻者堪头白，况是多愁少睡人。

卷 437_56 【酬和元九东川路诗十二首·嘉陵夜有怀二首】

白居易

露湿墙花春意深，西廊月上半床阴。
怜君独卧无言语，唯我知君此夜心。

不明不暗胧胧月，不暖不寒慢慢风。
独卧空床好天气，平明闲事到心中。

卷 437_57 【酬和元九东川路诗十二首·夜深行】

白居易

百牢关外夜行客，三殿角头宵直人。
莫道近臣胜远使，其如同是不闲身。

· 全唐诗 ·

卷 437_58【酬和元九东川路诗十二首·望驿台】

白居易

靖安宅里当窗柳，望驿台前扑地花。
两处春光同日尽，居人思客客思家。

卷 437_59【酬和元九东川路诗十二首·江岸梨花】

白居易

梨花有思缘和叶，一树江头恼杀君。
最似孀闺少年妇，白妆素袖碧纱裙。

卷 437_60【答谢家最小偏怜女】

白居易

嫁得梁鸿六七年，耽书爱酒日高眠。雨荒春圃唯生草，
雪压朝厨未有烟。身病忧来缘女少，家贫忘却为夫贤。
谁知厚俸今无分，枉向秋风吹纸钱。

· 全唐诗 ·

卷 437_61【答骑马入空台】

白居易

君入空台去，朝往暮还来。我入泉台去，泉门无复开。

鰥夫仍系职，稚女未胜哀。寂寞咸阳道，家人覆墓回。

卷 437_62【答山驿梦】

白居易

入君旅梦来千里，闭我幽魂欲二年。

莫忘平生行坐处，后堂阶下竹丛前。

卷 437_63【和元九与吕二同宿话旧感赠】

白居易

见君新赠吕君诗，忆得同年行乐时。争入杏园齐马首，
潜过柳曲斗蛾眉。八人云散俱游宦，七度花开尽别离。
闻道秋娘犹且在，至今时复问微之。

· 全唐诗 ·

卷 437_64 【忆元九】

白居易

渺渺江陵道，相思远不知。近来文卷里，半是忆君诗。

卷 437_65 【萧员外寄新蜀茶】

白居易

蜀茶寄到但惊新，渭水煎来始觉珍。

满瓯似乳堪持玩，况是春深酒渴人。

卷 437_66 【寄上大兄】

白居易

秋鸿过尽无书信，病戴纱巾强出门。

独上荒台东北望，日西愁立到黄昏。

· 全唐诗 ·

卷 437_67【病中哭金銮子】

白居易

岂料吾方病，翻悲汝不全。卧惊从枕上，扶哭就灯前。
有女诚为累，无儿岂免怜。病来才十日，养得已三年。

慈泪随声迸，悲肠遇物牵。故衣犹架上，残药尚头边。
送出深村巷，看封小墓田。莫言三里地，此别是终天。

卷 437_68【寄内】

白居易

条桑初绿即为别，柿叶半红犹未归。
不如村妇知时节，解为田夫秋捣衣。

卷 437_69【病气】

白居易

自知气发每因情，情在何由气得平。
若问病根深与浅，此身应与病齐生。

· 全唐诗 ·

卷 437_70 【叹元九】

白居易

不入城门来五载，同时班列尽官高。
何人牢落犹依旧，唯有江陵元士曹。

卷 437_71 【眼暗】

白居易

早年勤倦看书苦，晚岁悲伤出泪多。眼损不知都自取，
病成方悟欲如何。夜昏乍似灯将灭，朝暗长疑镜未磨。
千药万方治不得，唯应闭目学头陀。

卷 437_72 【得袁相书】

白居易

谷苗深处一农夫，面黑头斑手把锄。
何意使人犹识我，就田来送相公书。

· 全唐诗 ·

卷 437_73【病中作】

白居易

病来城里诸亲故，厚薄亲疏心总知。

唯有蔚章于我分，深于同在翰林时。

卷 437_74【感化寺见元九、刘三十二题名处】

白居易

微之谪去千余里，太白无来十一年。

今日见名如见面，尘埃壁上破窗前。

卷 437_75【游悟贞寺回山下别张殷衡】

白居易

世缘未了治不得，孤负青山心共知。

愁君又入都门去，即是红尘满眼时。

· 全唐诗 ·

卷 437_76 【村居寄张殷衡】

白居易

金氏村中一病夫，生涯濩落性灵迂。唯看老子五千字，
不蹋长安十二衢。药铍夜倾残酒暖，竹床寒取旧毡铺。
闻君欲发江东去，能到茅庵访别无。

卷 437_77 【病中得樊大书】

白居易

荒村破屋经年卧，寂绝无人问病身。
唯有东都樊著作，至今书信尚殷勤。

卷 437_78 【开元九诗书卷】

白居易

红笺白纸两三束，半是君诗半是书。
经年不展缘身病，今日开看生蠹鱼。

· 全唐诗 ·

卷 437_79【昼卧】

白居易

抱枕无言语，空房独悄然。谁知尽日卧，非病亦非眠。

卷 437_80【夜坐】

白居易

庭前尽日立到夜，灯下有时坐彻明。

此情不语何人会，时复长吁一两声。

卷 437_81【暮立】

白居易

黄昏独立佛堂前，满地槐花满树蝉。

大抵四时心总苦，就中肠断是秋天。

· 全唐诗 ·

卷 437_82【有感】

白居易

绝弦与断丝，犹有却续时。唯有衷肠断，应无续得期。

卷 437_83【答友问】

白居易

似玉童颜尽，如霜病鬓新。莫惊身顿老，心更老于身。

卷 437_84【村夜】

白居易

霜草苍苍虫切切，村南村北行人绝。

独出前门望野田，月明荞麦花如雪。

· 全唐诗 ·

卷 437_85【闻虫】

白居易

暗虫唧唧夜绵绵，况是秋阴欲雨天。

犹恐愁人暂得睡，声声移近卧床前。

卷 437_86【寒食夜有怀】

白居易

寒食非长非短夜，春风不热不寒天。

可怜时节堪相忆，何况无灯各早眠。

卷 437_87【赠内】

白居易

漠漠暗苔新雨地，微微凉露欲秋天。

莫对月明思往事，损君颜色减君年。

· 全唐诗 ·

卷 437_88 【得钱舍人书问眼疾】

白居易

春来眼暗少心情，点尽黄连尚未平。

唯得君书胜得药，开缄未读眼先明。

卷 437_89 【还李十一马】

白居易

传语李君劳寄马，病来唯著杖扶身。

纵拟强骑无出处，却将牵与趁朝人。

卷 437_90 【九日寄行简】

白居易

摘得菊花携得酒，绕村骑马思悠悠。

下邳田地平如掌，何处登高望梓州。

· 全唐诗 ·

卷 437_91【夜坐】

白居易

斜月入前楹，迢迢夜坐情。梧桐上阶影，蟋蟀近床声。

曙傍窗间至，秋从簟上生。感时因忆事，不寝到鸡鸣。

卷 437_92【村居二首】

白居易

田园莽苍经春早，篱落萧条尽日风。

若问经过谈笑者，不过田舍白头翁。

门闭仍逢雪，厨寒未起烟。贫家重寥落，半为日高眠。

卷 437_93【早春】

白居易

雪散因和气，冰开得暖光。春销不得处，唯有鬓边霜。

卷 437_94【和梦游春诗一百韵】

白居易

昔君梦游春，梦游仙山曲。恍若有所遇，似惬平生欲。
因寻菖蒲水，渐入桃花谷。到一红楼家，爱之看不足。
池流渡清泚，草嫩蹋绿蓐。门柳暗全低，檐樱红半熟。
转行深深院，过尽重重屋。乌龙卧不惊，青鸟飞相逐。
渐闻玉珮响，始辨珠履躅。遥见窗下人，娉婷十五六。
霞光抱明月，莲艳开初旭。缥缈云雨仙，氛氲兰麝馥。
风流薄梳洗，时世宽妆束。袖软异文绡，裾轻单丝縠。
裙腰银线压，梳掌金筐蹙。带襞紫蒲萄，袴花红石竹。
凝情都未语，付意微相瞩。眉敛远山青，鬟低片云绿。
帐牵翡翠带，被解鸳鸯襦。秀色似堪餐，秾华如可掬。
半卷锦头席，斜铺绣腰褥。朱唇素指匀，粉汗红绵扑。
心惊睡易觉，梦断魂难续。笼委独栖禽，剑分连理木。
存诚期有感，誓志贞无黜。京洛八九春，未曾花里宿。
壮年徒自弃，佳会应无复。鸾歌不重闻，凤兆从兹卜。
韦门女清贵，裴氏甥贤淑。罗扇夹花灯，金鞍攒绣毂。
既倾南国貌，遂坦东床腹。刘阮心渐忘，潘杨意方睦。
新修履信第，初食尚书禄。九酝备圣贤，八珍穷水陆。
秦家重萧史，彦辅怜卫叔。朝饩馈独盘，夜醪倾百斛。
亲宾盛辉赫，妓乐纷晔煜。宿醉才解醒，朝欢俄枕麹。
饮过君子争，令甚将军酷。酩酊歌鸂鶒，颠狂舞鸂鶒。
月流春夜短，日下秋天速。谢傅隙过驹，萧娘风过烛。
全凋蕣花折，半死梧桐秃。暗镜对孤鸾，哀弦留寡鹄。

· 全唐诗 ·

凄凄隔幽显，冉冉移寒燠。万事此时休，百身何处赎。
提携小儿女，将领旧姻族。再入朱门行，一傍青楼哭。
枥空无厩马，水涸失池鹭。摇落废井梧，荒凉故篱菊。
莓苔上几阁，尘土生琴筑。舞榭缀蟭蛸，歌梁聚蝙蝠。
嫁分红粉妾，卖散苍头仆。门客思彷徨，家人泣咿噢。
心期正萧索，宦序仍拘跼。怀策入崑函，驱车辞郾鄩。
逢时念既济，聚学思大畜。端详箴仕蓍，磨拭穿杨镞。
始从雠校职，首中贤良目。一拔侍瑶墀，再升纓绣服。
誓酬君王宠，愿使朝廷肃。密勿奏封章，清明操宪牍。
鹰鞬中病下，豸角当邪触。纠谬静东周，申冤动南蜀。
危言诋阉寺，直气忤钧轴。不忍曲作钩，乍能折为玉。
扪心无愧畏，腾口有谤讟。只要明是非，何曾虞祸福。
车摧太行路，剑落酆城狱。襄汉问修途，荆蛮指殊俗。
谪为江府掾，遣事荆州牧。趋走谒麾幢，喧烦视鞭朴。
簿书常自领，缿囚每亲鞫。竟日坐官曹，经旬旷休沐。
宅荒渚宫草，马瘦畬田粟。薄俸等涓毫，微官同桎梏。
月中照形影，天际辞骨肉。鹤病翅羽垂，兽穷爪牙缩。
行看须间白，谁劝杯中绿。时伤大野麟，命问长沙鵬。
夏梅山雨渍，秋瘴江云毒。巴水白茫茫，楚山青簇簇。
吟君七十韵，是我心所蓄。既去诚莫追，将来幸前勖。
欲除烦恼病，当取禅经读。须悟事皆空，无令念将属。
请思游春梦，此梦何闪倏。艳色即空花，浮生乃焦谷。
良姻在嘉偶，顷克为单独。入仕欲荣身，须臾成黜辱。
合者离之始，乐兮忧所伏。愁恨僧祇长，欢荣刹那促。
觉悟因傍喻，迷执由当局。膏明诱暗蛾，阳焱奔痴鹿。
贪为苦聚落，爱是悲林麓。水荡无明波，轮回死生辐。
尘应甘露洒，垢待醍醐浴。障要智灯烧，魔须慧刀戮。

· 全唐诗 ·

外熏性易染，内战心难衄。法句与心王，期君日三复。

卷 437_95【王昭君二首】

白居易

满面胡沙满鬓风，眉销残黛脸销红。
愁苦辛勤憔悴尽，如今却似画图中。

汉使却回凭寄语，黄金何日赎蛾眉。
君王若问妾颜色，莫道不如宫里时。

卷四百三十八

卷 438_1 【渭村退居，寄礼部崔侍郎、翰林钱舍人诗一百韵】

白居易

圣代元和岁，闲居渭水阳。不才甘命舛，多幸遇时康。
朝野分伦序，贤愚定否臧。重文疏卜式，尚少弃冯唐。
由是推天运，从兹乐性场。笼禽放高翥，雾豹得深藏。
世虑休相扰，身谋且自强。犹须务衣食，未免事农桑。
薤草通三径，开田占一坊。昼扉扃白版，夜碓扫黄粱。
隙地治场圃，闲时粪土疆。枳篱编刺夹，薤垄擘科秧。
穡力嫌身病，农心愿岁穰。朝衣典杯酒，佩剑博牛羊。
困倚栽松锸，饥提采蕨筐。引泉来后涧，移竹下前冈。
生计虽勤苦，家资甚渺茫。尘埃常满甌，钱帛少盈囊。
弟病仍扶杖，妻愁不出房。传衣念蓝缕，举案笑糟糠。
犬吠村胥闹，蝉鸣织妇忙。纳租看县帖，输粟问军仓。
夕歇攀村树，秋行绕野塘。云容阴惨澹，月色冷悠扬。
荞麦铺花白，棠梨间叶黄。早寒风撼撼，新霁月苍苍。
园菜迎霜死，庭芜过雨荒。檐空愁宿燕，壁暗思啼螳。
眼为看书损，肱因运甕伤。病骸浑似木，老鬓欲成霜。
少睡知年长，端忧觉夜长。旧游多废忘，往事偶思量。

· 全唐诗 ·

忽忆烟霄路，常陪剑履行。登朝思检束，入阁学趋跄。
命偶风云会，恩覃雨露霏。沾枯发枝叶，磨钝起锋铓。
崔阁连镳骛，钱兄接翼翔。齐竽混韶夏，燕石厕琳琅。
同日升金马，分宵直未央。共词加宠命，合表谢恩光。
厩马骄初跨，天厨味始尝。朝晡颁饼饵，寒暑赐衣裳。
对秉鹅毛笔，俱含鸡舌香。青缣衾薄絮，朱里幕高张。
昼食恒连案，宵眠每并床。差肩承诏旨，连署进封章。
起草偏同视，疑文最共详。灭私容点窜，穷理析毫芒。
便共输肝胆，何曾异肺肠。慎微参石奋，决密与张汤。
禁闥青交琐，宫垣紫界墙。井阑排菡萏，檐瓦斗鸳鸯。
楼额题鵷鹄，池心浴凤凰。风枝万年动，温树四时芳。
宿露凝金掌，晨晖上璧珰。砌筠涂绿粉，庭果滴红浆。
晓从朝兴庆，春陪宴柏梁。传呼鞭索索，拜舞珮锵锵。
仙仗环双阙，神兵辟两厢。火翻红尾旆，冰卓白竿枪。
滉漾经鱼藻，深沈近浴堂。分庭皆命妇，对院即储皇。
贵主冠浮动，亲王辔闹装。金钿相照耀，朱紫间荧煌。
球簇桃花绮，歌巡竹叶觞。洼银中贵带，昂黛内人妆。
赐褱东城下，颁酺曲水傍。尊壘分圣酒，妓乐借仙倡。
浅酌看红药，徐吟把绿杨。宴回过御陌，行歇入僧房。
白鹿原东脚，青龙寺北廊。望春花景暖，避暑竹风凉。
下直闲如社，寻芳醉似狂。有时还后到，无处不相将。
鸡鹤初虽杂，萧兰久乃彰。来燕隗貴重，去鲁孔恓惶。
聚散期难定，飞沉势不常。五年同昼夜，一别似参商。
屈折孤生竹，销摧百炼钢。途穷任憔悴，道在肯彷徨。
尚念遗簪折，仍怜病雀疮。恤寒分赐帛，救馁减馀粮。
药物来盈裹，书题寄满箱。殷勤翰林主，珍重礼闱郎。
煦沫诚多谢，抁扶岂所望。提携劳气力，吹簸不飞扬。

· 全唐诗 ·

拙劣才何用，龙钟分自当。妆嫫徒费黛，磨甌讵成璋。
习隐将时背，干名与道妨。外身宗老氏，齐物学蒙庄。
疏放遗千虑，愚蒙守一方。乐天无怨叹，倚命不劬勩。
愤懣胸须豁，交加臂莫攘。珠沉犹是宝，金跃未为祥。
泥尾休摇掉，灰心罢激昂。渐闲亲道友，因病事医王。
息乱归禅定，存神入坐亡。断痴求慧剑，济苦得慈航。
不动为吾志，无何是我乡。可怜身与世，从此两相忘。

卷 438_2 【酬卢秘书二十韵】

白居易

谬历文场选，惭非翰苑才。云霄高暂致，毛羽弱先摧。
识分忘轩冕，知归返草莱。杜陵书积蠹，丰狱剑生苔。
晦厌鸣鸡雨，春惊震蛰雷。旧恩收坠履，新律动寒灰。
凤诏容徐起，鹓行许重陪。衰颜虽拂拭，蹇步尚低徊。
睡少钟偏警，行迟漏苦催。风霜趁朝去，泥雪拜陵回。
上感君犹念，傍惭友或推。石顽镌费匠，女丑嫁劳媒。
倏忽青春度，奔波白日颓。性将时共背，病与老俱来。
闻有蓬壶客，知怀杞梓材。世家标甲第，官职滞麟台。
笔尽铅黄点，诗成锦绣堆。尝思豁云雾，忽喜访尘埃。
心为论文合，眉因劝善开。不胜珍重意，满袖写琼瑰。

· 全唐诗 ·

卷 438_3【题卢秘书夏日新栽竹二十韵】

白居易

湘竹初封植，卢生此考槃。久持霜节苦，新托露根难。
等度须当砌，疏稠要满阑。买怜分薄俸，栽称作闲官。
叶翦蓝罗碎，茎抽玉琯端。几声清淅沥，一簇绿檀栾。
未夜青岚入，先秋白露团。拂肩摇翡翠，熨手弄琅玕。
韵透窗风起，阴铺砌月残。炎天闻觉冷，窄地见疑宽。
梢动胜摇扇，枝低好挂冠。碧笼烟幕幕，珠洒雨珊珊。
晚箨晴云展，阴芽蛰虺蟠。爱从抽马策，惜未截鱼竿。
松韵徒烦听，桃夭不足观。梁惭当家杏，台陋本司兰。
撑拨诗人兴，勾牵酒客欢。静连芦簟滑，凉拂葛衣单。
岂止消时暑，应能保岁寒。莫同凡草木，一种夏中看。

卷 438_4【渭村酬李二十见寄】

白居易

百里音书何太迟，暮秋把得暮春诗。柳条绿日君相忆，
梨叶红时我始知。莫叹学官贫冷落，犹胜村客病支离。
形容意绪遥看取，不似华阳观里时。

· 全唐诗 ·

卷 438_5【初授赞善大夫早朝，寄李二十助教】

白居易

病身初谒青宫日，衰貌新垂白发年。寂寞曹司非热地，
萧条风雪是寒天。远坊早起常侵鼓，瘦马行迟苦费鞭。
一种共君官职冷，不如犹得日高眠。

卷 438_6【欲与元八卜邻，先有是赠】

白居易

平生心迹最相亲，欲隐墙东不为身。明月好同三径夜，
绿杨宜作两家春。每因暂出犹思伴，岂得安居不择邻。
何独终身数相见，子孙长作隔墙人。

卷 438_7【游城南，留元九、李二十晚归】

白居易

老游春饮莫相违，不独花稀人亦稀。
更劝残杯看日影，犹应趁得鼓声归。

· 全唐诗 ·

卷 438_8【广宣上人以应制诗见示，因以赠之，诏许上人居安国寺红楼院以诗供奉】

白居易

道林谈论惠休诗，一到人天便作师。香积筵承紫泥诏，
昭阳歌唱碧云词。红楼许住请银钥，翠辇陪行蹋玉墀。
惆怅甘泉曾侍从，与君前后不同时。

卷 438_9【重过秘书旧房，因题长句】

白居易

阁前下马思裴回，第二房门手自开，昔为白面书郎去，
今作苍须赞善来。吏人不识多新补，松竹相亲是旧栽。
应有题墙名姓在，试将衫袖拂尘埃。

卷 438_10【重到城七绝句·见元九】

白居易

容貌一日减一日，心情十分无九分。
每逢陌路犹嗟叹，何况今朝是见君。

· 全唐诗 ·

卷 438_11【重到城七绝句·高相宅】

白居易

青苔故里怀恩地，白发新生抱病身。

涕泪虽多无哭处，永宁门馆属他人。

卷 438_12【重到城七绝句·张十八】

白居易

谏垣几见迁遗补，宪府频闻转殿监。

独有咏诗张太祝，十年不改旧官衔。

卷 438_13【重到城七绝句·刘家花】

白居易

刘家墙上花还发，李十门前草又春。

处处伤心心始悟，多情不及少情人。

· 全唐诗 ·

卷 438_14【重到城七绝句·裴五】

白居易

莫怪相逢无笑语，感今思旧戟门前。

张家伯仲偏相似，每见清扬一惘然。

卷 438_15【重到城七绝句·仇家酒】

白居易

年年老去欢情少，处处春来感事深。

时到仇家非爱酒，醉时心胜醒时心。

卷 438_16【重到城七绝句·恒寂师】

白居易

旧游分散人零落，如此伤心事几条。

会逐禅师坐禅去，一时灭尽定中消。

· 全唐诗 ·

卷 438_17【靖安北街赠李二十】

白居易

榆荚抛钱柳展眉，两人并马语行迟。
还似往年安福寺，共君私试却回时。

卷 438_18【重伤小女子】

白居易

学人言语凭床行，嫩似花房脆似琼。才知恩爱迎三岁，
未辨东西过一生。汝异下殇应杀礼，吾非上圣讵忘情。
伤心自叹鸠巢拙，长堕春雏养不成。

卷 438_19【过颜处士墓】

白居易

向坟道径没荒榛，满室诗书积暗尘。长夜肯教黄壤晓，
悲风不许白杨春。箪瓢颜子生仍促，布被黔娄死更贫。
未会悠悠上天意，惜将富寿与何人。

· 全唐诗 ·

卷 438_20 【题周皓大夫新亭子二十二韵】

白居易

东道常为主，南亭别待宾。规模何日创，景致一时新。
广砌罗红药，疏窗荫绿筠。锁开宾阁晓，梯上妓楼春。
置醴宁三爵，加笏过八珍。茶香飘紫笋，脍缕落红鳞。

辉赫车舆闹，珍奇鸟兽驯。猕猴看枥马，鹦鹉唤家人。
锦额帘高卷，银花醴慢巡。劝尝光禄酒，许看洛川神。
敛翠凝歌黛，流香动舞巾。裙翻绣鸂鶒，梳陷钿麒麟。

笛怨音含楚，筝娇语带秦。侍儿催画烛，醉客吐文茵。
投辖多连夜，鸣珂便达晨。入朝纡紫绶，待漏拥朱轮。
贵介交三事，光荣照四邻。甘浓将奉客，稳暖不缘身。

十载歌钟地，三朝节钺臣。爱才心倜傥，敦旧礼殷勤。
门以招贤盛，家因好事贫。始知豪杰意，富贵为交亲。

卷 438_21 【赋得听边鸿】

白居易

惊风吹起塞鸿群，半拂平沙半入云。
为问昭君月下听，何如苏武雪中闻。

· 全唐诗 ·

卷 438_22【见杨弘贞诗赋，因题绝句以自谕】

白居易

赋句诗章妙入神，末年三十即无身。
常嗟薄命形憔悴，若比弘贞是幸人。

卷 438_23【病中早春】

白居易

今朝枕上觉头轻，强起阶前试脚行。臃肿断来无气力，
风痰恼得少心情。暖消霜瓦津初合，寒减冰渠冻不成。
唯有愁人鬓间雪，不随春尽逐春生。

卷 438_24【送人贬信州判官】

白居易

地僻山深古上饶，土风贫薄道程遥。不唯迁客须恓屑，
见说居人也寂寥。溪畔毒沙藏水弩，城头枯树下山魈。
若于此郡为卑吏，刺史厅前又折腰。

· 全唐诗 ·

卷 438_25 【曲江醉后赠诸亲故】

白居易

郭东丘墓何年客，江畔风光几日春。只合殷勤逐杯酒，
不须疏索向交亲。中天或有长生药，下界应无不死人。
除却醉来开口笑，世间何事更关身。

卷 438_26 【和元八侍御升平新居四绝句·看花屋】

白居易

忽惊映树新开屋，却似当檐故种花。
可惜年年红似火，今春始得属元家。

卷 438_27 【和元八侍御升平新居四绝句·累土山】

白居易

堆土渐高山意出，终南移入户庭间。
玉峰蓝水应惆怅，恐见新山望旧山。

· 全唐诗 ·

卷 438_28【和元八侍御升平新居四绝句·高亭】

白居易

亭脊太高君莫拆，东家留取当西山。

好看落日斜衔处，一片春岚映半环。

卷 438_29【和元八侍御升平新居四绝句·松树】

白居易

白金换得青松树，君既先栽我不栽。

幸有西风易凭仗，夜深偷送好声来。

卷 438_30【醉后却寄元九】

白居易

蒲池村里匆匆别，沔水桥边兀兀回。

行到城门残酒醒，万重离恨一时来。

· 全唐诗 ·

卷 438_31【重寄】

白居易

萧散弓惊雁，分飞剑化龙。悠悠天地内，不死会相逢。

卷 438_32【李十一舍人松园饮小酌酒，得元八侍御诗，叙云在台中推院有鞫狱之苦，即事书怀，因酬四韵】

白居易

爱酒舍人开小酌，能文御史寄新诗。乱松园里醉相忆，
古柏厅前忙不知。早夏我当逃暑日，晚衙君是虑囚时。
唯应清夜无公事，新草亭中好一期。

卷 438_33【重到华阳观旧居】

白居易

忆昔初年三十二，当时秋思已难堪。
若为重入华阳院，病鬓愁心四十三。

· 全唐诗 ·

卷 438_34 【答劝酒】

白居易

莫怪近来都不饮，几回因醉却沾巾。

谁料平生狂酒客，如今变作酒悲人。

卷 438_35 【题王侍御池亭】

白居易

朱门深锁春池满，岸落蔷薇水浸莎。

毕竟林塘谁是主，主人来少客来多。

卷 438_36 【听水部吴员外新诗，因赠绝句】

白居易

朱绂仙郎白雪歌，和人虽少爱人多。

明朝说与诗人道，水部如今不姓何。

· 全唐诗 ·

卷 438_37【雨夜忆元九】

白居易

天阴一日便堪愁，何况连宵雨不休。

一种雨中君最苦，偏梁阁道向通州。

卷 438_38【雨中携元九诗访元八侍御】

白居易

微之诗卷忆同开，假日多应不入台。

好句无人堪共咏，冲泥蹋水就君来。

卷 438_39【赠杨秘书巨源】

白居易

早闻一箭取辽城，相识虽新有故情。清句三朝谁是敌，
白须四海半为兄。贫家薤草时时入，瘦马寻花处处行。
不用更教诗过好，折君官职是声名。

· 全唐诗 ·

卷 438_40 【和武相公感韦令公旧池孔雀】

白居易

索莫少颜色，池边无主禽。难收带泥翅，易结著人心。

顶毳落残碧，尾花销暗金。放归飞不得，云海故巢深。

卷 438_41 【寄生衣与微之，因题封上】

白居易

浅色縠衫轻似雾，纺花纱袴薄于云。

莫嫌轻薄但知著，犹恐通州热杀君。

卷 438_42 【白牡丹】

白居易

白花冷澹无人爱，亦占芳名道牡丹。

应似东宫白赞善，被人还唤作朝官。

· 全唐诗 ·

卷 438_43 【梦旧】

白居易

别来老大苦修道，炼得离心成死灰。

平生忆念消磨尽，昨夜因何入梦来。

卷 438_44 【戏题卢秘书新移蔷薇】

白居易

风动翠条腰袅娜，露垂红萼泪阑干。

移他到此须为主，不别花人莫使看。

卷 438_45 【曲江夜归，闻元八见访】

白居易

自入台来见面稀，班中遥得揖容辉。

早知相忆来相访，悔待江头明月归。

· 全唐诗 ·

卷 438_46 【苦热题恒寂师禅室】

白居易

人人避暑走如狂，独有禅师不出房。
可是禅房无热到，但能心静即身凉。

卷 438_47 【微之到通州日，授馆未安，见尘壁间有数行字，读之，即仆旧诗，其落句云：绿水红莲一朵开，千花百草无颜色。然不知题者何人。微之吟叹不足，因缀一章，兼录仆诗本同寄。省其诗，乃十五年前初及第时，赠长安妓人阿软绝句。缅思往事，杳若梦中，怀旧感今，因酬长句】

白居易

十五年前似梦游，曾将诗句结风流。偶助笑歌嘲阿软，
可知传诵到通州。昔教红袖佳人唱，今遣青衫司马愁。
惆怅又闻题处所，雨淋江馆破墙头。

卷 438_48 【得微之到官后书，备知通州之事，怅然有感，因成四章】

白居易

来书子细说通州，州在山根峡岸头。四面千重火云合，

· 全唐诗 ·

中心一道瘴江流。虫蛇白昼拦官道，蚊蚋黄昏扑郡楼。
何罪遣君居此地，天高无处问来由。

匡匡巖山万仞余，人家应似甑中居。寅年篱下多逢虎，
亥日沙头始卖鱼。衣斑梅雨长须熨，米涩畲田不解锄。
努力安心过三考，已曾愁杀李尚书。

人稀地僻医巫少，夏旱秋霖瘴疟多。老去一身须爱惜，
别来四体得如何。侏儒饱笑东方朔，薏苡谗忧马伏波。
莫遣沉愁结成病，时时一唱濯缨歌。

通州海内恓惶地，司马人间冗长官。伤鸟有弦惊不定，
卧龙无水动应难。剑埋狱底谁深掘，松偃霜中尽冷看。
举目争能不惆怅，高车大马满长安。

卷 438_49【病中答招饮者】

白居易

顾我镜中悲白发，尽君花下醉青春。
不缘眼痛兼身病，可是尊前第二人。

· 全唐诗 ·

卷 438_50【燕子楼三首】

白居易

满窗明月满帘霜，被冷灯残拂卧床。
燕子楼中霜月夜，秋来只为一入长。

钿晕罗衫色似烟，几回欲著即潸然。
自从不舞霓裳曲，叠在空箱十一年。

今春有客洛阳回，曾到尚书墓上来。
见说白杨堪作柱，争教红粉不成灰。

卷 438_51【初贬官过望秦岭】

白居易

草草辞家忧后事，迟迟去国问前途。
望秦岭上回头立，无限秋风吹白须。

· 全唐诗 ·

卷 438_52 【蓝桥驿见元九诗】

白居易

蓝桥春雪君归日，秦岭秋风我去时。

每到驿亭先下马，循墙绕柱觅君诗。

卷 438_53 【韩公堆寄元九】

白居易

韩公堆北涧西头，冷雨凉风拂面秋。

努力南行少惆怅，江州犹似胜通州。

卷 438_54 【发商州】

白居易

商州馆里停三日，待得妻孥相逐行。

若比李三犹自胜，儿啼妇哭不闻声。

· 全唐诗 ·

卷 438_55 【武关南见元九题山石榴花见寄】

白居易

往来同路不同时，前后相思两不知。

行过关门三四里，榴花不见见君诗。

卷 438_56 【红鹦鹉】

白居易

安南远进红鹦鹉，色似桃花语似人。

文章辩慧皆如此，笼槛何年出得身。

卷 438_57 【题四皓庙】

白居易

卧逃秦乱起安刘，舒卷如云得自由。

若有精灵应笑我，不成一事谪江州。

· 全唐诗 ·

卷 438_58【罢药】

白居易

自学坐禅休服药，从他时复病沉沉。

此身不要全强健，强健多生人我心。

卷 438_59【白鹭】

白居易

人生四十未全衰，我为愁多白发垂。

何故水边双白鹭，无愁头上亦垂丝。

卷 438_60【襄阳舟夜】

白居易

下马襄阳郭，移舟汉阴驿。秋风截江起，寒浪连天白。

本是多愁人，复此风波夕。

· 全唐诗 ·

卷 438_61【江夜舟行】

白居易

烟淡月濛濛，舟行夜色中。江铺满槽水，帆展半樯风。

叫曙嗷嗷雁，啼秋唧唧虫。只应催北客，早作白须翁。

卷 438_62【红藤杖】

白居易

交亲过浥别，车马到江回。唯有红藤杖，相随万里来。

卷 438_63【江上吟元八绝句】

白居易

大江深处月明时，一夜吟君小律诗。

应有水仙潜出听，翻将唱作步虚词。

· 全唐诗 ·

卷 438_64 【途中感秋】

白居易

节物行摇落，年颜坐变衰。树初黄叶日，人欲白头时。

乡国程程远，亲朋处处辞。唯残病与老，一步不相离。

卷 438_65 【登郢州白雪楼】

白居易

白雪楼中一望乡，青山簇簇水茫茫。

朝来渡口逢京使，说道烟尘近洛阳。

卷 438_66 【舟夜赠内】

白居易

三声猿后垂乡泪，一叶舟中载病身。

莫凭水窗南北望，月明月暗总愁人。

· 全唐诗 ·

卷 438_67【逢旧】

白居易

我梳白发添新恨，君扫青蛾减旧容。
应被傍人怪惆怅，少年离别老相逢。

卷 438_68【臼口阻风十日】

白居易

洪涛白浪塞江津，处处遭回事事违。世上方为失途客，
江头又作阻风人。鱼虾遇雨腥盈鼻，蚊蚋和烟痒满身。
老大光阴能几日，等闲臼口坐经旬。

卷 438_69【浦中夜泊】

白居易

暗上江堤还独立，水风霜气夜棱棱。
回看深浦停舟处，芦荻花中一点灯。

· 全唐诗 ·

卷 438_70 【卢侍御与崔评事为予于黄鹤楼置宴，宴罢同望】

白居易

江边黄鹤古时楼，劳置华筵待我游。楚思淼茫云水冷，
商声清脆管弦秋。白花浪溅头陀寺，红叶林笼鹦鹉洲。
总是平生未行处，醉来堪赏醒堪愁。

卷 438_71 【舟中读元九诗】

白居易

把君诗卷灯前读，诗尽灯残天未明。
眼痛灭灯犹暗坐，逆风吹浪打船声。

卷 438_72 【舟行阻风，寄李十一舍人】

白居易

扁舟厌泊烟波上，轻策闲寻浦屿间。虎蹋青泥稠似印，
风吹白浪大于山。且愁江郡何时到，敢望京都几岁还。
今日料君朝退后，迎寒新酎暖开颜。

· 全唐诗 ·

卷 438_73【雨中题衰柳】

白居易

湿屈青条折，寒飘黄叶多。不知秋雨意，更遣欲如何。

卷 438_74【题王处士郊居】

白居易

半依云渚半依山，爱此令人不欲还。负郭田园九八顷，
向阳茅屋两三间。寒松纵老风标在，野鹤虽饥饮啄闲。
一卧江村来早晚，著书盈帙鬓毛斑。

卷 438_75【岁晚旅望】

白居易

朝来暮去星霜换，阴惨阳舒气序牵。万物秋霜能坏色，
四时冬日最凋年。烟波半露新沙地，鸟雀群飞欲雪天。
向晚苍苍南北望，穷阴旅思两无边。

· 全唐诗 ·

卷 438_76【晏坐闲吟】

白居易

昔为京洛声华客，今作江湖潦倒翁。意气销磨群动里，
形骸变化百年中。霜侵残鬓无多黑，酒伴衰颜只暂红。
愿学禅门非想定，千愁万念一时空。

卷 438_77【题李山人】

白居易

厨无烟火室无妻，篱落萧条屋舍低。
每日将何疗饥渴，井华云粉一刀圭。

卷 438_78【读庄子】

白居易

去国辞家谪异方，中心自怪少忧伤。
为寻庄子知归处，认得无何是本乡。

· 全唐诗 ·

卷 438_79【江楼偶宴赠同座】

白居易

南浦闲行罢，西楼小宴时。望湖凭槛久，待月放杯迟。
江果尝卢橘，山歌听竹枝。相逢且同乐，何必旧相知。

卷 438_80【放言五首】

白居易

朝真暮伪何人辨，古往今来底事无。但爱臧生能诈圣，
可知宁子解佯愚。草萤有耀终非火，荷露虽团岂是珠。
不取燔柴兼照乘，可怜光彩亦何殊。

世途倚伏都无定，尘网牵缠卒未休。祸福回还车转毂，
荣枯反覆手藏钩。龟灵未免刳肠患，马失应无折足忧。
不信君看弈棋者，输赢须待局终头。

赠君一法决狐疑，不用钻龟与祝蓍。试玉要烧三日满，
辨材须待七年期。周公恐惧流言后，王莽谦恭未篡时。
向使当初身便死，一生真伪复谁知。

谁家第宅成还破，何处亲宾哭复歌。昨日屋头堪炙手，
今朝门外好张罗。北邙未省留闲地，东海何曾有定波。

· 全唐诗 ·

莫笑贱贫夸富贵，共成枯骨两如何。

泰山不要欺毫末，颜子无心羨老彭。松树千年终是朽，
槿花一日自为荣。何须恋世常忧死，亦莫嫌身漫厌生。
生去死来都是幻，幻人哀乐系何情。

卷 438_81【岁暮道情二首】

白居易

壮日苦曾惊岁月，长年都不惜光阴。
为学空门平等法，先齐老少死生心。

半故青衫半白头，雪风吹面上江楼。
禅功自见无人觉，合是愁时亦不愁。

卷 438_82【读李杜诗集，因题卷后】

白居易

翰林江左日，员外剑南时。不得高官职，仍逢苦乱离。
暮年逋客恨，浮世谪仙悲。吟咏留千古，声名动四夷。
文场供秀句，乐府待新词。天意君须会，人间要好诗。

· 全唐诗 ·

卷 438_83 【强酒】

白居易

若不坐禅销妄想，即须行醉放狂歌。
不然秋月春风夜，争那闲思往事何。

卷 438_84 【独树浦雨夜寄李六郎中】

白居易

忽忆两家同里巷，何曾一处不追随。闲游预算分朝日，
静语多同待漏时。花下放狂冲黑饮，灯前起坐彻明棋。
可知风雨孤舟夜，芦苇丛中作此诗。

卷 438_85 【听崔七妓人筝】

白居易

花脸云鬟坐玉楼，十三弦里一时愁。
凭君向道休弹去，白尽江州司马头。

· 全唐诗 ·

卷 438_86 【望江州】

白居易

江回望见双华表，知是浔阳西郭门。
犹去孤舟三四里，水烟沙雨欲黄昏。

卷 438_87 【初到江州】

白居易

浔阳欲到思无穷，庾亮楼南湓口东。树木凋疏山雨后，
人家低湿水烟中。菰蒋喂马行无力，芦荻编房卧有风。
遥见朱轮来出郭，相迎劳动使君公。

卷 438_88 【醉后题李、马二妓】

白居易

行摇云髻花钿节，应似霓裳趁管弦。艳动舞裙浑是火，
愁凝歌黛欲生烟。有风纵道能回雪，无水何由忽吐莲。
疑是两般心未决，雨中神女月中仙。

· 全唐诗 ·

卷 438_89【卢侍御小妓乞诗，座上留赠】

白居易

郁金香汗裛歌巾，山石榴花染舞裙。好似文君还对酒，
胜于神女不归云。梦中那及觉时见，宋玉荆王应羡君。

卷四百三十九

卷 439_1【东南行一百韵，寄通州元九侍御，澧州李十一舍人、果州崔二十二使君，开州韦大元外、庾三十二补阙、杜十四拾遗、李二十助教员外、窦七校书】

白居易

南去经三楚，东来过五湖。山头看候馆，水面问征途。
地远穷江界，天低极海隅。飘零同落叶，浩荡似乘桴。
渐觉乡原异，深知土产殊。夷音语嘲哂，蛮态笑睢盱。
水市通闾闾，烟村混舳舻。吏征渔户税，人纳火田租。
亥日饶虾蟹，寅年足虎貔。成人男作𡗗，事鬼女为巫。
楼暗攒倡妇，堤长簇贩夫。夜船论铺赁，春酒断瓶酤。
见果皆卢橘，闻禽悉鹧鸪。山歌猿独叫，野哭鸟相呼。
岭徼云成栈，江郊水当郭。月移翘柱鹤，风泛贴墙乌。
鼉碍潮无信，蛟惊浪不虞。鼉鸣江播鼓，蜃气海浮图。
树裂山魑穴，沙含水弩枢。喘牛犁紫芋，羸马放青菰。
绣面谁家婢，鸦头几岁奴。泥中采菱芡，烧后拾樵苏。
鼎臠愁烹鳖，盘腥厌脍鲈。钟仪徒恋楚，张翰浪思吴。
气序凉还热，光阴旦复晡。身方逐萍梗，年欲近桑榆。
渭北田园废，江西岁月徂。忆归恒惨淡，怀旧忽踟蹰。
自念咸秦客，尝为邹鲁儒。蕴藏经国术，轻弃度关繻。

· 全唐诗 ·

赋力凌鸚鵡，词锋敌辘轳。战文重掉鞅，射策一弯弧。
崔杜鞭齐下，元韦轡并驱。名声逼扬马，交分过萧朱。
世务轻摩揣，周行窃觊觎。风云皆会合，雨露各沾濡。
共遇升平代，偏惭固陋躯。承明连夜直，建礼拂晨趋。
美服颁王府，珍羞降御厨。议高通白虎，谏切伏青蒲。
柏殿行陪宴，花楼走看酺。神旗张鸟兽，天籁动笙竽。
戈剑星芒耀，鱼龙电策驱。定场排越伎，促坐进吴歈。
缥缈疑仙乐，婵娟胜画图。歌鬟低翠羽，舞汗堕红珠。
别选闲游伴，潜招小饮徒。一杯愁已破，三醖气弥粗。
软美仇家酒，幽闲葛氏姝。十千方得斗，二八正当垆。
论笑杓胡律，谈怜巩嘏嘏。李酣犹短鬓，庾醉更蔫迂。
鞍马呼教住，骰盘喝遣输。长驱波卷白，连掷采成卢。
筹并频逃席，觥严列置盂。满卮那可灌，颓玉不胜扶。
入视中枢草，归乘内厩驹。醉曾冲宰相，骄不揖金吾。
日近恩虽重，云高势却孤。翻身落霄汉，失脚倒泥涂。
博望移门籍，浔阳佐郡符。时情变寒暑，世利算锱铢。
即日辞双阙，明朝别九衢。播迁分郡国，次第出京都。
秦岭驰三驿，商山上二邠。岷阳亭寂寞，夏口路崎岖。
大道全生棘，中丁尽执殳。江关未撤警，淮寇尚稽诛。
林对东西寺，山分大小姑。庐峰莲刻削，湓浦带萦纡。
九派吞青草，孤城覆绿芜。黄昏钟寂寂，清晓角呜呜。
春色辞门柳，秋声到井梧。残芳悲鶗鴂，暮节感茱萸。
蕊坼金英菊，花飘雪片芦。波红日斜没，沙白月平铺。
几见林抽笋，频惊燕引雏。岁华何倏忽，年少不须臾。
眇默思千古，苍茫想八区。孔穷缘底事，颜夭有何辜。
龙智犹经醢，龟灵未免刳。穷通应已定，圣哲不能逾。
况我身谋拙，逢他厄运拘。漂流随大海，锤锻任洪炉。

· 全唐诗 ·

险阻尝之矣，栖迟命也夫。沉冥消意气，穷饿耗肌肤。
防瘴和残药，迎寒补旧襦。书床鸣蟋蟀，琴匣网蜘蛛。
贫室如悬磬，端忧剧守株。时遭人指点，数被鬼揶揄。
兀兀都疑梦，昏昏半是愚。女惊朝不起，妻怪夜长吁。
万里抛朋侣，三年隔友于。自然悲聚散，不是恨荣枯。
去夏微之疟，今春席八殂。天涯书达否，泉下哭知无。
谩写诗盈卷，空盛酒满壶。只添新怅望，岂复旧欢娱。
壮志因愁减，衰容与病俱。相逢应不识，满颌白髭须。

卷 439_2【谪居】

白居易

面瘦头斑四十四，远谪江州为郡吏。逢时弃置从不才，
未老衰羸为何事。火烧寒涧松为烬，霜降春林花委地。
遭时荣悴一时间，岂是昭昭上天意。

卷 439_3【初到江州寄翰林张、李、杜三学士】

白居易

早攀霄汉上天衢，晚落风波委世途。雨露施恩无厚薄，
蓬蒿随分有荣枯。伤禽侧翅惊弓箭，老妇低颜事舅姑。
碧落三仙曾识面，年深记得姓名无。

· 全唐诗 ·

卷 439_4【庾楼晓望】

白居易

独凭朱槛立凌晨，山色初明水色新。竹雾晓笼衔岭月，
蘋风暖送过江春。子城阴处犹残雪，衙鼓声前未有尘。
三百年来庾楼上，曾经多少望乡人。

卷 439_5【宿西林寺】

白居易

木落天晴山翠开，爱山骑马入山来。
心知不及柴桑令，一宿西林便却回。

卷 439_6【江楼宴别】

白居易

楼中别曲催离酌，灯下红裙间绿袍。缥缈楚风罗绮薄，
铮鏦越调管弦高。寒流带月澄如镜，夕吹和霜利似刀。
尊酒未空欢未尽，舞腰歌袖莫辞劳。

· 全唐诗 ·

卷 439_7【题山石榴花】

白居易

一丛千朵压阑干，翦碎红绡却作团。风袅舞腰香不尽，
露销妆脸泪新干。蔷薇带刺攀应懒，菡萏生泥玩亦难。
争及此花檐户下，任人采弄尽人看。

卷 439_8【代春赠】

白居易

山吐晴岚水放光，辛夷花白柳梢黄。
但知莫作江西意，风景何曾异帝乡。

卷 439_9【答春】

白居易

草烟低重水花明，从道风光似帝京。
其奈山猿江上叫，故乡无此断肠声。

· 全唐诗 ·

卷 439_10 【櫻桃花下叹白发】

白居易

逐处花皆好，随年貌自衰。红樱满眼日，白发半头时。

倚树无言久，攀条欲放迟。临风两堪叹，如雪复如丝。

卷 439_11 【惜落花，赠崔二十四】

白居易

漠漠纷纷不奈何，狂风急雨两相和。

晚来怅望君知否，枝上稀疏地上多。

卷 439_12 【移山櫻桃】

白居易

亦知官舍非吾宅，且劬山樱满院栽。

上佐近来多五考，少应四度见花开。

· 全唐诗 ·

卷 439_13 【官舍闲题】

白居易

职散优闲地，身慵老大时。送春唯有酒，销日不过棋。

禄米獐牙稻，园蔬鸭脚葵。饱餐仍晏起，余暇弄龟儿。

卷 439_14 【晚春登大云寺南楼，赠常禅师】

白居易

花尽头新白，登楼意若何。岁时春日少，世界苦人多。

愁醉非因酒，悲吟不是歌。求师治此病，唯劝读楞伽。

卷 439_15 【北楼送客归上都】

白居易

凭高眺远一凄凄，却下朱阑即解携。京路人归天直北，

江楼客散日平西。长津欲度回渡尾，残酒重倾簇马蹄。

不独别君须强饮，穷愁自要醉如泥。

· 全唐诗 ·

卷 439_16【北亭招客】

白居易

疏散郡丞同野客，幽闲官舍抵山家。春风北户千茎竹，
晚日东园一树花。小醺吹酷尝冷酒，深炉敲火炙新茶。
能来尽日观棋否，太守知慵放晚衙。

卷 439_17【宿西林寺，早赴东林满上人之会因寄崔二十二员外】

白居易

谪辞魏阙鹈鸂隔，老入庐山麋鹿随。薄暮萧条投寺宿，
凌晨清静与僧期。双林我起闻钟后，只日君趋入阁时。
鹏鷃高低分皆定，莫劳心力远相思。

卷 439_18【游宝称寺】

白居易

竹寺初晴日，花塘欲晓春。野猿疑弄客，山鸟似呼人。
酒嫩倾金液，茶新碾玉尘。可怜幽静地，堪寄老慵身。

· 全唐诗 ·

卷 439_19【早春闻提壶鸟，因题邻家】

白居易

厌听秋猿催下泪，喜闻春鸟劝提壶。谁家红树先花发，
何处青楼有酒酺。进士粗豪寻静尽，拾遗风采近都无。
欲期明日东邻醉，变作腾腾一俗夫。

卷 439_20【见紫薇花忆微之】

白居易

一丛暗淡将何比，浅碧笼裙衬紫巾。
除却微之见应爱，人间少有别花人。

卷 439_21【蔷薇花一丛独死，不知其故，因有是篇】

白居易

柯条未尝损，根蔕不曾移。同类今齐茂，孤芳忽独萎。
仍怜委地日，正是带花时。碎碧初凋叶，焦红尚恋枝。
乾坤无厚薄，草木自荣衰。欲问因何事，春风亦不知。

· 全唐诗 ·

卷 439_22 【湖亭望水】

白居易

久雨南湖涨，新晴北客过。日沉红有影，风定绿无波。
岸没闾阎少，滩平船舫多。可怜心赏处，其奈独游何。

卷 439_23 【闲游】

白居易

外事因慵废，中怀与静期。寻泉上山远，看笋出林迟。
白石磨樵斧，青竿理钓丝。澄清深浅好，最爱夕阳时。

卷 439_24 【忆微之伤仲远】

白居易

幽独辞群久，漂流去国赊。只将琴作伴，唯以酒为家。
感逝因看水，伤离为见花。李三埋地底，元九谪天涯。
举眼青云远，回头白日斜。可能胜贾谊，犹自滞长沙。

· 全唐诗 ·

卷 439_25 【过郑处士】

白居易

闻道移居村坞间，竹林多处独开关。
故来不是求他事，暂借南亭一望山。

卷 439_26 【霖雨苦多，江湖暴涨，块然独望，因题北亭】

白居易

自作浔阳客，无如苦雨何。阴昏晴日少，闲闷睡时多。
湖阔将天合，云低与水和。篙根舟子语，巷口钓人歌。
雾岛沉黄气，风帆蹙白波。门前车马道，一宿变江河。

卷 439_27 【春末夏初闲游江郭二首】

白居易

闲出乘轻屐，徐行蹋软沙。观鱼傍湓浦，看竹入杨家。
林迸穿篱笋，藤飘落水花。雨埋钓舟小，风飏酒旗斜。
嫩剥青菱角，浓煎白茗芽。淹留不知夕，城树欲栖鸦。

柳影繁初合，莺声涩渐稀。早梅迎夏结，残絮送春飞。

· 全唐诗 ·

西日韶光尽，南风暑气微。展张新小簟，熨帖旧生衣。
绿蚁杯香嫩，红丝脍缕肥。故园无此味，何必苦思归。

卷 439_28 【红藤杖】

白居易

南诏红藤杖，西江白首人。时时携步月，处处把寻春。
劲健孤茎直，疏圆六节匀。火山生处远，泸水洗来新。
粗细才盈手，高低仅过身。天边望乡客，何日拄归秦。

卷 439_29 【风雨中寻李十一，因题船上】

白居易

匹马来郊外，扁舟在水滨。可怜冲雨客，来访阻风人。
小榼酤清醕，行厨煮白鳞。停杯看柳色，各忆故园春。

卷 439_30 【题庐山山下汤泉】

白居易

一眼汤泉流向东，浸泥浇草暖无功。
骊山温水因何事，流入金铺玉瓮中。

· 全唐诗 ·

卷 439_31【寄蕲州簟与元九，因题六韵】

白居易

笛竹出蕲春，霜刀劈翠筠。织成双锁簟，寄与独眠人。
卷作筒中信，舒为席上珍。滑如铺薤叶，冷似卧龙鳞。
清润宜乘露，鲜华不受尘。通州炎瘴地，此物最关身。

卷 439_32【秋热】

白居易

西江风候接南威，暑气常多秋气微。
犹道江州最凉冷，至今九月著生衣。

卷 439_33【题元八溪居】

白居易

溪岚漠漠树重重，水槛山窗次第逢。晚叶尚开红踯躅，
秋芳初结白芙蓉。声来枕上千年鹤，影落杯中五老峰。
更愧殷勤留客意，鱼鲜饭细酒香浓。

· 全唐诗 ·

卷 439_34 【晚出西郊】

白居易

散吏闲如客，贫州冷似村。早凉湖北岸，残照郭西门。

懒镊从须白，休治任眼昏。老来何所用，少兴不多言。

卷 439_35 【阶下莲】

白居易

叶展影翻当砌月，花开香散入帘风。

不如种在天池上，犹胜生于野水中。

卷 439_36 【端居咏怀】

白居易

贾生俟罪心相似，张翰思归事不如。斜日早知惊鵬鸟，
秋风悔不忆鲈鱼。胸襟曾贮匡时策，怀袖犹残谏猎书。
从此万缘都摆落，欲携妻子买山居。

· 全唐诗 ·

卷 439_37【夜宿江浦，闻元八改官，因寄此什】

白居易

君游丹陛已三迁，我泛沧浪欲二年。剑珮晓趋双凤阙，
烟波夜宿一渔船。交亲尽在青云上，乡国遥抛白日边。
若报生涯应笑杀，结茅栽芋种畬田。

卷 439_38【百花亭】

白居易

朱槛在空虚，凉风八月初。山形如峴首，江色似桐庐。
佛寺乘船入，人家枕水居。高亭仍有月，今夜宿何如。

卷 439_39【江楼早秋】

白居易

南国虽多热，秋来亦不迟。湖光朝霁后，竹气晚凉时。
楼阁宜佳客，江山入好诗。清风水蘋叶，白露木兰枝。
欲作云泉计，须营伏腊资。匡庐一步地，官满更何之。

· 全唐诗 ·

卷 439_40 【送客之湖南】

白居易

年年渐见南方物，事事堪伤北客情。山鬼趯跳唯一足，
峡猿哀怨过三声。帆开青草湖中去，衣湿黄梅雨里行。
别后双鱼难定寄，近来潮不到湓城。

卷 439_41 【百花亭晚望夜归】

白居易

百花亭上晚裴回，云影阴晴掩复开。日色悠扬映山尽，
雨声萧飒渡江来。鬓毛遇病双如雪，心绪逢秋一似灰。
向夜欲归愁未了，满湖明月小船回。

卷 439_42 【西楼】

白居易

小郡大江边，危楼夕照前。青芜卑湿地，白露沍寥天。
乡国此时阻，家书何处传。仍闻陈蔡戍，转战已三年。

· 全唐诗 ·

卷 439_43【寻李道士山居，兼呈元明府】

白居易

尽日行还歇，迟迟独上山。攀藤老筋力，照水病容颜。

陶巷招居住，茅家许往还。饱谙荣辱事，无意恋人间。

卷 439_44【四十五】

白居易

行年四十五，两鬓半苍苍。清瘦诗成癖，粗豪酒放狂。

老来尤委命，安处即为乡。或拟庐山下，来春结草堂。

卷 439_45【寄李相公、崔侍郎、钱舍人】

白居易

曾陪鹤驭两三仙，亲侍龙舆四五年。天上欢华春有限，
世间漂泊海无边。荣枯事过都成梦，忧喜心忘便是禅。
官满更归何处去，香炉峰在宅门前。

· 全唐诗 ·

卷 439_46 【厅前桂】

白居易

天台岭上凌霜树，司马厅前委地丛。

一种不生明月里，山中犹校胜尘中。

卷 439_47 【寻王道士药堂，因有题赠】

白居易

行行觅路缘松峤，步步寻花到杏坛。白石先生小有洞，
黄芽姹女大还丹。常悲东郭千家冢，欲乞西山五色丸。
但恐长生须有籍，仙台试为检名看。

卷 439_48 【秋晚】

白居易

篱菊花稀砌桐落，树阴离离日色薄。单幕疏帘贫寂寞，
凉风冷露秋萧索。光阴流转忽已晚，颜色凋残不如昨。
莱妻卧病月明时，不捣寒衣空捣药。

· 全唐诗 ·

卷 439_49【南浦岁暮对酒，送王十五归京】

白居易

腊后冰生覆湓水，夜来云暗失庐山。风飘细雪落如米，
索索萧萧芦苇间。此地二年留我住，今朝一酌送君还。
相看渐老无过醉，聚散穷通总是闲。

卷 439_50【除夜】

白居易

薄晚支颐坐，中宵枕臂眠。一从身去国，再见日周天。
老度江南岁，春抛渭北田。浔阳来早晚，明日是三年。

卷 439_51【闻李十一出牧澧州，崔二十二出牧果州，因寄
绝句】

白居易

平生相见即眉开，静念无如李与崔。
各是天涯为刺史，缘何不觅九江来。

· 全唐诗 ·

卷 439_52【元和十三年淮寇未平，诏停岁仗，愤然有感，率尔成章】

白居易

闻停岁仗轸皇情，应为淮西寇未平。不分气从歌里发，
无明心向酒中生。愚计忽思飞短檄，狂心便欲请长缨。
从来妄动多如此，自笑何曾得事成。

卷 439_53【庾楼新岁】

白居易

岁时销旅貌，风景触乡愁。牢落江湖意，新年上庾楼。

卷 439_54【上香炉峰】

白居易

倚石攀萝歇病身，青筇竹杖白纱巾。
他时画出庐山障，便是香炉峰上人。

· 全唐诗 ·

卷 439_55【忆微之】

白居易

与君何日出屯蒙，鱼恋江湖鸟厌笼。分手各抛沧海畔，
折腰俱老绿衫中。三年隔阔音尘断，两地飘零气味同。
又被新年劝相忆，柳条黄软欲春风。

卷 439_56【雨夜赠元十八】

白居易

卑湿沙头宅，连阴雨夜天。共听檐溜滴，心事两悠然。
把酒循环饮，移床曲尺眠。莫言非故旧，相识已三年。

卷 439_57【寒食江畔】

白居易

草香沙暖水云晴，风景令人忆帝京。还似往年春气味，
不宜今日病心情。闻莺树下沈吟立，信马江头取次行。
忽见紫桐花怅望，下邳明日是清明。

· 全唐诗 ·

卷 439_58【三月三日登庾楼，寄庾三十二】

白居易

三日欢游辞曲水，二年愁卧在长沙。
每登高处长相忆，何况兹楼属庾家。

卷 439_59【闻李六景俭自河东令授唐邓行军司马，以诗贺之】

白居易

谁能淮上静风波，闻道河东应此科。不独文词供奉记，
定将谈笑解兵戈。泥埋剑戟终难久，水借蛟龙可在多。
四十著绯军司马，男儿官职未蹉跎。

卷 439_60【石榴树】

白居易

可怜颜色好阴凉，叶翦红笺花扑霜。伞盖低垂金翡翠，
熏笼乱搭绣衣裳。春芽细炷千灯焰，夏蕊浓焚百和香。
见说上林无此树，只教桃柳占年芳。

· 全唐诗 ·

卷 439_61【大林寺桃花】

白居易

人间四月芳菲尽，山寺桃花始盛开。
长恨春归无觅处，不知转入此中来。

卷 439_62【咏怀】

白居易

自从委顺任浮沈，渐觉年多功用深。面上减除忧喜色，
胸中消尽是非心。妻儿不问唯耽酒，冠盖皆慵只抱琴。
长笑灵均不知命，江蓠丛畔苦悲吟。

卷 439_63【早发楚城驿】

白居易

雨过尘埃灭，沿江道径平。月乘残夜出，人趁早凉行。
寂历闲吟动，冥濛暗思生。荷塘翻露气，稻垄泻泉声。
宿犬闻铃起，栖禽见火惊。曈曈烟树色，十里始天明。

· 全唐诗 ·

卷 439_64【簪岷东池】

白居易

簪岷亭东有小池，早荷新荇绿参差。

中宵把火行人发，惊起双栖白鹭鸂。

卷 439_65【建昌江】

白居易

建昌江水县门前，立马教人唤渡船。

忽似往年归蔡渡，草风沙雨渭河边。

卷 439_66【哭从弟】

白居易

伤心一尉便终身，叔母年高新妇贫。

一片绿衫消不得，腰金拖紫是何人。

· 全唐诗 ·

卷 439_67【香炉峰下新卜山居，草堂初成，偶题东壁】

白居易

五架三间新草堂，石阶桂柱竹编墙。南檐纳日冬天暖，
北户迎风夏月凉。洒砌飞泉才有点，拂窗斜竹不成行。
来春更葺东厢屋，纸阁芦帘著孟光。

卷 439_68【重题】

白居易

喜入山林初息影，厌趋朝市久劳生。早年薄有烟霞志，
岁晚深谙世俗情。已许虎溪云里卧，不争龙尾道前行。
从兹耳界应清净，免见啾啾毁誉声。

长松树下小溪头，班鹿胎巾白布裘。药圃茶园为产业，
野麋林鹤是交游。云生涧户衣裳润，岚隐山厨火烛幽。
最爱一泉新引得，清冷屈曲绕阶流。

日高睡足犹慵起，小阁重衾不怕寒。遗爱寺钟欹枕听，
香炉峰雪拨帘看。匡庐便是逃名地，司马仍为送老官。
心泰身宁是归处，故乡何独在长安。

宦途自此心长别，世事从今口不言。岂止形骸同土木，

· 全唐诗 ·

兼将寿夭任乾坤。胸中壮气犹须遣，身外浮荣何足论。
还有一条遗恨事，高家门馆未酬恩。

卷 439_69【山中问月】

白居易

为问长安月，谁教不相离。昔随飞盖处，今照入山时。
借助秋怀旷，留连夜卧迟。如归旧乡国，似对好亲知。
松下行为伴，溪头坐有期。千岩将万壑，无处不相随。

卷 439_70【正月十五日夜，东林寺学禅，偶怀蓝田杨主簿，
因呈智禅师】

白居易

新年三五东林夕，星汉迢迢钟梵迟。花县当君行乐夜，
松房是我坐禅时。忽看月满还相忆，始叹春来自不知。
不觉定中微念起，明朝更问雁门师。

卷 439_71【临水坐】

白居易

昔为东掖垣中客，今作西方社内人。

· 全唐诗 ·

手把杨枝临水坐，闲思往事似前身。

卷 439_72 【山居】

白居易

山斋方独往，尘事莫相仍。蓝舆辞鞍马，缁徒换友朋。

朝餐唯药菜，夜伴只纱灯。除却青衫在，其余便是僧。

卷 439_73 【遗爱寺】

白居易

弄日临溪坐，寻花绕寺行。时时闻鸟语，处处是泉声。

卷 439_74 【山中与元九书，因题书后】

白居易

忆昔封书与君夜，金銮殿后欲明天。今夜封书在何处，

庐山庵里晚灯前。笼鸟槛猿俱未死，人间相见是何年。

· 全唐诗 ·

卷 439_75【黄石岩下作】

白居易

久别鹓鸾侣，深随鸟兽群。教他远亲故，何处觅知闻。

昔日青云意，今移向白云。

卷 439_76【戏赠李十三判官】

白居易

垂鞭相送醉醺醺，遥见庐山指似君。

想君初觉从军乐，未爱香炉峰上云。

卷 439_77【醉中戏赠郑使君】

白居易

密座移红毯，酡颜照绿杯。双娥留且住，五马任先回。

醉耳歌催醒，愁眉笑引开。平生少年兴，临老暂重来。

· 全唐诗 ·

卷 439_78【江亭夕望】

白居易

凭高望远思悠哉，晚上江亭夜未回。日欲没时红浪沸，
月初生处白烟开。辞枝雪蕊将春去，满镊霜毛送老来。
争敢三年作归计，心知不及贾生才。

卷 439_79【酬元员外三月三十日慈恩寺相忆见寄】

白居易

怅望慈恩三月尽，紫桐花落鸟关关。诚知曲水春相忆，
其奈长沙老未还。赤岭猿声催白首，黄茅瘴色换朱颜。
谁言南国无霜雪，尽在愁人鬓发间。

卷 439_80【偶然二首】

白居易

楚怀邪乱灵均直，放弃合宜何恻恻。汉文明圣贾生贤，
谪向长沙堪叹息。人事多端何足怪，天文至信犹差忒。
月离于毕合滂沱，有时不雨何能测。

· 全唐诗 ·

火发城头鱼水里，救火竭池鱼失水。乖龙藏在牛领中，
雷击龙来牛枉死。人道蓍神龟骨灵，试卜鱼牛那至此。
六十四卦七十钻，毕竟不能知所以。

卷 439_81【中秋月】

白居易

万里清光不可思，添愁益恨绕天涯，谁人陇外久征戍，
何处庭前新别离。失宠故姬归院夜，没蕃老将上楼时。
照他几许人肠断，玉兔银蟾远不知。

卷 439_82【谢李六郎中寄新蜀茶】

白居易

故情周匝向交亲，新茗分张及病身。红纸一封书后信，
绿芽十片火前春。汤添勺水煎鱼眼，末下刀圭搅麴尘。
不寄他人先寄我，应缘我是别茶人。

· 全唐诗 ·

卷 439_83【携诸山客同上香炉峰，遇雨而还，沾濡狼藉，互相笑谑，题此解嘲】

白居易

萧洒登山去，龙钟遇雨回。磴危攀薜荔，石滑践莓苔。

袜污君相谑，鞋穿我自咍。莫欺泥土脚，曾蹋玉阶来。

卷 439_84【彭蠡湖晚归】

白居易

彭蠡湖天晚，桃花水气春。鸟飞千白点，日没半红轮。

何必为迁客，无劳是病身。何来临此望，少有不愁人。

卷 439_85【酬赠李炼师见招】

白居易

几年司谏直承明，今日求真礼上清。曾犯龙鳞容不死，
欲骑鹤背觅长生。刘纲有妇仙同得，伯道无儿累更轻。
若许移家相近住，便驱鸡犬上层城。

· 全唐诗 ·

卷 439_86【西河雨夜送客】

白居易

云黑雨翛翛，江昏水暗流。有风催解缆，无月伴登楼。
酒罢无多兴，帆开不少留。唯看一点火，遥认是行舟。

卷 439_87【登西楼忆行简】

白居易

每因楼上西南望，始觉人间道路长。碍日暮山青簇簇，
漫天秋水白茫茫。风波不见三年面，书信难传万里肠。
早晚东归来下峡，稳乘船舫过瞿唐。

卷 439_88【罗子】

白居易

有女名罗子，生来才两春。我今年已长，日夜二毛新。
顾念娇啼面，思量老病身。直应头似雪，始得见成人。

· 全唐诗 ·

卷 439_89 【读僧灵彻诗】

白居易

东林寺里西廊下，石片镌题数首诗。
言句怪来还校别，看名知是老汤师。

卷 439_90 【听李士良琵琶】

白居易

声似胡儿弹舌语，愁如塞月恨边云。
闲人暂听犹眉敛，可使和蕃公主闻。

卷 439_91 【昭君怨】

白居易

明妃风貌最娉婷，合在椒房应四星。只得当年备宫掖，
何曾专夜奉帏屏。见疏从道迷图画，知屈那教配虏庭。
自是君恩薄如纸，不须一向恨丹青。

· 全唐诗 ·

卷 439_92 【闲吟】

白居易

自从苦学空门法，销尽平生种种心。
唯有诗魔降未得，每逢风月一闲吟。

卷 439_93 【戏问山石榴】

白居易

小树山榴近砌栽，半含红萼带花来。
争知司马夫人妒，移到庭前便不开。

卷 439_94 【編集拙诗成一十五卷因题卷末戏赠元九、李二十】

白居易

一篇长恨有风情，十首秦吟近正声。每被老元偷格律，
苦教短李伏歌行。世间富贵应无分，身后文章合有名。
莫怪气粗言语大，新排十五卷诗成。

· 全唐诗 ·

卷 439_95【湖上闲望】

白居易

藤花浪拂紫茸条，菰叶风翻绿剪刀。
闲弄水芳生楚思，时时合眼咏离骚。

· 全唐诗 ·

卷四百四十

卷 440_1【江南谪居十韵】

白居易

自哂沉冥客，曾为献纳臣。壮心徒许国，薄命不如人。
才展凌云翅，俄成失水鳞。葵枯犹向日，蓬断即辞春。
泽畔长愁地，天边欲老身。萧条残活计，冷落旧交亲。
草合门无径，烟消甑有尘。忧方知酒圣，贫始觉钱神。
虎尾难容足，羊肠易覆轮。行藏与通塞，一切任陶钧。

卷 440_2【江楼夜吟元九律诗，成三十韵】

白居易

昨夜江楼上，吟君数十篇。词飘朱槛底，韵堕绿江前。
清楚音谐律，精微思入玄。收将白雪丽，夺尽碧云妍。
寸截金为句，双雕玉作联。八风凄间发，五彩烂相宣。
冰扣声声冷，珠排字字圆。文头交比绣，筋骨软于绵。
汹涌同波浪，铮鏦过管弦。醴泉流出地，钧乐下从天。

· 全唐诗 ·

神鬼闻如泣，鱼龙听似禅。星回疑聚集，月落为留连。
雁感无鸣者，猿愁亦悄然。交流迁客泪，停住贾人船。
暗被歌姬乞，潜闻思妇传。斜行题粉壁，短卷写红笺。
肉味经时忘，头风当日痊。老张知定伏，短李爱应颠。
道屈才方振，身闲业始专。天教声烜赫，理合命迍邅。
顾我文章劣，知他气力全。工夫虽共到，巧拙尚相悬。
各有诗千首，俱抛海一边。白头吟处变，青眼望中穿。
酬答朝妨食，披寻夜废眠。老偿文债负，宿结字因缘。
每叹陈夫子，常嗟李谪仙。名高折人爵，思苦减天年。
不得当时遇，空令后代怜。相悲今若此，湓浦与通川。

卷 440_3【浔阳岁晚，寄元八郎中、庾三十二员外】

白居易

阅水年将暮，烧金道未成。丹砂不肯死，白发自须生。
病肺惭杯满，衰颜忌镜明。春深旧乡梦，岁晚故交情。
一别浮云散，双瞻列宿荣。螭头阶下立，龙尾道前行。
封事频闻奏，除书数见名。虚怀事僚友，平步取公卿。
漏尽鸡人报，朝回幼女迎。可怜白司马，老大在湓城。

卷 440_4【元九以绿丝布白轻裾见寄，制成衣服，以诗报知】

白居易

绿丝文布素轻裾，珍重京华手自封。贫友远劳君寄附，

· 全唐诗 ·

病妻亲为我裁缝。袴花白似秋去薄，衫色青于春草浓。
欲著却休知不称，折腰无复旧形容。

卷 440_5【清明日送韦侍御贬虔州】

白居易

寂寞清明日，萧条司马家。留饧和冷粥，出火煮新茶。
欲别能无酒，相留亦有花。南迁更何处，此地已天涯。

卷 440_6【九江春望】

白居易

淼茫积水非吾土，飘泊浮萍自我身。身外信缘为活计，
眼前随事觅交亲。炉烟岂异终南色，湓草宁殊渭北春。
此地何妨便终老，譬如元是九江人。

卷 440_7【晚题东林寺双池】

白居易

向晚双池好，初晴百物新。袅枝翻翠羽，溅水跃红鳞。
萍泛同游子，莲开当丽人。临流一惆怅，还忆曲江春。

· 全唐诗 ·

卷 440_8 【赠内子】

白居易

白发长兴叹，青娥亦伴愁。寒衣补灯下，小女戏床头。
暗淡屏帏故，凄凉枕席秋。贫中有等级，犹胜嫁黔娄。

卷 440_9 【送客春游岭南二十韵】

白居易

已讶游何远，仍嗟别太频。离容君蹙促，赠语我殷勤。
迢递天南面，苍茫海北漘。诃陵国分界，交趾郡为邻。

蓊郁三光晦，温暾四气匀。阴晴变寒暑，昏晓错星辰。
瘴地难为老，蛮陬不易驯。土民稀白首，洞主尽黄巾。

战舰犹惊浪，戎车未息尘。红旗围卉服，紫绶裹文身。
面苦桄榔裹，浆酸橄榄新。牙樯迎海舶，铜鼓赛江神。

不冻贪泉暖，无霜毒草春。云烟蟒蛇气，刀剑鳄鱼鳞。
路足羈栖客，官多谪逐臣。天黄生飓母，雨黑长枫人。

回使先传语，征轩早返轮。须防杯里蛊，莫爱囊中珍。
北与南殊俗，身将货孰亲。尝闻君子诫，忧道不忧贫。

· 全唐诗 ·

卷 440_10【自题】

白居易

功名宿昔人多许，宠辱斯须自不知。一旦失恩先左降，
三年随例未量移。马头觅角生何日，石火敲光住几时。
前事是身俱若此，空门不去欲何之。

卷 440_11【自悲】

白居易

火宅煎熬地，霜松摧折身。因知群动内，易死不过人。

卷 440_12【寻郭道士不遇】

白居易

郡中乞假来相访，洞里朝元去不逢。看院只留双白鹤，
入门惟见一青松。药炉有火丹应伏，云碓无人水自舂。
欲问参同契中事，更期何日得从容。

· 全唐诗 ·

卷 440_13【浔阳春三首·春生】

白居易

春生何处暗周游，海角天涯遍始休。先遣和风报消息，
续教啼鸟说来由。展张草色长河畔，点缀花房小树头。
若到故园应觅我，为传沦落在江州。

卷 440_14【浔阳春三首·春来】

白居易

春来触地故乡情，忽见风光忆两京。金谷踏花香骑入，
曲江碾草钿车行。谁家绿酒欢连夜，何处红楼睡失明。
独有不眠不醉客，经春冷坐古湓城。

卷 440_15【浔阳春三首·春去】

白居易

一从泽畔为迁客，两度江头送暮春。白发更添今日鬓，
青衫不改去年身。百川未有回流水，一老终无却少人。
四十六时三月尽，送春争得不殷勤。

· 全唐诗 ·

卷 440_16 【梦微之】

白居易

晨起临风一惆怅，通川湓水断相闻。

不知忆我因何事，昨夜三回梦见君。

卷 440_17 【赠韦炼师】

白居易

浔阳迁客为居士，身似浮云心似灰。上界女仙无嗜欲，

何因相顾两裴回。共疑过去人间世，曾作谁家夫妇来。

卷 440_18 【问刘十九】

白居易

绿蚁新醅酒，红泥小火炉。晚来天欲雪，能饮一杯无。

· 全唐诗 ·

卷 440_19【得行简书，闻欲下峡，先以诗寄】

白居易

朝来又得东川信，欲取春初发梓州。书报九江闻暂喜，
路经三峡想还愁。潇湘瘴雾加餐饭，滟潏惊波稳泊舟。
欲寄两行迎尔泪，长江不肯向西流。

卷 440_20【南湖早春】

白居易

风回云断雨初晴，返照湖边暖复明。乱点碎红山杏发，
平铺新绿水蘋生。翅低白雁飞仍重，舌涩黄鹂语未成。
不道江南春不好，年年衰病减心情。

卷 440_21【元十八从事南海，欲出庐山临别旧居，有恋泉声之什，因以投和，兼伸别情】

白居易

贤侯辟土礼从容，莫恋泉声问所从。雨露初承黄纸诏，
烟霞欲别紫霄峰。伤弓未息新惊鸟，得水难留久卧龙。
我正退藏君变化，一杯可易得相逢。

· 全唐诗 ·

卷 440_22 【题韦家泉池】

白居易

泉落青山出白云，萦村绕郭几家分。

自从引作池中水，深浅方圆一任君。

卷 440_23 【醉中对红叶】

白居易

临风杪秋树，对酒长年人。醉貌如霜叶，虽红不是春。

卷 440_24 【遣怀】

白居易

羲和走驭趁年光，不许人间日月长。遂使四时都似电，
争教两鬓不成霜。荣销枯去无非命，壮尽衰来亦是常。
已共身心要约定，穷通生死不惊忙。

· 全唐诗 ·

卷 440_25 【点额鱼】

白居易

龙门点额意何如，红尾青髻却返初。

见说在天行雨苦，为龙未必胜为鱼。

卷 440_26 【闻龟儿咏诗】

白居易

怜渠已解咏诗章，摇膝支颐学二郎。

莫学二郎吟太苦，才年四十鬓如霜。

卷 440_27 【对酒】

白居易

未济卦中休卜命，参同契里莫劳心。

无如饮此销愁物，一饷愁消直万金。

· 全唐诗 ·

卷 440_28【东墙夜合树去秋为风雨所摧，今年花时，怅然有感】

白居易

碧萸红缕今何在，风雨飘将去不回。

惆怅去年墙下地，今春唯有荠花开。

卷 440_29【病起】

白居易

病不出门无限时，今朝强出与谁期。

经年不上江楼醉，劳动春风飏酒旗。

卷 440_30【梦亡友刘太白同游彰敬寺】

白居易

三千里外卧江州，十五年前哭老刘。

昨夜梦中彰敬寺，死生魂魄暂同游。

· 全唐诗 ·

卷 440_31 【与果上人歿时题此诀别，兼简二林僧社】

白居易

本结菩提香火社，为嫌烦恼电泡身。

不须惆怅从师去，先请西方作主人。

卷 440_32 【赠写真者】

白居易

子骋丹青日，予当丑老时。无劳役神思，更画病容仪。

迢递麒麟阁，图功未有期。区区尺素上，焉用写真为。

卷 440_33 【刘十九同宿】

白居易

红旗破贼非吾事，黄纸除书无我名。

唯共嵩阳刘处士，围棋赌酒到天明。

· 全唐诗 ·

卷 440_34【十二年冬江西温暖，喜元八寄金石棱到，因题此诗】

白居易

今冬腊候不严凝，暖雾温风气上腾。山脚崦中才有雪，
江流慢处亦无冰。欲将何药防春瘴，只有元家金石棱。

卷 440_35【闲意】

白居易

不争荣耀任沉沦，日与时疏共道亲。北省朋僚音信断，
东林长老往还频。病停夜食闲如社，慵拥朝裘暖似春。
渐老渐谙闲气味，终身不拟作忙人。

卷 440_36【送友人上峡赴东川辟命】

白居易

见说瞿塘峡，斜衔滟滪根。难于寻鸟路，险过上龙门。
羊角风头急，桃花水色浑。山回若鳌转，舟入似鲸吞。
岸合愁天断，波跳恐地翻。怜君经此去，为感主人恩。

· 全唐诗 ·

卷 440_37【夜送孟司功】

白居易

浔阳白司马，夜送孟功曹。江暗管弦急，楼明灯火高。

湖波翻似箭，霜草杀如刀。且莫开征棹，阴风正怒号。

卷 440_38【衰病】

白居易

老辞游冶寻花伴，病别荒狂旧酒徒。

更恐五年三岁后，些些谭笑亦应无。

卷 440_39【题诗屏风绝句】

白居易

相忆采君诗作障，自书自勘不辞劳。

障成定被人争写，从此南中纸价高。

· 全唐诗 ·

卷 440_40 【答微之】

白居易

君写我诗盈寺壁，我题君句满屏风。

与君相遇知何处，两叶浮萍大海中。

卷 440_41 【偶宴有怀】

白居易

遇兴寻文客，因欢命酒徒。春游忆亲故，夜会似京都。

诗思闲仍在，乡愁醉暂无。狂来欲起舞，惭见白髭须。

卷 440_42 【山中酬江州崔使君见寄】

白居易

眷眄情无恨，优容礼有余。三年为郡吏，一半许山居。

酒熟心相待，诗来手自书。庾楼春好醉，明月且回车。

· 全唐诗 ·

卷 440_43 【山枇杷】

白居易

深山老去惜年华，况对东溪野枇杷。火树风来翻绛焰，
琼枝日出晒红纱。回看桃李都无色，映得芙蓉不是花。
争奈结根深石底，无因移得到人家。

卷 440_44 【闻李尚书拜相，因以长句寄贺微之】

白居易

怜君不久在通川，知己新提造化权。夔契定求才济世，
张雷应辨气冲天。那知沦落天涯日，正是陶钧海内年。
肯向泥中抛折剑，不收重铸作龙泉。

卷 440_45 【岁暮】

白居易

穷阴急景坐相催，壮齿韶颜去不回。旧病重因年老发，
新愁多是夜长来。膏明自爇缘多事，雁默先烹为不才。
祸福细寻无会处，不如且进手中杯。

· 全唐诗 ·

卷 440_46【雨中赴刘十九二林之期，及到寺，刘已先去，因以四韵寄之】

白居易

云中台殿泥中路，既阻同游懒却还。将谓独愁犹对雨，
不知多兴已寻山。才应行到千峰里，只校来迟半日间。
最惜杜鹃花烂漫，春风吹尽不同攀。

卷 440_47【蔷薇正开，春酒初熟，因招刘十九、张大夫、崔二十四同饮】

白居易

瓮头竹叶经春熟，阶底蔷薇入夏开。似火浅深红压架，
如饴气味绿粘台。试将诗句相招去，倘有风情或可来。
明日早花应更好，心期同醉卯时杯。

卷 440_48【李白墓】

白居易

采石江边李白坟，绕田无限草连云。可怜荒垄穷泉骨，
曾有惊天动地文。但是诗人多薄命，就中沦落不过君。

· 全唐诗 ·

卷 440_49【对酒】

白居易

漫把参同契，难烧伏火砂。有时成白首，无处问黄芽。

幻世如泡影，浮生抵眼花。唯将绿醕酒，且替紫河车。

卷 440_50【戏答诸少年】

白居易

顾我长年头似雪，饶君壮岁气如云。

朱颜今日虽欺我，白发他时不放君。

卷 440_51【风雨晚泊】

白居易

苦竹林边芦苇丛，停舟一望思无穷。青苔扑地连春雨，
白浪掀天尽日风。忽忽百年行欲半，茫茫万事坐成空。
此生飘荡何时定，一缕鸿毛天地中。

· 全唐诗 ·

卷 440_52 【题崔使君新楼】

白居易

忧人何处可销忧，碧瓮红栏溢水头。

从此浔阳风月夜，崔公楼替庾公楼。

卷 440_53 【山中戏问韦侍御】

白居易

我抱栖云志，君怀济世才。常吟反招隐，那得入山来。

卷 440_54 【赠昙禅师】

白居易

五年不入慈恩寺，今日寻师始一来。

欲知火宅焚烧苦，方寸如今化作灰。

· 全唐诗 ·

卷 440_55【寄微之】

白居易

帝城行乐日纷纷，天畔穷愁我与君。秦女笑歌春不见，
巴猿啼哭夜常闻。何处琵琶弦似语，谁家风堕髻如云。
人生多少欢娱事，那独千分无一分。

卷 440_56【醉吟二首】

白居易

空王百法学未得，姹女丹砂烧即飞。
事事无成身老也，醉乡不去欲何归。

两鬓千茎新似雪，十分一醺欲如泥。
酒狂又引诗魔发，日午悲吟到日西。

卷 440_57【晓寝】

白居易

转枕重安寝，回头一欠伸。纸窗明觉晓，布被暖知春。
莫强疏慵性，须安老大身。鸡鸣一觉睡，不博早朝人。

· 全唐诗 ·

卷 440_58【答元八郎中、杨十二博士】

白居易

身觉浮云无所著，心同止水有何情。但知潇洒疏朝市，
不要崎岖隐姓名。尽日观鱼临涧坐，有时随鹿上山行。
谁能抛得人间事，来共腾腾过此生。

卷 440_59【湖亭与行简宿】

白居易

浔阳少有风情客，招宿湖亭尽却回。
水槛虚凉风月好，夜深谁共阿怜来。

卷 440_60【八月十五日夜湓亭望月】

白居易

昔年八月十五夜，曲江池畔杏园边。今年八月十五夜，
湓浦沙头水馆前。西北望乡何处是，东南见月几回圆。
临风一叹无人会，今夜清光似往年。

· 全唐诗 ·

卷 440_61【赠江客】

白居易

江柳影寒新雨地，塞鸿声急欲霜天。
愁君独向沙头宿，水绕芦花月满船。

卷 440_62【残暑招客】

白居易

云截山腰断，风驱雨脚回。早阴江上散，残热日中来。
却取生衣著，重拈竹簟开。谁能淘晚热，闲饮两三杯。

卷 440_63【浔阳秋怀，赠许明府】

白居易

霜红二林叶，风白九江波。暝色投烟鸟，秋声带雨荷。
马闲无处出，门冷少人过。卤莽还乡梦，依稀望阙歌。
共思除醉外，无计奈愁何。试问陶家酒，新篘得几多。

· 全唐诗 ·

卷 440_64【九日醉吟】

白居易

有恨头还白，无情菊自黄。一为州司马，三见岁重阳。
剑匣尘埃满，笼禽日月长。身从渔父笑，门任雀罗张。
问疾因留客，听吟偶置觞。叹时论倚伏，怀旧数存亡。
奈老应无计，治愁或有方。无过学王绩，唯以醉为乡。

卷 440_65【问韦山人山甫】

白居易

身名身事两蹉跎，试就先生问若何。
从此神仙学得否，白须虽有未为多。

卷 440_66【送萧炼师步虚词十首，卷后以二绝继之】

白居易

欲上瀛州临别时，赠君十首步虚词。
天仙若爱应相问，可道江州司马诗。

· 全唐诗 ·

花纸瑶緘松墨字，把将天上共谁开。
试呈王母如堪唱，发遣双成更取来。

卷 440_67【赠李兵马使】

白居易

身得贰师余气概，家藏都尉旧诗章。
江南别有楼船将，燕颌虬须不姓杨。

卷 440_68【题遗爱寺前溪松】

白居易

偃亚长松树，侵临小石溪。静将流水对，高共远峰齐。
翠盖烟笼密，花幢雪压低。与僧清影坐，借鹤稳枝栖。
笔写形难似，琴偷韵易迷。暑天风槭槭，晴夜露凄凄。
独契依为舍，闲行绕作蹊。栋梁君莫采，留著伴幽栖。

卷 440_69【庐山草堂夜雨独宿寄牛二、李七、庾三十二员外】

白居易

丹青携手三君子，白发垂头一病翁。兰省花时锦帐下，

· 全唐诗 ·

庐山雨夜草庵中。终身胶漆心应在，半路云泥迹不同。
唯有无生三昧观，荣枯一照两成空。

卷 440_70 【闻杨十二新拜省郎，遥以诗贺】

白居易

文昌新入有光辉，紫界宫墙白粉闱。晓日鸡人传漏箭，
春风侍女护朝衣。雪飘歌句高难和，鹤拂烟霄老惯飞。
官职声名俱入手，近来诗客似君稀。

卷 440_71 【三月三日怀微之】

白居易

良时光景长虚掷，壮岁风情已暗销。
忽忆同为校书日，每年同醉是今朝。

卷 440_72 【赠韦八】

白居易

辞君岁久见君初，白发惊嗟两有馀。容鬓别来今至此，
心情料取合何如。曾同曲水花亭醉，亦共华阳竹院居。

· 全唐诗 ·

岂料天南相见夜，哀猿瘴雾宿匡庐。

卷 440_73【春江闲步，赠张山人】

白居易

江景又妍和，牵愁发浩歌。晴沙金屑色，春水麴尘波。
红簇交枝杏，青含卷叶荷。藉莎怜软暖，憩树爱婆娑。
书信朝贤断，知音野老多。相逢不闲语，争奈日长何。

卷 440_74【春听琵琶，兼简长孙司户】

白居易

四弦不似琵琶声，乱写真珠细撼铃。指底商风悲飒飒，
舌头胡语苦醒醒。如言都尉思京国，似诉明妃厌虏庭。
迁客共君想劝谏，春肠易断不须听。

卷 440_75【吴宫辞】

白居易

一入吴王殿，无人睹翠娥。楼高时见舞，宫静夜闻歌。
半露胸如雪，斜回脸似波。妍媸各有分，谁敢妒恩多。

· 全唐诗 ·

卷 440_76【送韦侍御量移金州司马】

白居易

春欢雨露同沾泽，冬叹风霜独满衣。留滞多时如我少，
迁移好处似君稀。卧龙云到须先起，蛰燕雷惊尚未飞。
莫恨东西沟水别，沧溟长短拟同归。

卷 440_77【自到浔阳生三女子，因诮真理，用遣妄怀】

白居易

宦途本自安身拙，世累由来向老多。远谪四年徒已矣，
晚生三女拟如何。预愁嫁娶真成患，细念因缘尽是魔。
赖学空王治苦法，须抛烦恼入头陀。

卷 440_78【江西裴常侍以优礼见待，又蒙赠诗，辄叙鄙诚，
用伸感谢】

白居易

一从簪笏事金貂，每借温颜放折腰。长觉身轻离泥滓，
忽惊手重捧琼瑶。马因回顾虽增价，桐遇知音已半焦。
他日秉钧如见念，壮心直气未全销。

· 全唐诗 ·

卷 440_79【自江州司马授忠州刺史，仰荷圣泽，聊书鄙诚】

白居易

炎瘴抛身远，泥涂索脚难。网初鳞拨刺，笼久翅摧残。
雷电颁时令，阳和变岁寒。遗簪承旧念，剖竹授新官。
乡党前程近，心随外事宽。生还应有分，西笑问长安。

卷 440_80【除忠州，寄谢崔相公】

白居易

提拔出泥知力竭，吹嘘生翅见情深。剑锋缺折难冲斗，
桐尾烧焦岂望琴。感旧两行年老泪，酬恩一寸岁寒心。
忠州好恶何须问，鸟得辞笼不择林。

卷 440_81【初除官，蒙裴常侍赠鹖衔瑞草绯袍鱼袋，因谢惠贶，兼抒离情】

白居易

新授铜符未著绯，因君装束始光辉。惠深范叔绨袍赠，
荣过苏秦佩印归。鱼缀白金随步跃，鹖衔红绶绕身飞。
明朝恋别朱门泪，不敢多垂恐污衣。

· 全唐诗 ·

卷 440_82【洪州逢熊孺登】

白居易

靖安院里辛夷下，醉笑狂吟气最粗。
莫问别来多少苦，低头看取白髭须。

卷 440_83【初著刺史绯，答友人见赠】

白居易

故人安慰善为辞，五十专城道未迟。徒使花袍红似火，
其如蓬鬓白成丝。且贪薄俸君应惜，不称衰容我自知。
银印可怜将底用，只堪归舍吓妻儿。

卷 440_84【又答贺客】

白居易

银章暂假为专城，贺客来多懒起迎。
似挂绯衫衣架上，朽株枯竹有何荣。

· 全唐诗 ·

卷 440_85 【别草堂三绝句】

白居易

正听山鸟向阳眠，黄纸除书落枕前。
为感君恩须暂起，炉峰不拟住多年。
久眠褐被为居士，忽挂绯袍作使君。

身出草堂心不出，庐山未要勒移文。
三间茅舍向山开，一带山泉绕舍回。
山色泉声莫惆怅，三年官满却归来。

卷 440_86 【钟陵饯送】

白居易

翠幕红筵高在云，歌钟一曲万家闻。
路人指点滕王阁，看送忠州白使君。

卷 440_87 【浔阳宴别】

白居易

鞍马军城外，笙歌祖帐前。乘潮发湓口，带雪别庐山。

· 全唐诗 ·

暮景牵行色，春寒散醉颜。共嗟炎瘴地，尽室得生还。

卷 440_88【戏赠户部李巡官】

白居易

好去民曹李判官，少贪公事且谋欢。
男儿未死争能料，莫作忠州刺史看。

卷 440_89【行次夏口，先寄李大夫】

白居易

连山断处大江流，红旆逶迤镇上游。幕下翱翔秦御史，
军前奔走汉诸侯。曾陪剑履升鸾殿，欲谒旌幢入鹤楼。
假著绯袍君莫笑，恩深始得向忠州。

卷 440_90【重赠李大夫】

白居易

早接清班登玉陛，同承别诏直金銮。凤巢阁上容身稳，
鹤锁笼中展翅难。流落多年应是命，量移远郡未成官。
惭君独不欺憔悴，犹作银台旧眼看。

· 全唐诗 ·

卷 440_91【对镜吟】

白居易

闲看明镜坐清晨，多病姿容半老身。谁论情性乖时事，
自想形骸非贵人。三殿失恩宜放弃，九宫推命合漂沦。
如今所得须甘分，腰佩银龟朱两轮。

卷 440_92【江州赴忠州，至江陵已来，舟中示舍弟五十韵】

白居易

昔作咸秦客，常思江海行。今来仍尽室，此去又专城。
典午犹为幸，分忧固是荣。筭星州乘送，艤牒驿船迎。
共载皆妻子，同游即弟兄。宁辞浪迹远，且贵赏心并。
云展帆高挂，飙驰棹迅征。溯流从汉浦，循路转荆衡。
山逐时移色，江随地改名。风光近东早，水木向南清。
夏口烟孤起，湘川雨半晴。日煎红浪沸，月射白砂明。
北渚寒留雁，南枝暖待莺。骈朱桃露萼，点翠柳含萌。
亥市鱼盐聚，神林鼓笛鸣。壶浆椒叶气，歌曲竹枝声。
系缆怜沙静，垂纶爱岸平。水餐红粒稻，野茹紫花菁。
瓯泛茶如乳，台粘酒似饴。脍长抽锦缕，藕脆削琼英。
容易来千里，斯须进一程。未曾劳气力，渐觉有心情。
卧稳添春睡，行迟带酒醒。忽愁牵世网，便欲濯尘缨。
早接文场战，曾争翰苑盟。掉头称俊造，翘足取公卿。

· 全唐诗 ·

且昧随时义，徒输报国诚。众排恩易失，偏压势先倾。
虎尾忧危切，鸿毛性命轻。烛蛾谁救活，蚕茧自缠萦。
敛手辞双阙，回眸望两京。长沙抛贾谊，漳浦卧刘桢。
鶗鴂鸣还歇，蟾蜍破又盈。年光同激箭，乡思极摇旌。
潦倒亲知笑，衰羸旧识惊。乌头因感白，鱼尾为劳赭。
剑学将何用，丹烧竟不成。孤舟萍一叶，双鬓雪千茎。
老见人情尽，闲思物理精。如汤探冷热，似博斗输赢。
险路应须避，迷途莫共争。此心知止足，何物要经营。
玉向泥中洁，松经雪后贞。无妨隐朝市，不必谢寰瀛。
但在前非悟，期无后患婴。多知非景福，少语是元亨。
晦即全身药，明为伐性兵。昏昏随世俗，蠢蠢学黎氓。
鸟以能言³，龟缘入梦烹。知之一何晚，犹足保余生。

卷 440_93【题岳阳楼】

白居易

岳阳城下水漫漫，独上危楼倚曲栏。春岸绿时连梦泽，
夕波红处近长安。猿攀树立啼何苦，雁点湖飞渡亦难。
此地唯堪画图障，华堂张与贵人看。

卷 440_94【入峡次巴东】

白居易

不知远郡何时到，犹喜全家此去同。万里王程三峡外，

· 全唐诗 ·

百年生计一舟中。巫山暮足沾花雨，陇水春多逆浪风。
两片红旗数声鼓，使君艤牒上巴东。

卷 440_95【十年三月三十日，别微之于沔上，十四年三月十一夜，遇微之于峡中，停舟夷陵七言十七韵以赠，且欲记所遇之地，为他年会话张本也】

白居易

沔水店头春尽日，送君上马谪通川。夷陵峡口明月夜，
此处逢君是偶然。一别五年方见面，相携三宿未回船。

坐从日暮唯长叹，语到天明竟未眠。齿发蹉跎将五十，
关河迢递过三千。生涯共寄沧江上，乡国俱抛白日边。

往事渺茫都似梦，旧游流落半归泉。醉悲洒泪春杯里，
吟苦支颐晓烛前。莫问龙钟恶官职，且听清脆好文篇。

别来只是成诗癖，老去何曾更酒颠。各限王程须去住，
重开离宴贵留连。黄牛渡北移征棹，白狗崖东卷别筵。

神女台云闲缭绕，使君滩水急潺湲，风凄暝色愁杨柳，
月吊宵声哭杜鹃。万丈赤幢潭底日，一条白练峡中天。

君还秦地辞炎徼，我向忠州入瘴烟。未死会应相见在，
又知何地复何年。

· 全唐诗 ·

卷 440_96 【题峡中石上】

白居易

巫女庙花红似粉，昭君村柳翠于眉。
诚知老去风情少，见此争无一句诗。

· 全唐诗 ·

第四百四十一卷

卷 441_1【夜入瞿唐峡】

白居易

瞿唐天下险，夜上信难哉。岸似双屏合，天如匹帛开。
逆风惊浪起，拔念暗船来。欲识愁多少，高于滟滪堆。

卷 441_2【初到忠州赠李六】

白居易

好在天涯李使君，江头相见日黄昏。吏人生梗都如鹿，
市井疏芜只抵村。一只兰船当驿路，百层石磴上州门。
更无平地堪行处，虚受朱轮五马恩。

卷 441_3【郡斋暇日忆庐山草堂，兼寄二林僧社三十韵，多叙贬官已来出处之意】

白居易

· 全唐诗 ·

谏诤知无补，迁移分所当。不堪匡圣主，只合事空王。
龙象投新社，鹈鸂失故行。沉吟辞北阙，诱引向西方。
便住双林寺，仍开一草堂。平治行道路，安置坐禅床。
手版支为枕，头巾阁在墙。先生乌几舄，居士白衣裳。
竟岁何曾闷，终身不拟忙。灭除残梦想，换尽旧心肠。
世界多烦恼，形神久损伤。正从风鼓浪，转作日销霜。
吾道寻知止，君恩偶未忘。忽蒙颁凤诏，兼谢剖鱼章。
莲静方依水，葵枯重仰阳。三车犹夕会，五马已晨装。
去似寻前世，来如别故乡。眉低出鹫岭，脚重下蛇冈。
渐望庐山远，弥愁峡路长。香炉峰隐隐，巴字水茫茫。
瓢挂留庭树，经收在屋梁。春抛红药圃，夏忆白莲塘。
唯拟捐尘事，将何答宠光。有期追永远，无政继龚黄。
南国秋犹热，西斋夜暂凉。闲吟四句偈，静对一炉香。
身老同丘井，心空是道场。觅僧为去伴，留俸作归粮。
为报山中侣，凭看竹下房。会应归去在，松菊莫教荒。

卷 441_4【赠康叟】

白居易

八十秦翁老不归，南宾太守乞寒衣。
再三怜汝非他意，天宝遗民见渐稀。

卷 441_5【鹦鹉】

· 全唐诗 ·

白居易

竟日语还默，中宵栖复惊。身囚缘彩翠，心苦为分明。
暮起归巢思，春多忆侣声。谁能拆笼破，从放快飞鸣。

卷 441_6【京使回，累得南省诸公书，因以长句诗寄谢萧五、刘二、元二、吴十一、韦大、陆郎中、崔二十二、牛二、李七、庾三十二、李六、李十、杨三、樊大、杨十二员外】

白居易

雪压泥埋未死身，每劳存问愧交亲。浮萍飘泊三千里，
列宿参差十五人。禁月落时君待漏，畚烟深处我行春。
瘴乡得老犹为幸，岂敢伤嗟白发新。

卷 441_7【东城春意】

白居易

风软云不动，郡城东北隅。晚来春澹澹，天气似京都。
弦管随宜有，杯觞不道无。其如亲故远，无可共欢娱。

卷 441_8【木莲树生巴峡山谷间，巴民亦呼为黄心树，大者高五丈，涉冬不凋，身如青杨，有白文，叶如桂，厚大无脊，

· 全唐诗 ·

花如莲，香色艳腻皆同，独房蕊有异。四月初始开，自开迨谢，仅二十日。忠州西北十里，有鸣玉溪，生者秾茂尤异。元和十四年夏，命道士丘元志写，惜其遐僻，因题三绝句云】

白居易

如折芙蓉栽旱地，似抛芍药挂高枝。
云埋水隔无人识，唯有南宾太守知。

红似燕支腻如粉，伤心好物不须臾。
山中风起无时节，明日重来得在无。

已愁花落荒岩底，复恨根生乱石间。
几度欲移移不得，天教抛掷在深山。

卷 441_9【种桃杏】

白居易

无论海角与天涯，大抵心安即是家。路远谁能念乡曲，
年深兼欲忘京华。忠州且作三年计，种杏栽桃拟待花。

卷 441_10【新秋】

· 全唐诗 ·

白居易

二毛生镜日，一叶落庭时。老去争由我，愁来欲泥谁。
空销闲岁月，不见旧亲知。唯弄扶床女，时时强展眉。

卷 441_11【龙昌寺荷池】

白居易

冷碧新秋水，残红半破莲。从来寥落意，不似此池边。

卷 441_12【听竹枝赠李侍御】

白居易

巴童巫女竹枝歌，懊恼何人怨咽多。
暂听遣君犹怅望，长闻教我复如何。

卷 441_13【寄胡饼与杨万州】

白居易

胡麻饼样学京都，面脆油香新出炉。
寄与饥馋杨大使，尝看得似辅兴无。

· 全唐诗 ·

卷 441_14【感櫻桃花，因招饮客】

白居易

櫻桃昨夜开如雪，鬓发今年白似霜。渐觉花前成老丑，
何曾酒后更颠狂。谁能闻此来相劝，共泥春风醉一场。

卷 441_15【东亭闲望】

白居易

东亭尽日坐，谁伴寂寥身。绿桂为宾客，红蕉当美人。
笑言虽不接，情状似相亲。不作悠悠想，如何度晚春。

卷 441_16【画木莲花图寄元郎中】

白居易

花房膩似红莲朵，艳色鲜如紫牡丹。
唯有诗人能解爱，丹青写出与君看。

卷 441_17【和李澧州题韦开州经藏诗】

· 全唐诗 ·

白居易

既悟莲花藏，须遗贝叶书。菩提无处所，文字本空虚。
观指非知月，忘筌是得鱼。闻君登彼岸，舍筏复何如。

卷 441_18【九日题涂溪】

白居易

蕃草席铺枫叶岸，竹枝歌送菊花杯。
明年尚作南宾守，或可重阳更一来。

卷 441_19【即事寄微之】

白居易

畲田涩米不耕锄，旱地荒园少菜蔬。想念土风今若此，
料看生计合何如。衣缝紕纈黄丝绢，饭下腥咸白小鱼。
饱暖饥寒何足道，此身长短是空虚。

卷 441_20【题郡中荔枝诗十八韵，兼寄万州杨八使君】

白居易

· 全唐诗 ·

奇果标南土，芳林对北堂。素华春漠漠，丹实夏煌煌。
叶捧低垂户，枝擎重压墙。始因风弄色，渐与日争光。
夕讶条悬火，朝惊树点妆。深于红踯躅，大校白槟榔。
星缀连心朵，珠排耀眼房。紫罗裁衬壳，白玉裹填瓤。
早岁曾闻说，今朝始摘尝。嚼疑天上味，嗅异世间香。
润胜莲生水，鲜逾橘得霜。燕支掌中颢，甘露舌头浆。
物少尤珍重，天高苦渺茫。已教生暑月，又使阻遐方。
粹液灵难驻，妍姿嫩易伤。近南光景热，向北道途长。
不得充王赋，无由寄帝乡。唯君堪掷赠，面白似潘郎。

卷 441_21 【留北客】

白居易

峡外相逢远，樽前一会难。即须分手别，且强展眉欢。
楚袖萧条舞，巴弦趣数弹。笙歌随分有，莫作帝乡看。

卷 441_22 【重寄荔枝与杨使君，时闻杨使君欲种植故有落句之戏】

白居易

摘来正带凌晨露，寄去须凭下水船。映我绯衫浑不见，
对公银印最相鲜。香连翠叶真堪画，红透青笼实可怜。
闻道万州方欲种，愁君得吃是何年。

· 全唐诗 ·

卷 441_23【和万州杨使君四绝句·竞渡】

白居易

竞渡相传为汨罗，不能止遏意无他。
自经放逐来憔悴，能校灵均死几多。

卷 441_24【和万州杨使君四绝句·江边草】

白居易

闻君泽畔伤春草，忆在天门街里时。
漠漠凄凄愁满眼，就中惆怅是江蓠。

卷 441_25【和万州杨使君四绝句·嘉庆李】

白居易

东都绿李万州栽，君手封题我手开。
把得欲尝先怅望，与渠同别故乡来。

卷 441_26【和万州杨使君四绝句·白槿花】

· 全唐诗 ·

白居易

秋薜晚英无艳色，何因栽种在人家。
使君自别罗敷面，争解回头爱白花。

卷 441_27【和行简望郡南山】

白居易

反照前山云树明，从君苦道似华清。
试听肠断巴猿叫，早晚骊山有此声。

卷 441_28【种荔枝】

白居易

红颗珍珠诚可爱，白须太守亦何痴。
十年结子知谁在，自向庭中种荔枝。

卷 441_29【阴雨】

白居易

岚雾今朝重，江山此地深。滩声秋更急，峡气晓多阴。

· 全唐诗 ·

望阙云遮眼，思乡雨滴心。将何慰幽独，赖此北窗琴。

卷 441_30 【送客归京】

白居易

水陆四千里，何时归到秦。舟辞三峡雨，马入九衢尘。
有酒留行客，无书寄贵人。唯凭远传语，好在曲江春。

卷 441_31 【送萧处士游黔南】

白居易

能文好饮老萧郎，身似浮云鬓似霜。生计抛来诗是业，
家园忘却酒为乡。江从巴峡初成字，猿过巫阳始断肠。
不醉黔中争去得，磨围山月正苍苍。

卷 441_32 【东楼醉】

白居易

天涯深峡无人地，岁暮穷阴欲夜天。
不向东楼时一醉，如何拟过二三年。

· 全唐诗 ·

卷 441_33【寄微之】

白居易

高天默默物茫茫，各有来由致损伤。鸚为能言长剪翅，
龟缘难死久支床。莫嫌冷落抛闲地，犹胜炎蒸卧瘴乡。
外物竟关身底事，谩排门戟系腰章。

卷 441_34【东楼招客夜饮】

白居易

莫辞数数醉东楼，除醉无因破得愁。
唯有绿樽红烛下，暂时不似在忠州。

卷 441_35【醉后戏题】

白居易

自知清冷似冬凌，每被人呼作律僧。
今夜酒醺罗绮暖，被君融尽玉壶冰。

卷 441_36【冬至夜】

· 全唐诗 ·

白居易

老去襟怀常濩落，病来须鬓转苍浪。心灰不及炉中火，
鬓雪多于砌下霜。三峡南宾城最远，一年冬至夜偏长。
今宵始觉房栊冷，坐索寒衣托孟光。

卷 441_37【竹枝词四首】

白居易

瞿唐峡口水烟低，白帝城头月向西。
唱到竹枝声咽处，寒猿暗鸟一时啼。
竹枝苦怨怨何人，夜静山空歇又闻。
蛮儿巴女齐声唱，愁杀江楼病使君。

巴东船舫上巴西，波面风生雨脚齐。
水蓼冷花红簇簇，江蓠湿叶碧凄凄。

江畔谁人唱竹枝，前声断咽后声迟。
怪来调苦缘词苦，多是通州司马诗。

卷 441_38【酬严中丞晚眺黔江见寄】

白居易

· 全唐诗 ·

江水三回曲，愁人两地情。磨围山下色，明月峡中声。
晚后连天碧，秋来彻底清。临流有新恨，照见白须生。

卷 441_39【寄题杨万州四望楼】

白居易

江上新楼名四望，东西南北水茫茫。
无由得与君携手，同凭栏干一望乡。

卷 441_40【答杨使君登楼见忆】

白居易

忠万楼中南北望，南州烟水北州云。
两州何事偏相忆，各是笼禽作使君。

卷 441_41【除夜】

白居易

岁暮纷多思，天涯渺未归。老添新甲子，病减旧容辉。
乡国仍留念，功名已息机。明朝四十九，应转悟前非。

· 全唐诗 ·

卷 441_42 【闻雷】

白居易

瘴地风霜早，温天气候催。穷冬不见雪，正月已闻雷。
震蛰虫蛇出，惊枯草木开。空余客方寸，依旧似寒灰。

卷 441_43 【春至】

白居易

若为南国春还至，争向东楼日又长。白片落梅浮涧水，
黄梢新柳出城墙。闲拈蕉叶题诗咏，闷取藤枝引酒尝。
乐事渐无身渐老，从今始拟负风光。

卷 441_44 【感春】

白居易

巫峡中心郡，巴城四面春。草青临水地，头白见花人。
忧喜皆心火，荣枯是眼尘。除非一杯酒，何物更关身。

卷 441_45 【春江】

· 全唐诗 ·

白居易

炎凉昏晓苦推迁，不觉忠州已二年。闭阁只听朝暮鼓，
上楼空望往来船。莺声诱引来花下，草色勾留坐水边。
唯有春江看未厌，萦砂绕石绿潺湲。

卷 441_46 【题东楼前李使君所种樱花花】

白居易

身入青云不见日，手栽红树又逢春。
唯留花向楼前著，故故抛愁与后人。

卷 441_47 【巴水】

白居易

城下巴江水，春来似麴尘。软沙如渭曲，斜岸忆天津。
影蘸新黄柳，香浮小白蘋。临流搔首坐，惆怅为何人。

卷 441_48 【野行】

白居易

· 全唐诗 ·

草润衫襟重，沙干屐齿轻。仰头听鸟立，信脚望花行。
暇日无公事，衰年有道情。浮生短于梦，梦里莫营营。

卷 441_49【送高侍御使回，因寄杨八】

白居易

明月峡边逢制使，黄茅岸上是忠州。
到城莫说忠州恶，无益虚教杨八愁。

卷 441_50【奉酬李相公见示绝句】

白居易

碧油幢下捧新诗，荣贱虽殊共一悲。
涕泪满襟君莫怪，甘泉侍从最多时。

卷 441_51【喜山石榴花开】

白居易

忠州州里今日花，庐山山头去时树。已怜根损斩新栽，
还喜花开依旧数。赤玉何人少琴轸，红缣谁家合罗袴。
但知烂熳恣情开，莫怕南宾桃李妒。

卷 441_52【戏赠萧处士、清禅师】

· 全唐诗 ·

白居易

三杯崑崙忘机客，百衲头陀任运僧。
又有放慵巴郡守，不营一事共腾腾。

卷 441_53【钱虢州以三堂绝句见寄，因以本韵和之】

白居易

同事空王岁月深，相思远寄定中吟。
遥知清净中和化，只用金刚三昧心。

卷 441_54【三月三日】

白居易

暮春风景初三日，流世光阴半百年。
欲作闲游无好伴，半江惆怅却回船。

卷 441_55【寒食夜】

白居易

四十九年身老日，一百五夜月明天。

· 全唐诗 ·

抱膝思量何事在，痴男騃女唤秋千。

卷 441_56【代州民问】

白居易

龙昌寺底开山路，巴子台前种柳林。
官职家乡都忘却，谁人会得使君心。

卷 441_57【答州民】

白居易

宦情斗擞随尘去，乡思销磨逐日无。
唯拟腾腾作闲事，遮渠不道使君愚。

卷 441_58【荔枝楼对酒】

白居易

荔枝新熟鸡冠色，烧酒初开琥珀香。
欲摘一枝倾一醑，西楼无客共谁尝。

· 全唐诗 ·

卷 441_59【房家夜宴喜雪，戏赠主人】

白居易

风头向夜利如刀，赖此温炉软锦袍。桑落气薰珠翠暖，
柘枝声引管弦高。酒钩送醺推莲子，烛泪粘盘垒蒲萄。
不醉遣侬争散得，门前雪片似鹅毛。

卷 441_60【醉后赠人】

白居易

香球趁拍回环匝，花醺抛巡取次飞。
自入春来未同醉，那能夜去独先归。

卷 441_61【初除尚书郎，脱刺史绯】

白居易

亲宾相贺问何如，服色恩光尽反初。头白喜抛黄草峡，
眼明惊拆紫泥书。便留朱绂还铃阁，却著青袍侍玉除。
无奈娇痴三岁女，绕腰啼哭觅金鱼。

· 全唐诗 ·

卷 441_62【留题开元寺上方】

白居易

东寺台阁好，上方风景清。数来犹未厌，长别岂无情。
恋水多临坐，辞花剩绕行。最怜新岸柳，手种未全成。

卷 441_63【别种东坡花树两绝】

白居易

三年留滞在江城，草树禽鱼尽有情。
何处殷勤重回首，东坡桃李种新成。

花林好住莫憔悴，春至但知依旧春。
楼上明年新太守，不妨还是爱花人。

卷 441_64【别桥上竹】

白居易

穿桥进竹不依行，恐碍行人被损伤。
我去自惭遗爱少，不教君得似甘棠。

· 全唐诗 ·

卷 441_65【发白狗峡，次黄牛峡登高寺，却望忠州】

白居易

白狗次黄牛，滩如竹节稠。路穿天地险，人续古今愁。
忽见千花塔，因停一叶舟。畏途常迫促，静境暂淹留。
巴曲春全尽，巫阳雨半收。北归虽引领，南望亦回头。
昔去悲殊俗，今来念旧游。别僧山北寺，抛竹水西楼。
郡树花如雪，军厨酒似油。时时大开口，自笑忆忠州。

卷 441_66【棣华驿见杨八题梦兄弟诗】

白居易

遥闻旅宿梦兄弟，应为邮亭名棣华。
名作棣华来早晚，自题诗后属杨家。

卷 441_67【商山路有感】

白居易

万里路长在，六年身始归。所经多旧馆，大半主人非。

· 全唐诗 ·

卷 441_68【商山路驿桐树，昔与微之前后题名处】

白居易

与君前后多迁谪，五度经过此路隅。
笑问中庭老桐树，这回归去免来无。

卷 441_69【恻恻吟】

白居易

恻恻复恻恻，逐臣返乡国。前事难重论，少年不再得。
泥涂绛老头班白，炎瘴灵均面黎黑。六年不死却归来，
道著姓名人不识。

卷 441_70【德宗皇帝挽歌词四首】

白居易

执象宗玄祖，贻谋启孝孙。文高柏梁殿，礼薄霸陵原。
宫仗辞天阙，朝仪出国门。生成不可报，二十七年恩。

虞帝南巡后，殷宗谅暗中。初辞铸鼎地，已闭望仙台。
晓落当陵月，秋生满旆风。前星承帝座，不使北辰空。

· 全唐诗 ·

业大承宗祖，功成付子孙。睿文诗播乐，遗训史标言。
节表中和德，方垂广利恩。悬知千载后，理代数贞元。
梦减三龄寿，哀延七月期。寝园愁望远，宫仗哭行迟。
云日添寒惨，笳箫向晚悲。因山有遗诏，如葬汉文时。

卷 441_71【昭德皇后挽歌词】

白居易

仙去逍遥境，诗留窈窕章。春归金屋少，夜入寿宫长。
凤引曾辞辇，蚕休昔采桑。阴灵何处感，沙麓月无光。

卷 441_72【太平乐词二首】

白居易

岁丰仍节俭，时泰更销兵。圣念长如此，何忧不太平。

湛露浮尧酒，薰风起舜歌。愿同尧舜意，所乐在人和。

卷 441_73【小曲新词二首】

白居易

· 全唐诗 ·

霁色鲜宫殿，秋声脆管弦。圣明千岁乐，岁岁似今年。
红裾明月夜，碧簟早秋时。好向昭阳宿，天凉玉漏迟。

卷 441_74【闺怨词三首】

白居易

朝憎莺百啭，夜妒燕双栖。不惯经春别，谁知到晓啼。

珠箔笼寒月，纱窗背晓灯。夜来巾上泪，一半是春冰。

关山征戍远，闺阁别离难。苦战应憔悴，寒衣不要宽。

卷 441_75【残春曲】

白居易

禁苑残莺三四声，景迟风慢暮春情。

日西无事墙阴下，闲蹋宫花独自行。

卷 441_76【长安春】

白居易

· 全唐诗 ·

青门柳枝软无力，东风吹作黄金色。
街东酒薄醉易醒，满眼春愁销不得。

卷 441_77【长乐坡送人，赋得愁字】

白居易

行人南北分征路，流水东西接御沟。
终日坡前恨离别，谩名长乐是长愁。

卷 441_78【独眠吟二首】

白居易

夜长无睡起阶前，寥落星河欲曙天。
十五年来明月夜，何曾一夜不孤眠。

独眠客，夜夜可怜长寂寂。就中今夜最愁人，
凉月清风满床席。

卷 441_79【期不至】

白居易

· 全唐诗 ·

红烛清樽久延伫，出门入门天欲曙。
星稀月落竟不来，烟柳胧胧鹊飞去。

卷 441_80【长洲苑】

白居易

春入长洲草又生，鸂鶒飞起少人行。
年深不辨娃宫处，夜夜苏台空月明。

卷 441_81【忆江柳】

白居易

曾栽杨柳江南岸，一别江南两度春。
遥忆青青江岸上，不知攀折是何人。

卷 441_82【南浦别】

白居易

南浦凄凄别，西风袅袅秋。一看肠一断，好去莫回头。

· 全唐诗 ·

卷 441_83 【三年别】

白居易

悠悠一别已三年，相望相思明月天。
肠断青天望明月，别来三十六回圆。

卷 441_84 【伤春词】

白居易

深浅檐花千万枝，碧纱窗外啭黄鹂。
残妆含泪下帘坐，尽日伤春春不知。

卷 441_85 【后宫词】

白居易

泪湿罗巾梦不成，夜深前殿按歌声。
红颜未老恩先断，斜倚薰笼坐到明。

· 全唐诗 ·

第四百四十二卷

卷 442_1【吟元郎中白须诗，兼饮雪水茶，因题壁上】

白居易

吟咏霜毛句，闲尝雪水茶。城中展眉处，只是有元家。

卷 442_2【吴七郎中山人，待制班中，偶赠绝句】

白居易

金马东门只日开，汉庭待诏重仙才。
第三松树非华表，那得辽东鹤下来。

卷 442_3【和张十八秘书谢裴相公寄马】

白居易

齿齐腰足毛头腻，秘阁张郎叱拨驹。洗了颔花翻假锦，
走时蹄汗蹋真珠。青衫乍见曾惊否，红粟难赊得饱无。

· 全唐诗 ·

丞相寄来应有意，遣君骑去上云衢。

卷 442_4 【答山侣】

白居易

颌下髭须半是丝，光阴向后几多时。非无解挂簪缨意，
未有支持伏腊资。冒热冲寒徒自取，随行逐队欲何为。
更惭山侣频传语，五十归来道未迟。

卷 442_5 【早朝思退居】

白居易

霜严月苦欲明天，忽忆闲居思浩然。自问寒灯夜半起，
何如暖被日高眠。唯惭老病披朝服，莫虑饥寒计俸钱。
随有随无且归去，拟求丰足是何年。

卷 442_6 【曲江亭晚望】

白居易

曲江岸北凭栏干，水面阴生日脚残。尘路行多绿袍故，
风亭立久白须寒。诗成暗著闲心记，山好遥偷病眼看。

· 全唐诗 ·

不被马前提省印，何人信道是郎官。

卷 442_7【初除主客郎中知制诰，与王十一、李七、元九三舍人同出同宿，话旧感怀】

白居易

闲宵静话喜还悲，聚散穷通不自知。已分云泥行异路，
忽惊鸡鹤宿同枝。紫垣曹署荣华地，白发郎官老丑时。
莫怪不如君气味，此中来校十年迟。

卷 442_8【西省对花忆忠州东坡新花树，因寄题东楼】

白居易

每看阙下丹青树，不忘天边锦绣林。西掖垣中今日眼，
南宾楼上去年心。花含春意无分别，物感人情有浅深。
最忆东坡红烂熳，野桃山杏水林檎。

卷 442_9【寄题忠州小楼桃花】

白居易

· 全唐诗 ·

再游巫峡知何日，总是秦人说向谁。
长忆小楼风月夜，红栏干上两三枝。

卷 442_10【中书连直，寒食不归，因怀元九】

白居易

去岁清明日，南巴古郡楼。今年寒食夜，西省凤池头。
并上新人直，难随旧伴游。诚知视草贵，未免对花愁。
鬓发茎茎白，光阴寸寸流。经春不同宿，何异在忠州。

卷 442_11【春忆二林寺旧游，因寄朗、满、晦三上人】

白居易

一别东林三度春，每春常似忆情亲。头陀会里为逋客，
供奉班中作老臣。清净久辞香火伴，尘劳难索幻泡身。
最惭僧社题桥处，十八人名空一人。

卷 442_12【和元少尹新授官】

白居易

官稳身应泰，春风信马行。纵忙无苦事，虽病有心情。

· 全唐诗 ·

厚禄儿孙饱，前驱道路荣。花时八入直，无暇贺元兄。

卷 442_13【朝回和元少尹绝句】

白居易

朝客朝回回望好，尽纡朱紫佩金银。
此时独与君为伴，马上青袍唯两人。

卷 442_14【重和元少尹】

白居易

凤阁舍人京亚尹，白头俱未著绯衫。
南宫起请无消息，朝散何时得入衔。

卷 442_15【中书夜直梦忠州】

白居易

阁下灯前梦，巴南城里游。觅花来渡口，寻寺到山头。
江色分明绿，猿声依旧愁。禁钟惊睡觉，唯不上东楼。

· 全唐诗 ·

卷 442_16 【醉后】

白居易

酒后高歌且放狂，门前闲事莫思量。
犹嫌小户长先醒，不得多时住醉乡。

卷 442_17 【待漏入阁书事，奉赠元九学士阁老】

白居易

衙排宣政仗，门启紫宸关。彩笔停书命，花砖趁立班。
稀星点银砾，残月堕金环。暗漏犹传水，明河渐下山。
从东分地色，向北仰天颜。碧缕炉烟直，红垂佩尾闲。
纶闱惭并入，翰苑忝先攀。笑我青袍故，饶君茜绶殷。
诗仙归洞里，酒病滞人间。好去鸳鸯侣，冲天便不还。

卷 442_18 【晚春重到集贤院】

白居易

官曹清切非人境，风月鲜明是洞天。满砌荆花铺紫毯，
隔墙榆荚撒青钱。前时谪去三千里，此地辞来十四年。
虚薄至今惭旧职，院名抬举号为贤。

· 全唐诗 ·

卷 442_19 【紫薇花】

白居易

丝纶阁下文书静，钟鼓楼中刻漏长。
独坐黄昏谁是伴，紫薇花对紫微郎。

卷 442_20 【后宫词】

白居易

雨露由来一点恩，争能遍布及千门。
三千宫女胭脂面，几个春来无泪痕。

卷 442_21 【卜居】

白居易

游宦京都二十春，贫中无处可安贫。长羡蜗牛犹有舍，
不如硕鼠解藏身。且求容立锥头地，免似漂流木偶人。
但道吾庐心便足，敢辞湫隘与嚣尘。

卷 442_22 【题新居寄元八】

· 全唐诗 ·

白居易

青龙冈北近西边，移入新居便泰然。冷巷闭门无客到，
暖檐移榻向阳眠。阶庭宽窄才容足，墙壁高低粗及肩。
莫羨升平元八宅，自思买用几多钱。

卷 442_23 【登龙尾道南望，忆庐山旧隐】

白居易

龙尾道边来一望，香炉峰下去无因。青山举眼三千里，
白发平头五十人。自笑形骸纡组绶，将何言语掌丝纶。
君恩壮健犹难报，况被年年老逼身。

卷 442_24 【冯谖老处见与严郎中酬和诗，因戏赠绝句】

白居易

乍来天上宜清净，不用回头望故山。
纵有旧游君莫忆，尘心起即堕人间。

卷 442_25 【见于给事暇日上直寄南省诸郎官诗，因以戏赠】

白居易

· 全唐诗 ·

倚作天仙弄地仙，夸张一日抵千年。黄麻敕胜长生箓，
白纈词嫌内景篇。云彩误居青琐地，风流合在紫微天。
东曹渐去西垣近，鹤驾无妨更著鞭。

卷 442_26【题新昌所居】

白居易

宅小人烦闷，泥深马钝顽。街东闲处住，日午热时还。
院窄难栽竹，墙高不见山。唯应方寸内，此地觅宽闲。

卷 442_27【西省北院新构小亭，种竹开窗，东通骑省，与李常侍隔窗小饮，各题四韵】

白居易

结托白须伴，因依青竹丛。题诗新壁上，过酒小窗中。
深院晚无日，虚檐凉有风。金貂醉看好，回首紫垣东。

卷 442_28【酬元郎中同制加朝散大夫，书怀见赠】

白居易

命服虽同黄纸上，官班不共紫垣前。青衫脱早差三日，

· 全唐诗 ·

白发生迟校九年。曩者定交非势利，老来同病是诗篇。
终身拟作卧云伴，逐月须收烧药钱。五品足为婚嫁主，
绯袍著了好归田。

卷 442_29【初著绯戏赠元九】

白居易

晚遇缘才拙，先衰被病牵。那知垂白日，始是著绯年。
身外名徒尔，人间事偶然。我朱君紫绶，犹未得差肩。

卷 442_30【和韩侍郎苦雨】

白居易

润气凝柱础，繁声注瓦沟。暗留窗不晓，凉引簟先秋。
叶湿蚕应病，泥稀燕亦愁。仍闻放朝夜，误出到街头。

卷 442_31【连雨】

白居易

风雨暗萧萧，鸡鸣暮复朝。碎声笼苦竹，冷翠落芭蕉。
水鸟投檐宿，泥蛙入户跳。仍闻蕃客见，明日欲追朝。

· 全唐诗 ·

卷 442_32 【初加朝散大夫又转上柱国】

白居易

紫微今日烟霄地，赤岭前年泥土身。得水鱼还动鳞鬣，
乘轩鹤亦长精神。且惭身忝官阶贵，未敢家嫌活计贫。
柱国勋成私自问，有何功德及生人。

卷 442_33 【行简初授拾遗，同早朝入阁，因示十二韵】

白居易

夜色尚苍苍，槐阴夹路长。听钟出长乐，传鼓到新昌。
宿雨沙堤润，秋风桦烛香。马骄欺地软，人健得天凉。
待漏排阊阖，停珂拥建章。尔随黄阁老，吾次紫微郎。
并入连称籍，齐趋对折方。斗班花接萼，绰立雁分行。
近职诚为美，微才岂合当。纶言难下笔，谏纸易盈箱。
老去何侥幸，时来不料量。唯求杀身地，相誓答恩光。

卷 442_34 【立秋日登乐游园】

白居易

· 全唐诗 ·

独行独语曲江头，回马迟迟上乐游。
萧飒凉风与衰鬓，谁教计会一时秋。

卷 442_35【新秋早起，有怀元少尹】

白居易

秋来转觉此身衰，晨起临阶盥漱时。漆匣镜明头尽白，
铜瓶水冷齿先知。光阴纵惜留难住，官职虽荣得已迟。
老去相逢无别计，强开笑口展愁眉。

卷 442_36【夜筝】

白居易

紫袖红弦明月中，自弹自感暗低容。
弦凝指咽声停处，别有深情一万重。

卷 442_37【妻初授邑号告身】

白居易

弘农旧县授新封，钿轴金泥诰一通。我转官阶常自愧，
君加邑号有何功。花笺印了排窠湿，锦褙装来耀手红。

· 全唐诗 ·

倚得身名便慵堕，日高犹睡绿窗中。

卷 442_38【送客南迁】

白居易

我说南中事，君应不愿听。曾经身困苦，不觉语叮咛。
烧处愁云梦，波时忆洞庭。春畚烟勃勃，秋瘴露冥冥。
蚊蚋经冬活，鱼龙欲雨腥。水虫能射影，山鬼解藏形。
穴掉巴蛇尾，林飘鸬鸟翎。飓风千里黑，莽草四时青。
客似惊弦雁，舟如委浪萍。谁人劝言笑，何计慰漂零。
慎勿琴离膝，长须酒满瓶。大都从此去，宜醉不宜醒。

卷 442_39【暮归】

白居易

不觉百年半，何曾一日闲。朝随烛影出，暮趁鼓声还。
瓮里非无酒，墙头亦有山。归来长困卧，早晚得开颜。

卷 442_40【寄远】

白居易

· 全唐诗 ·

欲忘忘未得，欲去去无由。两腋不生翅，二毛空满头。
坐看新落叶，行上最高楼。暝色无边际，茫茫尽眼愁。

卷 442_41 【旧房】

白居易

远壁秋声虫络丝，入檐新影月低眉。
床帷半故帘旌断，仍是初寒欲夜时。

卷 442_42 【钱侍郎使君以题庐山草堂诗见寄，因酬之】

白居易

殷勤江郡守，怅望掖垣郎。惭见新琼什，思归旧草堂。
事随心未得，名与道相妨。若不休官去，人间到老忙。

卷 442_43 【寄山僧】

白居易

眼看过半百，早晚扫岩扉。白首谁能住，青山自不归。
百千万劫障，四十九年非。会拟抽身去，当风斗擞衣。

· 全唐诗 ·

卷 442_44【慈恩寺有感】

白居易

自问有何惆怅事，寺门临入却迟回。
李家哭泣元家病，柿叶红时独自来。

卷 442_45【酬严十八郎中见示】

白居易

口厌含香握厌兰，紫微青琐举头看。忽惊鬓后苍浪发，
未得心中本分官。夜酌满容花色暖，秋吟切骨玉声寒。
承明长短君应入，莫忆家江七里滩。

卷 442_46【寄王秘书】

白居易

霜菊花萎日，风梧叶碎时。怪来秋思苦，缘咏秘书诗。

卷 442_47【中书寓直】

· 全唐诗 ·

白居易

缭绕宫墙围禁林，半开阊阖晓沈沈。天晴更觉南山近，
月出方知西掖深。病对词头惭彩笔，老看镜面愧华簪。
自嫌野物将何用，土木形骸麋鹿心。

卷 442_48【自问】

白居易

黑花满眼丝满头，早衰因病病因愁。
宦途气味已谙尽，五十不休何日休。

卷 442_49【曲江独行，招张十八】

白居易

曲江新岁后，冰与水相和。南岸犹残雪，东风未有波。
偶游身独自，相忆意如何。莫待春深去，花时鞍马多。

卷 442_50【新居早春二首】

白居易

· 全唐诗 ·

静巷无来客，深居不出门。铺沙盖苔面，扫雪拥松根。
渐暖宜闲步，初晴爱小园。觅花都未有，唯觉树枝繁。
地润东风暖，闲行蹋草芽。呼童遣移竹，留客伴尝茶。
溜滴檐冰尽，尘浮隙日斜。新居未曾到，邻里是谁家。

卷 442_51 【新昌新居书事四十韵，因寄元郎中、张博士】

白居易

冒宠已三迁，归期始二年。囊中贮馀俸，园外买闲田。
狐兔同三径，蒿莱共一廛。新园聊划秽，旧屋且扶颠。
檐漏移倾瓦，梁欹换蠹椽。平治绕台路，整顿近阶砖。
巷狭开容驾，墙低垒过肩。门间堪驻盖，堂室可铺筵。
丹凤楼当后，青龙寺在前。市街尘不到，宫树影相连。
省史嫌坊远，豪家笑地偏。敢劳宾客访，或望子孙传。
不觅他人爱，唯将自性便。等闲栽树木，随分占风烟。
逸致因心得，幽期遇境牵。松声疑涧底，草色胜河边。
虚润冰销地，晴和日出天。苔行滑如簟，莎坐软于绵。
帘每当山卷，帷多带月褰。篱东花掩映，窗北竹婵娟。
迹慕青门隐，名惭紫禁仙。假归思晚沐，朝去恋春眠。
拙薄才无取，疏慵职不专。题墙书命笔，沽酒率分钱。
柏杵舂灵药，铜瓶漱暖泉。炉香穿盖散，笼烛隔纱然。
陈室何曾扫，陶琴不要弦。屏除俗事尽，养活道情全。
尚有妻孥累，犹为组绶缠。终须抛爵禄，渐拟断腥膻。
大抵宗庄叟，私心事竺乾。浮荣水划字，真谛火生莲。
梵部经十二，玄书字五千。是非都付梦，语默不妨禅。

· 全唐诗 ·

博士官犹冷，郎中病已痊。多同僻处住，久结静中缘。
缓步携筇杖，徐吟展蜀笺。老宜闲语话，闷忆好诗篇。
蛮榼来方泻，蒙茶到始煎。无辞数相见，鬓发各苍然。

卷 442_52【喜敏中及第，偶示所怀】

白居易

自知群从为儒少，岂料词场中第频。桂折一枝先许我，
杨穿三叶尽惊人。转于文墨须留意，贵向烟霄早致身。
莫学尔兄年五十，蹉跎始得掌丝纶。

卷 442_53【久不见韩侍郎，戏题四韵以寄之】

白居易

近来韩阁老，疏我我心知。户大嫌甜酒，才高笑小诗。
静吟乖月夜，闲醉旷花时。还有愁同处，春风满鬓丝。

卷 442_54【寄白头陀】

白居易

近见头陀伴，云师老更慵。性灵闲似鹤，颜状古于松。

· 全唐诗 ·

山里犹难觅，人间岂易逢。仍闻移住处，太白最高峰。

卷 442_55【和韩侍郎题杨舍人林池见寄】

白居易

渠水暗流春冻解，风吹日炙不成凝。
凤池冷暖君谙在，二月因何更有冰。

卷 442_56【勤政楼西老柳】

白居易

半朽临风树，多情立马人。开元一株柳，长庆二年春。

卷 442_57【偶题阁下厅】

白居易

静爱青苔院，深宜白鬓翁。貌将松共瘦，心与竹俱空。
暖有低檐日，春多颺幕风。平生闲境界，尽在五言中。

卷 442_58【予与故刑部李侍郎早结道友，以药术为事，与

· 全唐诗 ·

故京兆尹晚为诗侣有林泉之期。周岁之间，二君长逝。李住曲江北，元居升平西。追感旧游，因贻同志】

白居易

从哭李来伤道气，自亡元后减诗情。金丹同学都无益，
水竹邻居竟不成。月夜若为游曲水，花时那忍到升平。
如年七十身犹在，但恐伤心无处行。

卷 442_59【送冯舍人阁老往襄阳】

白居易

紫微阁底送君回，第二厅帘下不开。
莫恋汉南风景好，岷山花尽早归来。

卷 442_60【莫走柳条词送别】

白居易

南陌伤心别，东风满把春。莫欺杨柳弱，劝酒胜于人。

卷 442_61【酬韩侍郎、张博士雨后游曲江见寄】

· 全唐诗 ·

白居易

小园新种红樱树，闲绕花行便当游。
何必更随鞍马队，冲泥蹋雨曲江头。

卷 442_62【元家花】

白居易

今日元家宅，樱桃发几枝。稀稠与颜色，一似去年时。
失却东园主，春风可得知。

卷 442_63【代人赠王员外】

白居易

好在王员外，平生记得不。共赆黄叟酒，同上莫愁楼。
静接殷勤语，狂随烂熳游。那知今日眼，相见冷于秋。

卷 442_64【惜小园花】

白居易

晓来红萼凋零尽，但见空枝四五株。

· 全唐诗 ·

前日狂风昨夜雨，残芳更合得存无。

卷 442_65【萧相公宅遇自远禅师，有感而赠】

白居易

宦途堪笑不胜悲，昨日荣华今日衰。转似秋蓬无定处，
长于春梦几多时。半头白发惭萧相，满面红尘问远师。
应是世间缘未尽，欲抛官去尚迟疑。

卷 442_66【草词毕遇芍药初开，因咏小谢红药当阶翻诗，
以为一句未尽其状，偶成十六韵】

白居易

罢草紫泥诏，起吟红药诗。词头封送后，花口拆开时。
坐对钩帘久，行观步履迟。两三丛烂熳，十二叶参差。
背日房微敛，当阶朵旋欹。钗萼抽碧股，粉蕊扑黄丝。
动荡情无限，低斜力不支。周回看未足，比谕语难为。
勾漏丹砂里，焦饶火焰旗。彤云剩根蒂，绛帟欠纓綈。
况有晴风度，仍兼宿露垂。疑香薰黼画，似泪著胭脂。
有意留连我，无言怨思谁。应愁明日落，如恨隔年期。
菡萏泥连萼，玫瑰刺绕枝。等量无胜者，唯眼与心知。

卷 442_67【喜张十八博士除水部员外郎】

· 全唐诗 ·

白居易

老何殁后吟声绝，虽有郎官不爱诗。无复篇章传道路，
空留风月在曹司。长嗟博士官犹屈，亦恐骚人道渐衰。
今日闻君除水部，喜于身得省郎时。

卷 442_68【与沈、杨二舍人阁老同食，敕赐樱桃玩物，感恩因成十四韵】

白居易

清晓趋丹禁，红樱降紫宸。驱禽养得熟，和叶摘来新。
圆转盘倾玉，鲜明笼透银。内园题两字，四掖赐三臣。
荧惑晶华赤，醍醐气味真。如珠未穿孔，似火不烧人。
杏俗难为对，桃顽讵可伦。肉嫌卢橘厚，皮笑荔枝皴。
琼液酸甜足，金丸大小匀。偷须防曼倩，惜莫掷安仁。
手擘才离核，匙抄半是津。甘为舌上露，暖作腹中春。
已惧长尸禄，仍惊数食珍。最惭恩未报，饱喂不才身。

卷 442_69【送严大夫赴桂州】

白居易

地压坤方重，官兼宪府雄。桂林无瘴气，柏署有清风。
山水衙门外，旌旗艤牖中。大夫应绝席，诗酒与谁同。

· 全唐诗 ·

卷 442_70【春夜宿直】

白居易

三月十四夜，西垣东北廊。碧梧叶重叠，红药树低昂。
月砌漏幽影，风帘飘暗香。禁中无宿客，谁伴紫微郎。

卷 442_71【夏夜宿直】

白居易

人少庭宇旷，夜凉风露清。槐花满院气，松子落阶声。
寂寞挑灯坐，沉吟蹋月行。年衰自无趣，不是厌承明。

卷 442_72【七言十二句赠驾部吴郎中七兄】

白居易

四月天气和且清，绿槐阴合沙堤平。独骑善马衔镫稳，
初著单衣肢体轻。退朝下直少徒侣，归舍闭门无送迎。
风生竹夜窗间卧，月照松时台上行。春酒冷尝三数醺，
晓琴闲弄十余声。幽怀静境何人别，唯有南宫老驾兄。

· 全唐诗 ·

卷 442_73【玉真张观主下小女冠阿容】

白居易

绰约小天仙，生来十六年。姑山半峰雪，瑶水一枝莲。
晚院花留立，春窗月伴眠。回眸虽欲语，阿母在傍边。

卷 442_74【龙花寺主家小尼】

白居易

头青眉眼细，十四女沙弥。夜静双林怕，春深一食饥。
步慵行道困，起晚诵经迟。应似仙人子，花宫未嫁时。

卷 442_75【访陈二】

白居易

晓垂朱绶带，晚著白纶巾。出去为朝客，归来是野人。
两餐聊过日，一榻足容身。此外皆闲事，时时访老陈。

卷 442_76【晚亭逐凉】

· 全唐诗 ·

白居易

送客出门后，移床下砌初。趁凉行绕竹，引睡卧看书。
老更为官拙，慵多向事疏。松窗倚藤杖，人道似僧居。

卷 442_77【曲江忆李十一】

白居易

李君殁后共谁游，柳岸荷亭两度秋。
独绕曲江行一匝，依前还立水边愁。

卷 442_78【江亭玩春】

白居易

江亭乘晓阅众芳，春妍景丽草树光。日消石桂绿岚气，
风坠木兰红露浆。水蒲渐展书带叶，山榴半含琴轸房。
何物春风吹不变，愁人依旧鬓苍苍。

卷 442_79【闻夜砧】

白居易

· 全唐诗 ·

谁家思妇秋捣帛，月苦风凄砧杵悲。八月九月正长夜，
千声万声无了时。应到天明头尽白，一声添得一茎丝。

卷 442_80【板桥路】

白居易

梁苑城西二十里，一渠春水柳千条。若为此路今重过，
十五年前旧板桥。曾共玉颜桥上别，不知消息到今朝。

卷 442_81【青门柳】

白居易

青青一树伤心色，曾入几人离恨中。
为近都门多送别，长条折尽减春风。

卷 442_82【梨园弟子】

白居易

白头垂泪话梨园，五十年前雨露恩。
莫问华清今日事，满山红叶锁宫门。

· 全唐诗 ·

卷 442_83【暮江吟】

白居易

一道残阳铺水中，半江瑟瑟半江红。
可怜九月初三夜，露似真珠月似弓。

卷 442_84【思妇眉】

白居易

春风摇荡自东来，折尽樱桃绽尽梅。
惟余思妇愁眉结，无限春风吹不开。

卷 442_85【怨词】

白居易

夺宠心那惯，寻思倚殿门。不知移旧爱，何处作新恩。

卷 442_86【空闺怨】

白居易

· 全唐诗 ·

寒月沈沈洞房静，真珠帘外梧桐影。
秋霜欲下手先知，灯底裁缝剪刀冷。

卷 442_87【秋房夜】

白居易

云露青天月漏光，中庭立久却归房。
水窗席冷未能卧，挑尽残灯秋夜长。

卷 442_88【采莲曲】

白居易

菱叶萦波荷飏风，荷花深处小船通。
逢郎欲语低头笑，碧玉搔头落水中。

卷 442_89【邻女】

白居易

娉婷十五胜天仙，白日姮娥旱地莲。
何处闲教鹦鹉语，碧纱窗下绣床前。

· 全唐诗 ·

卷 442_90 【闺妇】

白居易

斜凭绣床愁不动，红绡带缓绿鬟低。
辽阳春尽无消息，夜合花前日又西。

卷 442_91 【移牡丹栽】

白居易

金钱买得牡丹栽，何处辞丛别主来。
红芳堪惜还堪恨，百处移将百处开。

卷 442_92 【听夜筝有感】

白居易

江州去日听筝夜，白发新生不愿闻。
如今格是头成雪，弹到天明亦任君。

卷 442_93 【代谢好妓答崔员外】

· 全唐诗 ·

白居易

青娥小谢娘，白发老崔郎。谩爱胸前雪，其如头上霜。
别后曹家碑背上，思量好字断君肠。

卷 442_94 【琵琶】

白居易

弦清拨刺语铮铮，背却残灯就月明。
赖是心无惆怅事，不然争奈子弦声。

卷 442_95 【和殷协律琴思】

白居易

秋水莲冠春草裙，依稀风调似文君。
烦君玉指分明语，知是琴心佯不闻。

卷 442_96 【寄李苏州，兼示杨琼】

白居易

真娘墓头春草碧，心奴鬓上秋霜白。为问苏台酒席中，

· 全唐诗 ·

使君歌笑与谁同。就中犹有杨琼在，堪上东山伴谢公。

卷 442_97【听弹湘妃怨】

白居易

玉轸朱弦瑟瑟徽，吴娃徵调奏湘妃。
分明曲里愁云雨，似道萧萧郎不归。

卷 442_98【闲坐】

白居易

暖拥红炉火，闲搔白发头。百年慵里过，万事醉中休。
有室同摩诘，无儿比邓攸。莫论身在日，身后亦无忧。

卷 442_99【不睡】

白居易

焰短寒缸尽，声长晓漏迟。年衰自无睡，不是守三尸。

· 全唐诗 ·

第四百四十三卷

卷 443_1 【初罢中书舍人】

白居易

自惭拙宦叨清贵，还有痴心怕素餐。或望君臣相献替，
可图妻子免饥寒。性疏岂合承恩久，命薄元知济事难。
分寸宠光酬未得，不休更拟觅何官。

卷 443_2 【宿阳城驿对月】

白居易

亲故寻回驾，妻孥未出关。凤凰池上月，送我过商山。

卷 443_3 【商山路有感】

白居易

忆昨征还日，三人归路同。此生都是梦，前事旋成空。

· 全唐诗 ·

杓直泉埋玉，虞平烛过风。唯残乐天在，头白向江东。

卷 443_4【重感】

白居易

停骖歇路隅，重感一长吁。扰扰生还死，纷纷荣又枯。
困支青竹杖，闲捋白髭须。莫叹身衰老，交游半已无。

卷 443_5【逢张十八员外籍】

白居易

旅思正茫茫，相逢此道傍。晓岚林叶暗，秋露草花香。
白发江城守，青衫水部郎。客亭同宿处，忽似夜归乡。

卷 443_6【赴杭州重宿棣华驿，见杨八旧诗，感题一绝】

白居易

往恨今愁应不殊，题诗梁下又踟蹰。
羨君犹梦见兄弟，我到天明睡亦无。

· 全唐诗 ·

卷 443_7【寓言题僧】

白居易

劫风火起烧荒宅，苦海波生荡破船。
力小无因救焚溺，清凉山下且安禅。

卷 443_8【内乡村路作】

白居易

日下风高野路凉，缓驱疲马暗思乡。
渭村秋物应如此，枣赤梨红稻穗黄。

卷 443_9【路上寄银匙与阿龟】

白居易

谪宦心都惯，辞乡去不难。缘留龟子住，涕泪一阑干。
小子须娇养，邹婆为好看。银匙封寄汝，忆我即加餐。

卷 443_10【山泉煎茶有怀】

· 全唐诗 ·

白居易

坐酌泠泠水，看煎瑟瑟尘。无由持一碗，寄与爱茶人。

卷 443_11【郢州赠别王八使君】

白居易

昔是诗狂客，今为酒病夫。强吟翻怅望，纵醉不欢娱。
鬓发三分白，交亲一半无。郢城君莫厌，犹校近京都。

卷 443_12【吉祥寺见钱侍郎题名】

白居易

云雨三年别，风波万里行。愁来正萧索，况见古人名。

卷 443_13【重到江州感旧游，题郡楼十一韵】

白居易

掌纶知是忝，剖竹信为荣。才薄官仍重，恩深责尚轻。
昔征从典午，今出自承明。凤诏休挥翰，渔歌欲濯缨。
还乘小艫牒，却到古湓城。醉客临江待，禅僧出郭迎。

· 全唐诗 ·

青山满眼在，白发半头生。又校三年老，何曾一事成。
重过萧寺宿，再上庾楼行。云水新秋思，闾阎旧日情。
郡民犹认得，司马咏诗声。

卷 443_14【赠江州李十使君员外十二韵】

白居易

我本江湖上，悠悠任运身。朝随卖药客，暮伴钓鱼人。
迹为烧丹隐，家缘嗜酒贫。经过剡溪雪，寻觅武陵春。
岂有疏狂性，堪为侍从臣。仰头惊凤阙，下口触龙鳞。
剑佩辞天上，风波向海滨。非贤虚偶圣，无屈敢求伸。
昔去曾同日，今来即后尘。中年俱白发，左宦各朱轮。
长短才虽异，荣枯事略均。殷勤李员外，不合不相亲。

卷 443_15【题别遗爱草堂兼呈李十使君】

白居易

曾住炉峰下，书堂对药台。斩新萝径合，依旧竹窗开。
砌水亲开决，池荷手自栽。五年方暂至，一宿又须回。
纵未长归得，犹胜不到来。君家白鹿洞，闻道亦生苔。

卷 443_16【重题】

· 全唐诗 ·

白居易

泉石尚依依，林疏僧亦稀。何年辞水阁，今夜宿云扉。
谩献长杨赋，虚抛薜荔衣。不能成一事，赢得白头归。

卷 443_17【夜泊旅望】

白居易

少睡多愁客，中宵起望乡。沙明连浦月，帆白满船霜。
近海江弥阔，迎秋夜更长。烟波三十宿，犹未到钱唐。

卷 443_18【九江北岸遇风雨】

白居易

黄梅县边黄梅雨，白头浪里白头翁。九江阔处不见岸，
五月尽时多恶风。人间稳路应无限，何事抛身在此中。

卷 443_19【舟中晚起】

白居易

日高犹掩水窗眠，枕簟清凉八月天。泊处或依沽酒店，

· 全唐诗 ·

宿时多伴钓鱼船。退身江海应无用，忧国朝廷自有贤。
且向钱唐湖上去，冷吟闲醉二三年。

卷 443_20【秋寒】

白居易

雪鬓年颜老，霜庭景气秋。病看妻检药，寒遣婢梳头。
身外名何有，人间事且休。澹然方寸内，唯拟学虚舟。

卷 443_21【初到郡斋寄钱湖州李苏州】

白居易

俱来沧海郡，半作白头翁。谩道风烟接，何曾笑语同。
吏稀秋税毕，客散晚庭空。霁后当楼月，潮来满座风。
霅溪殊冷僻，茂苑太繁雄。唯此钱唐郡，闲忙恰得中。

卷 443_22【对酒自勉】

白居易

五十江城守，停杯一自思。头仍未尽白，官亦不全卑。
荣宠寻过分，欢娱已校迟。肺伤虽怕酒，心健尚夸诗。

· 全唐诗 ·

夜舞吴娘袖，春歌蛮子词。犹堪三五岁，相伴醉花时。

卷 443_23【郡楼夜宴留客】

白居易

北客劳相访，东楼为一开。褰帘待月出，把火看潮来。
艳听竹枝曲，香传莲子杯。寒天殊未晓，归骑且迟回。

卷 443_24【醉题候仙亭】

白居易

蹇步垂朱绶，华缨映白须。何因驻衰老，只有且欢娱。
酒兴还应在，诗情可便无。登山与临水，犹未要人扶。

卷 443_25【东院】

白居易

松下轩廊竹下房，暖檐晴日满绳床。净名居士经三卷，
荣启先生琴一张。老去齿衰嫌橘醋，病来肺渴觉茶香。
有时闲酌无人伴，独自腾腾入醉乡。

· 全唐诗 ·

卷 443_26 【虚白堂】

白居易

虚白堂前衙退后，更无一事到中心。
移床就日檐间卧，卧咏闲诗侧枕琴。

卷 443_27 【闲夜咏怀，因招周协律，刘、薛二秀才】

白居易

世名检束为朝士，心性疏慵是野夫。高置寒灯如客店，
深藏夜火似僧炉。香浓酒熟能尝否，冷淡诗成肯和无。
若厌雅吟须俗饮，妓筵勉力为君铺。

卷 443_28 【晚兴】

白居易

极浦收残雨，高城驻落晖。山明虹半出，松暗鹤双归。
将吏随衙散，文书入务稀。闲吟倚新竹，筠粉污朱衣。

卷 443_29 【衰病】

· 全唐诗 ·

白居易

老与病相仍，华簪发不胜。行多朝散药，睡少夜停灯。
禄食分供鹤，朝衣减施僧。性多移不得，郡政谩如绳。

卷 443_30【病中对病鹤】

白居易

同病病夫怜病鹤，精神不损翅翎伤。未堪再举摩霄汉，
只合相随觅稻粱。但作悲吟和嘹唳，难将俗貌对昂藏。
唯应一事宜为伴，我发君毛俱似霜。

卷 443_31【夜归】

白居易

半醉闲行湖岸东，马鞭敲镫辔珑璁。万株松树青山上，
十里沙堤明月中。楼角渐移当路影，潮头欲过满江风。
归来未放笙歌散，画戟门开蜡烛红。

卷 443_32【腊后岁前遇景咏意】

白居易

· 全唐诗 ·

海梅半白柳微黄，冻水初融日欲长。度腊都无苦霜霰，
迎春先有好风光。郡中起晚听衙鼓，城上行慵倚女墙。
公事渐闲身且健，使君殊未厌余杭。

卷 443_33【白发】

白居易

雪发随梳落，霜毛绕鬓垂。加添老气味，改变旧容仪。
不肯长如漆，无过总作丝。最憎明镜里，黑白半头时。

卷 443_34【钱湖州以箬下酒，李苏州以五（）酒，相次寄到，无因同饮，聊咏所怀】

白居易

劳将箬下忘忧物，寄与江城爱酒翁。铛脚三州何处会，
瓮头一醆几时同。倾如竹叶盈樽绿，饮作桃花上面红。
莫怪殷勤醉相忆，曾陪西省与南宫。

卷 443_35【花楼望雪命宴赋诗】

白居易

· 全唐诗 ·

连天际海白皑皑，好上高楼望一回。何处更能分道路，
此时兼不认池台。万重云树山头翠，百尺花楼江畔开。
素壁联题分韵句，红炉巡饮暖寒杯。冰铺湖水银为面，
风卷汀沙玉作堆。绁惹舞人春艳曳，句留醉客夜裴回。
输将虚白堂前鹤，失却樟亭驿后梅。别有故情偏忆得，
曾经穷苦照书来。

卷 443_36 【晚岁】

白居易

壮岁忽已去，浮荣何足论。身为百口长，官是一州尊。
不觉白双鬓，徒言朱两轓。病难施郡政，老未答君恩。
岁暮别兄弟，年衰无子孙。惹愁谙世网，治苦赖空门。
揽带知腰瘦，看灯觉眼昏。不缘衣食系，寻合返丘园。

卷 443_37 【宿竹阁】

白居易

晚坐松檐下，宵眠竹阁间。清虚当服药，幽独抵归山。
巧未能胜拙，忙应不及闲。无劳别修道，即此是玄关。

卷 443_38 【岁暮枉衢州张使君书并诗，因以长句报之】

· 全唐诗 ·

白居易

西州彼此意何如，官职蹉跎岁欲除。浮石潭边停五马，
望涛楼上得双鱼。万言旧手才难敌，五字新题思有余。
贫薄诗家无好物，反投桃李报琼琚。

卷 443_39 【和薛秀才寻梅花同饮见赠】

白居易

忽惊林下发寒梅，便试花前饮冷杯。白马走迎诗客去，
红筵铺待舞人来。歌声怨处微微落，酒气熏时旋旋开。
若到岁寒无雨雪，犹应醉得两三回。

卷 443_40 【与诸客空腹饮】

白居易

隔宿书招客，平明饮暖寒。麴神寅日合，酒圣卯时欢。
促膝才飞白，酡颜已渥丹。碧筹攒米碗，红袖拂骰盘。
醉后歌尤异，狂来舞不难。抛杯语同坐，莫作老人看。

卷 443_41 【小岁日对酒吟钱湖州所寄诗】

· 全唐诗 ·

白居易

独酌无多兴，闲吟有所思。一杯新岁酒，两句故人诗。
杨柳初黄日，髭须半白时。蹉跎春气味，彼此老心知。

卷 443_42【钱塘湖春行】

白居易

孤山寺北贾亭西，水面初平云脚低。几处早莺争暖树，
谁家新燕啄春泥。乱花渐欲迷人眼，浅草才能没马蹄。
最爱湖东行不足，绿杨阴里白沙堤。

卷 443_43【题灵隐寺红辛夷花，戏酬光上人】

白居易

紫粉笔含尖火焰，红胭脂染小莲花。
芳情乡思知多少，恼得山僧悔出家。

卷 443_44【重向火】

白居易

· 全唐诗 ·

火销灰复死，疏弃已经旬。岂是人情薄，其如天气春。
风寒忽再起，手冷重相亲。却就红炉坐，心如逢故人。

卷 443_45【候仙亭同诸客醉作】

白居易

谢安山下空携妓，柳恹洲边只赋诗。
争及湖亭今日会，嘲花咏水赠蛾眉。

卷 443_46【城上】

白居易

城上冬冬鼓，朝衙复晚衙。为君慵不出，落尽绕城花。

卷 443_47【早行林下】

白居易

披衣未冠栉，晨起入前林。宿露残花气，朝光新叶阴。
傍松人迹少，隔竹鸟声深。闲倚小桥立，倾头时一吟。

· 全唐诗 ·

卷 443_48 【送李校书趁寒食归义兴山居】

白居易

大见腾腾诗酒客，不忧生计似君稀。
到舍将何作寒食，满船唯载树阴归。

卷 443_49 【题孤山寺山石榴花示诸僧众】

白居易

山榴花似结红巾，容艳新妍占断春。色相故关行道地，
香尘拟触坐禅人。瞿昙弟子君知否，恐是天魔女化身。

卷 443_50 【独行】

白居易

暗诵黄庭经在口，闲携青竹杖随身。
晚花新笋堪为伴，独入林行不要人。

卷 443_51 【二月五日花下作】

· 全唐诗 ·

白居易

二月五日花如雪，五十二人头似霜。闻有酒时须笑乐，
不关身事莫思量。羲和趁日沉西海，鬼伯驱人葬北邙。
只有且来花下醉，从人笑道老颠狂。

卷 443_52【戏题木兰花】

白居易

紫房日照胭脂拆，素艳风吹腻粉开。
怪得独饶脂粉态，木兰曾作女郎来。

卷 443_53【清明日观妓舞听客诗】

白居易

看舞颜如玉，听诗韵似金。绮罗从许笑，弦管不妨吟。
可惜春风老，无嫌酒醖深。辞花送寒食，并在此时心。

卷 443_54【西湖晚归，回望孤山寺，赠诸客】

白居易

· 全唐诗 ·

柳湖松岛莲花寺，晚动归桡出道场。卢橘子低山雨重，
棕榈叶战水风凉。烟波澹荡摇空碧，楼殿参差倚夕阳。
到岸请君回首望，蓬莱宫在海中央。

卷 443_55【湖中自照】

白居易

重重照影看容鬓，不见朱颜见白丝。
失却少年无处觅，泥他湖水欲何为。

卷 443_56【赠苏炼师】

白居易

两鬓苍然心浩然，松窗深处药炉前。携将道士通宵语，
忘却花时尽日眠。明镜懒开长在匣，素琴欲弄半无弦。
犹嫌庄子多词句，只读逍遥六七篇。

卷 443_57【杭州春望】

白居易

望海楼明照曙霞，护江堤白蹋晴沙。涛声夜入伍员庙，

· 全唐诗 ·

柳色春藏苏小家。红袖织绡夸柿蒂，青旗沽酒趁梨花。
谁开湖寺西南路，草绿裙腰一道斜。

卷 443_58【饮散夜归赠诸客】

白居易

鞍马夜纷纷，香街起暗尘。回鞭招饮妓，分火送归人。
风月应堪惜，杯觞莫厌频。明朝三月尽，忍不送残春。

卷 443_59【湖亭晚归】

白居易

尽日湖亭卧，心闲事亦稀。起因残醉醒，坐待晚凉归。
松雨飘藤帽，江风透葛衣。柳堤行不厌，沙软絮霏霏。

卷 443_60【东楼南望八韵】

白居易

不厌东南望，江楼对海门。风涛生有信，天水合无痕。
鹧带云帆动，鸥和雪浪翻。鱼盐聚为市，烟火起成村。
日脚金波碎，峰头钿点繁。送秋千里雁，报暝一声猿。

· 全唐诗 ·

已豁烦襟闷，仍开病眼昏。郡中登眺处，无胜此东轩。

卷 443_61【醉中酬殷协律】

白居易

泗水亭边一分散，浙江楼上重游陪。挥鞭二十年前别，
命驾三千里外来。醉袖放狂相向舞，愁眉和笑一时开。
留君夜住非无分，且尽青娥红烛台。

卷 443_62【孤山寺遇雨】

白居易

拂波云色重，洒叶雨声繁。水鹭双飞起，风荷一向翻。
空濛连北岸，萧飒入东轩。或拟湖中宿，留船在寺门。

卷 443_63【樟亭双樱树】

白居易

南馆西轩两树樱，春条长足夏阴成。
素华朱实今虽尽，碧叶风来别有情。

· 全唐诗 ·

卷 443_64【湖上夜饮】

白居易

郭外迎人月，湖边醒酒风。谁留使君饮，红烛在舟中。

卷 443_65【赠沙鸥】

白居易

老逼教垂白，官科遣著绯。形骸虽有累，方寸却无机。
遇酒多先醉，逢山爱晚归。沙鸥不知我，犹避隼旗飞。

卷 443_66【余杭形胜】

白居易

余杭形胜四方无，州傍青山县枕湖。绕郭荷花三十里，
拂城松树一千株。梦儿亭古传名谢，教妓楼新道姓苏。
独有使君年太老，风光不称白髭须。

卷 443_67【江楼夕望招客】

· 全唐诗 ·

白居易

海天东望夕茫茫，山势川形阔复长。灯火万家城四畔，
星河一道水中央。风吹古木晴天雨，月照平沙夏夜霜。
能就江楼销暑否，比君茅舍较清凉。

卷 443_68【新秋病起】

白居易

一叶落梧桐，年光半又空。秋多上阶日，凉足入怀风。
病瘦形如鹤，愁焦鬓似蓬。损心诗思里，伐性酒狂中。
华盖何曾惜，金丹不致功。犹须自惭愧，得作白头翁。

卷 443_69【木芙蓉花下招客饮】

白居易

晚凉思饮两三杯，召得江头酒客来。
莫怕秋无伴醉物，水莲花尽木莲开。

卷 443_70【悲歌】

白居易

· 全唐诗 ·

白头新洗镜新磨，老逼身来不奈何。耳里频闻故人死，
眼前唯觉少年多。塞鸿遇暖犹回翅，江水因潮亦反波。
独有衰颜留不得，醉来无计但悲歌。

卷 443_71【江楼晚眺，景物鲜奇，吟玩成篇，寄水部张员外】

白居易

澹烟疏雨间斜阳，江色鲜明海气凉。蜃散云收破楼阁，
虹残水照断桥梁。风翻白浪花千片，雁点青天字一行。
好著丹青图画取，题诗寄与水曹郎。

卷 443_72【夜招周协律，兼答所赠】

白居易

满眼虽多客，开眉复向谁。少年非我伴，秋夜与君期。
落魄俱耽酒，殷勤共爱诗。相怜别有意，彼此老无儿。

卷 443_73【重酬周判官】

白居易

· 全唐诗 ·

秋爱冷吟春爱醉，诗家眷属酒家仙。
若教早被浮名系，可得闲游三十年。

卷 443_74 【饮后夜醒】

白居易

黄昏饮散归来卧，夜半人扶强起行。枕上酒容和睡醒，
楼前海月伴潮生。将归梁燕还重宿，欲灭窗灯却复明。
直至晓来犹妄想，耳中如有管弦声。

卷 443_75 【代卖薪女赠诸妓】

白居易

乱蓬为鬓布为巾，晓蹋寒山自负薪。
一种钱塘江畔女，著红骑马是何人。

卷 443_76 【奉和李大夫题新诗二首各六韵·因严亭】

白居易

箕颖人穷独，蓬壶路艰难。何如兼吏隐，复得事跻攀。

· 全唐诗 ·

岩树罗阶下，江云贮栋间。似移天目石，疑入武丘山。
清景徒堪赏，皇恩肯放闲。遥知兴未足，即被诏征还。

卷 443_77【奉和李大夫题新诗二首各六韵·忘筌亭】

白居易

翠巘公门对，朱轩野径连。只开新户牖，不改旧风烟。
虚室闲生白，高情澹入玄。酒容同座劝，诗借属城传。
自笑沧江畔，遥思绛帐前。亭台随处有，争敢比忘筌。

卷 443_78【予以长庆二年冬十月到杭州，明年秋九月始与
范阳卢贾、汝南周元范、兰陵萧悦、清河崔求、东莱刘方舆同
游恩德寺之泉洞竹石，籍甚久矣，及兹目击，果惬心期，因自
嗟云：到郡周岁，方来入寺，半日复去，俯视朱绶，仰睇白云，
有愧于心，遂留绝句】

白居易

云水埋藏恩德洞，簪裾束缚使君身。
暂来不宿归州去，应被山呼作俗人。

卷 443_79【早冬】

· 全唐诗 ·

白居易

十月江南天气好，可怜冬景似春华。霜轻未杀萋萋草，
日暖初干漠漠沙。老柘叶黄如嫩树，寒樱枝白是狂花。
此时却羡闲人醉，五马无由入酒家。

卷 443_80 【岁假内命酒赠周判官、萧协律】

白居易

共知欲老流年急，且喜新正假日频。闻健此时相劝醉，
偷闲何处共寻春。脚随周叟行犹疾，头比萧翁白未匀。
岁酒先拈辞不得，被君推作少年人。

卷 443_81 【与诸客携酒寻去年梅花有感】

白居易

马上同携今日杯，湖边共觅去春梅。年年只是人空老，
处处何曾花不开。诗思又牵吟咏发，酒酣闲唤管弦来。
樽前百事皆依旧，点检惟无薛秀才。

卷 443_82 【醉送李协律赴湖南辟命，因寄沈八中丞】

· 全唐诗 ·

白居易

富阳山底樟亭畔，立马停舟飞酒盃。曾共中丞情缱绻，
暂留协律语踟蹰。紫微星北承恩去，青草湖南称意无。
不羡君官羡君幕，幕中收得阮元瑜。

卷 443_83【内道场永讷上人就郡见访，善说维摩经，临别请诗，因以此赠】

白居易

五夏登坛内殿师，水为心地玉为仪。正传金粟如来偈，
何用钱唐太守诗。苦海出来应有路，灵山别后可无期。
他生莫忘今朝会，虚白亭中法乐时。

卷 443_84【见李苏州示男阿武诗，自感成咏】

白居易

遥羡青云里，祥鸾正引雏。自怜沧海伴，老蚌不生珠。

卷 443_85【正月十五日夜月】

白居易

· 全唐诗 ·

岁熟人心乐，朝游复夜游。春风来海上，明月在江头。
灯火家家市，笙歌处处楼。无妨思帝里，不合厌杭州。

卷 443_86【题州北路傍老柳树】

白居易

皮枯缘受风霜久，条短为应攀折频。但见半衰当此路，
不知初种是何人。雪花零碎逐年减，烟叶稀疏随分新。
莫道老株芳意少，逢春犹胜不逢春。

卷 443_87【题清头陀】

白居易

头陀独宿寺西峰，百尺禅庵半夜钟。
烟月苍苍风瑟瑟，更无杂树对山松。

卷 443_88【自叹二首】

白居易

形羸自觉三餐减，睡少偏知夜漏长。
实事渐消虚事在，银鱼金带绕腰光。

· 全唐诗 ·

二毛晓落梳头懒，两眼春昏点药频。
唯有闲行犹得在，心情未到不如人。

卷 443_89【湖上醉中代诸妓寄严郎中】

白居易

笙歌杯酒正欢娱，忽忆仙郎望帝都。借问连宵直南省，
何如尽日醉西湖。蛾眉别久心知否，鸡舌含多口厌无。
还有些些惆怅事，春来山路见蘼芜。

卷 443_90【自咏】

白居易

闷发每吟诗引兴，兴来兼酌酒开颜。欲逢假日先招客，
正对衙时亦望山。句检簿书多卤莽，堤防官吏少机关。
谁能头白劳心力，人道无才也是闲。

卷 443_91【晚兴】

白居易

草浅马翩翩，新晴薄暮天。柳条春拂面，衫袖醉垂鞭。

· 全唐诗 ·

立语花堤上，行吟水寺前。等闲消一日，不觉过三年。

卷 443_92 【早兴】

白居易

晨光出照屋梁明，初打开门鼓一声。犬上阶眠知地湿，
鸟临窗语报天晴。半销宿酒头仍重，新脱冬衣体乍轻。
睡觉心空思想尽，近来乡梦不多成。

卷 443_93 【竹楼宿】

白居易

小书楼下千竿竹，深火炉前一醺灯。
此处与谁相伴宿，烧丹道士坐禅僧。

卷 443_94 【湖上招客送春泛舟】

白居易

欲送残春招酒伴，客中谁最有风情。两瓶簪下新开得，
一曲霓裳初教成。排比管弦行翠袖，指麾船舫点红旗。
慢牵好向湖心去，恰似菱花镜上行。

· 全唐诗 ·

卷 443_95【戏醉客】

白居易

莫言鲁国书生懦，莫把杭州刺史欺。
醉客请君开眼望，绿杨风下有红旗。

卷 443_96【紫阳花】

白居易

何年植向仙坛上，早晚移栽到梵家。
虽在人间人不识，与君名作紫阳花。

· 全唐诗 ·

第四百四十四卷

卷 444_1【郡斋旬假，始命宴呈座客示郡僚】

白居易

公门日两衙，公假月三旬。衙用决簿领，旬以会亲宾。
公多及私少，劳逸常不均。况为剧郡长，安得闲宴频。
下车已二月，开筵始今晨。初黔军厨突，一拂郡榻尘。
既备献酬礼，亦具水陆珍。萍醅箬溪醕，水鲙松江鳞。
侑食乐悬动，佐欢妓席陈。风流吴中客，佳丽江南人。
歌节点随袂，舞香遗在茵。清奏凝未阕，酡颜气已春。
众宾勿遽起，群寮且逡巡。无轻一日醉，用犒九日勤。
微彼九日勤，何以治吾民。微此一日醉，何以乐吾身。

卷 444_2【题西亭】

白居易

朝亦视簿书，暮亦视簿书。簿书视未竟，蟋蟀鸣座隅。
始觉芳岁晚，复嗟尘务拘。西园景多暇，可以少踟躇。
池鸟澹容与，桥柳高扶疏。烟蔓裊青薜，水花披白蕖。

· 全唐诗 ·

何人造兹亭，华敞绰有余。四檐轩鸟翅，复屋罗蜘蛛。
直廊抵曲房，窈窕深且虚。修竹夹左右，清风来徐徐。
此宜宴佳宾，鼓瑟吹笙竽。荒淫即不可，废旷将何如。
幸有酒与乐，及时欢且娱。忽其解郡印，他人来此居。

卷 444_3【郡中西园】

白居易

闲园多芳草，春夏香靡靡。深树足佳禽，旦暮鸣不已。
院门闭松竹，庭径穿兰芷。爱彼池上桥，独来聊徙倚。
鱼依藻长乐，鸥见人暂起。有时舟随风，尽日莲照水。
谁知郡府内，景物闲如此。始悟喧静缘，何尝系远迩。

卷 444_4【北亭卧】

白居易

树绿晚阴合，池凉朝气清。莲开有佳色，鹤唳无凡声。
唯此闲寂境，惬我幽独情。病假十五日，十日卧兹亭。
明朝吏呼起，还复视黎甿。

卷 444_5【一叶落】

· 全唐诗 ·

白居易

烦暑郁未退，凉飙潜已起。寒温与盛衰，递相为表里。
萧萧秋林下，一叶忽先委。勿言微摇落，摇落从此始。

卷 444_6【崔湖州赠红石琴荐焕如锦文，无以答之，以诗酬谢】

白居易

赅锦支绿绮，韵同相感深。千年古涧石，八月秋堂琴。
引出山水思，助成金玉音。人间无可比，比我与君心。

卷 444_7【九日宴集，醉题郡楼，兼呈周、殷二判官】

白居易

前年九日馀杭郡，呼宾命宴虚白堂。去年九日到东洛，
今年九日来吴乡。两边蓬鬓一时白，三处菊花同色黄。
一日日知添老病，一年年觉惜重阳。江南九月未摇落，
柳青蒲绿稻穗香。姑苏台榭倚苍霭，太湖山水含清光。
可怜假日好天色，公门吏静风景凉。榜舟鞭马取宾客，
扫楼拂席排壶觞。胡琴铮鏦指拨刺，吴娃美丽眉眼长。
笙歌一曲思凝绝，金钿再拜光低昂。日脚欲落备灯烛，

· 全唐诗 ·

风头渐高加酒浆。觥醑艳翻菡萏叶，舞鬟摆落茱萸房。
半酣凭槛起四顾，七堰八门六十坊。远近高低寺间出，
东西南北桥相望。水道脉分棹鳞次，里间棋布城册方。
人烟树色无隙罅，十里一片青茫茫。自问有何才与政，
高厅大馆居中央。铜鱼今乃泽国节，刺史是古吴都王。
郊无戎马郡无事，门有桀戟腰有章。盛时傥来合惭愧，
壮岁忽去还感伤。从事醒归应不可，使君醉倒亦何妨。
请君停杯听我语，此语真实非虚狂。五旬已过不为夭，
七十为期盖是常。须知菊酒登高会，从此多无二十场。

卷 444_8 【同微之赠别郭虚舟炼师五十韵】

白居易

我为江司马，君为荆判司。俱当愁悴日，始识虚舟师。
师年三十余，白皙好容仪。专心在铅汞，余力工琴棋。
静弹弦数声，闲饮酒一卮。因指尘土下，蜉蝣良可悲。
不闻姑射上，千岁冰雪肌。不见辽城外，古今冢累累。
嗟我天地间，有术人莫知。得可逃死籍，不唯走三尸。
授我参同契，其辞妙且微。六一闳扃鐍，子午守雄雌。
我读随日悟，心中了无疑。黄芽与紫车，谓其坐致之。
自负因自叹，人生号男儿。若不佩金印，即合翳玉芝。
高谢人间世，深结山中期。泥坛方合矩，铸鼎圆中规。
炉橐一以动，瑞气红辉辉。斋心独叹拜，中夜偷一窥。
二物正訢合，厥状何怪奇。绸缪夫妇体，狎猎鱼龙姿。
简寂馆钟后，紫霄峰晓时。心尘未净洁，火候遂参差。

· 全唐诗 ·

万寿觞刀圭，千功失毫厘。先生弹指起，姹女随烟飞。
始知缘会间，阴鹭不可移。药灶今夕罢，诏书明日追。
追我复追君，次第承恩私。官虽小大殊，同立白玉墀。
我直紫微阁，手进赏罚词。君侍玉皇座，口含生杀机。
直躬易媒孽，浮俗我瑕疵。转徙今安在，越峤吴江湄。
一提支郡印，一建连帅旗。何言四百里，不见如天涯。
秋风旦夕来，白日西南驰。雪霜各满鬓，朱紫徒为衣。
师从庐山洞，访旧来于斯。寻君又觅我，风驭纷逶迤。
帔裾曳黄绢，须发垂青丝。逢人但敛手，问道亦颔颐。
孤云难久留，十日告将归。款曲话平昔，殷勤勉衰羸。
后会杳何许，前心日磷缁。俗家无异物，何以充别资。
素笺一百句，题附元家诗。朱顶鹤一只，与师云间骑。
云间鹤背上，故情若相思。时时摘一句，唱作步虚辞。

卷 444_9【霓裳羽衣歌】

白居易

我昔元和侍宪皇，曾陪内宴宴昭阳。千歌百舞不可数，
就中最爱霓裳舞。舞时寒食春风天，玉钩栏下香案前。
案前舞者颜如玉，不著人家俗衣服。虹裳霞帔步摇冠，
钿璫累累佩珊珊。娉婷似不任罗绮，顾听乐悬行复止。
磬箫箏笛递相搀，击擗弹吹声迤迤。散序六奏未动衣，
阳台宿云慵不飞。中序擘騫初入拍，秋竹竿裂春冰拆。
飘然转旋回雪轻，嫣然纵送游龙惊。小垂手后柳无力，
斜曳裾时云欲生。烟蛾敛略不胜态，风袖低昂如有情。

· 全唐诗 ·

上元点鬟招萼绿，王母挥袂别飞琼。繁音急节十二遍，
跳珠撼玉何铿锵。翔鸾舞了却收翅，喉鹤曲终长引声。
当时乍见惊心目，凝视谛听殊未足。一落人间八九年，
耳冷不曾闻此曲。湓城但听山魑语，巴峡唯闻杜鹃哭。
移领钱唐第二年，始有心情问丝竹。玲珑箜篌谢好箏，
陈宠鹭栗沈平笙。清弦脆管纤纤手，教得霓裳一曲成。
虚白亭前湖水畔，前后祇应三度按。便除席子抛却来，
闻道如今各星散。今年五月至苏州，朝钟暮角催白头。
贪看案牍常侵夜，不听笙歌直到秋。秋来无事多闲闷，
忽忆霓裳无处问。闻君部内多乐徒，问有霓裳舞者无。
答云七县十万户，无人知有霓裳舞。唯寄长歌与我来，
题作霓裳羽衣谱。四幅花笺碧间红，霓裳实录在其中。
千姿万状分明见，恰与昭阳舞者同。眼前仿佛睹形质，
昔日今朝想如一。疑从魂梦呼召来，似著丹青图写出。
我爱霓裳君合知，发于歌咏形于诗。君不见我歌云，
惊破霓裳羽衣曲。又不见我诗云，曲爱霓裳未拍时。
由来能事皆有主，杨氏创声君造谱。君言此舞难得人，
须是倾城可怜女。吴妖小玉飞作烟，越艳西施化为土。
娇花巧笑久寂寥，娃馆苕萝空处所。如君所言诚有是，
君试从容听我语。若求国色始翻传，但恐人间废此舞。
妍媸优劣宁相远，大都只在人抬举。李娟张态君莫嫌，
亦拟随宜且教取。

卷 444_10【小童薛阳陶吹鹭栗歌】

白居易

· 全唐诗 ·

剪削干芦插寒竹，九孔漏声五音足。近来吹者谁得名，
关雎老死李衮生。衮今又老谁其嗣，薛氏乐童年十二。
指点之下师授声，含嚙之间天与气。润州城高霜月明，
吟霜思月欲发声。山头江底何悄悄，猿声不喘鱼龙听。
翕然声作疑管裂，诎然声尽疑刀截。有时婉软无筋骨，
有时顿挫生棱节。急声圆转促不断，辘轳辘轳似珠贯。
缓声展引长有条，有条直直如笔描。下声乍坠石沉重，
高声忽举云飘萧。明旦公堂陈宴席，主人命乐娱宾客。
碎丝细竹徒纷纷，宫调一声雄出群。众音覩缕不落道，
有如部伍随将军。嗟尔阳陶方稚齿，下手发声已如此。
若教头白吹不休，但恐声名压关李。

卷 444_11【啄木曲】

白居易

莫买宝剪刀，虚费千金直。我有心中愁，知君剪不得。
莫磨解结锥，徒劳人气力。我有肠中结，知君解不得。
莫染红丝线，徒夸好颜色。我有双泪珠，知君穿不得。
莫近红炉火，炎气徒相逼。我有两鬓霜，知君销不得。
刀不能剪心愁，锥不能解肠结。线不能穿泪珠，
火不能销鬓雪。不如饮此神圣杯，万念千忧一时歇。

卷 444_12【题灵岩寺】

· 全唐诗 ·

白居易

娃宫屣廊寻已倾，砚池香径又欲平。二三月时何草绿，
几百年来空月明。使君虽老颇多思，携觞领妓处处行。
今愁古恨入丝竹，一曲凉州无限情。直自当时到今日，
中间歌吹更无声。

卷 444_13【双石】

白居易

苍然两片石，厥状怪且丑。俗用无所堪，时人嫌不取。
结从胚浑始，得自洞庭口。万古遗水滨，一朝入吾手。
担舁来郡内，洗刷去泥垢。孔黑烟痕深，罅青苔色厚。
老蛟蟠作足，古剑插为首。忽疑天上落，不似人间有。
一可支吾琴，一可贮吾酒。峭绝高数尺，坳泓容一斗。
五弦倚其左，一杯置其右。洼樽酌未空，玉山颓已久。
人皆有所好，物各求其偶。渐恐少年场，不容垂白叟。
回头问双石，能伴老夫否。石虽不能言，许我为三友。

卷 444_14【宿东亭晓兴】

白居易

温温土炉火，耿耿纱笼烛。独抱一张琴，夜入东斋宿。

· 全唐诗 ·

窗声度残漏，帘影浮初旭。头痒晓梳多，眼昏春睡足。
负暄檐宇下，散步池塘曲。南雁去未回，东风来何速。
雪依瓦沟白，草绕墙根绿。何言万户州，太守常幽独。

卷 444_15【日渐长，赠周、殷二判官】

白居易

日渐长，春尚早。墙头半露红萼枝，池岸新铺绿芽草。
蹋草攀枝仰头叹，何人知此春怀抱。年颜盛壮名未成，
官职欲高身已老。万茎白发真堪恨，一片绯衫何足道。
赖得君来劝一杯，愁开闷破心头好。

卷 444_16【花前叹】

白居易

前岁花前五十二，今年花前五十五。岁课年功头发知，
从霜成雪君看取。几人得老莫自嫌，樊李吴韦尽成土。
南州桃李北州梅，且喜年年作花主。花前置酒谁相劝，
容坐唱歌满起舞。欲散重拈花细看，争知明日无风雨。

卷 444_17【自咏五首】

· 全唐诗 ·

白居易

朝亦随群动，暮亦随群动。荣华瞬息间，求得将何用。
形骸与冠盖，假合相戏弄。但异睡著人，不知梦是梦。

一家五十口，一郡十万户。出为差科头，入为衣食主。
水旱合心忧，饥寒须手抚。何异食蓼虫，不知苦是苦。

公私颇多事，衰惫殊少欢。迎送宾客懒，鞭笞黎庶难。
老耳倦声乐，病口厌杯盘。既无可恋者，何以不休官。

一日复一日，自问何留滞。为贪逐日俸，拟作归田计。
亦须随丰约，可得无限剂。若待足始休，休官在何岁。

官舍非我庐，官园非我树。洛中有小宅，渭上有别墅。
既无婚嫁累，幸有归休处。归去诚已迟，犹胜不归去。

卷 444_18【和微之听妻弹别鹤操，因为解释其义，依韵加四句】

白居易

义重莫若妻，生离不如死。誓将死同穴，其奈生无子。
商陵追礼教，妇出不能止。舅姑明旦辞，夫妻中夜起。
起闻双鹤别，若与人相似。听其悲唳声，亦如不得已。
青田八九月，辽城一万里。裴回去住云，呜咽东西水。

· 全唐诗 ·

写之在琴曲，听者酸心髓。况当秋月弹，先入忧人耳。
怨抑掩朱弦，沉吟停玉指。一闻无儿叹，相念两如此。
无儿虽薄命，有妻偕老矣。幸免生别离，犹胜商陵氏。

卷 444_19【题故元少尹集后二首】

白居易

黄壤讵知我，白头徒忆君。唯将老年泪，一洒故人文。

遗文三十轴，轴轴金玉声。龙门原上土，埋骨不埋名。

卷 444_20【和微之四月一日作】

白居易

四月一日天，花稀叶阴薄。泥新燕影忙，蜜熟蜂声乐。
麦风低冉冉，稻水平漠漠。芳节或蹉跎，游心稍牢落。
春华信为美，夏景亦未恶。飏浪嫩青荷，重栏晚红药。
吴宫好风月，越郡多楼阁。两地诚可怜，其奈久离索。

卷 444_21【吴中好风景二首】

白居易

· 全唐诗 ·

吴中好风景，八月如三月。水荇叶仍香，木莲花未歇。
海天微雨散，江郭纤埃灭。暑退衣服干，潮生船舫活。
两衙渐多暇，亭午初无热。骑吏语使君，正是游时节。

吴中好风景，风景无朝暮。晓色万家烟，秋声八月树。
舟移管弦动，桥拥旌旗驻。改号齐云楼，重开武丘路。
况当丰岁熟，好是欢游处。州民劝使君，且莫抛官去。

卷 444_22【答刘禹锡白太守行】

白居易

吏满六百石，昔贤辄去之。秩登二千石，今我方罢归。
我秩讶已多，我归惭已迟。犹胜尘土下，终老无休期。
卧乞百日告，起吟五篇诗。朝与府吏别，暮与州民辞。
去年到郡时，麦穗黄离离。今年去郡日，稻花白霏霏。
为郡已周岁，半岁罹旱饥。襦袴无一片，甘棠无一枝。
何乃老与幼，泣别尽沾衣。下惭苏人泪，上愧刘君辞。

卷 444_23【别苏州】

白居易

浩浩姑苏民，郁郁长洲城。来惭荷宠命，去愧无能名。
青紫行将吏，班白列黎氓。一时临水拜，十里随舟行。

· 全唐诗 ·

钱筵犹未收，征棹不可停。稍隔烟树色，尚闻丝竹声。
怅望武丘路，沉吟汴水亭。还乡信有兴，去郡能无情。

卷 444_24【卯时酒】

白居易

佛法赞醍醐，仙方夸沆瀣。未如卯时酒，神速功力倍。
一杯置掌上，三咽入腹内。煦若春贯肠，暄如日炙背。
岂独肢体畅，仍加志气大。当时遗形骸，竟日忘冠带。
似游华胥国，疑反混元代。一性既完全，万机皆破碎。
半醒思往来，往来吁可怪。宠辱忧喜间，惶惶二十载。
前年辞紫闼，今岁抛皂盖。去矣鱼返泉，超然蝉离蜕。
是非莫分别，行止无疑碍。浩气贮胸中，青云委身外。
扪心私自语，自语谁能会。五十年来心，未如今日泰。
况兹杯中物，行坐长相对。

卷 444_25【自问行何迟】

白居易

前月发京口，今辰次淮涯。二旬四百里，自问行何迟。
还乡无他计，罢郡有馀资。进不慕富贵，退未忧寒饥。
以此易过日，腾腾何所为。逢山辄倚棹，遇寺多题诗。
酒醒夜深后，睡足日高时。眼底一无事，心中百不知。

· 全唐诗 ·

想到京国日，懒放亦如斯。何必冒风水，促促赴程归。

卷 444_26【除日答梦得同发楚州】

白居易

共作千里伴，俱为一郡回。岁阴中路尽，乡思先春来。
山雪晚犹在，淮冰晴欲开。归欤吟可作，休恋主人杯。

卷 444_27【问杨琼】

白居易

古人唱歌兼唱情，今人唱歌唯唱声。
欲说向君君不会，试将此语问杨琼。

卷 444_28【有感三首】

白居易

鬓发已斑白，衣绶方朱紫。穷贱当壮年，富荣临暮齿。
车舆红尘合，第宅青烟起。彼来此须去，品物之常理。
第宅非吾庐，逆旅暂留止。子孙非我有，委蜕而已矣。
有如蚕造茧，又似花生子。子结花暗凋，茧成蚕老死。

· 全唐诗 ·

悲哉可奈何，举世皆如此。

莫养瘦马驹，莫教小妓女。后事在目前，不信君看取。
马肥快行走，妓长能歌舞。三年五岁间，已闻换一主。
借问新旧主，谁乐谁辛苦。请君大带上，把笔书此语。

往事勿追思，追思多悲怆。来事勿相迎，相迎已惆怅。
不如兀然坐，不如塌然卧。食来即开口，睡来即合眼。
二事最关身，安寝加餐饭。忘怀任行止，委命随修短。
更若有兴来，狂歌酒一醺。

卷 444_29【宿荥阳】

白居易

生长在荥阳，少小辞乡曲。迢迢四十载，复向荥阳宿。
去时十一二，今年五十六。追思儿戏时，宛然犹在目。
旧居失处所，故里无宗族。岂唯变市朝，兼亦迁陵谷。
独有溱洧水，无情依旧绿。

卷 444_30【经溱洧】

白居易

落日驻行骑，沉吟怀古情。郑风变已尽，溱洧至今清。

· 全唐诗 ·

不见士与女，亦无芍药名。

卷 444_31【就花枝】

白居易

就花枝，移酒海，今朝不醉明朝悔。且算欢娱逐日来，
任他容鬓随年改。醉翻衫袖抛小令，笑掷骰盘呼大采。
自量气力与心情，三五年间犹得在。

卷 444_32【喜雨】

白居易

圃旱忧葵堇，农旱忧禾菽。人各有所私，我旱忧松竹。
松干竹焦死，眷眷在心目。洒叶溉其根，汲水劳僮仆。
油云忽东起，凉雨凄相续。似面洗垢尘，如头得膏沐。
千柯习习润，万叶欣欣绿。千日浇灌功，不如一霖霖。
方知宰生灵，何异活草木。所以圣与贤，同心调玉烛。

卷 444_33【题道宗上人十韵】

白居易

· 全唐诗 ·

如来说偈赞，菩萨著论议。是故宗律师，以诗为佛事。
一音无差别，四句有诠次。欲使第一流，皆知不二义。
精洁沾戒体，闲淡藏禅味。从容恣语言，缥缈离文字。
旁延邦国彦，上达王公贵。先以诗句牵，后令入佛智。
人多爱师句，我独知师意。不似休上人，空多碧云思。

卷 444_34【寄皇甫宾客】

白居易

名利既两忘，形体方自遂。卧掩罗雀门，无人惊我睡。
睡足斗擞衣，闲步中庭地。食饱摩挲腹，心头无一事。
除却玄晏翁，何人知此味。

卷 444_35【寄庾侍郎】

白居易

一双华亭鹤，数片太湖石。嶸嶸苍玉峰，矫矫青云翮。
是时岁云暮，淡薄烟景夕。庭霜封石棱，池雪印鹤迹。
幽致竟谁别，闲静聊自适。怀哉庾顺之，好是今宵客。

卷 444_36【寄崔少监】

· 全唐诗 ·

白居易

微微西风生，稍稍东方明。入秋神骨爽，琴晓丝桐清。
弹为古宫调，玉水寒泠泠。自觉弦指下，不是寻常声。
须臾群动息，掩琴坐空庭。直至日出后，犹得心和平。
惜哉意未已，不使崔君听。

卷 444_37【醉题沈子明壁】

白居易

不爱君池东十丛菊，不爱君池南万竿竹。爱君帘下唱歌人，
色似芙蓉声似玉。我有阳关君未闻，若闻亦应愁杀君。

卷 444_38【劝酒】

白居易

劝君一醺君莫辞，劝君两醺君莫疑，劝君三醺君始知。
面上今日老昨日，心中醉时胜醒时。天地迢迢自长久，
白兔赤乌相趁走。身后堆金拄北斗，不如生前一樽酒。
君不见春明门外天欲明，喧喧歌哭半死生。
游人驻马出不得，白舆素车争路行。归去来，头已白，
典钱将用买酒吃。

· 全唐诗 ·

卷 444_39【落花】

白居易

留春春不住，春归人寂寞。厌风风不定，风起花萧索。
既兴风前叹，重命花下酌。劝君尝绿醕，教人拾红萼。
桃飘火焰焰，梨堕雪漠漠。独有病眼花，春风吹不落。

卷 444_40【对镜吟】

白居易

白头老人照镜时，掩镜沉吟吟旧诗。二十年前一茎白，
如今变作满头丝。吟罢回头索杯酒，醉来屈指数亲知。
老于我者多穷贱，设使身存寒且饥。少于我者半为土，
墓树已抽三五枝。我今幸得见头白，禄俸不薄官不卑。
眼前有酒心无苦，只合欢娱不合悲。

卷 444_41【耳顺吟，寄敦诗、梦得】

白居易

三十四十五欲牵，七十八十百病缠。五十六十却不恶，
恬淡清静心安然。已过爱贪声利后，犹在病羸昏耄前。

· 全唐诗 ·

未无筋力寻山水，尚有心情听管弦。闲开新酒尝数醺，
醉忆旧诗吟一篇。敦诗梦得且相劝，不用嫌他耳顺年。

卷 444_42【别毡帐火炉】

白居易

忆昨腊月天，北风三尺雪。年老不禁寒，夜长安可彻。
赖有青毡帐，风前自张设。复此红火炉，雪中相暖热。
如鱼入渊水，似兔藏深穴。婉软蛰鳞苏，温燉冻肌活。
方安阴惨夕，遽变阳和节。无奈时候迁，岂是恩情绝。
毳蓑逐日卷，香燎随灰灭。离恨属三春，佳期在十月。
但令此身健，不作多时别。

卷 444_43【六年春赠分司东都诸公】

白居易

我为同州牧，内愧无才术。忝擢恩已多，遭逢幸非一。
偶当谷贱岁，适值民安日。郡县狱空虚，乡间盗奔逸。
其间最幸者，朝客多分秩。行接鸳鹭群，坐成芝兰室。
时联拜表骑，间动题诗笔。夜雪秉烛游，春风携榼出。
花教莺点检，柳付风排比。法酒淡清浆，含桃袅红实。
洛童调金管，卢女铎瑶瑟。黛惨歌思深，腰凝舞拍密。
每因同醉乐，自觉忘衰疾。始悟肘后方，不如杯中物。

· 全唐诗 ·

生涯随日过，世事何时毕。老子苦乖慵，希君数牵率。

卷 444_44【九日代罗、樊二妓招舒著作】

白居易

罗敷敛双袂，樊姬献一杯。不见舒员外，秋菊为谁开。

卷 444_45【忆旧游】

白居易

忆旧游，旧游安在哉。旧游之人半白首，旧游之地多苍苔。
江南旧游凡几处，就中最忆吴江隈。长洲苑绿柳万树，
齐云楼春酒一杯。阊门晓严旗鼓出，皋桥夕闹船舫回。
修蛾慢脸灯下醉，急管繁弦头上催。六七年前狂烂漫，
三千里外思裴回。李娟张态一春梦，周五殷三归夜台。
虎丘月色为谁好，娃宫花枝应自开。赖得刘郎解吟咏，
江山气色合归来。

卷 444_46【答崔宾客晦叔十二月四日见寄】

白居易

· 全唐诗 ·

今岁日馀二十六，来岁年登六十二，尚不能忧眼下身，
因何更算人间事。居士忘筌默默坐，先生枕麴昏昏睡。
早晚相从归醉乡，醉乡去此无多地。

卷 444_47【劝我酒】

白居易

劝我酒，我不辞。请君歌，歌莫迟。歌声长，辞亦切，
此辞听者堪愁绝。洛阳女儿面似花，河南大尹头如雪。

卷 444_48【赠韦处士，六年夏大热旱】

白居易

骄阳连毒暑，动植皆枯槁。旱日乾密云，炎烟焦茂草。
少壮犹困苦，况予病且老。脱无白梅檀，何以除热恼。
汗巾束头鬓，膾炙熏襟抱。始觉韦山人，休粮散发好。

· 全唐诗 ·

第四百四十五卷

卷 445_1【和微之诗二十三首·和晨霞】

白居易

君歌仙氏真，我歌慈氏真。慈氏发真念，念此阎浮人。
左命大迦叶，右召桓提因。千万化菩萨，百亿诸鬼神。
上自非相顶，下及风水轮。胎卵湿化类，蠢蠢难具陈。
弘愿在救拔，大悲忘辛勤。无论善不善，岂间冤与亲。
抉开生盲眼，摆去烦恼尘。烛以智慧日，洒之甘露津。
千界一时度，万法无与邻。借问晨霞子，何如朝玉宸。

卷 445_2【和微之诗二十三首·和送刘道士游天台】

白居易

闻君梦游仙，轻举超世雰。握持尊皇节，统卫吏兵军。
灵旗星月象，天衣龙凤纹。佩服交带篆，讽吟蕊珠文。
阊宫缥缈间，钧乐依稀闻。斋心谒西母，瞑拜朝东君。
烟霏子晋裾，霞烂麻姑裙。倏忽别真侣，怅望随归云。
人生同大梦，梦与觉谁分。况此梦中梦，悠哉何足云。

· 全唐诗 ·

假如金阙顶，设使银河滨。既未出三界，犹应在五蕴。
饮咽日月精，茹嚼沆瀣芬。尚是色香味，六尘之所熏。
仙中有大仙，首出梦幻群。慈光一照烛，奥法相网缊。
不知万龄暮，不见三光曛。一性自了了，万缘徒纷纷。
苦海不能漂，劫火不能焚。此是竺乾教，先生垂典坟。

卷 445_3 【和微之诗二十三首 · 和栢沐寄道友】

白居易

栢沐事朝谒，中门初动关。盛服去尚早，假寐须臾间。
钟声发东寺，夜色藏南山。停骖待五漏，人马同时闲。
高星粲金粟，落月沉玉环。出门向关路，坦坦无阻艰。
始出里北门，稍转市西闾。晨烛照朝服，紫烂复朱殷。
由来朝廷士，一入多不还。因循掷白日，积渐凋朱颜。
青云已难致，碧落安能攀。但且知止足，尚可销忧患。

卷 445_4 【和微之诗二十三首 · 和祝苍华】

白居易

日居复月诸，环回照下土。使我玄云发，化为素丝缕。
稟质本羸劣，养生仍莽卤。痛饮困连宵，悲吟饥过午。
遂令头上发，种种无尺五。根稀比黍苗，梢细同钗股。
岂是乏膏沐，非关栢风雨。最为悲伤多，心焦衰落苦。

· 全唐诗 ·

馮者能有几，落者不可数。秃似鹄填河，堕如乌解羽。
苍华何用祝，苦辞亦休吐。匹如剃头僧，岂要巾冠主。

卷 445_5【和微之诗二十三首·和我年三首】

白居易

我年五十七，荣名得几许。甲乙三道科，苏杭两州主。
才能本浅薄，心力虚劳苦。可能随众人，终老于尘土。

我年五十七，归去诚已迟。历官十五政，数若珠累累。
野萍始宾荐，场苗初絜维。因读管萧书，窃慕大有为。
及遭荣遇来，乃觉才力羸。黄纸诏频草，朱轮车载脂。
妻孥及仆使，皆免寒与饥。省躬私自愧，知我者微之。
永怀山阴守，未遂嵩阳期。如何坐留滞，头白江之湄。

我年五十七，荣名得非少。报国竟何如，谋身犹未了。
昔尝速官谤，恩大而怨小。一黜鹤辞轩，七年鱼在沼。
将枯鳞再跃，经铩翮重矫。白日上昭昭，青云高渺渺。
平生颇同病，老大宜相晓。紫绶足可荣，白头不为夭。
夙怀慕箕颍，晚节期松筱。何当阙下来，同拜陈情表。

卷 445_6【和微之诗二十三首·和三月三十日四十韵】

白居易

· 全唐诗 ·

送春君何在，君在山阴署。忆我苏杭时，春游亦多处。
为君歌往事，岂敢辞劳虑。莫怪言语狂，须知酬答遽。
江南腊月半，水冻凝如瘀。寒景尚苍茫，和风已吹嘘。
女墙城似灶，雁齿桥如锯。鱼尾上簷沦，草芽生沮洳。
律迟太簇管，日缓羲和驭。布泽木龙催，迎春土牛助。
雨师习习洒，云将飘飘翥。四野万里晴，千山一时曙。
杭土丽且康，苏民富而庶。善恶有惩劝，刚柔无吐茹。
两衙少辞牒，四境稀书疏。俗以劳俸安，政因闲暇著。
仙亭日登眺，虎丘时游豫。寻幽驻旌轩，选胜回宾御。
舟移溪鸟避，乐作林猿觑。池古莫耶沉，石奇罗刹踞。
水苗泥易耨，畚粟灰难锄。紫蕨抽出畦，白莲埋在淤。
菱花红带黯，湿叶黄含菸。镜动波贴菱，雪回风旋絮。
手经攀桂馥，齿为尝梅楚。坐并船脚欹，行多马蹄踞。
圣贤清浊醉，水陆鲜肥饫。鱼鲙芥酱调，水葵盐豉絮。
虽微五袴咏，幸免兆人诟。但令乐不荒，何必游无倨。
吴苑仆寻罢，越城公尚据。旧游几客存，新宴谁人与。
莫空文举酒，强下何曾箸。江上易优游，城中多毁誉。
分应当自尽，事勿求人恕。我既无子孙，君仍毕婚娶。
久为云雨别，终拟江湖去。范蠡有扁舟，陶潜有篮舆。
两心苦相忆，两口遥相语。最恨七年春，春来各一处。

卷 445_7【和微之诗二十三首·和寄乐天】

白居易

贤愚类相交，人情之大率。然自古今来，几人号胶漆。

· 全唐诗 ·

近闻屈指数，元某与白乙。旁爱及弟兄，中权避家室。
松筠与金石，未足喻坚密。在车如轮辕，在身如肘腋。
又如风云会，天使相召匹。不似势利交，有名而无实。
顷我在杭岁，值君之越日。望愁来仪迟，宴惜流景疾。
坐耀黄金带，酌酹赭玉质。酣歌口不停，狂舞衣相拂。
平生赏心事，施展十未一。会笑始哑哑，离嗟乃唧唧。
饯筵才收拾，征棹遽排比。后恨苦绵绵，前欢何卒卒。
居人色惨淡，行子心纡郁。风袂去时挥，云帆望中失。
宿醒和别思，目眩心忽忽。病魂黯然销，老泪凄其出。
别君只如昨，芳岁换六七。俱是官家身，后期难自必。

卷 445_8【和微之诗二十三首·和寄问刘、白】

白居易

正与刘梦得，醉笑大开口。适值此诗来，欢喜君知否。
遂令高卷幕，兼遣重添酒。起望会稽云，东南一回首。
爱君金玉句，举世谁人有。功用随日新，资材本天授。
吟哦不能散，自午将及酉。遂留梦得眠，匡床宿东牖。

卷 445_9【和微之诗二十三首·和新楼北园偶集，从孙公度、周巡官、韩秀才、卢秀才、范外士小饮，郑侍御判官，周、刘二从事皆先归】

白居易

· 全唐诗 ·

闻君新楼宴，下对北园花。主人既贤豪，宾客皆才华。
初筵日未高，中饮景已斜。天地为幕席，富贵如泥沙。
嵇刘陶阮徒，不足置齿牙。卧瓮鄙毕卓，落帽嗤孟嘉。
芳草供枕藉，乱莺助喧哗。醉乡得道路，狂海无津涯。
一岁春又尽，百年期不赊。同醉君莫辞，独醒古所嗟。
销愁若沃雪，破闷如割瓜。称觴起为寿，此乐无以加。
歌声凝贯珠，舞袖飘乱麻。相公谓四座，今日非自夸。
有奴善吹笙，有婢弹琵琶。十指纤若笋，双鬟鬋如鸦。
履舄起交杂，杯盘散纷拏。归去勿拥遏，倒载逃难遮。
明日宴东武，后日游若耶。岂独相公乐，讴歌千万家。

卷 445_10【和微之诗二十三首·和除夜作】

白居易

君赋此诗夜，穷阴岁之馀。我和此诗日，微和春之初。
老知颜状改，病觉肢体虚。头上毛发短，口中牙齿疏。
一落老病界，难逃生死墟。况此促促世，与君多索居。
君在浙江东，荣驾方伯舆。我在魏阙下，谬乘大夫车。
妻孥常各饱，奴婢亦盈庐。唯是利人事，比君全不如。
我统十郎官，君领百吏胥。我掌四曹局，君管十乡闾。
君为父母君，大惠在资储。我为刀笔吏，小恶乃诛锄。
君提七郡籍，我按三尺书。俱已佩金印，尝同趋玉除。
外宠信非薄，中怀何不摅。恩光未报答，日月空居诸。
磊落尝许君，跼促应笑予。所以自知分，欲先歌归欤。

· 全唐诗 ·

卷 445_11【和微之诗二十三首·和知非】

白居易

因君知非问，诤较天下事。第一莫若禅，第二无如醉。
禅能泯人我，醉可忘荣悴。与君次第言，为我少留意。
儒教重礼法，道家养神气。重礼足滋彰，养神多避忌。
不如学禅定，中有甚深味。旷廓了如空，澄凝胜于睡。
屏除默默念，销尽悠悠思。春无伤春心，秋无感秋泪。
坐成真谛乐，如受空王赐。既得脱尘劳，兼应离惭愧。
除禅其次醉，此说非无谓。一酌机即忘，三杯性咸遂。
逐臣去室妇，降虏败军帅。思苦膏火煎，忧深局锁秘。
须凭百杯沃，莫惜千金费。便似罩中鱼，脱飞生两翅。
劝君虽老大，逢酒莫回避。不然即学禅，两途同一致。

卷 445_12【和微之诗二十三首·和望晓】

白居易

休吟稽山晓，听咏秦城旦。鸣鸡初有声，宿鸟犹未散。
丁丁漏向尽，冬冬鼓过半。南山青沈沈，东方白漫漫。
街心若流水，城角如断岸。星河稍隅落，宫阙方轮焕。
朝车雷四合，骑火星一贯。赫奕冠盖盛，荧煌朱紫烂。
沙堤亘蟆池，市路绕龙断。白日忽照耀，红尘纷散乱。
贵教过客避，荣任行人看。祥烟满虚空，春色无边畔。

· 全唐诗 ·

鴈行候暑刻，龙尾登霄汉。台殿暖宜攀，风光晴可玩。
草铺地茵褥，云卷天帟幔。莺杂佩锵锵，花饶衣粲粲。
何言终日乐，独起临风叹。叹我同心人，一别春七换。
相望山隔碍，欲去官羁绊。何日到江东，超然似张翰。

卷 445_13【和微之诗二十三首·和李势女】

白居易

减一分太短，增一分太长。不朱面若花，不粉肌如霜。
色为天下艳，心乃女中郎。自言重不幸，家破身未亡。
人各有一死，此死职所当。忍将先人体，与主为疣疮。
妾死主意快，从此两无妨。愿信赤心语，速即白刃光。
南郡忽感激，却立舍锋铓。抚背称阿姊，归我如归乡。
竟以恩信待，岂止猜妒忘。由来几上肉，不足挥干将。
南郡死已久，骨枯墓苍苍。愿于墓上头，立石镌此章。
劝诫天下妇，不令阴胜阳。

卷 445_14【和微之诗二十三首·和酬郑侍御东阳春闷放怀
追越游见寄】

白居易

君得嘉鱼置宾席，乐如南有嘉鱼时。劲气森爽竹竿竦，
妍文灿烂芙蓉披。载笔在幕名已重，补衮于朝官尚卑。

· 全唐诗 ·

一缄疏入掩谷永，三都赋成排左思。自言拜辞主人后，
离心荡飏风前旗。东南门馆别经岁，春眼怅望秋心悲。
昨日嘉鱼来访我，方驾同出何所之。乐游原头春尚早，
百舌新语声裊裊。日趁花忙向南拆，风催柳急从东吹。
流年惝恍不饶我，美景鲜妍来为谁。红尘三条界阡陌，
碧草千里铺郊畿。馀霞断时绮幅裂，斜云展处罗文纍。
暮钟远近声互动，暝鸟高下飞追随。酒酣将归未能去，
怅然回望天四垂。生何足养嵇著论，途何足泣杨涟洏。
胡不花下伴春醉，满酌绿酒听黄鹂。嘉鱼点头时一叹，
听我此言不知疲。语终兴尽各分散，东西轩骑分逶迤。
此诗勿遣闲人见，见恐与他为笑资。白首旧寮知我者，
凭君一咏向周师。

卷 445_15【和微之诗二十三首·和自劝二首】

白居易

稀稀疏疏绕篱竹，窄窄狭狭向阳屋。屋中有一曝背翁，
委置形骸如土木。日暮半炉麸炭火，夜深一醺纱笼烛。
不知有益及民无，二十年来食官禄。就暖移盘檐下食，
防寒拥被帷中宿。秋官月俸八九万，岂徒遣尔身温足。
勤操丹笔念黄沙，莫使饥寒囚滞狱。

急景凋年急于水，念此揽衣中夜起。门无宿客共谁言，
暖酒挑灯对妻子。身饮数杯妻一醺，馀酌分张与儿女。
微酣静坐未能眠，风霰萧萧打窗纸。自问有何才与术，

· 全唐诗 ·

入为丞郎出刺史。争知寿命短复长，岂得营营心不止。
请看韦孔与钱崔，半月之间四人死。

卷 445_16【和微之诗二十三首·和雨中花】

白居易

真宰倒持生杀柄，闲物命长人短命。松枝上鹤薨下龟，
千年不死仍无病。人生不得似龟鹤，少去老来同旦暝。
何异花开旦暝间，未落仍遭风雨横。草得经年菜连月，
唯花不与多时节。一年三百六十日，花能几日供攀折。
桃李无言难自诉，黄莺解语凭君说。莺虽为说不分明，
叶底枝头谩饶舌。

卷 445_17【和微之诗二十三首·和晨兴因报问龟儿】

白居易

冬旦寒惨澹，云日无晶辉。当此岁暮感，见君晨兴诗。
君诗亦多苦，苦在兄远离。我苦不在远，缠绵肝与脾。
西院病孀妇，后床孤侄儿。黄昏一恸后，夜半十起时。
病眼两行血，衰鬓万茎丝。咽绝五脏脉，瘦消百骸脂。
双目失一目，四肢断两肢。不如溘然逝，安用半活为。
谁谓荼檠苦，荼檠甘如饴。谁谓汤火热，汤火冷如澌。

· 全唐诗 ·

前时君寄诗，忧念问阿龟。喉燥声气窒，经年无报辞。
及睹晨兴句，未吟先涕垂。因兹涟洳际，一吐心中悲。
茫茫四海间，此苦唯君知。去我四千里，使我告诉谁。
仰头向青天，但见雁南飞。凭雁寄一语，为我达微之。
弦绝有续胶，树斩可接枝。唯我中肠断，应无连得期。

卷 445_18【和微之诗二十三首·和朝回与王炼师游南山下】

白居易

蔼蔼春景馥，峨峨夏云初。蹉跎退朝骑，飘飘随风裾。
晨从四丞相，入拜白玉除。暮与一道士，出寻青溪居。
吏隐本齐致，朝野孰云殊。道在有中适，机忘无外虞。
但愧烟霄上，鸾凤为吾徒。又惭云林间，鸥鹤不我疏。
坐倾数杯酒，卧枕一卷书。兴酣头兀兀，睡觉心于于。
以此送日月，问师为何如。

卷 445_19【和微之诗二十三首·和尝新酒】

白居易

空腹尝新酒，偶成卯时醉。醉来拥褐裘，直至斋时睡。
睡酣不语笑，真寝无梦寐。殆欲忘形骸，讵知属天地。
醒馥和未散，起坐澹无事。举臂一欠伸，引琴弹秋思。

· 全唐诗 ·

卷 445_20【和微之诗二十三首·和顺之琴者】

白居易

阴阴花院月，耿耿兰房烛。中有弄琴人，声貌俱如玉。
清泠石泉引，雅澹风松曲。遂使君子心，不爱凡丝竹。

卷 445_21【感旧写真】

白居易

李放写我真，写来二十载。莫问真何如，画亦销光彩。
朱颜与玄鬓，日夜改复改。无磋貌遽非，且喜身犹在。

卷 445_22【授太子宾客归洛】

白居易

南省去拂衣，东都来掩扉。病将老齐至，心与身同归。
白首外缘少，红尘前事非。怀哉紫芝叟，千载心相依。

卷 445_23【秋池二首】

· 全唐诗 ·

白居易

身闲无所为，心闲无所思。况当故园夜，复此新秋池。
岸暗鸟栖后，桥明月出时。菱风香散漫，桂露光参差。
静境多独得，幽怀竟谁知。悠然心中语，自问来何迟。

朝衣薄且健，晚簟清仍滑。社近燕影稀，雨馀蝉声歇。
闲中得诗境，此境幽难说。露荷珠自倾，风竹玉相戛。
谁能一同宿，共玩新秋月。暑退早凉归，池边好时节。

卷 445_24 【中隐】

白居易

大隐住朝市，小隐入丘樊。丘樊太冷落，朝市太嚣喧。
不如作中隐，隐在留司官。似出复似处，非忙亦非闲。
不劳心与力，又免饥与寒。终岁无公事，随月有俸钱。
君若好登临，城南有秋山。君若爱游荡，城东有春园。
君若欲一醉，时出赴宾筵。洛中多君子，可以恣欢言。
君若欲高卧，但自深掩关。亦无车马客，造次到门前。
人生处一世，其道难两全。贱即苦冻馁，贵则多忧患。
唯此中隐士，致身吉且安。穷通与丰约，正在四者间。

卷 445_25 【问秋光】

· 全唐诗 ·

白居易

殷卿领北镇，崔尹开南幕。外事信为荣，中怀未必乐。
何如不才者，兀兀无所作。不引窗下琴，即举池上酌。
淡交唯对水，老伴无如鹤。自适颇从容，旁观诚濩落。
身心转恬泰，烟景弥淡泊。回首语秋光，东来应不错。

卷 445_26【引泉】

白居易

一为止足限，二为衰疾牵。邴罢不因事，陶归非待年。
归来嵩洛下，闭户何翛然。静扫林下地，闲疏池畔泉。
伊流狭似带，洛石大如拳。谁教明月下，为我声溅溅。
竟夕舟中坐，有时桥上眠。何用施屏障，水竹绕床前。

卷 445_27【知足吟】

白居易

不种一陇田，仓中有馀粟。不采一株桑，箱中有馀服。
官闲离忧责，身泰无羁束。中人百户税，宾客一年禄。
樽中不乏酒，篱下仍多菊。是物皆有馀，非心无所欲。
吟君未贫作，同歌知足曲。自问此时心，不足何时足。

· 全唐诗 ·

卷 445_28 【酬集贤刘郎中对月见寄，兼怀元浙东】

白居易

月在洛阳天，天高净如水。下有白头人，揽衣中夜起。
思远镜亭上，光深书殿里。眇然三处心，相去各千里。

卷 445_29 【太湖石】

白居易

远望老嵯峨，近观怪嶙峋。才高八九尺，势若千万寻。
嵌空华阳洞，重叠匡山岑。邈矣仙掌迥，呀然剑门深。
形质冠今古，气色通晴阴。未秋已瑟瑟，欲雨先沈沈。
天姿信为异，时用非所任。磨刀不如砺，捣帛不如砧。
何乃主人意，重之如万金。岂伊造物者，独能知我心。

卷 445_30 【偶作二首】

白居易

扰扰贪生人，几何不夭阏。遑遑爱名人，几何能贵达。
伊余信多幸，拖紫垂白发。身为三品官，年已五十八。
筋骸虽早衰，尚未苦羸憊。资产虽不丰，亦不甚贫竭。

· 全唐诗 ·

登山力犹在，遇酒兴时发。无事日月长，不羁天地阔。
安身有处所，适意无时节。解带松下风，抱琴池上月。
人间所重者，相印将军钺。谋虑系安危，威权主生杀。
焦心一身苦，炙手旁人热。未必方寸间，得如吾快活。

日出起盥栉，振衣入道场。寂然无他念，但对一炉香。
日高始就食，食亦非膏粱。精粗随所有，亦足饱充肠。
日午脱巾簪，燕息窗下床。清风飒然至，卧可致羲皇。
日西引杖屦，散步游林塘。或饮茶一醺，或吟诗一章。
日入多不食，有时唯命觞。何以送闲夜，一曲秋霓裳。
一日分五时，作息率有常。自喜老后健，不嫌闲中忙。
是非一以贯，身世交相忘。若问此何许，此是无何乡。

卷 445_31【葺池上旧亭】

白居易

池月夜凄凉，池风晓萧飒。欲入池上冬，先葺池上閤。
向暖窗户开，迎寒帘幕合。苔封旧瓦木，水照新朱蜡。
软火深土炉，香醪小瓷榼。中有独宿翁，一灯对一榻。

卷 445_32【崔十八新池】

白居易

· 全唐诗 ·

爱君新小池，池色无人知。见底月明夜，无波风定时。
忽看不似水，一泊稀琉璃。

卷 445_33 【玩止水】

白居易

动者乐流水，静者乐止水。利物不如流，鉴形不如止。
凄清早霜降，淅沥微风起。中面红叶开，四隅绿萍委。
广狭八九丈，湾环有涯涘。浅深三四尺，洞彻无表里。
净分鹤翘足，澄见鱼掉尾。迎眸洗眼尘，隔胸荡心滓。
定将禅不别，明与诚相似。清能律贪夫，淡可交君子。
岂唯空狎玩，亦取相伦拟。欲识静者心，心源只如此。

卷 445_34 【闻崔十八宿予新昌弊宅，时予亦宿崔家依仁新亭，一宵偶同，两兴暗合，因而成咏，聊以写怀】

白居易

陋巷掩弊庐，高居敞华屋。新昌七株松，依仁万茎竹。
松前月台白，竹下风池绿。君向我斋眠，我在君亭宿。
平生有微尚，彼此多幽独。何必本主人，两心聊自足。

卷 445_35 【日长】

· 全唐诗 ·

白居易

日长昼加餐，夜短朝余睡。春来寝食间，虽老犹有味。
林塘得芳景，园曲生幽致。爱水多棹舟，惜花不扫地。
幸无眼下病，且向樽前醉。身外何足言，人间本无事。

卷 445_36【三月三十日作】

白居易

今朝三月尽，寂寞春事毕。黄鸟渐无声，朱樱新结实。
临风独长叹，此叹意非一。半百过九年，艳阳残一日。
随年减欢笑，逐日添衰疾。且遣花下歌，送此杯中物。

卷 445_37【慵不能】

白居易

架上非无书，眼慵不能看。匣中亦有琴，手慵不能弹。
腰慵不能带，头慵不能冠。午后恣情寝，午时随事餐。
一餐终日饱，一寝至夜安。饥寒亦闲事，况乃不饥寒。

卷 445_38【晨兴】

· 全唐诗 ·

白居易

宿鸟动前林，晨光上东屋。铜炉添早香，纱笼灭残烛。
头醒风稍愈，眼饱睡初足。起坐兀无思，叩齿三十六。
何以解宿斋，一杯云母粥。

卷 445_39【朝课】

白居易

平陂白石渠，静扫青苔院。池上好风来，新荷大如扇。
小亭中何有，素琴对黄卷。蕊珠讽数篇，秋思弹一遍。
从容朝课毕，方与客相见。

卷 445_40【天竺寺七叶堂避暑】

白居易

郁郁复郁郁，伏热何时毕。行入七叶堂，烦暑随步失。
檐雨稍霏微，窗风正萧瑟。清宵一觉睡，可以销百疾。

卷 445_41【香山寺石楼潭夜浴】

白居易

· 全唐诗 ·

炎光昼方炽，暑气宵弥毒。摇扇风甚微，褰裳汗霏霏。
起向月下行，来就潭中浴。平石为浴床，洼石为浴斛。
绡巾薄露顶，草屣轻乘足。清凉咏而归，归上石楼宿。

卷 445_42【嗟发落】

白居易

朝亦嗟发落，暮亦嗟发落。落尽诚可嗟，尽来亦不恶。
既不劳洗沐，又不烦梳掠。最宜湿暑天，头轻无髻缚。
脱置垢巾帻，解去尘缨络。银瓶贮寒泉，当顶倾一勺。
有如醍醐灌，坐受清凉乐。因悟自在僧，亦资于剃削。

卷 445_43【安稳眠】

白居易

家虽日渐贫，犹未苦饥冻。身虽日渐老，幸无急病痛。
眼逢闹处合，心向闲时用。既得安稳眠，亦无颠倒梦。

卷 445_44【池上夜境】

白居易

· 全唐诗 ·

晴空星月落池塘，澄鲜净绿表里光。露簟清莹迎夜滑，
风襟潇洒先秋凉。无人惊处野禽下，新睡觉时幽草香。
但问尘埃能去否，濯缨何必向沧浪。

卷 445_45【书绅】

白居易

仕有职役劳，农有畎亩勤。优哉分司叟，心力无苦辛。
岁晚头又白，自问何欣欣。新酒始开瓮，旧谷犹满囷。
吾尝静自思，往往夜达晨。何以送吾老，何以安吾贫。
岁计莫如谷，饱则不干人。日计莫如醉，醉则兼忘身。
诚知有道理，未敢劝交亲。恐为人所哂，聊自书诸绅。

卷 445_46【秋游平泉，赠韦处士、闲禅师】

白居易

秋景引闲步，山游不知疲。杖藜舍舆马，十里与僧期。
昔尝忧六十，四体不支持。今来已及此，犹未苦衰羸。
心兴遇境发，身力因行知。寻云到起处，爱泉听滴时。
南村韦处士，西寺闲禅师。山头与涧底，闻健且相随。

卷 445_47【游坊口悬泉，偶题石上】

· 全唐诗 ·

白居易

济源山水好，老尹知之久。常日听人言，今秋入吾手。
孔山刀剑立，沁水龙蛇走。危磴上悬泉，澄湾转坊口。
虚明见深底，净绿无纤垢。仙棹浪悠扬，尘缨风斗薊。
岩寒松柏短，石古莓苔厚。锦坐纓高低，翠屏张左右。
虽无安石妓，不乏文举酒。谈笑逐身来，管弦随事有。
时逢杖锡客，或值垂纶叟。相与澹忘归，自辰将及酉。
公门欲返驾，溪路犹回首。早晚重来游，心期罢官后。

卷 445_48【对火玩雪】

白居易

平生所心爱，爱火兼怜雪。火是腊天春，雪为阴夜月。
鹅毛纷正堕，兽炭敲初折。盈尺白盐寒，满炉红玉热。
稍宜杯酌动，渐引笙歌发。但识欢来由，不知醉时节。
银盘堆柳絮，罗袖抔琼屑。共愁明日销，便作经年别。

卷 445_49【六年寒食洛下宴游，赠冯、李二少尹】

白居易

丰年寒食节，美景洛阳城。三尹皆强健，七日尽晴明。
东郊蹋青草，南园攀紫荆。风拆海榴艳，露坠木兰英。

· 全唐诗 ·

假开春未老，宴合日屡倾。珠翠混花影，管弦藏水声。
佳会不易得，良辰亦难并。听吟歌暂辍，看舞杯徐行。
米价贱如土，酒味浓于饴。此时不尽醉，但恐负平生。
殷勤二曹长，各捧一银觥。

卷 445_50 【苦热中寄舒员外】

白居易

何堪日衰病，复此时炎燠。厌对俗杯盘，倦听凡丝竹。
藤床铺晚雪，角枕截寒玉。安得清瘦人，新秋夜同宿。
非君固不可，何夕枉高躅。

卷 445_51 【闲夕】

白居易

一声早蝉发，数点新萤度。兰釭耿无烟，筠簟清有露。
未归后房寝，且下前轩步。斜月入低廊，凉风满高树。
放怀常自适，遇境多成趣。何法使之然，心中无细故。

卷 445_52 【寄情】

白居易

· 全唐诗 ·

灼灼早春梅，东南枝最早。持来玩未足，花向手中老。
芳香销掌握，怅望生怀抱。岂无后开花，念此先开好。

卷 445_53【舒员外游香山寺数日不归，兼辱尺书，大夸胜事，时正值坐衙之际，走笔题长句以赠之】

白居易

香山石楼倚天开，翠屏壁立波环回。黄菊繁时好客到，
碧云合处佳人来。酡颜一笑天桃绽，清吟数声寒玉哀。
轩骑逶迟棹容与，留连三日不能回。白头老尹府中坐，
早衙才退暮衙催。庭前阶上何所有，累囚成贯案成堆。
岂无池塘长秋草，亦有丝竹生尘埃。今日清光昨夜月，
竟无人来劝一杯。知

卷 445_54【早冬游王屋，自灵都抵阳台上方望天坛，偶吟成章，寄温谷周尊师、中书李相公】

白居易

霜降山水清，王屋十月时。石泉碧漾漾，岩树红离离。
朝为灵都游，暮有阳台期。飘然世尘外，鸾鹤如可追。
忽念公程尽，复惭身力衰。天坛在天半，欲上心迟迟。
尝闻此游者，隐客与损之。各抱贵仙骨，俱非泥垢姿。
二人相顾言，彼此称男儿。若不为松乔，即须作皋夔。

· 全唐诗 ·

今果如其语，光彩双葳蕤。一人佩金印，一人翳玉芝。
我来高其事，咏叹偶成诗。为君题石上，欲使故山知。

卷 445_55【吴宫辞】

白居易

淡红花帔浅檀蛾，睡脸初开似剪波。
坐对珠笼闲理曲，琵琶鹦鹉语相和。

· 全唐诗 ·

第四百四十六卷

卷 446_1 【元微之除浙东观察使，喜得杭越邻州，先赠长句】

白居易

稽山镜水欢游地，犀带金章荣贵身。官职比君虽校小，
封疆与我且为邻。郡楼对玩千峰月，江界平分两岸春。
杭越风光诗酒主，相看更合与何人。

卷 446_2 【席上答微之】

白居易

我住浙江西，君去浙江东。勿言一水隔，便与千里同。
富贵无人劝君酒，今宵为我尽杯中。

卷 446_3 【答微之上船后留别】

白居易

· 全唐诗 ·

烛下尊前一分手，舟中岸上两回头。
归来虚白堂中梦，合眼先应到越州。

卷 446_4【答微之泊西陵驿见寄】

白居易

烟波尽处一点白，应是西陵古驿台。
知在台边望不见，暮潮空送渡船回。

卷 446_5【答微之夸越州州宅】

白居易

贺上人回得报书，大夸州宅似仙居。厌看冯翊风沙久，
喜见兰亭烟景初。日出旌旗生气色，月明楼阁在空虚。
知君暗数江南郡，除却余杭尽不如。

卷 446_6【微之重夸州居，其落句有西州罗刹之谑，因嘲兹石，聊以寄怀】

白居易

君问西州城下事，醉中叠纸为君书。嵌空石面标罗刹，

· 全唐诗 ·

压捺潮头敌子胥。神鬼曾鞭犹不动，波涛虽打欲何如。
谁知太守心相似，抵滞坚顽两有余。

卷 446_7【张十八员外以新诗二十五首见寄，郡楼月下吟玩
通夕，因题卷后，封寄微之】

白居易

秦城南省清秋夜，江郡东楼明月时。去我三千六百里，
得君二十五篇诗。阳春曲调高难和，淡水交情老始知。
坐到天明吟未足，重封转寄与微之。

卷 446_8【酬微之】

白居易

满帙填箱唱和诗，少年为戏老成悲。声声丽曲敲寒玉，
句句妍辞缀色丝。吟玩独当明月夜，伤嗟同是白头时。
由来才命相磨折，天遣无儿欲怨谁。

卷 446_9【余思未尽，加为六韵，重寄微之】

白居易

· 全唐诗 ·

海内声华并在身，篋中文字绝无伦。遥知独对封章草，
忽忆同为献纳臣。走笔往来盈卷轴，除官递互掌丝纶。
制从长庆辞高古，诗到元和体变新。各有文姬才稚齿，
俱无通子继余尘。琴书何必求王粲，与女犹胜与外人。

卷 446_10 【答微之咏怀见寄】

白居易

閤中同直前春事，船里相逢昨日情。分袂二年劳梦寐，
并床三宿话平生。紫微北畔辞宫阙，沧海西头对郡城。
聚散穷通何足道，醉来一曲放歌行。

卷 446_11 【酬微之夸镜湖】

白居易

我嗟身老岁方徂，君更官高兴转孤。军门郡阁曾闲否，
禹穴耶溪得到无。酒盏省陪波卷白，骰盘思共彩呼卢。
一泓镜水谁能羨，自有胸中万顷湖。

卷 446_12 【雪中即事答微之】

白居易

· 全唐诗 ·

连夜江云黄惨澹，平明山雪白模糊。银河沙涨三千里，
梅岭花排一万株。北市风生飘散面，东楼日出照凝酥。
谁家高士关门户，何处行人失道途。舞鹤庭前毛稍定，
捣衣砧上练新铺。戏团稚女呵红手，愁坐衰翁对白须。
压瘴一州除疾苦，呈丰万井尽欢娱。润含玉德怀君子，
寒助霜威忆大夫。莫道烟波一水隔，何妨气候两乡殊。
越中地暖多成雨，还有瑶台琼树无。

卷 446_13【醉封诗筒寄微之】

白居易

一生休戚与穷通，处处相随事事同。未死又怜沧海郡，
无儿俱作白头翁。展眉只仰三杯后，代面唯凭五字中。
为向两州邮吏道，莫辞来去递诗筒。

卷 446_14【除夜寄微之】

白居易

鬓毛不觉白毵毵，一事无成百不堪。共惜盛时辞阙下，
同嗟除夜在江南。家山泉石寻常忆，世路风波子细谙。
老校于君合先退，明年半百又加三。

· 全唐诗 ·

卷 446_15【苏州李中丞以元日郡斋感怀诗寄微之及予，辄依来篇，七首八韵，走笔奉答，兼呈微之】

白居易

白首余杭白太守，落魄抛名来已久。一辞渭北故园春，
再把江南新岁酒。杯前笑歌徒勉强，镜里形容渐衰老。
领郡惭当潦倒年，邻州喜得平生友。长洲草接松江岸，
曲水花连镜湖口。老去还能痛饮无，春来曾作闲游否。
凭莺传语报李六，倩雁将书与元九。莫嗟一日日催人，
且贵一年年入手。

卷 446_16【早春西湖闲游，怅然兴怀，忆与微之同赏，因思在越官重事殷，镜湖之游，或恐未暇，偶成十八韵寄微之】

白居易

上马复呼宾，湖边景气新。管弦三数事，骑从十余人。
立换登山屐，行携漉酒巾。逢花看当妓，遇草坐为茵。
西日笼黄柳，东风荡白蘋。小桥装雁齿，轻浪蹙鱼鳞。
画舫牵徐转，银船酌慢巡。野情遗世累，醉态任天真。
彼此年将老，平生分最亲。高天从所愿，远地得为邻。
云树分三驿，烟波限一津。翻嗟寸步隔，却厌尺书频。
浙右称雄镇，山阴委重臣。贵垂长紫绶，荣驾大朱轮。
出动刀枪队，归生道路尘。雁惊弓易散，鸥怕鼓难驯。

· 全唐诗 ·

百吏瞻相面，千夫捧拥身。自然闲兴少，应负镜湖春。

卷 446_17【答微之见寄】

白居易

可怜风景浙东西，先数余杭次会稽。禹庙未胜天竺寺，
钱湖不羨若耶溪。摆尘野鹤春毛暖，拍水沙鸥湿翅低。
更对雪楼君爱否，红栏碧甃点银泥。

卷 446_18【祭社宵兴灯前偶作】

白居易

城头传鼓角，灯下整衣冠。夜镜藏须白，秋泉漱齿寒。
欲将闲送老，须著病辞官。更待年终后，支持归计看。

卷 446_19【闲卧】

白居易

尽日前轩卧，神闲境亦空。有山当枕上，无事到心中。
帘卷侵床日，屏遮入座风。望春春未到，应在海门东。

· 全唐诗 ·

卷 446_20【新春江次】

白居易

浦干潮未应，堤湿冻初销。粉片妆梅朵，金丝刷柳条。
鸭头新绿水，雁齿小红桥。莫怪珂声碎，春来五马骄。

卷 446_21【春题湖上】

白居易

湖上春来似画图，乱峰围绕水平铺。松排山面千重翠，
月点波心一颗珠。碧毯线头抽早稻，青罗裙带展新蒲。
未能抛得杭州去，一半句留是此湖。

卷 446_22【早春忆微之】

白居易

昏昏老与病相和，感物思君叹复歌。声早鸡先知夜短，
色浓柳最占春多。沙头雨染斑斑草，水面风驱瑟瑟波。
可道眼前光景恶，其如难见故人何。

· 全唐诗 ·

卷 446_23【失鹤】

白居易

失为庭前雪，飞因海上风。九霄应得侣，三夜不归笼。
声断碧云外，影沉明月中。郡斋从此后，谁伴白头翁。

卷 446_24【自感】

白居易

宴游寝食渐无味，杯酒管弦徒绕身。
宾客欢娱僮仆饱，始知官职为他人。

卷 446_25【得湖州崔十八使君书，喜与杭越邻郡，因成长句代贺，兼寄微之】

白居易

三郡何因此结缘，贞元科第忝同年。故情欢喜开书后，
旧事思量在眼前。越国封疆吞碧海，杭城楼閣入青烟。
吴兴卑小君应屈，为是蓬莱最后仙。

· 全唐诗 ·

卷 446_26 【同诸客携酒早看樱桃花】

白居易

晓报樱桃发，春携酒客过。绿饴粘盏杓，红雪压枝柯。
天色晴明少，人生事故多。停杯替花语，不醉拟如何。

卷 446_27 【柳絮】

白居易

三月尽是头白日，与春老别更依依。
凭莺为向杨花道，绊惹春风莫放归。

卷 446_28 【早饮湖州酒，寄崔使君】

白居易

一榼扶头酒，泓澄泻玉壶。十分蘸甲酌，潋艳满银盂。
捧出光华动，尝看气味殊。手中稀琥珀，舌上冷醍醐。
瓶里有时尽，江边无处沽。不知崔太守，更有寄来无。

卷 446_29 【病中书事】

· 全唐诗 ·

白居易

三载卧山城，闲知节物情。莺多过春语，蝉不待秋鸣。
气嗽因寒发，风痰欲雨生。病身无所用，唯解卜阴晴。

卷 446_30【与微之唱和，来去常以竹筒贮诗，陈协律美而成篇，因以此答】

白居易

拣得琅玕截作筒，缄题章句写心胸。随风每喜飞如鸟，
渡水常忧化作龙。粉节坚如太守信，霜筠冷称大夫容。
烦君赞咏心知愧，鱼目骊珠同一封。

卷 446_31【醉戏诸妓】

白居易

席上争飞使君酒，歌中多唱舍人诗。
不知明日休官后，逐我东山去是谁。

卷 446_32【北院】

白居易

· 全唐诗 ·

北院人稀到，东窗事最偏。竹烟行灶上，石壁卧房前。
性拙身多暇，心慵事少缘。还如病居士，唯置一床眠。

卷 446_33【酬周协律】

白居易

五十钱唐守，应为送老官。滥蒙辞客爱，犹作近臣看。
凿落愁须饮，琵琶闷遣弹。白头虽强醉，不似少年欢。

卷 446_34【题石山人】

白居易

腾腾兀兀在人间，贵贱贤愚尽往还。臃肿筵中唯饮酒，
歌钟会处独思山。存神不许三尸住，混俗无妨两鬓斑。
除却余杭白太守，何人更解爱君闲。

卷 446_35【诗解】

白居易

新篇日日成，不是爱声名。旧句时时改，无妨悦性情。
但令长守郡，不觉却归城。只拟江湖上，吟哦过一生。

· 全唐诗 ·

卷 446_36 【潮】

白居易

早潮才落晚潮来，一月周流六十回。
不独光阴朝复暮，杭州老去被潮催。

卷 446_37 【闻歌妓唱严郎中诗，因以绝句寄之】

白居易

已留旧政布中和，又付新词与艳歌。
但是人家有遗爱，就中苏小感恩多。

卷 446_38 【柘枝妓】

白居易

平铺一合锦筵开，连击三声画鼓催。红蜡烛移桃叶起，
紫罗衫动柘枝来。带垂钿胯花腰重，帽转金铃雪面回。
看即曲终留不住，云飘雨送向阳台。

卷 446_39 【急乐世辞】

· 全唐诗 ·

白居易

正抽碧线绣红罗，忽听黄莺敛翠蛾。
秋思冬愁春怅望，大都不称意时多。

卷 446_40 【天竺寺送坚上人归庐山】

白居易

锡杖登高寺，香炉忆旧峰。偶来舟不系，忽去鸟无踪。
岂要留离偈，宁劳动别容。与师俱是梦，梦里暂相逢。

卷 446_41 【除官赴阙，留赠微之】

白居易

去年十月半，君来过浙东。今年五月尽，我发向关中。
两乡默默心相别，一水盈盈路不通。从此津人应省事，
寂寥无复递诗筒。

卷 446_42 【留题郡斋】

白居易

· 全唐诗 ·

吟山歌水嘲风月，便是三年官满时。春为醉眠多闭閤，
秋因晴望暂褰帷。更无一事移风俗，唯化州民解咏诗。

卷 446_43【别州民】

白居易

耆老遮归路，壶浆满别筵。甘棠无一树，那得泪潸然。
税重多贫户，农饥足旱田。唯留一湖水，与汝救凶年。

卷 446_44【留题天竺、灵隐两寺】

白居易

在郡六百日，入山十二回。宿因月桂落，醉为海榴开。
黄纸除书到，青宫诏命催。僧徒多怅望，宾从亦裴回。
寺閤烟埋竹，林香雨落梅。别桥怜白石，辞洞恋青苔。
渐出松间路，犹飞马上杯。谁教冷泉水，送我下山来。

卷 446_45【西湖留别】

白居易

征途行色惨风烟，祖帐离声咽管弦。翠黛不须留五马，

· 全唐诗 ·

皇恩只许住三年。绿藤阴下铺歌席，红藕花中泊妓船。
处处回头尽堪恋，就中难别是湖边。

卷 446_46【重寄别微之】

白居易

凭仗江波寄一辞，不须惆怅报微之。
犹胜往岁峡中别，滟滪堆边招手时。

卷 446_47【重题别东楼】

白居易

东楼胜事我偏知，气象多随昏旦移。湖卷衣裳白重叠，
山张屏障绿参差。海仙楼塔晴方出，江女笙箫夜始吹。
春雨星攒寻蟹火，秋风霞飏弄涛旗。宴宜云髻新梳后，
曲爱霓裳未拍时。太守三年嘲不尽，郡斋空作百篇诗。

卷 446_48【别周军事】

白居易

主人头白官仍冷，去后怜君是底人。

· 全唐诗 ·

试谒会稽元相去，不妨相见却殷勤。

卷 446_49【看常州柘枝，赠贾使君】

白居易

莫惜新衣舞柘枝，也从尘污汗沾垂。
料君即却归朝去，不见银泥衫故时。

卷 446_50【汴河路有感】

白居易

三十年前路，孤舟重往还。绕身新眷属，举目旧乡关。
事去唯留水，人非但见山。啼襟与愁鬓，此日两成斑。

卷 446_51【埇桥旧业】

白居易

别业埇城北，抛来二十春。改移新径路，变换旧村邻。
有税田畴薄，无官弟侄贫。田园何用问，强半属他人。

· 全唐诗 ·

卷 446_52【茅城驿】

白居易

汴河无景思，秋日又凄凄。地薄桑麻瘦，村贫屋舍低。
早苗多间草，浊水半和泥。最是萧条处，茅城驿向西。

卷 446_53【河阴夜泊忆微之】

白居易

忆君我正泊行舟，望我君应上郡楼。
万里月明同此夜，黄河东面海西头。

卷 446_54【杭州回舫】

白居易

自别钱塘山水后，不多饮酒懒吟诗。
欲将此意凭回棹，报与西湖风月知。

卷 446_55【途中题山泉】

· 全唐诗 ·

白居易

决决涌岩穴，溅溅出洞门。向东应入海，从此不归源。
似叶飘辞树，如云断别根。吾身亦如此，何日返乡园。

卷 446_56【欲到东洛，得杨使君书，因以此报】

白居易

向公心切向财疏，淮上休官洛下居。三郡政能从独步，
十年生计复何如。使君滩上久分手，别驾渡头先得书。
且喜平安又相见，其余外事尽空虚。

卷 446_57【洛下寓居】

白居易

秋馆清凉日，书因解闷看。夜窗幽独处，琴不为人弹。
游宴慵多废，趋朝老渐难。禅僧教断酒，道士劝休官。
渭曲庄犹在，钱唐俸尚残。如能便归去，亦不至饥寒。

卷 446_58【味道】

白居易

· 全唐诗 ·

叩齿晨兴秋院静，焚香冥坐晚窗深。七篇真诰论仙事，
一卷檀经说佛心。此日尽知前境妄，多生曾被外尘侵。
自嫌习性犹残处，爱咏闲诗好听琴。

卷 446_59【好听琴】

白居易

本性好丝桐，尘机闻即空。一声来耳里，万事离心中。
清畅堪销疾，恬和好养蒙。尤宜听三乐，安慰白头翁。

卷 446_60【爱咏诗】

白居易

辞章讽咏成千首，心行归依向一乘。
坐倚绳床闲自念，前生应是一诗僧。

卷 446_61【酬皇甫庶子见寄】

白居易

掌纶不称吾应笑，典郡无能我自知。别诏忽惊新命出，
同寮偶与夙心期。春坊潇洒优闲地，秋鬓苍浪老大时。

· 全唐诗 ·

独占二疏应未可，龙楼见拟觅分司。

卷 446_62 【卧疾】

白居易

闲官卧疾绝经过，居处萧条近洛河。
水北水南秋月夜，管弦声少杵声多。

卷 446_63 【远师】

白居易

东宫白庶子，南寺远禅师。何处遥相见，心无一事时。

卷 446_64 【问远师】

白居易

荤膻停夜食，吟咏散秋怀。笑问东林老，诗应不破斋。

卷 446_65 【小院酒醒】

· 全唐诗 ·

白居易

酒醒闲独步，小院夜深凉。一领新秋簟，三间明月廊。
未收残盏杓，初换热衣裳。好是幽眠处，松阴六尺床。

卷 446_66【赠侯三郎中】

白居易

老爱东都好寄身，足泉多竹少埃尘。年丰最喜唯贫客，
秋冷先知是瘦人。幸有琴书堪作伴，苦无田宅可为邻。
洛中纵未长居得，且与苏田游过春。

卷 446_67【求分司东都，寄牛相公十韵】

白居易

忽忽心如梦，星星鬓似丝。纵贫长有酒，虽老未抛诗。
俭薄身都惯，疏顽性颇宜。饭粗餐亦饱，被暖起常迟。
万里归何得，三年伴是谁。华亭鹤不去，天竺石相随。
王尹赏将马，田家卖与池。开门闲坐日，绕水独行时。
懒慢交游许，衰羸相府知。官寮幸无事，可惜不分司。

卷 446_68【酬杨八】

· 全唐诗 ·

白居易

君以旷怀宜静境，我因蹇步称闲官。
闭门足病非高士，劳作云心鹤眼看。

卷 446_69【履道新居二十韵】

白居易

履道坊西角，官河曲北头。林园四邻好，风景一家秋。
门闭深沈树，池通浅沮沟。拔青松直上，铺碧水平流。
篱菊黄金合，窗筠绿玉稠。疑连紫阳洞，似到白蘋洲。
僧至多同宿，宾来辄少留。岂无诗引兴，兼有酒销忧。
移榻临平岸，携茶上小舟。果穿闻鸟啄，萍破见鱼游。
地与尘相远，人将境共幽。泛潭菱点镜，沉浦月生钩。
厨晓烟孤起，庭寒雨半收。老饥初爱粥，瘦冷早披裘。
洛下招新隐，秦中忘旧游。辞章留凤阁，班籍寄龙楼。
病惬官曹静，闲惭俸禄优。琴书中有得，衣食外何求。
济世才无取，谋身智不周。应须共心语，万事一时休。

卷 446_70【九日思杭州旧游，寄周判官及诸客】

白居易

忽忆郡南山顶上，昔时同醉是今辰。笙歌委曲声延耳，

· 全唐诗 ·

金翠动摇光照身。风景不随宫相去，欢娱应逐使君新。
江山宾客皆如旧，唯是当筵换主人。

卷 446_71【秋晚】

白居易

烟景淡濛濛，池边微有风。觉寒蛩近壁，知暝鹤归笼。
长貌随年改，衰情与物同。夜来霜厚薄，梨叶半低红。

卷 446_72【分司】

白居易

散秩留司殊有味，最宜病拙不才身。行香拜表为公事，
碧洛青嵩当主人。已出闲游多到夜，却归慵卧又经旬。
钱唐五马留三匹，还拟骑游揽扰春。

卷 446_73【河南王尹初到，以诗代书先问之】

白居易

别来王阁老，三岁似须臾。鬓上斑多少，杯前兴有无。
官从分紧慢，情莫问荣枯。许入朱门否，篮舆一病夫。

· 全唐诗 ·

卷 446_74 【池西亭】

白居易

朱栏映晚树，金魄落秋池。还似钱唐夜，西楼月出时。

卷 446_75 【临池闲卧】

白居易

小竹围庭匝，平池与砌连。闲多临水坐，老爱向阳眠。
营役抛身外，幽奇送枕前。谁家卧床脚，解系钓鱼船。

卷 446_76 【吾庐】

白居易

吾庐不独贮妻儿，自觉年侵身力衰。眼下营求容足地，
心中准拟挂冠时。新昌小院松当户，履道幽居竹绕池。
莫道两都空有宅，林泉风月是家资。

卷 446_77 【题新居，寄宣州崔相公】

· 全唐诗 ·

白居易

门庭有水巷无尘，好称闲官作主人。冷似雀罗虽少客，
宽于蜗舍足容身。疏通竹径将迎月，扫掠莎台欲待春。
济世料君归未得，南园北曲谩为邻。

卷 446_78【忆杭州梅花，因叙旧游，寄萧协律】

白居易

三年闲闷在余杭，曾为梅花醉几场。伍相庙边繁似雪，
孤山园里丽如妆。蹋随游骑心长惜，折赠佳人手亦香。
赏自初开直至落，欢因小饮便成狂。薛刘相次埋新垄，
沈谢双飞出故乡。歌伴酒徒零散尽，唯残头白老萧郎。

卷 446_79【病中辱张常侍题集贤院诗，因以继和】

白居易

天禄阁门开，甘泉侍从回。图书皆帝籍，寮友尽仙才。
骑省通中掖，龙楼隔上台。犹怜病宫相，诗寄洛阳来。

卷 446_80【早春晚归】

· 全唐诗 ·

白居易

晚归骑马过天津，沙白桥红返照新。草色连延多隙地，
鼓声闲缓少忙人。还如南国饶沟水，不似西京足路尘。
金谷风光依旧在，无人管领石家春。

卷 446_81【赠杨使君】

白居易

曾嗟放逐同巴峡，且喜归还会洛阳。时命到来须作用，
功名未立莫思量。银衔叱拨欺风雪，金屑琵琶费酒浆。
更待城东桃李发，共君沉醉两三场。

卷 446_82【赠皇甫庶子】

白居易

何因散地共徘徊，人道君才我不才。骑少马蹄生易蹶，
用稀印锁涩难开。妻知年老添衣絮，婢报天寒拨酒醅。
更愧小胥咨拜表，单衫冲雪夜深来。

卷 446_83【池上竹下作】

· 全唐诗 ·

白居易

穿篱绕舍碧逶迤，十亩闲居半是池。食饱窗间新睡后，
脚轻林下独行时。水能性淡为吾友，竹解心虚即我师。
何必悠悠人世上，劳心费目觅亲知。

卷 446_84【闲出觅春，戏赠诸郎官】

白居易

年来数出觅风光，亦不全闲亦不忙。放鞚体安骑稳马，
隔袍身暖照晴阳。迎春日日添诗思，送老时时放酒狂。
除却髭须白一色，其余未伏少年郎。

卷 446_85【别春炉】

白居易

暖阁春初入，温炉兴稍阑。晚风犹冷在，夜火且留看。
独宿相依久，多情欲别难。谁能共天语，长遣四时寒。

卷 446_86【泛小舫二首】

白居易

· 全唐诗 ·

水一塘，舸一只。舸头漾漾知风起，舸背萧萧
闻雨滴。

醉卧船中欲醒时，忽疑身是江南客。

船缓进，水平流。一茎竹篙别船尾，两幅青幕覆船头。
亚竹乱藤多照岸，如从凤口向湖州。

卷 446_87【梦行简】

白居易

天气妍和水色鲜，闲吟独步小桥边。
池塘草绿无佳句，虚卧春窗梦阿怜。

卷 446_88【题新居呈王尹，兼简府中三掾】

白居易

弊宅须重葺，贫家乏羡财。桥凭川守造，树倩府僚栽。
朱板新犹湿，红英暖渐开。仍期更携酒，倚槛看花来。

卷 446_89【云和】

白居易

· 全唐诗 ·

非琴非瑟亦非筝，拨柱推弦调未成。
欲散白头千万恨，只消红袖两三声。

卷 446_90【春老】

白居易

欲随年少强游春，自觉风光不属身。
歌舞屏风花障上，几时曾画白头人。

卷 446_91【春雪过皇甫家】

白居易

晚来篮輿雪中回，喜遇君家门正开。
唯要主人青眼待，琴诗谈笑自将来。

卷 446_92【崔侍御以孩子三日至示其所生诗见示，因以二绝句和之】

白居易

洞房门上挂桑弧，香水盆中浴凤雏。
还似初生三日魄，嫦娥满月即成珠。

· 全唐诗 ·

爱惜肯将同宝玉，喜欢应胜得王侯。
弄璋诗句多才思，愁杀无儿老邓攸。

卷 446_93【与皇甫庶子同游城东】

白居易

闲游何必多徒侣，相劝时时举一杯。博望苑中无职役，
建春门外足池台。绿油剪叶蒲新长，红蜡黏枝杏欲开。
白马朱衣两宫相，可怜天气出城来。

卷 446_94【洛城东花下作】

白居易

记得旧诗章，花多数洛阳。及逢枝似雪，已是鬓成霜。
向后光阴促，从前事意忙。无因重年少，何计驻时芳。
欲送愁离面，须倾酒入肠。白头无藉在，醉倒亦何妨。

卷 446_95【晚春寄微之并崔湖州】

白居易

洛阳陌上少交亲，履道城边欲暮春。

· 全唐诗 ·

崔在吴兴元在越，出门骑马觅何人。

卷 446_96【城东闲行，因题尉迟司业水阁】

白居易

闲绕洛阳城，无人知姓名。病乘篮輿出，老著茜衫行。
处处花相引，时时酒一倾。借君溪阁上，醉咏两三声。

卷 446_97【寄皇甫七】

白居易

孟夏爱吾庐，陶潜语不虚。花樽飘落酒，风案展开书。
邻女偷新果，家僮漉小鱼。不知皇甫七，池上兴何如。

卷 446_98【访皇甫七】

白居易

上马行数里，逢花倾一杯。更无停泊处，还是觅君来。

· 全唐诗 ·

第四百四十七卷

卷 447_1【除苏州刺史，别洛城东花】

白居易

乱雪千花落，新丝两鬓生。老除吴郡守，春别洛阳城。
江上今重去，城东更一行。别花何用伴，劝酒有残莺。

卷 447_2【奉和汴州令狐令公二十二韵】

白居易

客有东征者，夷门一落帆。二年方得到，五日未为淹。
在浚旌重葺，游梁馆更添。心因好善乐，貌为礼贤谦。
俗阜知敦劝，民安见察廉。仁风扇道路，阴雨膏闾阎。
文律操将柄，兵机钓得钤。碧幢油叶叶，红旆火襜襜。
景象春加丽，威容晓助严。枪森赤豹尾，纛吒黑龙髯。
门静尘初敛，城昏日半衔。选幽开后院，占胜坐前檐。
平展丝头毯，高褰锦额帘。雷捶柘枝鼓，雪摆胡腾衫。
发滑歌钗坠，妆光舞汗沾。回灯花簇簇，过酒玉纤纤。
饌盛盘心殢，醑浓盏底黏。陆珍熊掌烂，海味蟹螯咸。

· 全唐诗 ·

福履千夫祝，形仪四座瞻。羊公长在岘，传说莫归岩。
眷爱人人遍，风情事事兼。犹嫌客不醉，同赋夜厌厌。

卷 447_3【船夜援琴】

白居易

鸟栖鱼不动，月照夜江深。身外都无事，舟中只有琴。
七弦为益友，两耳是知音。心静即声淡，其间无古今。

卷 447_4【答刘和州禹锡】

白居易

换印虽频命未通，历阳湖上又秋风。不教才展休明代，
为罚诗争造化功。我亦思归田舍下，君应厌卧郡斋中。
好相收拾为闲伴，年齿官班约略同。

卷 447_5【渡淮】

白居易

淮水东南阔，无风渡亦难。孤烟生乍直，远树望多圆。
春浪棹声急，夕阳帆影残。清流宜映月，今夜重吟看。

· 全唐诗 ·

卷 447_6【赴苏州至常州，答贾舍人】

白居易

杭城隔岁转苏台，还拥前时五马回。厌见簿书先眼合，
喜逢杯酒暂眉开。未酬恩宠年空去，欲立功名命不来。
一别承明三领郡，甘从人道是粗才。

卷 447_7【去岁罢杭州，今春领吴郡，惭无善政，聊写鄙怀，
兼寄三相公】

白居易

为问三丞相，如何秉国钧。那将最剧郡，付与苦慵人。
岂有吟诗客，堪为持节臣。不才空饱暖，无惠及饥贫。
昨卧南城月，今行北境春。铅刀磨欲尽，银印换何频。
杭老遮车辙，吴童扫路尘。虚迎复虚送，惭见两州民。

卷 447_8【宣武令狐相公以诗寄赠，传播吴中，聊奉短草，
用申酬谢】

白居易

新诗传咏忽纷纷，楚老吴娃耳遍闻。尽解呼为好才子，

· 全唐诗 ·

不知官是上将军。辞人命薄多无位，战将功高少有文。
谢朓篇章韩信钺，一生双得不如君。

卷 447_9【自咏】

白居易

形容瘦薄诗情苦，岂是人间有相人。只合一生眠白屋，
何因三度拥朱轮。金章未佩虽非贵，银榼常携亦不贫。
唯是无儿头早白，被天磨折恰平均。

卷 447_10【吟前篇，因寄微之】

白居易

君颜贵茂不清羸，君句雄华不苦悲。
何事遣君还似我，髭须早白亦无儿。

卷 447_11【紫薇花】

白居易

紫薇花对紫薇翁，名目虽同貌不同。独占芳菲当夏景，
不将颜色托春风。浔阳官舍双高树，兴善僧庭一大丛。

· 全唐诗 ·

何似苏州安置处，花堂栏下月明中。

卷 447_12【自到郡斋，仅经旬日，方专公务，未及宴游，偷闲走笔，题二十韵，兼寄常州贾舍人、湖州崔郎中，仍呈吴中诸客】

白居易

渭北离乡客，江南守土臣。涉途初改月，入境已经旬。
甲郡标天下，环封极海滨。版图十万户，兵籍五千人。
自顾才能少，何堪宠命频。冒荣惭印绶，虚奖负丝纶。
候病须通脉，防流要塞津。救烦无若静，补拙莫如勤。
削使科条简，摊令赋役均。以兹为报效，安敢不躬亲。
襦袴提于手，韦弦佩在绅。敢辞称俗吏，且愿活疲民。
常未征黄霸，湖犹借寇恂。愧无铛脚政，徒忝犬牙邻。
制诰夸黄绢，诗篇占白蘋。铜符抛不得，琼树见无因。
警寐钟传夜，催衙鼓报晨。唯知对胥吏，未暇接亲宾。
色变云迎夏，声残鸟过春。麦风非逐扇，梅雨异随轮。
武寺山如故，王楼月自新。池塘闲长草，丝竹废生尘。
暑遣烧神酎，晴教煦舞茵。待还公事了，亦拟乐吾身。

卷 447_17【题笼鹤】

白居易

· 全唐诗 ·

经旬不饮酒，逾月未闻歌。岂是风情少，其如尘事多。
虎丘惭客问，娃馆妒人过。莫笑笼中鹤，相看去几何。

卷 447_18【答客问杭州】

白居易

为我踟蹰停酒盏，与君约略说杭州。山名天竺堆青黛，
湖号钱唐泻绿油。大屋檐多装雁齿，小航船亦画龙头。
所嗟水路无三百，官系何因得再游。

卷 447_19【登阊门闲望】

白居易

阊门四望郁苍苍，始觉州雄土俗强。十万夫家供课税，
五千子弟守封疆。阖闾城碧铺秋草，乌鹊桥红带夕阳。
处处楼前飘管吹，家家门外泊舟航。云埋虎寺山藏色，
月耀娃宫水放光。曾赏钱唐嫌茂苑，今来未敢苦夸张。

卷 447_20【代诸妓赠送周判官】

白居易

· 全唐诗 ·

妓筵今夜别姑苏，客棹明朝向镜湖。莫泛扁舟寻范蠡，
且随五马觅罗敷。兰亭月破能回否，娃馆秋凉却到无。
好与使君为老伴，归来休染白髭须。

卷 447_21【秋寄微之十二韵】

白居易

娃馆松江北，稽城浙水东。屈君为长吏，伴我作衰翁。
旌旆知非远，烟云望不通。忙多对酒榼，兴少阅诗筒。
淡白秋来日，疏凉雨后风。余霞数片绮，新月一张弓。
影满衰桐树，香凋晚蕙丛。饥啼春谷鸟，寒怨络丝虫。
览镜头虽白，听歌耳未聋。老愁从此遣，醉笑与谁同。
清旦方堆案，黄昏始退公。可怜朝暮景，销在两衙中。

卷 447_22【池上早秋】

白居易

荷芰绿参差，新秋水满池。早凉生北槛，残照下东篱。
露饱蝉声懒，风干柳意衰。过潘二十岁，何必更愁悲。

卷 447_23【郡西亭偶咏】

· 全唐诗 ·

白居易

常爱西亭面北林，公私尘事不能侵。共闲作伴无如鹤，
与老相宜只有琴。莫遣是非分作界，须教吏隐合为心。
可怜此道人皆见，但要修行功用深。

卷 447_24【故衫】

白居易

闇淡绯衫称老身，半披半曳出朱门。袖中吴郡新诗本，
襟上杭州旧酒痕。残色过梅看向尽，故香因洗嗅犹存。
曾经烂熳三年著，欲弃空箱似少恩。

卷 447_25【郡中夜听李山人弹三乐】

白居易

风琴秋拂匣，月户夜开关。荣启先生乐，姑苏太守闲。
传声千古后，得意一时间。却怪钟期耳，唯听水与山。

卷 447_26【东城桂三首】

白居易

· 全唐诗 ·

子墮本从天竺寺，根盤今在闔閭城。
當時應逐南風落，落向人間取次生。

霜雪壓多雖不死，荊榛長疾欲相埋。
長忧落在樵人手，賣作蘇州一束柴。

遙知天上桂花孤，試問嫦娥更要無。
月宮幸有閑田地，何不中央種兩株。

卷 447_27【聞行簡恩賜章服，喜成長句寄之】

白居易

吾年五十加朝散，爾亦今年賜服章。齒發恰同知命歲，
官銜俱是客曹郎。榮傳錦帳花聯萼，彩動綾袍雁趁行。
大抵著緋宜老大，莫嫌秋鬢數莖霜。

卷 447_28【喚笙歌】

白居易

露墜菱花槿，風吹敗葉荷。老心歡樂少，秋眼感傷多。
芳歲今如此，衰翁可奈何。猶應不如醉，試遣喚笙歌。

· 全唐诗 ·

卷 447_29 【对酒吟】

白居易

一抛学士笔，三佩使君符。未换银青绶，唯添雪白须。
公门衙退掩，妓席客来铺。履舄从相近，讴吟任所须。
金衔嘶五马，钿带舞双姝。不得当年有，犹胜到老无。
合声歌汉月，齐手拍吴歙。今夜还先醉，应烦红袖扶。

卷 447_30 【偶饮】

白居易

三盏醺醺四体融，妓亭檐下夕阳中。千声方响敲相续，
一曲云和戛未终。今日心情如往日，秋风气味似春风。
唯憎小吏樽前报，道去衙时水五筒。

卷 447_31 【早发赴洞庭舟中作】

白居易

阊门曙色欲苍苍，星月高低宿水光。棹举影摇灯烛动，
舟移声拽管弦长。渐看海树红生日，遥见包山白带霜。
出郭已行十五里，唯消一曲慢霓裳。

· 全唐诗 ·

卷 447_32【宿湖中】

白居易

水天向晚碧沉沉，树影霞光重叠深。浸月冷波千顷练，
苞霜新橘万株金。幸无案牍何妨醉，纵有笙歌不废吟。
十只画船何处宿，洞庭山脚太湖心。

卷 447_33【拣贡橘书情】

白居易

洞庭贡橘拣宜精，太守勤王请自行。珠颗形容随日长，
琼浆气味得霜成。登山敢惜驽骀力，望阙难伸蝼蚁情。
疏贱无由亲跪献，愿凭朱实表丹诚。

卷 447_34【夜泛阳坞入明月湾即事，寄崔湖州】

白居易

湖山处处好淹留，最爱东湾北坞头。掩映橘林千点火，
泓澄潭水一盆油。龙头画舸衔明月，鹊脚红旗蘸碧流。
为报茶山崔太守，与君各是一家游。

· 全唐诗 ·

卷 447_35【泛太湖书事，寄微之】

白居易

烟渚云帆处处通，飘然舟似入虚空。玉杯浅酌巡初匝，
金管徐吹曲未终。黄夹缣林寒有叶，碧琉璃水净无风。
避旗飞鹭翩翻白，惊鼓跳鱼拨刺红。润雪压多松偃蹇，
岩泉滴久石玲珑。书为故事留湖上，吟作新诗寄浙东。
军府威容从道盛，江山气色定知同。报君一事君应羨，
五宿澄波皓月中。

卷 447_36【题新馆】

白居易

曾为白社羁游子，今作朱门醉饱身。十万户州尤觉贵，
二千石禄敢言贫。重裘每念单衣士，兼味尝思旅食人。
新馆寒来多少客，欲回歌酒暖风尘。

卷 447_37【西楼喜雪命宴】

白居易

宿云黄惨澹，晓雪白飘飘。散面遮槐市，堆花压柳桥。

· 全唐诗 ·

四郊铺缟素，万室翫琼瑶。银榼携桑落，金炉上丽谯。
光迎舞妓动，寒近醉人销。歌乐虽盈耳，惭无五袴谣。

卷 447_38【新栽梅】

白居易

池边新种七株梅，欲到花时点检来。
莫怕长洲桃李妒，今年好为使君开。

卷 447_39【酬刘和州戏赠】

白居易

钱唐山水接苏台，两地褰帷愧不才。政事素无争学得，
风情旧有且将来。双蛾解珮啼相送，五马鸣珂笑却回。
不似刘郎无景行，长抛春恨在天台。

卷 447_40【戏和贾常州醉中二绝句】

白居易

闻道毗陵诗酒兴，近来积渐学姑苏。
鼇头新令从偷去，刮骨清吟得似无。

· 全唐诗 ·

越调管吹留客曲，吴吟诗送暖寒杯。
娃宫无限风流事，好遣孙心暂学来。

卷 447_41【岁暮寄微之三首】

白居易

微之别久能无叹，知退书稀岂免愁。甲子百年过半后，
光阴一岁欲终头。池冰晓合胶船底，楼雪晴销露瓦沟。
自觉欢情随日减，苏州心不及杭州。

荣进虽频退亦频，与君才命不调匀。若不九重中掌事，
即须千里外抛身。紫垣南北厅曾对，沧海东西郡又邻。
唯欠结庐嵩洛下，一时归去作闲人。

白头岁暮苦相思，除却悲吟无可为。枕上从妨一夜睡，
灯前读尽十年诗。龙钟校正骑驴日，憔悴通江司马时。
若并如今是全活，纡朱拖紫且开眉。

卷 447_42【岁日家宴戏示弟侄等，兼呈张侍御二十八丈，
殷判官二十三兄】

白居易

弟妹妻孥小侄甥，娇痴弄我助欢情。岁盏后推蓝尾酒，

· 全唐诗 ·

春盘先劝胶牙饴。形骸潦倒虽堪叹，骨肉团圆亦可荣。
犹有夸张少年处，笑呼张丈唤殷兄。

卷 447_43【正月三日闲行】

白居易

黄鹂巷口莺欲语，乌鹊河头冰欲销。
绿浪东西南北水，红栏三百九十桥。

鸳鸯荡漾双双翅，杨柳交加万万条。
借问春风来早晚，只从前日到今朝。

卷 447_44【夜归】

白居易

逐胜移朝宴，留欢放晚衙。宾寮多谢客，骑从半吴娃。
到处销春景，归时及月华。城阴一道直，烛焰两行斜。
东吹先催柳，南霜不杀花。皋桥夜沽酒，灯火是谁家。

卷 447_45【自叹】

白居易

· 全唐诗 ·

岂独年相迫，兼为病所侵。春来痰气动，老去嗽声深。
眼暗犹操笔，头斑未挂簪。因循过日月，真是俗人心。

卷 447_46【郡中闲独，寄微之及崔湖州】

白居易

少年宾旅非吾辈，晚岁簪纓束我身。酒散更无同宿客，
诗成长作独吟人。蘋洲会面知何日，镜水离心又一春。
两处也应相忆在，官高年长少情亲。

卷 447_47【小舫】

白居易

小舫一艘新造了，轻装梁柱庑安篷。深坊静岸游应遍，
浅水低桥去尽通。黄柳影笼随棹月，白蘋香起打头风。
慢牵欲傍樱桃泊，借问谁家花最红。

卷 447_48【马坠强出，赠同座】

白居易

足伤遭马坠，腰重倩人抬。只合窗间卧，何由花下来。

· 全唐诗 ·

坐依桃叶枝，行呷地黄杯。强出非他意，东风落尽梅。

卷 447_49【夜闻贾常州、崔湖州茶山境会，想羡欢宴，因寄此诗】

白居易

遥闻境会茶山夜，珠翠歌钟俱绕身。盘下中分两州界，
灯前合作一家春。青娥递舞应争妙，紫笋齐尝各斗新。
自叹花时北窗下，蒲黄酒对病眠人。

卷 447_50【酬微之开拆新楼初毕相报末联见戏之作】

白居易

海山郁郁石棱棱，新豁高居正好登。南临赡部三千界，
东对蓬宫十二层。报我楼成秋望月，把君诗读夜回灯。
无妨却有他心眼，妆点亭台即不能。

卷 447_51【病中多雨逢寒食】

白居易

水国多阴常懒出，老夫饶病爱闲眠。三旬卧度莺花月，

· 全唐诗 ·

一半春销风雨天。薄暮何人吹鬣策，新晴几处缚秋千。
彩绳芳树长如旧，唯是年年换少年。

卷 447_52【清明夜】

白居易

好风胧月清明夜，碧砌红轩刺史家。
独绕回廊行复歇，遥听弦管暗看花。

卷 447_53【苏州柳】

白居易

金谷园中黄袅娜，曲江亭畔碧婆娑。老来处处游行遍，
不似苏州柳最多。絮扑白头条拂面，使君无计奈春何。

卷 447_54【三月二十八日赠周判官】

白居易

一春惆怅残三日，醉问周郎忆得无。
柳絮送人莺劝酒，去年今日别东都。

· 全唐诗 ·

卷 447_55【偶作】

白居易

红杏初生叶，青梅已缀枝。阑珊花落后，寂寞酒醒时。
坐闷低眉久，行慵举足迟。少年君莫怪，头白自应知。

卷 447_56【重答刘和州】

白居易

分无佳丽敌西施，敢有文章替左司。随分笙歌聊自乐，
等闲篇咏被人知。花边妓引寻香径，月下僧留宿剑池。
可惜当时好风景，吴王应不解吟诗。

卷 447_57【奉送三兄】

白居易

少年曾管二千兵，昼听笙歌夜斫营。自反丘园头尽白，
每逢旗鼓眼犹明。杭州暮醉连床卧，吴郡春游并马行。
自愧阿连官职慢，只教兄作使君兄。

· 全唐诗 ·

卷 447_58 【城上夜宴】

白居易

留春不住登城望，惜夜相将秉烛游。风月万家河两岸，
笙歌一曲郡西楼。诗听越客吟何苦，酒被吴娃劝不休。
从道人生都是梦，梦中欢笑亦胜愁。

卷 447_59 【重题小舫，赠周从事，兼戏微之】

白居易

细篷青篾织鱼鳞，小眼红窗衬麴尘。阔狭才容从事座，
高低恰称使君身。舞筵须拣腰轻女，仙棹难胜骨重人。
不似镜湖廉使出，高樯大艑闹惊春。

卷 447_60 【吴樱桃】

白居易

含桃最说出东吴，香色鲜秾气味殊。恰恰举头千万颗，
婆娑拂面两三株。鸟偷飞处衔将火，人摘争时蹋破珠。
可惜风吹兼雨打，明朝后日即应无。

· 全唐诗 ·

卷 447_61【春尽劝客酒】

白居易

林下春将尽，池边日半斜。樱桃落砌颗，夜合隔帘花。
尝酒留闲客，行茶使小娃。残杯劝不饮，留醉向谁家。

卷 447_62【仲夏斋居，偶题八韵，寄微之及崔湖州】

白居易

腥血与荤蔬，停来一月馀。肌肤虽瘦损，方寸任清虚。
体适通宵坐，头慵隔日梳。眼前无俗物，身外即僧居。
水榭风来远，松廊雨过初。褰帘放巢燕，投食施池鱼。
久别闲游伴，频劳问疾书。不知湖与越，吏隐兴何如。

卷 447_63【官宅】

白居易

红紫共纷纷，祇承老使君。移舟木兰棹，行酒石榴裙。
水色窗窗见，花香院院闻。恋他官舍住，双鬓白如云。

· 全唐诗 ·

卷 447_64【六月三日夜闻蝉】

白居易

荷香清露坠，柳动好风生。微月初三夜，新蝉第一声。
乍闻愁北客，静听忆东京。我有竹林宅，别来蝉再鸣。
不知池上月，谁拨小船行。

卷 447_65【莲石】

白居易

青石一两片，白莲三四枝。寄将东洛去，心与物相随。
石倚风前树，莲栽月下池。遥知安置处，预想发荣时。
领郡来何远，还乡去已迟。莫言千里别，岁晚有心期。

卷 447_66【眼病二首】

白居易

散乱空中千片雪，蒙笼物上一重纱。纵逢晴景如看雾，
不是春天亦见花。僧说客尘来眼界，医言风眩在肝家。
两头治疗何曾瘥，药力微茫佛力赊。

· 全唐诗 ·

眼藏损伤来已久，病根牢固去应难。医师尽劝先停酒，
道侣多教早罢官。案上谩铺龙树论，盒中虚撚决明丸。
人间方药应无益，争得金篦试刮看。

卷 447_67【题东武丘寺六韵】

白居易

香刹看非远，祇园入始深。龙蟠松矫矫，玉立竹森森。
怪石千僧坐，灵池一剑沉。海当亭两面，山在寺中心。
酒熟凭花劝，诗成倩鸟吟。寄言轩冕客，此地好抽簪。

卷 447_68【夜游西武丘寺八韵】

白居易

不厌西丘寺，闲来即一过。舟船转云岛，楼阁出烟萝。
路入青松影，门临白月波。鱼跳惊秉烛，猿觑怪鸣珂。
摇曳双红旆，娉婷十翠娥。香花助罗绮，钟梵避笙歌。
领郡时将久，游山数几何。一年十二度，非少亦非多。

卷 447_69【咏怀】

白居易

· 全唐诗 ·

苏杭自昔称名郡，牧守当今当好官。两地江山蹋得遍，
五年风月咏将残。几时酒醖曾抛却，何处花枝不把看。
白发满头归得也，诗情酒兴渐阑珊。

卷 447_70【重咏】

白居易

日觉双眸暗，年惊两鬓苍。病应无处避，老更不宜忙。
徇俗心情少，休官道理长。今秋归去定，何必重思量。

卷 447_71【百日假满】

白居易

心中久有归田计，身上都无济世才。长告初从百日满，
故乡元约一年回。马辞辕下头高举，鹤出笼中翅大开。
但拂衣行莫回顾，的无官职趁人来。

卷 447_72【九日寄微之】

白居易

眼闇头风事事妨，绕篱新菊为谁黄。闲游日久心慵倦，

· 全唐诗 ·

痛饮年深肺损伤。吴郡两回逢九月，越州四度见重阳。
怕飞杯酒多分数，厌听笙歌旧曲章。蟋蟀声寒初过雨，
茱萸色浅未经霜。去秋共数登高会，又被今年减一场。

卷 447_73【题报恩寺】

白居易

好是清凉地，都无系绊身。晚晴宜野寺，秋景属闲人。
净石堪敷坐，寒泉可濯巾。自惭容鬓上，犹带郡庭尘。

卷 447_74【晚起】

白居易

卧听冬冬衙鼓声，起迟睡足长心情。华簪脱后头虽白，
堆案抛来眼校明。闲上篮舆乘兴出，醉回花舫信风行。
明朝更濯尘缨去，闻道松江水最清。

卷 447_75【自思益寺次楞伽寺作】

白居易

朝从思益峰游后，晚到楞伽寺歇时。照水姿容虽已老，

· 全唐诗 ·

上山筋力未全衰。行逢禅客多相问，坐倚渔舟一自思，
犹去悬车十五载，休官非早亦非迟。

卷 447_76【松江亭携乐观渔宴宿】

白居易

震泽平芜岸，松江落叶波。在官常梦想，为客始经过。
水面排罾网，船头簇绮罗。朝盘鲙红鲤，夜烛舞青娥。
雁断知风急，潮平见月多。繁丝与促管，不解和渔歌。

卷 447_77【宿灵岩寺上院】

白居易

高高白月上青林，客去僧归独夜深。荤血屏除唯对酒，
歌钟放散只留琴。更无俗物当人眼，但有泉声洗我心。
最爱晓亭东望好，太湖烟水绿沉沉。

卷 447_78【酬别周从事二首】

白居易

腰痛拜迎人客倦，眼昏勾押簿书难。

· 全唐诗 ·

辞官归去缘衰病，莫作陶潜范蠡看。

洛下田园久抛掷，吴中歌酒莫留连。
嵩阳云树伊川月，已校归迟四五年。

卷 447_79【武丘寺路】

白居易

自开山寺路，水陆往来频。银勒牵骄马，花船载丽人。
芰荷生欲遍，桃李种仍新。好住湖堤上，长留一道春。

卷 447_80【齐云楼晚望偶题十韵兼呈冯侍御，周、殷二协律】

白居易

潦倒宦情尽，萧条芳岁阑。欲辞南国去，重上北城看。
复叠江山壮，平铺井邑宽。人稠过杨府，坊闹半长安。
插雾峰头没，穿霞日脚残。水光红漾漾，树色绿漫漫。
约略留遗爱，殷勤念旧欢。病抛官职易，老别友情难。
九月全无热，西风亦未寒。齐云楼北面，半日凭栏干。

卷 447_81【河亭晴望】

· 全唐诗 ·

白居易

风转云头敛，烟销水面开。晴虹桥影出，秋雁橹声来。
郡静官初罢，乡遥信未回。明朝是重九，谁劝菊花杯。

卷 447_82【留别微之】

白居易

干时久与本心违，悟道深知前事非。犹厌劳形辞郡印，
那将趁伴著朝衣。五千言里教知足，三百篇中劝式微。
少室云边伊水畔，比君校老合先归。

卷 447_83【自喜】

白居易

自喜天教我少缘，家徒行计两翩翩。身兼妻子都三口，
鹤与琴书共一船。僮仆减来无冗食，资粮算外有余钱。
携将贮作丘中费，犹免饥寒得数年。

卷 447_84【武丘寺路宴留别诸妓】

白居易

· 全唐诗 ·

银泥裙映锦障泥，画舸停桡马簇蹄。清管曲终鹦鹉语，
红旗影动泼汗嘶。渐消醉色朱颜浅，欲语离情翠黛低。
莫忘使君吟咏处，女坟湖北武丘西。

卷 447_85【江上对酒二首】

白居易

酒助疏顽性，琴资缓慢情。有慵将送老，无智可劳生。
忽忽忘机坐，恹恹任运行。家乡安处是，那独在神京。

久贮沧浪意，初辞桎梏身。昏昏常带酒，默默不应人。
坐稳便箕踞，眠多爱欠伸。客来存礼数，始著白纶巾。

卷 447_86【望亭驿酬别周判官】

白居易

何事出长洲，连宵饮不休。醒应难作别，欢渐少于愁。
灯火穿村市，笙歌上驿楼。何言五十里，已不属苏州。

卷 447_87【见小侄龟儿咏灯诗并腊娘制衣，因寄行简】

白居易

· 全唐诗 ·

已知腊子能裁服，复报龟儿解咏灯。
巧妇才人常薄命，莫教男女苦多能。

卷 447_88【酒筵上答张居士】

白居易

但要前尘减，无妨外相同。虽过酒肆上，不离道场中。
弦管声非实，花钿色是空。何人知此义，唯有净名翁。

卷 447_89【鹦鹉】

白居易

陇西鹦鹉到江东，养得经年觜渐红。常恐思归先剪翅，
每因喂食暂开笼。人怜巧语情虽重，鸟忆高飞意不同。
应似朱门歌舞妓，深藏牢闭后房中。

卷 447_90【听琵琶妓弹略略】

白居易

腕软拨头轻，新教略略成。四弦千遍语，一曲万重情。
法向师边得，能从意上生。莫欺江外手，别是一家声。

· 全唐诗 ·

卷 447_91【写新诗寄微之，偶题卷后】

白居易

写了吟看满卷愁，浅红笺纸小银钩。
未容寄与微之去，已被人传到越州。

卷 447_92【宝历二年八月三十日夜梦后作】

白居易

尘缨忽解诚堪喜，世网重来未可知。
莫忘全吴馆中梦，岭南泥雨步行时。

卷 447_93【与梦得同登栖灵塔】

白居易

半月悠悠在广陵，何楼何塔不同登。
共怜筋力犹堪在，上到栖灵第九层。

卷 447_94【梦苏州水阁，寄冯侍御】

· 全唐诗 ·

白居易

扬州驿里梦苏州，梦到花桥水阁头。
觉后不知冯侍御，此中昨夜共谁游。

卷 447_95【喜罢郡】

白居易

五年两郡亦堪嗟，偷出游山走看花。自此光阴为己有，
从前日月属官家。樽前免被催迎使，枕上休闻报坐衙。
睡到午时欢到夜，回看官职是泥沙。

卷 447_96【答次休上人】

白居易

姓白使君无丽句，名休座主有新文。
禅心不合生分别，莫爱余霞嫌碧云。

· 全唐诗 ·

第四百四十八卷

卷 448_1【感悟妄缘，题如上人壁】

白居易

自从为駉童，直至作衰翁。所好随年异，为忙终日同。
弄沙成佛塔，锵玉谒王宫。彼此皆儿戏，须臾即色空。
有营非了义，无著是真宗。兼恐勤修道，犹应在妄中。

卷 448_2【思子台有感二首】

白居易

曾家机上闻投杼，尹氏园中见掇蜂。
但以恩情生隙罅，何人不解作江充。

闇生魑魅蠹生虫，何异谗生疑阻中。
但使武皇心似烛，江充不敢作江充。

卷 448_3【赋得边城角】

· 全唐诗 ·

白居易

边角两三枝，霜天陇上儿。望乡相并立，向月一时吹。
战马头皆举，征人手尽垂。呜呜三奏罢，城上展旌旗。

卷 448_4【忆洛中所居】

白居易

忽忆东都宅，春来事宛然。雪销行径里，水上卧房前。
厌绿栽黄竹，嫌红种白莲。醉教莺送酒，闲遣鹤看船。
幸是林园主，惭为食禄牵。宦情薄似纸，乡思争于弦。
岂合姑苏守，归休更待年。

卷 448_5【想归田园】

白居易

恋他朝市求何事，想取丘园乐此身。千首恶诗吟过日，
一壶好酒醉消春。归乡年亦非全老，罢郡家仍未苦贫。
快活不知如我者，人间能有几人。

卷 448_6【琴茶】

· 全唐诗 ·

白居易

兀兀寄形群动内，陶陶任性一生间。自抛官后春多醉，
不读书来老更闲。琴里知闻唯绿水，茶中故旧是蒙山。
穷通行止长相伴，谁道吾今无往还。

卷 448_7【赠楚州郭使君】

白居易

淮水东南第一州，山围雉堞月当楼。黄金印绶悬腰底，
白雪歌诗落笔头。笑看儿童骑竹马，醉携宾客上仙舟。
当家美事堆身上，何啻林宗与细侯。

卷 448_8【和郭使君题枸杞】

白居易

山阳太守政严明，吏静人安无犬惊。
不知灵药根成狗，怪得时闻吠夜声。

卷 448_9【初到洛下闲游】

白居易

· 全唐诗 ·

汉庭重少身宜退，洛下闲居迹可逃。趁伴入朝应老丑，
寻春放醉尚粗豪。诗携彩纸新装卷，酒典绯花旧赐袍。
曾在东方千骑上，至今躑躅马头高。

卷 448_10【醉赠刘二十八使君】

白居易

为我引杯添酒饮，与君把箸击盘歌。诗称国手徒为尔，
命压人头不奈何。举眼风光长寂寞，满朝官职独蹉跎。
亦知合被才名折，二十三年折太多。

卷 448_11【太湖石】

白居易

烟翠三秋色，波涛万古痕。削成青玉片，截断碧云根。
风气通岩穴，苔文护洞门。三峰具体小，应是华山孙。

卷 448_12【过敷水】

白居易

垂鞭欲渡罗敷水，处分鸣驺且缓驱。秦氏双蛾久冥漠，

· 全唐诗 ·

苏台五马尚踟蹰。村童店女仰头笑，今日使君真是愚。

卷 448_13【南院】

白居易

林院无情绪，经春不一开。杨花飞作穗，榆荚落成堆。
壮气从中减，流年逐后催。只应如过客，病去老迎来。

卷 448_14【闲咏】

白居易

步月怜清景，眠松爱绿阴。早年诗思苦，晚岁道情深。
夜学禅多坐，秋牵兴暂吟。悠然两事外，无处更留心。

卷 448_15【初授秘监，拜赐金紫，闲吟小酌，偶写所怀】

白居易

紫袍新秘监，白首旧书生。鬓雪人间寿，腰金世上荣。
子孙无可念，产业不能营。酒引眼前兴，诗留身后名。
闲倾三数酌，醉咏十余声。便是羲皇代，先从心太平。

· 全唐诗 ·

卷 448_16 【新昌闲居，招杨郎中兄弟】

白居易

纱巾角枕病眠翁，忙少闲多谁与同。但有双松当砌下，
更无一事到心中。金章紫绶堪如梦，皂盖朱轮别似空。
暑月贫家何所有，客来唯赠北窗风。

卷 448_17 【秘省后厅】

白居易

槐花雨润新秋地，桐叶风翻欲夜天。
尽日后厅无一事，白头老监枕书眠。

卷 448_18 【松斋偶兴】

白居易

置心思虑外，灭迹是非间。约俸为生计，随官换往还。
耳烦闻晓角，眼醒见秋山。赖此松檐下，朝回半日闲。

卷 448_19 【和杨郎中贺杨仆射致仕后杨侍郎门生合宴席上

· 全唐诗 ·

作】

白居易

业重关西继大名，恩深阙下遂高情。祥鳣降伴趋庭鲤，
贺燕飞和出谷莺。范蠡舟中无子弟，疏家席上欠门生。
可怜玉树连桃李，从古无如此会荣。

卷 448_20 【松下琴赠客】

白居易

松寂风初定，琴清夜欲阑。偶因群动息，试拨一声看。
寡鹤当徽怨，秋泉应指寒。惭君此倾听，本不为君弹。

卷 448_21 【秋斋】

白居易

晨起秋斋冷，萧条称病容。清风两窗竹，白露一庭松。
阮籍谋身拙，嵇康向事慵。生涯别有处，浩气在心胸。

卷 448_22 【涂山寺独游】

· 全唐诗 ·

白居易

野径行无伴，僧房宿有期。涂山来去熟，唯是马蹄知。

卷 448_23【登观音台望城】

白居易

百千家似围棋局，十二街如种菜畦。
遥认微微入朝火，一条星宿五门西。

卷 448_24【登灵应台北望】

白居易

临高始见人寰小，对远方知色界空。
回首却归朝市去，一稊米落太仓中。

卷 448_25【酬裴相公题兴化小池见招长句】

白居易

为爱小塘招散客，不嫌老监与新诗。山公倒载无妨学，
范蠡扁舟未要追。蓬断偶飘桃李径，鸥惊误拂凤凰池。

· 全唐诗 ·

敢辞课拙酬高韵，一勺争禁万顷陂。

卷 448_26 【闲行】

白居易

五十年来思虑熟，忙人应未胜闲人。林园傲逸真成贵，
衣食单疏不是贫。专掌图书无过地，遍寻山水自由身。
倘年七十犹强健，尚得闲行十五春。

卷 448_27 【闲出】

白居易

兀兀出门何处去，新昌街晚树阴斜。
马蹄知意缘行熟，不向杨家即庾家。

卷 448_28 【与僧智如夜话】

白居易

懒钝尤知命，幽栖渐得朋。门闲无谒客，室静有禅僧。
炉向初冬火，笼停半夜灯。忧劳缘智巧，自喜百无能。

· 全唐诗 ·

卷 448_29 【忆庐山旧隐及洛下新居】

白居易

形骸黽勉班行内，骨肉句留俸禄中。无奈攀缘随手长，
亦知恩爱到头空。草堂久闭庐山下，竹院新抛洛水东。
自是未能归去得，世间谁要白须翁。

卷 448_30 【晚寒】

白居易

急景流如箭，凄风利似刀。暝催鸡翅敛，寒束树枝高。
缩水浓和酒，加绵厚絮袍。可怜冬计毕，暖卧醉陶陶。

卷 448_31 【偶眠】

白居易

放杯书案上，枕臂火炉前。老爱寻思事，慵多取次眠。
妻教卸乌帽，婢与展青毡。便是屏风样，何劳画古贤。

卷 448_32 【华城西北雉堞最高，崔相公首创楼台，钱左丞

· 全唐诗 ·

继种花果，合为胜境，题在雅篇，岁暮独游，怅然成咏】

白居易

高居称君子，潇洒四无邻。丞相栋梁久，使君桃李新。
凝情看丽句，驻步想清尘。况是寒天客，楼空无主人。

卷 448_33【奉使途中，戏赠张常侍】

白居易

早风吹土满长衢，驿骑星轺尽疾驱。
共笑篮舁亦称使，日驰一驿向东都。

卷 448_34【有小白马乘驭多时，奉使东行至稠桑驿，溘然而毙，足可惊伤，不能忘情，题二十韵】

白居易

能骤复能驰，翩翩白马儿。毛寒一团雪，鬃薄万条丝。
皂盖春行日，骊驹晓从时。双旌前独步，五马内偏骑。
芳草承蹄叶，垂杨拂顶枝。跨将迎好客，惜不换妖姬。
慢鞚游萧寺，闲驱醉习池。睡来乘作梦，兴发倚成诗。
鞭为驯难下，鞍缘稳不离。北归还共到，东使亦相随。

· 全唐诗 ·

赭白何曾变，玄黄岂得知。嘶风觉声急，踏雪怪行迟。
昨夜犹刍秣，今朝尚絷维。卧槽应不起，顾主遂长辞。
尘灭駸駸迹，霜留皎皎姿。度关形未改，过隙影难追。
念倍燕求骏，情深项别骅。银收钩臆带，金卸络头羁。
何处理奇骨，谁家觅弊帷。稠桑驿门外，吟罢涕双垂。

卷 448_35 【题喷玉泉】

白居易

泉喷声如玉，潭澄色似空。练垂青嶂上，珠泻绿盆中。
溜滴三秋雨，寒生六月风。何时此岩下，来作濯缨翁。

卷 448_36 【酬皇甫宾客】

白居易

闲官兼慢使，著处易停轮。况欲逢新岁，仍初见故人。
冒寒寻到洛，待暖始归秦。亦拟同携手，城东略看春。

卷 448_37 【种白莲】

白居易

· 全唐诗 ·

吴中白藕洛中栽，莫恋江南花懒开。
万里携归尔知否，红蕉朱槿不将来。

卷 448_38【答苏庶子】

白居易

偶作关东使，重陪洛下游。病来从断酒，老去可禁愁。
款曲偏青眼，蹉跎各白头。蓬山闲气味，依约似龙楼。

卷 448_39【答尉迟少监水阁重宴】

白居易

人情依旧岁华新，今日重招往日宾。鸡黍重回千里驾，
林园闇换四年春。水轩平写琉璃镜，草岸斜铺翡翠茵。
闻道经营费心力，忍教成后属他人。

卷 448_40【和刘郎中伤鄂姬】

白居易

不独君嗟我亦嗟，西风北雪杀南花。
不知月夜魂归处，鹦鹉洲头第几家。

· 全唐诗 ·

卷 448_41【赠东邻王十三】

白居易

携手池边月，开襟竹下风。驱愁知酒力，破睡见茶功。
居处东西接，年颜老少同。能来为伴否，伊上作渔翁。

卷 448_42【早春同刘郎中寄宣武令狐相公】

白居易

梁园不到一年强，遥想清吟对绿觞。更有何人能饮酌，
新添几卷好篇章。马头拂柳时回辔，豹尾穿花暂亚枪。
谁引相公开口笑，不逢白监与刘郎。

卷 448_43【寄太原李相公】

白居易

闻道北都今一变，政和军乐万人安。绮罗二八围宾榻，
组练三千夹将坛。蝉鬓应夸丞相少，貂裘不觉太原寒。
世间大有虚荣贵，百岁无君一日欢。

· 全唐诗 ·

卷 448_44 【雪中寄令狐相公，兼呈梦得】

白居易

兔园春雪梁王会，想对金罍咏玉尘。
今日相如身在此，不知客右坐何人。

卷 448_45 【出使在途，所骑马死，改乘肩舆，将归长安，
偶咏旅怀，寄太原李相公】

白居易

驿路崎岖泥雪寒，欲登篮舆一长叹。风光不见桃花骑，
尘土空留杏叶鞍。丧乘独归殊不易，脱骖相赠岂为难。
并州好马应无数，不怕旌旄试觅看。

卷 448_46 【有双鹤留在洛中，忽见刘郎中依然鸣顾，刘因
为鹤叹二篇寄予，予以二绝句答之】

白居易

辞乡远隔华亭水，逐我来栖缑岭云。
惭愧稻粱长不饱，未曾回眼向鸡群。

· 全唐诗 ·

荒草院中池水畔，衔恩不去又经春。
见君惊喜双回顾，应为吟声似主人。

卷 448_47 【宿窦使君庄水亭】

白居易

使君何在在江东，池柳初黄杏欲红。
有兴即来闲便宿，不知谁是主人翁。

卷 448_48 【龙门下作】

白居易

龙门涧下濯尘缨，拟作闲人过此生。
筋力不将诸处用，登山临水咏诗行。

卷 448_49 【姚侍御见过，戏赠】

白居易

晚起春寒慵裹头，客来池上偶同游。
东台御史多提举，莫按金章系布裘。

· 全唐诗 ·

卷 448_50 【履道春居】

白居易

微雨洒园林，新晴好一寻。低风洗池面，斜日拆花心。
暝助岚阴重，春添水色深。不如陶省事，犹抱有弦琴。

卷 448_51 【题洛中第宅】

白居易

水木谁家宅，门高占地宽。悬鱼挂青甃，行马护朱栏。
春榭笼烟暖，秋庭锁月寒。松胶黏琥珀，筠粉扑琅玕。
试问池台主，多为将相官。终身不曾到，唯展宅图看。

卷 448_52 【寄殷协律】

白居易

五岁优游同过日，一朝消散似浮云。琴诗酒伴皆抛我，
雪月花时最忆君。几度听鸡歌白日，亦曾骑马咏红裙。
吴娘暮雨萧萧曲，自别江南更不闻。

· 全唐诗 ·

卷 448_53【洛下诸客就宅相送，偶题西亭】

白居易

几榻临池坐，轩车冒雪过。交亲致杯酒，僮仆解笙歌。
流岁行将晚，浮荣得几多。林泉应问我，不住意如何。

卷 448_54【答林泉】

白居易

好住旧林泉，回头一怅然。渐知吾潦倒，深愧尔留连。
欲作栖云计，须营种黍钱。更容求一郡，不得亦归田。

卷 448_55【将发洛中，枉令狐相公手札，兼辱二篇宠行，以长句答之】

白居易

尺素忽惊来梓泽，双金不惜送蓬山。八行落泊飞云雨，
五字枪鏠动珮环。玉韵乍听堪醒酒，银钩细读当披颜。
收藏便作终身宝，何啻三年怀袖间。

· 全唐诗 ·

卷 448_56 【临都驿答梦得六言二首】

白居易

扬子津头月下，临都驿里灯前。
昨日老于前日，去年春似今年。

谢守归为秘监，冯公老作郎官。
前事不须问著，新诗且更吟看。

卷 448_57 【喜钱左丞再除华州，以诗伸贺】

白居易

左辖辍中台，门东委上才。彤襜经宿到，绛帐及春开。
民望恳难夺，天心慈易回。那知不隔岁，重借寇恂来。

卷 448_58 【和钱华州题少华清光绝句】

白居易

高情雅韵三峰守，主领清光管白云。
自笑亦曾为刺史，苏州肥膩不如君。

· 全唐诗 ·

卷 448_59【送陕府王大夫】

白居易

金马门前回剑珮，铁牛城下拥旌旗。
他时万一为交代，留取甘棠三两枝。

卷 448_60【代迎春花招刘郎中】

白居易

幸与松筠相近栽，不随桃李一时开。
杏园岂敢妨君去，未有花时且看来。

卷 448_61【玩迎春花赠杨郎中】

白居易

金英翠萼带春寒，黄色花中有几般。
恁君与向游人道，莫作蔓菁花眼看。

卷 448_62【闲出】

· 全唐诗 ·

白居易

身外无羁束，心中少是非。被花留便住，逢酒醉方归。
人事行时少，官曹入日稀。春寒游正好，稳马薄绵衣。

卷 448_63【座上赠卢判官】

白居易

把酒承花花落频，花香酒味相和春。
莫言不是江南会，虚白亭中旧主人。

卷 448_64【曲江有感】

白居易

曲江西岸又春风，万树花前一老翁。
遇酒逢花还且醉，若论惆怅事何穷。

卷 448_65【杏园花下赠刘郎中】

白居易

怪君把酒偏惆怅，曾是贞元花下人。

· 全唐诗 ·

自别花来多少事，东风二十四回春。

卷 448_66 【花前有感，兼呈崔相公、刘郎中】

白居易

落花如雪鬓如霜，醉把花看益自伤。少日为名多检束，
长年无兴可颠狂。四时轮转春常少，百刻支分夜苦长。
何事同生壬子岁，老于崔相及刘郎。

卷 448_67 【微之就拜尚书，居易续除刑部，因书贺意，兼咏离怀】

白居易

我为宪部入南宫，君作尚书镇浙东。老去一时成白首，
别来七度换春风。簪纓假合虚名在，筋力销磨实事空。
远地官高亲故少，些些谈笑与谁同。

卷 448_68 【喜与韦左丞同入南省，因叙旧以赠之】

白居易

早年同遇陶钧主，利钝精粗共在熔。金剑淬来长透匣，

· 全唐诗 ·

铅刀磨尽不成锋。差肩北省惭非据，接武南宫幸再容。
跛鳖虽迟骐驎疾，何妨中路亦相逢。

卷 448_69【伊州】

白居易

老去将何散老愁，新教小玉唱伊州。
亦应不得多年听，未教成时已白头。

卷 448_70【早朝】

白居易

鼓动出新昌，鸡鸣赴建章。翩翩稳鞍马，楚楚健衣裳。
宫漏传残夜，城阴送早凉。月堤槐露气，风烛桦烟香。
双阙龙相对，千官雁一行。汉庭方尚少，惭叹鬓如霜。

卷 448_71【答裴相公乞鹤】

白居易

警露声音好，冲天相貌殊。终宜向辽廓，不称在泥涂。
白首劳为伴，朱门幸见呼。不知疏野性，解爱凤池无。

· 全唐诗 ·

卷 448_72【晚从省归】

白居易

朝回北阙值清晨，晚出南宫送暮春。入去丞郎非散秩，
归来诗酒是闲人。犹思泉石多成梦，尚叹簪裾未离身。
终是不如山下去，心头眼底两无尘。

卷 448_73【北窗闲坐】

白居易

虚窗两丛竹，静室一炉香。门外红尘合，城中白日忙。
无烦寻道士，不要学仙方。自有延年术，心闲岁月长。

卷 448_74【酬严给事】

白居易

羸女偷乘风去时，洞中潜歇弄琼枝。
不缘啼鸟春饶舌，青琐仙郎可得知。

卷 448_75【京路】

· 全唐诗 ·

白居易

西来为看秦山雪，东去缘寻洛苑春。
来去腾腾两京路，闲行除我更无人。

卷 448_76【华州西】

白居易

每逢人静慵多歇，不计程行困即眠。
上得篮舆未能去，春风敷水店门前。

卷 448_77【从陕至东京】

白居易

从陕至东京，山低路渐平。风光四百里，车马十三程。
花共垂鞭看，杯多并辔倾。笙歌与谈笑，随分自将行。

卷 448_78【送春】

白居易

银花凿落从君劝，金屑琵琶为我弹。

· 全唐诗 ·

不独送春兼送老，更尝一着更听看。

卷 448_79【宿杜曲花下】

白居易

觅得花千树，携来酒一壶。懒归兼拟宿，未醉岂劳扶。
但惜春将晚，宁愁日渐晡。篮舆为卧舍，漆盞是行厨。
斑竹盛茶柜，红泥煖饭炉。眼前无所阙，身外更何须。
小面琵琶婢，苍头觔策奴。从君饱富贵，曾作此游无。

卷 448_80【逢旧】

白居易

久别偶相逢，俱疑是梦中。即今欢乐事，放醖又成空。

卷 448_81【绣妇叹】

白居易

连枝花样绣罗襦，本拟新年饷小姑。自觉逢春饶怅望，
谁能每日趁功夫。针头不解愁眉结，线缕难穿泪脸珠。
虽凭绣床都不绣，同床绣伴得知无。

· 全唐诗 ·

卷 448_82【春词】

白居易

低花树映小妆楼，春入眉心两点愁。
斜倚栏杆背鹦鹉，思量何事不回头。

卷 448_83【恨词】

白居易

翠黛眉低敛，红珠泪暗销。从来恨人意，不省似今朝。

卷 448_84【山石榴花十二韵】

白居易

晔晔复煌煌，花中无比方。艳天宜小院，条短称低廊。
本是山头物，今为砌下芳。千丛相向背，万朵互低昂。
照灼连朱槛，玲珑映粉墙。风来添意态，日出助晶光。
渐绽胭脂萼，犹含琴轸房。离披乱剪彩，斑驳未匀妆。
绛焰灯千炷，红裙妓一行。此时逢国色，何处觅天香。
恐合栽金阙，思将献玉皇。好差青鸟使，封作百花王。

· 全唐诗 ·

卷 448_85 【送敏中归豳宁幕】

白居易

六十衰翁儿女悲，傍人应笑尔应知。弟兄垂老相逢日，
杯酒临欢欲散时。前路加餐须努力，今宵尽醉莫推辞。
司徒知我难为别，直过秋归未讶迟。

卷 448_86 【宴散】

白居易

小宴追凉散，平桥步月回。笙歌归院落，灯火下楼台。
残暑蝉催尽，新秋雁带来。将何迎睡兴，临卧举残杯。

卷 448_87 【人定】

白居易

人定月胧明，香消枕簟清。翠屏遮烛影，红袖下帘声。
坐久吟方罢，眠初梦未成。谁家教鹦鹉，故故语相惊。

卷 448_88 【池上】

· 全唐诗 ·

白居易

袅袅凉风动，凄凄寒露零。兰衰花始白，荷破叶犹青。
独立栖沙鹤，双飞照水萤。若为寥落境，仍值酒初醒。

卷 448_89【池窗】

白居易

池晚莲芳谢，窗秋竹意深。更无人作伴，唯对一张琴。

卷 448_90【花酒】

白居易

香醅浅酌浮如蚁，雪鬓新梳薄似蝉。
为报洛城花酒道，莫辞送老二三年。

卷 448_91【题崔常侍济源庄】

白居易

谷口谁家住，云扃锁竹泉。主人何处去，萝薜换貂蝉。
籍在金闺内，班排玉宸前。诚知忆山水，归得是何年。

· 全唐诗 ·

卷 448_92【认春戏呈冯少尹、李郎中、陈主簿】

白居易

认得春风先到处，西园南面水东头。柳初变后条犹重，
花未开时枝已稠。闇助醉欢寻绿酒，潜添睡兴著红楼。
知君未别阳和意，直待春深始拟游。

卷 448_93【魏堤有怀】

白居易

魏王堤下水，声似使君滩。惆怅回头听，踟蹰立马看。
荡风波眼急，翻雪浪心寒。忆得瞿唐事，重吟行路难。

卷 448_94【柘枝词】

白居易

柳闇长廊合，花深小院开。苍头铺锦褥，皓腕捧银杯。
绣帽珠稠缀，香衫袖窄裁。将军拄毬杖，看按枯枝来。

卷 448_95【代梦得吟】

· 全唐诗 ·

白居易

后来变化三分贵，同辈凋零太半无。世上争先从尽汝，
人间斗在不如吾。竿头已到应难久，局势虽迟未必输。
不见山苗与林叶，迎春先绿亦先枯。

卷 448_96【寄答周协律】

白居易

故人叙旧寄新篇，惆怅江南到眼前。闇想楼台万余里，
不闻歌吹一周年。桥头谁更看新月，池畔犹应泊旧船。
最忆后庭杯酒散，红屏风掩绿窗眠。

· 全唐诗 ·

第四百四十九卷

卷 449_1【太和戊申岁大有年，诏赐百寮出城观稼，谨书盛事，以俟采诗】

白居易

清晨承诏命，丰岁阅田闾。膏雨抽苗足，凉风吐穗初。
早禾黄错落，晚稻绿扶疏。好入诗家咏，宜令史馆书。
散为万姓食，堆作九年储。莫道如云稼，今秋云不如。

卷 449_2【赠悼怀太子挽歌辞二首】

白居易

竹马书薨岁，铜龙表葬时。永言窀穸事，全用少阳仪。
寿夭由天命，哀荣出圣慈。恭闻褒赠诏，軫念在与夷。

剪叶藩封早，承华册命尊。笙歌辞洛苑，风雪蔽梁园。
卤簿凌霜宿，铭旌向月翻。宫寮不逮事，哭送出都门。

· 全唐诗 ·

卷 449_3【雨中招张司业宿】

白居易

过夏衣香润，迎秋簟色鲜。斜支花石枕，卧咏蕊珠篇。
泥汭非游日，阴沉好睡天。能来同宿否，听雨对床眠。

卷 449_4【和集贤刘学士早朝作】

白居易

吟君昨日早朝诗，金御炉前唤仗时。烟吐白龙头宛转，
扇开青雉尾参差。暂留春殿多称屈，合入纶闾即可知。
从此摩霄去非晚，鬓边未有一茎丝。

卷 449_5【送陕州王司马建赴任】

白居易

陕州司马去何如，养静资贫两有余。公事闲忙同少尹，
料钱多少敌尚书。只携美酒为行伴，唯作新诗趁下车。
自有铁牛无咏者，料君投刃必应虚。

· 全唐诗 ·

卷 449_6【对琴待月】

白居易

竹院新晴夜，松窗未卧时。共琴为老伴，与月有秋期。
玉轸临风久，金波出雾迟。幽音待清景，唯是我心知。

卷 449_7【杨家南亭】

白居易

小亭门向月斜开，满地凉风满地苔。
此院好弹秋思处，终须一夜抱琴来。

卷 449_8【早寒】

白居易

黄叶聚墙角，青苔围柱根。被经霜后薄，镜遇雨来昏。
半卷寒檐幕，斜开暖阁门。迎冬兼送老，只仰酒盈尊。

卷 449_9【斋月静居】

· 全唐诗 ·

白居易

病来心静一无思，老去身闲百不为。忽忽眼尘犹爱睡，
些些口业尚夸诗。荤腥每断斋居月，香火常亲宴坐时。
万虑消停百神泰，唯应寂寞杀三尸。

卷 449_10【宿裴相公兴化池亭】

白居易

林亭一出宿风尘，忘却平津是要津。松阁晴看山色近，
石渠秋放水声新。孙弘阁闹无闲客，傅说舟忙不借人。
何似抡才济川外，别开池馆待交亲。

卷 449_11【和刘郎中望终南山秋雪】

白居易

遍览古今集，都无秋雪诗。阳春先唱后，阴岭未消时。
草讶霜凝重，松疑鹤散迟。清光莫独占，亦对白云司。

卷 449_12【广府胡尚书频寄诗，因答绝句】

白居易

· 全唐诗 ·

尚书清白临南海，虽饮贪泉心不回。
唯向诗中得珠玉，时时寄到帝乡来。

卷 449_13【送鹤与裴相临别赠诗】

白居易

司空爱尔尔须知，不信听吟送鹤诗。羽翮势高宁惜别，
稻粱恩厚莫愁饥。夜栖少共鸡争树，晓浴先饶凤占池。
稳上青云勿回顾，的应胜在白家时。

卷 449_14【令狐相公拜尚书后有喜从镇归朝之作，刘郎中
先和，因以继之】

白居易

车骑新从梁苑回，履声珮响入中台。凤池望在终重去，
龙节功成且纳来。金勒最宜乘雪出，玉觞何必待花开。
尚书首唱郎中和，不计官资只计才。

卷 449_15【送河南尹冯学士赴任】

白居易

· 全唐诗 ·

石渠金谷中间路，轩骑翩翩十日程。清洛饮冰添苦节，
碧嵩看雪助高情。谩夸河北操旌钺，莫羨江西拥旆旌。
何似府寮京令外，别教三十六峰迎。

卷 449_16【读鄂公传】

白居易

高卧深居不见人，功名斗薮似灰尘。
唯留一部清商乐，月下风前伴老身。

卷 449_17【乌夜啼】

白居易

城上归时晚，庭前宿处危。月明无叶树，霜滑有风枝。
啼涩饥喉咽，飞低冻翅垂。画堂鹦鹉鸟，冷暖不相知。

卷 449_18【镜换杯】

白居易

欲将珠匣青铜镜，换取金尊白玉卮。镜里老来无避处，
尊前愁至有消时。茶能散闷为功浅，萱纵忘忧得力迟。

· 全唐诗 ·

不似杜康神用速，十分一盏便开眉。

卷 449_19【冬夜闻虫】

白居易

虫声冬思苦于秋，不解愁人闻亦愁。
我是老翁听不畏，少年莫听白君头。

卷 449_20【双鹦鹉】

白居易

绿衣整顿双栖起，红嘴分明对话时。始觉琵琶弦莽卤，
方知吉了舌参差。郑牛识字吾常叹，丁鹤能歌尔亦知。
若称白家鹦鹉鸟，笼中兼合解吟诗。

卷 449_21【赠朱道士】

白居易

仪容白皙上仙郎，方寸清虚内道场。两翼化生因服药，
三尸卧死为休粮。醮坛北向宵占斗，寝室东开早纳阳。
尽日窗间更无事，唯烧一炷降真香。

· 全唐诗 ·

卷 449_22【昨以拙诗十首寄西川杜相公，相公亦以新作十首惠然报示，首数虽等，工拙不伦，重以一章，用伸答谢】

白居易

诗家律手在成都，权与寻常将相殊。剪截五言兼用钺，
陶钧六义别开炉。惊人卷轴须知有，随事文章不道无。
篇数虽同光价异，十鱼目换十骊珠。

卷 449_23【和汴州令狐相公，新于郡内栽竹百竿，拆壁开轩，旦夕对玩，偶题七言五韵】

白居易

梁园修竹旧传名，园废年深竹不生。千亩荒凉寻未得，
百竿青翠种新成。墙开乍见重添兴，窗静时闻别有情。
烟叶蒙笼侵夜色，风枝萧飒欲秋声。更登楼望尤堪重，
千万人家无一茎。

卷 449_24【重答汝州李六使君见和忆吴中旧游五首】

白居易

为忆娃宫与虎丘，玩君新作不能休。蜀笺写出篇篇好，

· 全唐诗 ·

吴调吟时句句愁。洛下林园终共住，江南风月会重游。
由来事过多堪惜，何况苏州胜汝州。

卷 449_25【见殷尧藩侍御忆江南诗三十首，诗中多叙苏杭胜事，余尝典二郡，因继和之】

白居易

江南名郡数苏杭，写在殷家三十章。君是旅人犹苦忆，
我为刺史更难忘。境牵吟咏真诗国，兴入笙歌好醉乡。
为念旧游终一去，扁舟直拟到沧浪。

卷 449_26【闻新蝉赠刘二十八】

白居易

蝉发一声时，槐花带两枝。只应催我老，兼遣报君知。
白发生头速，青云入手迟。无过一杯酒，相劝数开眉。

卷 449_27【赠王山人】

白居易

玉芝观里王居士，服气餐霞善养身。夜后不闻龟喘息，

· 全唐诗 ·

秋来唯长鹤精神。容颜尽怪长如故，名姓多疑不是真。
贵重荣华轻寿命，知君闷见世间人。

卷 449_28【和刘郎中学士题集贤阁】

白居易

朱阁青山高庳齐，与君才子作诗题。傍闻大内笙歌近，
下视诸司屋舍低。万卷图书天禄上，一条风景月华西。
欲知丞相优贤意，百步新廊不蹋泥。

卷 449_29【观幻】

白居易

有起皆因灭，无嗟不暂同。从欢终作戚，转苦又成空。
次第花生眼，须臾烛过风。更无寻觅处，鸟迹印空中。

卷 449_30【病假中庞少尹携鱼酒相过】

白居易

宦情牢落年将暮，病假联绵日渐深。被老相催虽白首，
与春无分未甘心。闲停茶碗从容语，醉把花枝取次吟。

· 全唐诗 ·

劳动故人庞阁老，提鱼携酒远相寻。

卷 449_31 【听田顺儿歌】

白居易

戛玉敲冰声未停，嫌云不遏入青冥。
争得黄金满衫袖，一时抛与断年听。

卷 449_32 【听曹刚琵琶兼示重莲】

白居易

拨拨弦弦意不同，胡啼番语两玲珑。
谁能截得曹刚手，插向重莲衣袖中。

卷 449_33 【酬令狐相公春日寻花见寄六韵】

白居易

病卧帝王州，花时不得游。老应随日至，春肯为人留。
粉坏杏将谢，火繁桃尚稠。白飘僧院地，红落酒家楼。
空里雪相似，晚来风不休。吟君怅望句，如到曲江头。

· 全唐诗 ·

卷 449_34 【和刘郎中曲江春望见示】

白居易

芳景多游客，衰翁独在家。肺伤妨饮酒，眼痛忌看花。
寺路随江曲，宫墙夹道斜。羨君犹壮健，不枉度年华。

卷 449_35 【送东都留守令狐尚书赴任】

白居易

翠华黄屋未东巡，碧洛青嵩付大臣。地称高情多水竹，
山宜闲望少风尘。龙门即拟为游客，金谷先凭作主人。
歌酒家家花处处，莫空管领上阳春。

卷 449_36 【自题新昌居止，因招杨郎中小饮】

白居易

地偏坊远巷仍斜，最近东头是白家。宿雨长齐邻舍柳，
晴光照出夹城花。春风小榼三升酒，寒食深炉一碗茶。
能到南园同醉否，笙歌随分有些些。

· 全唐诗 ·

卷 449_37【南园试小乐】

白居易

小园斑驳花初发，新乐铮摐教欲成。红萼紫房皆手植，
苍头碧玉尽家生。高调管色吹银字，慢拽歌词唱渭城。
不饮一杯听一曲，将何安慰老心情。

卷 449_38【和微之春日投简阳明洞天五十韵】

白居易

青阳行已半，白日坐将徂。越国强仍大，稽城高且孤。
利饶盐煮海，名胜水澄湖。牛斗天垂象，台明地展图。
瑰奇填市井，佳丽溢闾閭。勾践遗风霸，西施旧俗姝。
船头龙夭矫，桥脚兽睂盱。乡味珍蟳蚶，时鲜贵鹧鸪。
语言诸夏异，衣服一方殊。捣练蛾眉婢，鸣榔蛙角奴。
江清敌伊洛，山翠胜荆巫。华表双栖鹤，联樯几点乌。
烟波分渡口，云树接城隅。涧远松如画，洲平水似铺。
绿科秧早稻，紫笋折新芦。暖蹋泥中藕，香寻石上蒲。
雨来萌尽达，雷后蛰全苏。柳眼黄丝颣，花房绛萼珠。
林风新竹折，野烧老桑枯。带犊长枝蕙，钱穿短贯榆。
暄和生野菜，卑湿长街芜。女浣纱相伴，儿烹鲤一呼。
山魈啼稚子，林狖挂山都。产业论蚕蚁，孳生计鸭雏。
泉岩雪飘洒，苔壁锦漫糊。堰限舟航路，堤通车马途。

· 全唐诗 ·

耶溪岸回合，禹庙径盘纡。洞穴何因凿，星槎谁与刳。
石凹仙药臼，峰峭佛香炉。去为投金简，来因挹玉壶。
贵仍招客宿，健未要人扶。闻望贤丞相，仪形美丈夫。
前驱驻旌旆，偏坐列笙竽。刺史旗翻隼，尚书履曳舄。
学禅超后有，观妙造虚无。髻里传僧宝，环中得道枢。
登楼诗八咏，置砚赋三都。捧拥罗将绮，趋跄紫与朱。
庙谟藏稷契，兵略贮孙吴。令下三军整，风高四海趋。
千家得慈母，六郡事严姑。重士过三哺，轻财抵一铢。
送觥歌宛转，嘲妓笑卢胡。佐饮时炮鳖，蠲醒数鲙鲈。
醉乡虽咫尺，乐事亦须臾。若不中贤圣，何由外智愚。
伊予一生志，我尔百年躯。江上三千里，城中十二衢。
出多无伴侣，归只对妻孥。白首青山约，抽身去得无。

卷 449_39 【酬郑侍御多雨春空过诗三十韵】

白居易

南雨来多滞，东风动即狂。月行离毕急，龙走召云忙。
鬼转雷车响，蛇腾电策光。浸淫天似漏，沮洳地成疮。
惨淡阴烟白，空濛宿雾黄。暗遮千里目，闷结九回肠。
寂寞羁臣馆，深沉思妇房。镜昏鸾灭影，衣润麝消香。
兰湿难纫珮，花凋易落妆。沾黄莺翅重，滋绿草心长。
紫陌皆泥泞，黄污共淼茫。恐霖成怪沴，望霁剧祲祥。
楚柳腰肢嬾，湘筠涕泪滂。昼昏疑是夜，阴盛胜于阳。
居士巾皆垫，行人盖尽张。跳蛙还屡出，移蚁欲深藏。
端坐交游废，闲行去步妨。愁生垂白叟，恼杀蹋青娘。

· 全唐诗 ·

变海常须虑，为鱼慎勿忘。此时方共惧，何处可相将。
已望东溟祷，仍封北户禳。却思逢旱魃，谁喜见商羊。
预怕为蚕病，先忧作麦伤。惠应施浹洽，政岂假揄扬。
祀典修咸秩，农书振满床。丹诚期恳苦，白日会昭彰。
赈廩赈饥户，苦城备坏墙。且当营岁事，宁暇惜年芳。
德胜令灾弭，人安在吏良。尚书心若此，不枉系金章。

卷 449_40【和春深二十首】

白居易

何处春深好，春深富贵家。马为中路鸟，妓作后庭花。
罗绮驱论队，金银用断车。眼前何所苦，唯苦日西斜。

何处春深好，春深贫贱家。荒凉三径草，冷落四邻花。
奴困归佣力，妻愁出赁车。途穷平路险，举足剧褒斜。

何处春深好，春深执政家。凤池添砚水，鸡树落衣花。
诏借当衢宅，恩容上殿车。延英开对久，门与日西斜。

何处春深好，春深方镇家。通犀排带胯，瑞鹖勘袍花。
飞絮冲球马，垂杨拂妓车。戎装拜春设，左握宝刀斜。

何处春深好，春深刺史家。阴繁棠布叶，岐秀麦分花。
五匹鸣珂马，双轮画轼车。和风引行乐，叶叶隼旗斜。

· 全唐诗 ·

何处春深好，春深学士家。凤书裁五色，马鬣剪三花。
蜡炬开明火，银台赐物车。相逢不敢揖，彼此帽低斜。

何处春深好，春深女学家。惯看温室树，饱识浴堂花。
御印提随仗，香笺把下车。宋家宫样髻，一片绿云斜。

何处春深好，春深御史家。絮萦骢马尾，蝶绕绣衣花。
破柱行持斧，埋轮立驻车。入班遥认得，鱼贯一行斜。

何处春深好，春深迁客家。一杯寒食酒，万里故园花。
炎瘴蒸如火，光阴走似车。为忧鵬鸟至，只恐日光斜。

何处春深好，春深经业家。唯求太常第，不管曲江花。
折桂名惭郤，收萤志慕车。官场泥补处，最怕寸阴斜。

何处春深好，春深隐士家。野衣裁薜叶，山饭晒松花。
兰索纫幽珮，蒲轮驻软车。林间箕踞坐，白眼向人斜。

何处春深好，春深渔父家。松湾随棹月，桃浦落船花。
投饵移轻楫，牵轮转小车。萧萧芦叶里，风起钓丝斜。

何处春深好，春深潮户家。涛翻三月雪，浪喷四时花。
曳练驰千马，惊雷走万车。余波落何处，江转富阳斜。

何处春深好，春深痛饮家。十分杯里物，五色眼前花。
餔歠眠糟瓮，流涎见麴车。中山一沉醉，千度日西斜。

· 全唐诗 ·

何处春深好，春深上巳家。兰亭席上酒，曲洛岸边花。
弄水游童棹，湔裾小妇车。齐桡争渡处，一匹锦标斜。

何处春深好，春深寒食家。玲珑镂鸡子，宛转彩球花。
碧草追游骑，红尘拜扫车。秋千细腰女，摇曳逐风斜。

何处春深好，春深博弈家。一先争破眼，六聚斗成花。
鼓应投壶马，兵冲象戏车。弹棋局上事，最妙是长斜。

何处春深好，春深嫁女家。紫排襦上雉，黄帖鬓边花。
转烛初移障，鸣环欲上车。青衣传毡褥，锦绣一条斜。

何处春深好，春深娶妇家。两行笼里烛，一树扇间花。
宾拜登华席，亲迎障幰车。催妆诗未了，星斗渐倾斜。

何处春深好，春深妓女家。眉欺杨柳叶，裙妒石榴花。
兰麝熏行被，金铜钉坐车。杭州苏小小，人道最天斜。

卷 449_41 【咏家酝十韵】

白居易

独醒从古笑灵均，长醉如今效伯伦。旧法依稀传自杜，
新方要妙得于陈。井泉王相资重九，麴蘖精灵用上寅。
酿糯岂劳炊范黍，撇筍何假漉陶巾。常嫌竹叶犹凡浊，
始觉榴花不正真。瓮揭开时香酷烈，瓶封贮后味甘辛。

· 全唐诗 ·

捧疑明水从空化，饮似阳和满腹春。色洞玉壶无表里，
光摇金醥有精神。能销忙事成闲事，转得忧人作乐人。
应是世间贤圣物，与君还往拟终身。

卷 449_42【池鹤二首】

白居易

高竹笼前无伴侣，乱鸡群里有风标。低头乍恐丹砂落，
晒翅常疑白雪消。转觉鸬鹚毛色下，苦嫌鹦鹉语声娇。
临风一唳思何事，怅望青田云水遥。

池中此鹤鹤中稀，恐是辽东老令威。带雪松枝翹膝胫，
放花菱片缀毛衣。低回且向林间宿，奋迅终须天外飞。
若问故巢知处在，主人相恋未能归。

卷 449_43【对酒五首】

白居易

巧拙贤愚相是非，何如一醉尽忘机。
君知天地中宽窄，雕鹗鸾皇各自飞。

蜗牛角上争何事，石火光中寄此身。
随富随贫且欢乐，不开口笑是痴人。

· 全唐诗 ·

丹砂见火去无迹，白发泥人来不休。
赖有酒仙相暖热，松乔醉即到前头。

百岁无多时壮健，一春能几日清明。
相逢且莫推辞醉，听唱阳关第四声。

昨日低眉问疾来，今朝收泪吊人回。
眼前流例君看取，且遣琵琶送一杯。

卷 449_44【僧院花】

白居易

欲悟色空为佛事，故栽芳树在僧家。
细看便是华严偈，方便风开智慧花。

卷 449_45【老戒】

白居易

我有白头戒，闻于韩侍郎。老多忧活计，病更恋班行。
矍铄夸身健，周遮说话长。不知吾免否，两鬓已成霜。

卷 449_46【洛桥寒食日作十韵】

· 全唐诗 ·

白居易

上苑风烟好，中桥道路平。蹴球尘不起，泼火雨新晴。
宿醉头仍重，晨游眼乍明。老慵虽省事，春诱尚多情。
遇客踟蹰立，寻花取次行。连钱嚼金勒，凿落写银罍。
府酝伤教送，官娃岂要迎。舞腰那及柳，歌舌不如莺。
乡国真堪恋，光阴可合轻。三年遇寒食，尽在洛阳城。

卷 449_47【快活】

白居易

可惜莺啼花落处，一壶浊酒送残春。可怜月好风凉夜，
一部清商伴老身。饱食安眠消日月，闲谈冷笑接交亲。
谁知将相王侯外，别有优游快活人。

卷 449_48【送令狐相公赴太原】

白居易

六纛双旌万铁衣，并汾旧路满光辉。青衫书记何年去，
红旆将军昨日归。诗作马蹄随笔走，猎酣鹰翅伴觥飞。
此都莫作多时计，再为苍生入紫微。

· 全唐诗 ·

卷 449_49【不出】

白居易

檐前新叶覆残花，席上余杯对早茶。
好是老身销日处，谁能骑马傍人家。

卷 449_50【惜落花】

白居易

夜来风雨急，无复旧花林。枝上三分落，园中二寸深。
日斜啼鸟思，春尽老人心。莫怪添杯饮，情多酒不禁。

卷 449_51【老病】

白居易

昼听笙歌夜醉眠，若非月下即花前。
如今老病须知分，不负春来二十年。

卷 449_52【忆晦叔】

· 全唐诗 ·

白居易

游山弄水携诗卷，看月寻花把酒杯。
六事尽思君作伴，几时归到洛阳来。

卷 449_53 【送徐州高仆射赴镇】

白居易

大红旆引碧幢旌，新拜将军指点行。战将易求何足贵，
书生难得始堪荣。离筵歌舞花丛散，候骑刀枪雪队迎。
应笑蹉跎白头尹，风尘唯管洛阳城。

卷 449_54 【琴酒】

白居易

耳根得听琴初畅，心地忘机酒半酣。
若使启期兼解醉，应言四乐不言三。

卷 449_55 【听幽兰】

白居易

· 全唐诗 ·

琴中古曲是幽兰，为我殷勤更弄看。
欲得身心俱静好，自弹不及听人弹。

卷 449_56【六年秋重题白莲】

白居易

素房含露玉冠鲜，绀叶摇风钿扇圆。本是吴州供进藕，
今为伊水寄生莲。移根到此三千里，结子经今六七年。
不独池中花故旧，兼乘旧日采花船。

卷 449_57【元相公挽歌词三首】

白居易

铭旌官重威仪盛，骑吹声繁卤簿长。
后魏帝孙唐宰相，六年七月葬咸阳。

墓门已闭笳箫去，唯有夫人哭不休。
苍苍露草咸阳垄，此是千秋第一秋。

送葬万人皆惨澹，反虞驷马亦悲鸣。
琴书剑珮谁收拾，三岁遗孤新学行。

· 全唐诗 ·

卷 449_58【卧听法曲霓裳】

白居易

金磬玉笙调已久，牙床角枕睡常迟。朦胧闲梦初成后，
宛转柔声入破时。乐可理心应不谬，酒能陶性信无疑。
起尝残酌听余曲，斜背银缸半下帷。

卷 449_59【结之】

白居易

欢爱今何在，悲啼亦是空。同为一夜梦，共过十年中。

卷 449_60【五凤楼晚望】

白居易

晴阳晚照湿烟销，五凤楼高天沲寥。野绿全经朝雨洗，
林红半被暮云烧。龙门翠黛眉相对，伊水黄金线一条。
自入秋来风景好，就中最好是今朝。

卷 449_61【寄刘苏州】

· 全唐诗 ·

白居易

去年八月哭微之，今年八月哭敦诗。何堪老泪交流日，
多是秋风摇落时。泣罢几回深自念，情来一倍苦相思。
同年同病同心事，除却苏州更是谁。

卷 449_62【送客】

白居易

病上篮舆相送来，衰容秋思两悠哉。
凉风裊裊吹槐子，却请行人劝一杯。

卷 449_63【秋思】

白居易

夕照红于烧，晴空碧胜蓝。兽形云不一，弓势月初三。
雁思来天北，砧愁满水南。萧条秋气味，未老已深谙。

卷 449_64【酬梦得秋夕不寐见寄】

白居易

· 全唐诗 ·

碧簟绡纱帐，夜凉风景清。病闻和药气，渴听碾茶声。
露竹偷灯影，烟松护月明。何言千里隔，秋思一时生。

卷 449_65【题周家歌者】

白居易

清紧如敲玉，深圆似转簧。一声肠一断，能有几多肠。

卷 449_66【忆梦得】

白居易

齿发各蹉跎，疏慵与病和。爱花心在否，见酒兴如何。
年长风情少，官高俗虑多。几时红烛下，闻唱竹枝歌。

卷 449_67【赠同座】

白居易

春黛双蛾嫩，秋蓬两鬓侵。谋欢身太晚，恨老意弥深。
薄解灯前舞，尤能酒后吟。花丛便不入，犹自未甘心。

· 全唐诗 ·

卷 449_68 【失婢】

白居易

宅院小墙庳，坊门帖榜迟。旧恩惭自薄，前事悔难追。
笼鸟无常主，风花不恋枝。今宵在何处，唯有月明知。

卷 449_69 【夜招晦叔】

白居易

庭草留霜池结冰，黄昏钟绝冻云凝。碧毡帐上正飘雪，
红火炉前初炷灯。高调秦筝一两弄，小花蛮榼二三升。
为君更奏湘神曲，夜就依来能不能。

卷 449_70 【戏答皇甫监】

白居易

寒宵劝酒君须饮，君是孤眠七十身。
莫道非人身不暖，十分一醺暖于人。

卷 449_71 【和杨师皋伤小姬英英】

· 全唐诗 ·

白居易

自从娇騃一相依，共见杨花七度飞。玳瑁床空收枕席，
琵琶弦断倚屏帏。人间有梦何曾入，泉下无家岂是归。
坟上少啼留取泪，明年寒食更沾衣。

卷 449_72【池边即事】

白居易

毡帐胡琴出塞曲，兰塘越棹弄潮声。
何言此处同风月，蓊北江南万里情。

卷 449_73【闻乐感邻】

白居易

老去亲朋零落尽，秋来弦管感伤多。尚书宅畔悲邻笛，
廷尉门前叹雀罗。绿绮窗空分妓女，绛纱帐掩罢笙歌。
欢娱未足身先去，争奈书生薄命何。

· 全唐诗 ·

第四百五十卷

卷 450_1【戊申岁暮咏怀三首】

白居易

穷冬月末两三日，半百年过六七时。龙尾趁朝无气力，
牛头参道有心期。荣华外物终须悟，老病傍人岂得知。
犹被妻儿教渐退，莫求致仕且分司。

唯生一女才十二，只欠三年未六旬。婚嫁累轻何怕老，
饥寒心惯不忧贫。紫泥丹笔皆经手，赤绂金章尽到身。
更拟踟蹰觅何事，不归嵩洛作闲人。

七年囚闭作笼禽，但愿开笼便入林。幸得展张今日翅，
不能辜负昔时心。人间祸福愚难料，世上风波老不禁。
万一差池似前事，又应追悔不抽簪。

卷 450_2【赠梦得】

白居易

· 全唐诗 ·

心中万事不思量，坐倚屏风卧向阳。渐觉咏诗犹老丑，
岂宜凭酒更粗狂。头垂白发我思退，脚蹋青云君欲忙。
只有今春相伴在，花前剩醉两三场。

卷 450_3【想东游五十韵】

白居易

海内时无事，江南岁有秋。生民皆乐业，地主尽贤侯。
郊静销戎马，城高逼斗牛。平河七百里，沃壤二三州。
坐有湖山趣，行无风浪忧。食宁妨解缆，寝不废乘流。
泉石谙天竺，烟霞识虎丘。余芳认兰泽，遗咏思蘋洲。
菡萏红涂粉，菰蒲绿泼油。鳞差渔户舍，绮错稻田沟。
紫洞藏仙窟，玄泉贮怪湫。精神昂老鹤，姿彩媚潜虬。
静阅天工妙，闲窥物状幽。投竿出比目，掷果下猕猴。
味苦莲心小，浆甜蔗节稠。橘苞从自结，藕孔是谁镵。
逐日移潮信，随风变棹讴。递夫交烈火，候吏次鸣驺。
梵塔形疑踊，阊门势欲浮。客迎携酒榼，僧待置茶瓯。
小宴闲谈笑，初筵雅献酬。稍催朱蜡炬，徐动碧牙筹。
圆醅飞莲子，长裾曳石榴。柘枝随画鼓，调笑从香球。
幕飏云飘槛，帘褰月露钩。舞繁红袖凝，歌切翠眉愁。
弦管宁容歇，杯盘未许收。良辰宜酩酊，卒岁好优游。
鲙缕鲜仍细，莼丝滑且柔。饱餐为日计，稳睡是身谋。
名愧空虚得，官知止足休。自嫌犹屑屑，众笑大悠悠。
物表疏形役，人寰足悔尤。蛾须远灯烛，兔勿近罟罗。
幻世春来梦，浮生水上沤。百忧中莫入，一醉外何求。

· 全唐诗 ·

未死痴王湛，无儿老邓攸。蜀琴安膝上，周易在床头。
去去无程客，行行不系舟。劳君频问讯，劝我少淹留。
云雨多分散，关山苦阻修。一吟江月别，七见日星周。
珠玉传新什，鹓鸾念故俦。悬旌心宛转，束楚意绸缪。
驿舫妆青雀，官槽秣紫骝。镜湖期远泛，禹穴约冥搜。
预扫题诗壁，先开望海楼。饮思亲履舄，宿忆并衾裯。
志气吾衰也，风情子在不。应须相见后，别作一家游。

卷 450_4【病免后喜除宾客】

白居易

卧在漳滨满十旬，起为商皓伴三人。
从今且莫嫌身病，不病何由索得身。

卷 450_5【长乐亭留别】

白居易

灞浐风烟函谷路，曾经几度别长安。昔时蹙促为迁客，
今日从容自去官。优诏幸分四皓秩，祖筵惭继二疏欢。
尘缨世网重重缚，回顾方知出得难。

卷 450_6【陕府王大夫相迎偶赠】

· 全唐诗 ·

白居易

紫微阁老自多情，白首园公岂要迎。伴我绿槐阴下歇，
向君红旆影前行。纶巾发少浑欹仄，篮舆肩齐甚稳平。
但问主人留几日，分司宾客去无程。

卷 450_7【别陕州王司马】

白居易

笙歌惆怅欲为别，风景阑珊初过春。
争得遣君诗不苦，黄河岸上白头人。

卷 450_8【将至东都先寄令狐留守】

白居易

黄鸟无声叶满枝，闲吟想到洛城时。惜逢金谷三春尽，
恨拜铜楼一月迟。诗境忽来还自得，醉乡潜去与谁期。
东都添个狂宾客，先报壶觞风月知。

卷 450_9【答崔十八见寄】

白居易

· 全唐诗 ·

明朝欲见琴尊伴，洗拭金杯拂玉徽。君乞曹州刺史替，
我抛刑部侍郎归。倚疮老马收蹄立，避箭高鸿尽翅飞。
岂料洛阳风月夜，故人垂老得相依。

卷 450_10【赠皇甫宾客】

白居易

轻衣稳马槐阴路，渐近东来渐少尘。耳闹久憎闻俗事，
眼明初喜见闲人。昔曾对作承华相，今复连为博望宾。
始信淡交宜久远，与君转老转相亲。

卷 450_11【归履道宅】

白居易

驿吏引藤舆，家童开竹扉。往时多暂住，今日是长归。
眼下有衣食，耳边无是非。不论贫与富，饮水亦应肥。

卷 450_12【问江南物】

白居易

归来未及问生涯，先问江南物在耶。引手摩挲青石笋，

· 全唐诗 ·

回头点检白莲花。苏州舫故龙头暗，王尹桥倾雁齿斜。
别有夜深惆怅事，月明双鹤在裴家。

卷 450_13【萧庶子相过】

白居易

半日停车马，何人在白家。殷勤萧庶子，爱酒不嫌茶。

卷 450_14【答尉迟少尹问所须】

白居易

乍到频劳问所须，所须非玉亦非珠。
爱君水阁宜闲咏，每有诗成许去无。

卷 450_15【咏闲】

白居易

但有闲销日，都无事系怀。朝眠因客起，午饭伴僧斋。
树合阴交户，池分水夹阶。就中今夜好，风月似江淮。

· 全唐诗 ·

卷 450_16 【同崔十八寄元浙东王陕州】

白居易

未能同隐云林下，且复相招禄仕间。随月有钱胜卖药，
终年无事抵归山。镜湖水远何由泛，棠树枝高不易攀。
惆怅八科残四在，两人荣闹两人闲。

卷 450_17 【答苏庶子月夜闻家僮奏乐见赠】

白居易

墙西明月水东亭，一曲霓裳按小伶。
不敢邀君无别意，弦生管涩未堪听。

卷 450_18 【偶吟】

白居易

里巷多通水，林园尽不扃。松身为外户，池面是中庭。
元氏诗三帙，陈家酒一瓶。醉来狂发咏，邻女映篱听。

卷 450_19 【白莲池泛舟】

· 全唐诗 ·

白居易

白藕新花照水开，红窗小舫信风回。
谁教一片江南兴，逐我殷勤万里来。

卷 450_20 【池上即事】

白居易

行寻谿石引新泉，坐看修桥补钓船。绿竹挂衣凉处歇，
清风展簟困时眠。身闲当贵真天爵，官散无忧即地仙。
林下水边无厌日，便堪终老岂论年。

卷 450_21 【酬裴相公见寄二绝】

白居易

习静心方泰，劳生事渐稀。可怜安稳地，舍此欲何归。
一双垂翅鹤，数首解嘲文。总是迂闲物，争堪伴相君。

卷 450_22 【答梦得闻蝉见寄】

白居易

· 全唐诗 ·

开缄思浩然，独咏晚风前。人貌非前日，蝉声似去年。
槐花新雨后，柳影欲秋天。听罢无他计，相思又一篇。

卷 450_23【令狐尚书许过弊居先赠长句】

白居易

不矜轩冕爱林泉，许到池头一醉眠。已遣平治行药径，
兼教扫拂钓鱼船。应将笔砚随诗主，定有笙歌伴酒仙。
只候高情无别物，苍苔石笋白花莲。

卷 450_24【自题】

白居易

老宜官冷静，贫赖俸优饶。热月无堆案，寒天不趁朝。
傍看应寂寞，自觉甚逍遥。徒对盈尊酒，兼无愁可销。

卷 450_25【答崔十八】

白居易

劳将白叟比黄公，今古由来事不同。
我有商山君未见，清泉白石在胸中。

· 全唐诗 ·

卷 450_26 【偶咏】

白居易

御热蕉衣健，扶羸竹杖轻。诵经凭槛立，散药绕廊行。
暝槿无风落，秋虫欲雨鸣。身闲当将息，病亦有心情。

卷 450_27 【答苏六】

白居易

但喜暑随三伏去，不知秋送二毛来。
更无别计相宽慰，故遣阳关劝一杯。

卷 450_28 【秋游】

白居易

下马闲行伊水头，凉风清景胜春游。
何事古今诗句里，不多说著洛阳秋。

卷 450_29 【偶作】

· 全唐诗 ·

白居易

张翰一杯酒，荣期三乐歌。聪明伤混沌，烦恼污头陀。
簟冷秋生早，阶闲日上多。近来门更静，无雀可张罗。

卷 450_30【游平原赠晦叔】

白居易

照水容虽老，登山力未衰。欲眠先命酒，暂歇亦吟诗。
且喜身无缚，终惭鬓有丝。回头语闲伴，闲校十年迟。

卷 450_31【不出门】

白居易

不出门来又数旬，将何销日与谁亲。鹤笼开处见君子，
书卷展时逢古人。自静其心延寿命，无求于物长精神。
能行便是真修道，何必降魔调伏身。

卷 450_32【叹鹤病】

白居易

· 全唐诗 ·

右翅低垂左胫伤，可怜风貌甚昂藏。
亦知白日青天好，未要高飞且养疮。

卷 450_33 【临都驿送崔十八】

白居易

勿言临都五六里，扶病出城相送来。莫道长安一步地，
马头西去几时回。与君后会知何处，为我今朝尽一杯。

卷 450_34 【对镜】

白居易

三分鬓发二分丝，晓镜秋容相对时。去作忙官应太老，
退为闲叟未全迟。静中得味何须道，稳处安身更莫疑。
若使至今黄绮在，闻吾此语亦分司。

卷 450_35 【劝酒十四首·何处难忘酒七首】

白居易

何处难忘酒，长安喜气新。初登高第后，乍作好官人。
省壁明张榜，朝衣稳称身。此时无一醺，争奈帝城春。

· 全唐诗 ·

何处难忘酒，天涯话旧情。青云俱不达，白发递相惊。
二十年前别，三千里外行。此时无一醺，何以叙平生。

何处难忘酒，朱门羨少年。春分花发后，寒食月明前。
小院回罗绮，深房理管弦。此时无一醺，争过艳阳天。

何处难忘酒，霜庭老病翁。暗声啼蟋蟀，干叶落梧桐。
鬓为愁先白，颜因醉暂红。此时无一醺，何计奈秋风。

何处难忘酒，军功第一高。还乡随露布，半路授旌旄。
玉柱剥葱手，金章烂椹袍。此时无一醺，何以骋雄豪。

何处难忘酒，青门送别多。敛襟收涕泪，簇马听笙歌。
烟树灞陵岸，风尘长乐坡。此时无一醺，争奈去留何。

何处难忘酒，逐臣归故园。赦书逢驿骑，贺客出都门。
半面瘴烟色，满衫乡泪痕。此时无一醺，何物可招魂。

卷 450_36【劝酒十四首·不如来饮酒七首】

白居易

莫隐深山去，君应到自嫌。齿伤朝水冷，貌苦夜霜严。
渔去风生浦，樵归雪满岩。不如来饮酒，相对醉厌厌。

莫作农夫去，君应见自愁。迎春犁瘦地，趁晚喂羸牛。

· 全唐诗 ·

数被官加税，稀逢岁有秋。不如来饮酒，酒伴醉悠悠。

莫作商人去，恹惶君未谙。雪霜行塞北，风水宿江南。
藏镪百千万，沉舟十二三。不如来饮酒，仰面醉酣酣。

莫事长征去，辛勤难具论。何曾画麟阁，只是老辕门。
虬虱衣中物，刀枪面上痕。不如来饮酒，合眼醉昏昏。

莫学长生去，仙方误杀君。那将薤上露，拟待鹤边云。
矻矻皆烧药，累累尽作坟。不如来饮酒，闲坐醉醺醺。

莫上青云去，青云足爱憎。自贤夸智慧，相纠斗功能。
鱼烂缘吞饵，蛾焦为扑灯。不如来饮酒，任性醉腾腾。

莫入红尘去，令人心力劳。相争两蜗角，所得一牛毛。
且灭嗔中火，休磨笑里刀。不如来饮酒，稳卧醉陶陶。

卷 450_37【和令狐相公寄刘郎中兼见示长句】

白居易

日月天衢仰面看，尚淹池凤滞台鸾。碧幢千里空移镇，
赤笔三年未转官。别后纵吟终少兴，病来虽饮不多欢。
酒军诗敌如相遇，临老犹能一据鞍。

· 全唐诗 ·

卷 450_38 【即事】

白居易

见月连宵坐，闻风尽日眠。室香罗药气，笼暖焙茶烟。
鹤啄新晴地，鸡栖薄暮天。自看淘酒米，倚杖小池前。

卷 450_39 【期宿客不至】

白居易

风飘雨洒帘帷故，竹映松遮灯火深。
宿客不来嫌冷落，一尊酒对一张琴。

卷 450_40 【问移竹】

白居易

问君移竹意如何，慎勿排行但间窠。
多种少栽皆有意，大都少校不如多。

卷 450_41 【重阳席上赋白菊】

· 全唐诗 ·

白居易

满园花菊郁金黄，中有孤丛色似霜。
还似今朝歌酒席，白头翁入少年场。

卷 450_42 【偶吟二首】

白居易

眼下有衣兼有食，心中无喜亦无忧。正如身后有何事，
应向人间无所求。静念道经深闭目，闲迎禅客小低头。
犹残少许云泉兴，一岁龙门数度游。

晴教晒药泥茶灶，闲看科松洗竹林。活计纵贫长净洁，
池亭虽小颇幽深。厨香炊黍调和酒，窗暖安弦拂拭琴。
老去生涯只如此，更无余事可劳心。

卷 450_43 【何处春先到】

白居易

何处春先到，桥东水北亭。冻花开未得，冷酒酌难醒。
就日移轻榻，遮风展小屏。不劳人劝醉，莺语渐丁宁。

· 全唐诗 ·

卷 450_44 【勉闲游】

白居易

天时人事常多故，一岁春能几处游。不是尘埃便风雨，
若非疾病即悲忧。贫穷心苦多无兴，富贵身忙不自由。
唯有分司官恰好，闲游虽老未能休。

卷 450_45 【寄两银榼与裴侍郎，因题两绝句】

白居易

贫无好物堪为信，双榼虽轻意不轻。
愿奉谢公池上酌，丹心绿酒一时倾。

惯和麴蘖堪盛否，重用盐梅试洗看。
小器不知容几许，襄阳米贱酒升宽。

卷 450_46 【小桥柳】

白居易

细水涓涓似泪流，日西惆怅小桥头。
衰杨叶尽空枝在，犹被霜风吹不休。

· 全唐诗 ·

卷 450_47【哭微之二首】

白居易

八月凉风吹白幕，寝门廊下哭微之。
妻孥朋友来相吊，唯道皇天无所知。

文章卓犖生无敌，风骨英灵歿有神。
哭送咸阳北原上，可能随例作灰尘。

卷 450_48【马上晚吟】

白居易

人少街荒已寂寥，风多尘起重萧条。上阳落叶飘宫树，
中渡流澌拥渭桥。出早冒寒衣校薄，归迟侵黑酒全消。
如今不是闲行日，日短天阴坊曲遥。

卷 450_49【醉中重留梦得】

白居易

刘郎刘郎莫先起，苏台苏台隔云水。
酒醺来从一百分，马头去便三千里。

· 全唐诗 ·

卷 450_50 【雪夜喜李郎中见访，兼酬所赠】

白居易

可怜今夜鹅毛雪，引得高情鹤氅人。红蜡烛前明似昼，
青毡帐里暖如春。十分满醖黄金液，一尺中庭白玉尘。
对此欲留君便宿，诗情酒分合相亲。

卷 450_51 【任老】

白居易

不愁陌上春光尽，亦任庭前日影斜。
面黑眼昏头雪白，老应无可更增加。

卷 450_52 【劝欢】

白居易

火急欢娱慎勿迟，眼看老病悔难追。
尊前花下歌筵里，会有求来不得时。

卷 450_53 【答王尚书问履道池旧桥】

· 全唐诗 ·

白居易

虹梁雁齿随年换，素板朱栏逐日修。但恨尚书能久别，
莫忘州守不频游。重移旧柱开中眼，乱种新花拥两头。
李郭小船何足问，待君乘过济川舟。

卷 450_54【晚归府】

白居易

晚从履道来归府，街路虽长尹不嫌。
马上凉于床上坐，绿槐风透紫蕉衫。

卷 450_55【从龙潭寺至少林寺，题赠同游者】

白居易

山屐田衣六七贤，褰芳蹋翠弄潺湲。九龙潭月落杯酒，
三品松风飘管弦。强健且宜游胜地，清凉不觉过炎天。
始知驾鹤乘云外，别有道遥地上仙。

卷 450_56【夜从法王寺下归岳寺】

白居易

· 全唐诗 ·

双刹夹虚空，缘云一径通。似从忉利下，如过剑门中。
灯光初合，笙歌曲未终。可怜狮子座，舁出净名翁。

卷 450_57【宿龙潭寺】

白居易

夜上九潭谁是伴，云随飞盖月随杯。
明年尚作三川守，此地兼将歌舞来。

卷 450_58【嵩阳观夜奏霓裳】

白居易

开元遗曲自凄凉，况近秋天调是商。爱者谁人唯白尹，
奏时何处有嵩阳。回临山月声弥怨，散入松风韵更长。
子晋少姨闻定怪，人间亦便有霓裳。

卷 450_59【过元家履信宅】

白居易

鸡犬丧家分散后，林园失主寂寥时。落花不语空辞树，
流水无情自入池。风荡宴船初破漏，雨淋歌阁欲倾欹。

· 全唐诗 ·

前庭后院伤心事，唯是春风秋月知。

卷 450_60【和杜录事题红叶】

白居易

寒山十月旦，霜叶一时新。似烧非因火，如花不待春。
连行排绛帐，乱落剪红巾。解驻篮舆看，风前唯两人。

卷 450_61【题崔常侍济上别墅】

白居易

求荣争宠任纷纷，脱叶金貂只有君。散员疏去未为贵，
小邑陶休何足云。山色好当晴后见，泉声宜向醉中闻。
主人忆尔尔知否，抛却青云归白云。

卷 450_62【过温尚书旧庄】

白居易

白石清泉抛济口，碧幢红旆照河阳。
村人都不知时事，犹自呼为处士庄。

· 全唐诗 ·

卷 450_63【天坛峰下赠杜录事】

白居易

年颜气力渐衰残，王屋中峰欲上难。顶上将探小有洞，
喉中须咽大还丹。河车九转宜精炼，火候三年在好看。
他日药成分一粒，与君先去扫天坛。

卷 450_64【赠僧五首·钵塔院如大师】

白居易

百千万劫菩提种，八十三年功德林。若不秉持僧行苦，
将何报答佛恩深。慈悲不瞬诸天眼，清净无尘几地心。
每岁八关蒙九授，殷勤一戒重千金。

卷 450_65【赠僧五首·神照上人】

白居易

心如定水随形应，口似悬河逐病治。
曾向众中先礼拜，西方去日莫相遗。

· 全唐诗 ·

卷 450_66【赠僧五首·自远禅师】

白居易

自出家来长自在，缘身一衲一绳床。
令人见即心无事，每一相逢是道场。

卷 450_67【赠僧五首·宗实上人】

白居易

荣华恩爱弃成唾，戒定真如和作香。
今古虽殊同一法，瞿昙抛却转轮王。

卷 450_68【赠僧五首·清闲上人】

白居易

梓潼耆属何年别，长寿坛场近日开。
应是蜀人皆度了，法轮移向洛中来。

卷 450_69【弹秋思】

· 全唐诗 ·

白居易

信意闲弹秋思时，调清声直韵疏迟。
近来渐喜无人听，琴格高低心自知。

卷 450_70【自咏】

白居易

随宜饮食聊充腹，取次衣裘亦暖身。未必得年非瘦薄，
无妨长福是单贫。老龟岂羡牺牲饱，蟠木宁争桃李春。
随分自安心自断，是非何用问闲人。

卷 450_71【分司初到洛中，偶题六韵，兼戏呈冯尹】

白居易

相府念多病，春宫容不才。官衔依口得，俸料逐身来。
白首林园在，红尘车马回。招呼新客侣，扫掠旧池台。
小舫宜携乐，新荷好盖杯。不知金谷主，早晚贺筵开。

卷 450_72【春风】

白居易

· 全唐诗 ·

春风先发苑中梅，樱杏桃梨次第开。
荠花榆荚深村里，亦道春风为我来。

· 全唐诗 ·

第四百五十一卷

卷 451_1【洛阳春】

白居易

洛阳陌上春长在，惜别今来二十年。
唯觅少年心不得，其余万事尽依然。

卷 451_2【恨去年】

白居易

老去唯耽酒，春来不著家。去年来校晚，不见洛阳花。

卷 451_3【早出晚归】

白居易

早起或因携酒出，晚归多是看花回。
若抛风景长闲坐，自问东京作底来。

· 全唐诗 ·

卷 451_4【魏王堤】

白居易

花寒懒发鸟慵啼，信马闲行到日西。
何处未春先有思，柳条无力魏王堤。

卷 451_5【尝黄醅新酎忆微之】

白居易

世间好物黄醅酒，天下闲人白侍郎。爱向卯时谋洽乐，
亦曾酉日放粗狂。醉来枕麹贫如富，身后堆金有若亡。
元九计程殊未到，瓮头一醅共谁尝。

卷 451_6【劝行乐】

白居易

少年信美何曾久，春日虽迟不再中。
欢笑胜愁歌胜哭，请君莫道等头空。

卷 451_7【老慵】

· 全唐诗 ·

白居易

岂是交亲向我疏，老慵自爱闭门居。
近来渐喜知闻断，免恼嵇康索报书。

卷 451_8 【酬别微之】

白居易

沔头峡口钱唐岸，三别都经二十年。且喜筋骸俱健在，
勿嫌须鬓各皤然。君归北阙朝天帝，我住东京作地仙。
博望自来非弃置，承明重入莫拘牵。醉收杯杓停灯语，
寒展衾裯对枕眠。犹被分司官系绊，送君不得过甘泉。

卷 451_9 【予与微之，老而无子，发于言叹，著在诗篇。今年冬各有一子，戏作二十，一以相贺，一以自嘲】

白居易

常忧到老都无子，何况新生又是儿。阴德自然宜有庆，
皇天可得道无知。一园水竹今为主，百卷文章更付谁。
莫虑鸬鹚无浴处，即应重入凤凰池。

五十八翁方有后，静思堪喜亦堪嗟。一珠甚小还惭蚌，
八子虽多不羡鸦。秋月晚生丹桂实，春风新长紫兰芽。

· 全唐诗 ·

持杯祝愿无他语，慎勿顽愚似汝爷。

卷 451_10【自问】

白居易

年来私自问，何故不归京。佩玉腰无力，看花眼不明。
老慵难发遣，春病易滋生。赖有弹琴女，时时听一声。

卷 451_11【晚桃花】

白居易

一树红桃亚拂池，竹遮松荫晚开时。非因斜日无由见，
不是闲人岂得知。寒地生材遗校易，贫家养女嫁常迟。
春深欲落谁怜惜，白侍郎来折一枝。

卷 451_12【夜调琴忆崔少卿】

白居易

今夜调琴忽有情，欲弹惆怅忆崔卿。
何人解爱中徽上，秋思头边八九声。

· 全唐诗 ·

卷 451_13【阿崔】

白居易

谢病卧东都，羸然一老夫。孤单同伯道，迟暮过商瞿。
岂料鬓成雪，方看掌弄珠。已衰宁望有，虽晚亦胜无。
兰入前春梦，桑悬昨日弧。里间多庆贺，亲戚共欢娱。
腻剃新胎发，香绷小绣襦。玉芽开手爪，酥颗点肌肤。
弓冶将传汝，琴书勿坠吾。未能知寿夭，何暇虑贤愚。
乳气初离壳，啼声渐变雏。何时能反哺，供养白头乌。

卷 451_14【赠邻里往还】

白居易

问予何故独安然，免被饥寒婚嫁牵。骨肉都卢无十口，
粮储依约有三年。但能斗薊人间事，便是逍遥地上仙。
唯恐往还相厌贱，南家饮酒北家眠。

卷 451_15【王子晋庙】

白居易

子晋庙前山月明，人闻往往夜吹笙。

· 全唐诗 ·

鸾吟凤唱听无拍，多似霓裳散序声。

卷 451_16【晚起】

白居易

起晚怜春暖，归迟爱月明。放慵长饱睡，闻健且闲行。
北阙停朝簿，西方入社名。唯吟一句偈，无念是无生。

卷 451_17【酬皇甫宾客】

白居易

玄晏家风黄绮身，深居高卧养精神。性慵无病常称病，
心足虽贫不道贫。竹院君闲销永日，花亭我醉送残春。
自嫌诗酒犹多兴，若比先生是俗人。

卷 451_18【池上赠韦山人】

白居易

新竹夹平流，新荷拂小舟。众皆嫌好拙，谁肯伴闲游。
客为忙多去，僧因饭暂留。独怜韦处士，尽日共悠悠。

· 全唐诗 ·

卷 451_19【无梦】

白居易

老眼花前暗，春衣雨后寒。旧诗多忘却，新酒且尝看。
拙定于身稳，慵应趁伴难。渐销名利想，无梦到长安。

卷 451_20【对小潭寄远上人】

白居易

小潭澄见底，闲客坐开襟。借问不流水，何如无念心。
彼惟清且浅，此乃寂而深。是义谁能答，明朝问道林。

卷 451_21【闲吟二首】

白居易

留司老宾客，春尽兴如何。官寺行香少，僧房寄宿多。
闲倾一醺酒，醉听两声歌。忆得陶潜语，羲皇无以过。

闲游来早晚，已得一周年。嵩洛供云水，朝廷乞俸钱。
长歌时独酌，饱食后安眠。闻道山榴发，明朝向玉泉。

· 全唐诗 ·

卷 451_22 【独游玉泉寺】

白居易

云树玉泉寺，肩舁半日程。更无人作伴，只共酒同行。
新叶千万影，残莺三两声。闲游竟未足，春尽有余情。

卷 451_23 【晚出寻人不遇】

白居易

篮舆不乘乘晚凉，相寻不遇亦无妨。
轻衣稳马槐阴下，自要闲行一两坊。

卷 451_24 【苦热】

白居易

头痛汗盈巾，连宵复达晨。不堪逢苦热，犹赖是闲人。
朝客应烦倦，农夫更苦辛。始惭当此日，得作自由身。

卷 451_25 【销暑】

· 全唐诗 ·

白居易

何以销烦暑，端居一院中。眼前无长物，窗下有清风。
热散由心静，凉生为室空。此时身自得，难更与人同。

卷 451_26【行香归】

白居易

出作行香客，归如坐夏僧。床前双草屨，檐下一纱灯。
珮委腰无力，冠欹发不胜。鸾台龙尾道，合尽少年登。

卷 451_27【同王十七庶子、李六员外、郑二侍御同年，四人游龙门，有感而作】

白居易

一曲悲歌酒一尊，同年零落几人存。世如阅水应堪叹，
名是浮云岂足论。各从仕禄休明代，共感平生知己恩。
今日与君重上处，龙门不是旧龙门。

卷 451_28【池上小宴问程秀才】

白居易

· 全唐诗 ·

洛下林园好自知，江南景物暗相随。净淘红粒置香饭，
薄切紫鳞烹水葵。雨滴篷声青雀舫，浪摇花影白莲池。
停杯一问苏州客，何似吴松江上时。

卷 451_29【桥亭卯饮】

白居易

卯时偶饮斋时卧，林下高桥桥上亭。松影过窗眠始觉，
竹风吹雨醉初醒。就荷叶上包鱼鲙，当石渠中浸酒瓶。
生计悠悠身兀兀，甘从妻唤作刘伶。

卷 451_30【舟中夜坐】

白居易

潭边霁后多清景，桥下凉来足好风。
秋鹤一双船一只，夜深相伴月明中。

卷 451_31【戏和微之答竇七行军之作】

白居易

旌钺从囊鞬，宾僚礼数全。夔龙来要地，鹓鹭下辽天。

· 全唐诗 ·

赭汗骑骄马，青娥舞醉仙。合成江上作，散到洛中传。
陋巷能无酒，贫池亦有船。春装秋未寄，谩道有闲钱。

卷 451_32 【闲忙】

白居易

奔走朝行内，栖迟林墅间。多因病后退，少及健时还。
斑白霜侵鬓，苍黄日下山。闲忙俱过日，忙校不如闲。

卷 451_33 【西风】

白居易

西风来几日，一叶已先飞。新霁乘轻屐，初凉换熟衣。
浅渠销慢水，疏竹漏斜晖。薄暮青苔巷，家僮引鹤归。

卷 451_34 【题西亭】

白居易

多见朱门富贵人，林园未毕即无身。
我今幸作西亭主，已见池塘五度春。

· 全唐诗 ·

卷 451_35 【观游鱼】

白居易

绕池闲步看鱼游，正值儿童弄钓舟。
一种爱鱼心各异，我来施食尔垂钩。

卷 451_36 【看采莲】

白居易

小桃闲上小莲船，半采红莲半白莲。
不似江南恶风浪，芙蓉池在卧床前。

卷 451_37 【看采菱】

白居易

菱池如镜净无波，白点花稀青角多。
时唱一声新水调，谩人道是采菱歌。

卷 451_38 【天老】

· 全唐诗 ·

白居易

早世身如风里烛，暮年发似镜中丝。
谁人断得人间事，少夭堪伤老又悲。

卷 451_39【秋池】

白居易

洗浪清风透水霜，水边闲坐一绳床。
眼尘心垢见皆尽，不是秋池是道场。

卷 451_40【登天宫阁】

白居易

午时乘兴出，薄暮未能还。高上烟中阁，平看雪后山。
委形群动里，任性一生间。洛下多闲客，其中我最闲。

卷 451_41【新雪二首】

白居易

不思北省烟霄地，不忆南宫风月天。

· 全唐诗 ·

唯忆静恭杨阁老，小园新雪暖炉前。

不思朱雀街东鼓，不忆青龙寺后钟。
唯忆夜深新雪后，新昌台上七株松。

卷 451_42 【日高卧】

白居易

怕寒放懒日高卧，临老谁言牵率身。夹幕绕房深似洞，
重裯衬枕暖于春，小青衣动桃根起，嫩绿醅浮竹叶新。
未裹头前倾一醺，何如冲雪趁朝人。

卷 451_43 【和微之任校书郎日过三乡】

白居易

三乡过日君年几，今日君年五十馀。
不独年催身亦变，校书郎变作尚书。

卷 451_44 【和微之十七与君别及陇月花枝之咏】

白居易

· 全唐诗 ·

别时十七今头白，恼乱君心三十年。
垂老休吟花月句，恐君更结后身缘。

卷 451_45 【和微之叹槿花】

白居易

朝荣殊可惜，暮落实堪嗟。若向花中比，犹应胜眼花。

卷 451_46 【思往喜今】

白居易

忆除司马向江州，及此凡经十五秋。虽在簪裾从俗累，
半寻山水是闲游。谪居终带乡关思，领郡犹分邦国忧。
争似如今作宾客，都无一念到心头。

卷 451_47 【题平泉薛家雪堆庄】

白居易

怪石千年应自结，灵泉一带是谁开。蹙为宛转青蛇项，
喷作玲珑白雪堆。赤日旱天长看雨，玄阴腊月亦闻雷。
所嗟地去都门远，不得肩舁每日来。

· 全唐诗 ·

卷 451_48 【和微之道保生三日】

白居易

相看鬓似丝，始作弄璋诗。且有承家望，谁论得力时。
莫兴三日叹，犹胜七年迟。我未能忘喜，君应不合悲。
嘉名称道保，乞姓号崔儿。但恐持相并，蒹葭琼树枝。

卷 451_49 【哭皇甫七郎中】

白居易

志业过玄晏，词华似祢衡。多才非福禄，薄命是聪明。
不得人间寿，还留身后名。涉江文一首，便可敌公卿。

卷 451_50 【晚起】

白居易

烂熯朝眠后，频伸晚起时。暖炉生火早，寒镜裹头迟。
融雪煎香茗，调酥煮乳糜。慵馋还自哂，快活亦谁知。
酒性温无毒，琴声淡不悲。荣公三乐外，仍弄小男儿。

· 全唐诗 ·

卷 451_51 【疑梦二首】

白居易

莫惊宠辱虚忧喜，莫计恩雠浪苦辛。
黄帝孔丘无处问，安知不是梦中身。

鹿疑郑相终难辨，蝶化庄生讵可知。
假使如今不是梦，能长于梦几多时。

卷 451_52 【夜宴惜别】

白居易

笙歌旖旎曲终头，转作离声满坐愁。箏怨朱弦从此断，
烛啼红泪为谁流。夜长似岁欢宜尽，醉未如泥饮莫休。
何况鸡鸣即须别，门前风雨冷修修。

卷 451_53 【归来二周岁】

白居易

归来二周岁，二岁似须臾。池藕重生叶，林鸦再引雏。
时丰实仓廩，春暖葺庖厨。更作三年计，三年身健无。

· 全唐诗 ·

卷 451_54【吾土】

白居易

身心安处为吾土，岂限长安与洛阳。水竹花前谋活计，
琴诗酒里到家乡。荣先生老何妨乐，楚接舆歌未必狂。
不用将金买庄宅，城东无主是春光。

卷 451_55【题岐王旧山池石壁】

白居易

树深藤老竹回环，石壁重重锦翠斑。俗客看来犹解爱，
忙人到此亦须闲。况当霁景凉风后，如在千岩万壑间。
黄绮更归何处去，洛阳城内有商山。

卷 451_56【病眼花】

白居易

头风目眩乘衰老，只有增加岂有瘳。花发眼中犹足怪，
柳生肘上亦须休。大窠罗绮看才辨，小字文书见便愁。
必若不能分黑白，却应无悔复无尤。

· 全唐诗 ·

卷 451_57【早饮醉中除河南尹敕到】

白居易

雪拥衡门水满池，温炉卯后暖寒时。绿醅新酎尝初醉，
黄纸除书到不知。厚俸自来诚忝滥，老身欲起尚迟疑。
应须了却丘中计，女嫁男婚三径资。

卷 451_58【除夜】

白居易

病眼少眠非守岁，老心多感又临春。
火销灯尽天明后，便是平头六十人。

卷 451_59【府西池】

白居易

柳无气力枝先动，池有波纹冰尽开。
今日不知谁计会，春风春水一时来。

卷 451_60【天津桥】

· 全唐诗 ·

白居易

津桥东北斗亭西，到此令人诗思迷。眉月晚生神女浦，
脸波春傍窈娘堤。柳丝袅袅风缲出，草缕茸茸雨剪齐。
报道前驱少呼喝，恐惊黄鸟不成啼。

卷 451_61【不准拟二首】

白居易

篮舆腾腾一老夫，褐裘乌帽白髭须。早衰饶病多蔬食，
筋力消磨合有无。不准拟身年六十，上山仍未要人扶。

忆昔谪居炎瘴地，巴猿引哭虎随行。多于贾谊长沙苦，
小校潘安白发生。不准拟身年六十，游春犹自有心情。

卷 451_62【府中夜赏】

白居易

樱桃厅院春偏好，石井栏堂夜更幽。白粉墙头花半出，
绯纱烛下水平流。闲留宾客尝新酒，醉领笙歌上小舟。
舞袖飘飘棹容与，忽疑身是梦中游。

· 全唐诗 ·

卷 451_63【府西池北新葺水斋，即事招宾，偶题十六韵】

白居易

缭绕府西面，潺湲池北头。凿开明月峡，决破白蘋洲。
清浅漪澜急，夤缘浦屿幽。直冲行径断，平入卧斋流。
石叠青棱玉，波翻白片鸥。喷时千点雨，澄处一泓油。
绝境应难别，同心岂易求。少逢人爱玩，多是我淹留。
夹岸铺长簟，当轩泊小舟。枕前看鹤浴，床下见鱼游。
洞户斜开扇，疏帘半上钩。紫浮萍泛泛，碧亚竹修修。
读罢书仍展，棋终局未收。午茶能散睡，卯酒善销愁。
檐雨晚初霁，窗风凉欲休。谁能伴老尹，时复一闲游。

卷 451_64【哭崔儿】

白居易

掌珠一颗儿三岁，鬓雪千茎父六旬。岂料汝先为异物，
常忧吾不见成人。悲肠自断非因剑，啼眼加昏不是尘。
怀抱又空天默默，依前重作邓攸身。

卷 451_65【初丧崔儿报微之晦叔】

白居易

· 全唐诗 ·

书报微之晦叔知，欲题崔字泪先垂。世间此恨偏敦我，
天下何人不哭儿。蝉老悲鸣抛蜕后，龙眠惊觉失珠时。
文章十帙官三品，身后传谁庇荫谁。

卷 451_66【府斋感怀酬梦得】

白居易

府伶呼唤争先到，家酝提携动辄随。合是人生开眼日，
自当年老敛眉时。丹砂炼作三铢土，玄发看成一把丝。
劳寄新诗远安慰，不闻枯树再生枝。

卷 451_67【斋居】

白居易

香火多相对，荤腥久不尝。黄耆数匙粥，赤箭一瓯汤。
厚俸将何用，闲居不可忘。明年官满后，拟买雪堆庄。

卷 451_68【与诸道者同游二室至九龙潭作】

白居易

喜逢二室游仙子，厌作三川守土臣。举手摩挲潭上石，

· 全唐诗 ·

开襟斗薮府中尘。他日终为独往客，今朝未是自由身。
若言尹是嵩山主，三十六峰应笑人。

卷 451_69【履道池上作】

白居易

家池动作经旬别，松竹琴鱼好在无。树暗小巢藏巧妇，
渠荒新叶长慈姑。不因车马时时到，岂觉林园日日芜。
犹喜春深公事少，每来花下得踟蹰。

卷 451_70【六十拜河南尹】

白居易

六十河南尹，前途足可知。老应无处避，病不与人期。
幸遇芳菲日，犹当强健时。万金何假藉，一醺莫推辞。
流水光阴急，浮云富贵迟。人间若无酒，尽合鬓成丝。

卷 451_71【重修府西水亭院】

白居易

因下疏为沼，随高筑作台。龙门分水入，金谷取花栽。

· 全唐诗 ·

绕岸行初匝，凭轩立未回。园西有池位，留与后人开。

卷 451_72【与诸公同出城观稼】

白居易

老尹醉醺醺，来随年少群。不忧头似雪，但喜稼如云。
岁望千箱积，秋怜五谷分。何人知帝力，尧舜正为君。

卷 451_73【水堂醉卧问杜三十一】

白居易

闻君洛下住多年，何处春流最可怜。为问魏王堤岸下，
何如同德寺门前。无妨水色堪闲玩，不得泉声伴醉眠。
那似此堂帘幕底，连明连夜碧潺湲。

卷 451_74【岁暮言怀】

白居易

职与才相背，心将口自言。磨铅教切玉，驱鹤遣乘轩。
只合居岩窟，何因入府门。年终若无替，转恐负君恩。

· 全唐诗 ·

卷 451_75 【座中戏呈诸少年】

白居易

衰容禁得无多酒，秋鬓新添几许霜。纵有风情应淡薄，
假如老健莫夸张。兴来吟咏从成癖，饮后酣歌少放狂。
不为倚官兼挟势，因何入得少年场。

卷 451_76 【雪后早过天津桥偶呈诸客】

白居易

官桥晴雪晓峨峨，老尹行吟独一过。紫绶相辉应不恶，
白须同色复如何。悠扬短景凋年急，牢落衰情感事多。
犹赖洛中饶醉客，时时泥我唤笙歌。

卷 451_77 【新制绫袄成，感而有咏】

白居易

水波纹袄造新成，绫软绵匀温复轻。晨兴好拥向阳坐，
晚出宜披蹋雪行。鹤氅毳疏无实事，木棉花冷得虚名。
宴安往往欢侵夜，卧稳昏昏睡到明。百姓多寒无可救，
一身独暖亦何情。心中为念农桑苦，耳里如闻饥冻声。

· 全唐诗 ·

争得大裘长万丈，与君都盖洛阳城。

卷 451_78【早春雪后赠洛阳李长官长水郑明府二同年】

白居易

献岁晴和风景新，铜驼街郭暖无尘。府庭共贺三川雪，
县道分行百里春。朱绂洛阳官位屈，青袍长水俸钱贫。
有何功德纡金紫，若比同年是幸人。

卷 451_79【醉吟】

白居易

醉来忘渴复忘饥，冠带形骸杳若遗。耳底斋钟初过后，
心头卯酒未消时。临风朗咏从人听，看雪闲行任马迟。
应被众疑公事慢，承前府尹不吟诗。

卷 451_80【府酒五绝·变法】

白居易

自惭到府来周岁，惠爱威棱一事无。
唯是改张官酒法，渐从浊水作醍醐。

· 全唐诗 ·

卷 451_81【府酒五绝·招客】

白居易

日午微风且暮寒，春风冷峭雪乾残。
碧毡帐下红炉畔，试为来尝一醺看。

卷 451_82【府酒五绝·辨味】

白居易

甘露太甜非正味，醴泉虽洁不芳馨。
杯中此物何人别，柔旨之中有典刑。

卷 451_83【府酒五绝·自劝】

白居易

忆昔羈贫应举年，脱衣典酒曲江边。
十千一斗犹赊饮，何况官供不著钱。

卷 451_84【府酒五绝·谕妓】

· 全唐诗 ·

白居易

烛泪夜粘桃叶袖，酒痕春污石榴裙。
莫辞辛苦供欢宴，老后思量悔煞君。

卷 451_85【晚归早出】

白居易

筋力年年减，风光日日新。退衙归逼夜，拜表出侵晨。
何处台无月，谁家池不春。莫言无胜地，自是少闲人。
坐厌推囚案，行嫌引马尘。几时辞府印，却作自由身。

卷 451_86【南龙兴寺残雪】

白居易

南龙兴寺春晴后，缓步徐吟绕四廊。老趁风花应不称，
闲寻松雪正相当。吏人引从多乘舆，宾客逢迎少下堂。
不拟人间更求事，些些疏懒亦何妨。

卷 451_87【天宫阁早春】

白居易

· 全唐诗 ·

天宫高阁上何频，每上令人耳目新。前日晚登缘看雪，
今朝晴望为迎春。林莺何处吟箏柱，墙柳谁家晒麹尘。
可惜三川虚作主，风光不属白头人。

卷 451_88【履道居三首】

白居易

莫嫌地窄林亭小，莫厌贫家活计微。
大有高门锁宽宅，主人到老不曾归。

东里素帷犹未彻，南邻丹旌又新悬。
衡门蜗舍自惭愧，收得身来已五年。

世事平分众所知，何尝苦乐不相随。
唯馀耽酒狂歌客，只有乐时无苦时。

卷 451_89【和梦得冬日晨兴】

白居易

漏传初五点，鸡报第三声。帐下从容起，窗间曛昉明。
照书灯未灭，暖酒火重生。理曲弦歌动，先闻唱渭城。

· 全唐诗 ·

卷 451_90【雪夜对酒招客】

白居易

帐小青毡暖，杯香绿蚁新。醉怜今夜月，欢忆去年人。
暗落灯花烬，闲生草座尘。殷勤报弦管，明日有嘉宾。

卷 451_91【赠晦叔忆梦得】

白居易

自别崔公四五秋，因何临老转风流。归来不说秦中事，
歇定唯谋洛下游。酒面浮花应是喜，歌眉敛黛不关愁。
得君更有无厌意，犹恨尊前欠老刘。

卷 451_92【醉后重赠晦叔】

白居易

老伴知君少，欢情向我偏。无论疏与数，相见辄欣然。
各以诗成癖，俱因酒得仙。笑回青眼语，醉并白头眠。
岂是今投分，多疑宿结缘。人间更何事，携手送衰年。

· 全唐诗 ·

卷 451_93 【睡觉】

白居易

星河耿耿漏绵绵，月暗灯微欲曙天。转枕频伸书帐下，
披裘箕踞火炉前。老眠早觉常残夜，病力先衰不待年。
五欲已销诸念息，世间无境可勾牵。

.

· 全唐诗 ·

第四百五十二卷

卷 452_1【咏兴五首·解印出公府】

白居易

解印出公府，斗薮尘土衣。百吏放尔散，双鹤随我归。
归来履道宅，下马入柴扉。马嘶返旧枥，鹤舞还故池。
鸡犬何忻忻，邻里亦依依。年颜老去日，生计胜前时。
有帛御冬寒，有谷防岁饥。饱于东方朔，乐于荣启期。
人生且如此，此外吾不知。

卷 452_2【咏兴五首·出府归吾庐】

白居易

出府归吾庐，静然安且逸。更无客干谒，时有僧问疾。
家僮十余人，枥马三四匹。慵发经旬卧，兴来连日出。
出游爱何处，嵩碧伊瑟瑟。况有清和天，正当疏散日。
身闲自为贵，何必居荣秩。心足即非贫，岂唯金满室。
吾观权势者，苦以身徇物。炙手外炎炎，履冰中栗栗。
朝饥口忘味，夕惕心忧失。但有富贵名，而无富贵实。

· 全唐诗 ·

卷 452_3【咏兴五首·池上有小舟】

白居易

池上有小舟，舟中有胡床。床前有新酒，独酌还独尝。
熏若春日气，皎如秋水光。可洗机巧心，可荡尘垢肠。
岸曲舟行迟，一曲进一觴。未知几曲醉，醉入无何乡。
寅缘潭岛间，水竹深青苍。身闲心无事，白日为我长。
我若未忘世，虽闲心亦忙。世若未忘我，虽退身难藏。
我今异于是，身世交相忘。

卷 452_4【咏兴五首·四月池水满】

白居易

四月池水满，龟游鱼跃出。吾亦爱吾池，池边开一室。
人鱼虽异族，其乐归于一。且与尔为徒，逍遥同过日。
尔无羨沧海，蒲藻可委质。吾亦忘青云，衡茅足容膝。
况吾与尔辈，本非蛟龙匹。假如云雨来，只是池中物。

卷 452_5【咏兴五首·小庭亦有月】

白居易

· 全唐诗 ·

小庭亦有月，小院亦有花。可怜好风景，不解嫌贫家。
菱角执笙簧，谷儿抹琵琶。红绡信手舞，紫绡随意歌。
村歌与社舞，客哂主人夸。但问乐不乐，岂在钟鼓多。
客告暮将归，主称日未斜。请客稍深酌，愿见朱颜酡。
客知主意厚，分数随口加。堂上烛未秉，座中冠已峨。
左顾短红袖，右命小青娥。长跪谢贵客，蓬门劳见过。
客散有余兴，醉卧独吟哦。幕天而席地，谁奈刘伶何。

卷 452_6【秋凉闲卧】

白居易

残暑昼犹长，早凉秋尚嫩。露荷散清香，风竹含疏韵。
幽闲竟日卧，衰病无人问。薄暮宅门前，槐花深一寸。

卷 452_7【酬思黯相公见过弊居戏赠】

白居易

轩盖光照地，行人为裴回。呼传君子出，乃是故人来。
访我入穷巷，引君登小台。台前多竹树，池上无尘埃。
贫家何所有，新酒三两杯。停杯款曲语，上马复迟回。
留守不外宿，日斜宫漏催。但留金刀赠，未接玉山颓。
家酝不敢惜，待君来即开。村妓不辞出，恐君輶然咍。

· 全唐诗 ·

卷 452_8 【再授宾客分司】

白居易

优稳四皓官，清崇三品列。伊予再尘忝，内愧非才哲。
俸钱七八万，给受无虚月。分命在东司，又不劳朝谒。
既资闲养疾，亦赖慵藏拙。宾友得从容，琴觞恣怡悦。
乘篮城外去，系马花前歇。六游金谷春，五看龙门雪。
吾若默无语，安知吾快活。吾欲更尽言，复恐人豪夺。
应为时所笑，苦惜分司阙。但问适意无，岂论官冷热。

卷 452_9 【把酒】

白居易

把酒仰问天，古今谁不死。所贵未死间，少忧多欢喜。
穷通谅在天，忧喜即由己。是故达道人，去彼而取此。
勿言未富贵，久忝居禄仕。借问宗族间，几人拖金紫。
勿忧渐衰老，且喜加年纪。试数班行中，几人及暮齿。
朝餐不过饱，五鼎徒为尔。夕寝止求安，一衾而已矣。
此外皆长物，于我云相似。有子不留金，何况兼无子。

卷 452_10 【首夏】

· 全唐诗 ·

白居易

林静蚊未生，池静蛙未鸣。景长天气好，竟日和且清。
春禽馀哢在，夏木新阴成。兀尔水边坐，翛然桥上行。
自问一何适，身闲官不轻。料钱随月用，生计逐日营。
食饱惭伯夷，酒足愧渊明。寿倍颜氏子，富百黔娄生。
有一即为乐，况吾四者并。所以私自慰，虽老有心情。

卷 452_11【代鹤】

白居易

我本海上鹤，偶逢江南客。感君一顾恩，同来洛阳陌。
洛阳寡族类，皎皎唯两翼。貌是天与高，色非日浴白。
主人诚可恋，其奈轩庭窄。饮啄杂鸡群，年深损标格。
故乡渺何处，云水重重隔。谁念深笼中，七换摩天翮。

卷 452_12【立秋夕有怀梦得】

白居易

露簟荻竹清，风扇蒲葵轻。一与故人别，再见新蝉鸣。
是夕凉飚起，闲境入幽情。回灯见栖鹤，隔竹闻吹笙。
夜茶一两杓，秋吟三数声。所思渺千里，云外长洲城。

· 全唐诗 ·

卷 452_13【哭崔常侍晦叔】

白居易

顽贱一拳石，精珍百炼金。名价既相远，交分何其深。
中诚一以合，外物不能侵。逶迤二十年，与世同浮沈。
晚有退闲约，白首归云林。垂老忽相失，悲哉口语心。
春日嵩高阳，秋夜清洛阴。丘园共谁卜，山水共谁寻。
风月共谁赏，诗篇共谁吟。花开共谁看，酒熟共谁斟。
惠死庄杜口，钟殁师废琴。道理使之然，从古非独今。
吾道自此孤，我情安可任。唯将病眼泪，一洒秋风襟。

卷 452_14【新秋晓兴】

白居易

浊暑忽已退，清宵未全长。晨缸耿残焰，宿闇凝微香。
喔喔鸡下树，辉辉日上梁。枕低茵席软，卧稳身入床。
睡足景犹早，起初风乍凉。展张小屏幃，收拾生衣裳。
还有惆怅事，迟迟未能忘。拂镜梳白发，可怜冰照霜。

卷 452_15【秋日与张宾客舒著作同游龙门，醉中狂歌，凡二百三十八字】

· 全唐诗 ·

白居易

秋天高高秋光清，秋风袅袅秋虫鸣。嵩峰馀霞锦绮卷，
伊水细浪鳞甲生。洛阳闲客知无数，少出游山多在城。
商岭老人自追逐，蓬丘逸士相逢迎。南出鼎门十八里，
庄店迢迢桥道平。不寒不热好时节，鞍马稳快衣衫轻。
并辔踟蹰下西岸，扣舷容与绕中汀。开怀旷达无所系，
触目胜绝不可名。荷衰欲黄苒犹绿，鱼乐自跃鸥不惊。
翠藻蔓长孔雀尾，彩船橈急寒雁声。家酝一壶白玉液，
野花数把黄金英。昼游四看西日暮，夜话三及东方明。
暂停杯觞辍吟咏，我有狂言君试听。丈夫一生有二志，
兼济独善难得并。不能救疗生民病，即须先濯尘土缨。
况吾头白眼已暗，终日戚促何所成。不如展眉开口笑，
龙门醉卧香山行。

卷 452_16【履信池樱桃岛上，醉后走笔，送别舒员外，兼
寄宗正李卿考功崔郎中】

白居易

樱桃岛前春，去春花万枝。忽忆与宗卿闲饮日，
又忆与考功狂醉时。岁晚无花空有叶，风吹满地乾重叠。
蹋叶悲秋复忆春，池边树下重殷勤。今朝一酌临寒水，
此地三回别故人。樱桃花，来春千万朵，
来春共谁花下坐。不论崔李上青云，明日舒三亦抛我。

· 全唐诗 ·

卷 452_17【秋池独泛】

白居易

萧疏秋竹篱，清浅秋风池。一只短舫艇，一张斑鹿皮。
皮上有野叟，手中持酒卮。半酣箕踞坐，自问身为谁。
严子垂钓日，苏门长啸时。悠然意自得，意外何人知。

卷 452_18【冬日早起闲咏】

白居易

水塘耀初旭，风竹飘馀霰。幽境虽目前，不因闲不见。
晨起对炉香，道经寻两卷。晚坐拂琴尘，秋思弹一遍。
此外更无事，开尊时自劝。何必东风来，一杯春上面。

卷 452_19【岁暮】

白居易

惨澹岁云暮，穷阴动经旬。霜风裂人面，冰雪摧车轮。
而我当是时，独不知苦辛。晨炊廩有米，夕爨厨有薪。
夹帽长覆耳，重裘宽裹身。加之一杯酒，煦妪如阳春。
洛城士与庶，比屋多饥贫。何处炉有火，谁家甑无尘。

· 全唐诗 ·

如我饱暖者，百人无一人。安得不惭愧，放歌聊自陈。

卷 452_20 【南池早春有怀】

白居易

朝游北桥上，晚憩南塘畔。西日雪全销，东风冰尽泮。
蓊蓊鱼尾掉，瞥瞥鹅毛换。泥暖草芽生，沙虚泉脉散。
晴芳冒苔岛，宿润侵蒲岸。洛下日初长，江南春欲半。
时光共抛掷，人事堪嗟叹。倚棹忽寻思，去年池上伴。

卷 452_21 【古意】

白居易

脉脉复脉脉，美人千里隔。不见来几时，瑶草三四碧。
玉琴声悄悄，鸾镜尘幂幂。昔为连理枝，今作分飞翮。
寄书多不达，加饭终无益。心肠不自宽，衣带何由窄。

卷 452_22 【山游示小妓】

白居易

双鬟垂未合，三十才过半。本是绮罗人，今为山水伴。

· 全唐诗 ·

春泉共挥弄，好树同攀玩。笑容共底迷，酒思风前乱。
红凝舞袖急，黛惨歌声缓。莫唱杨柳枝，无肠与君断。

卷 452_23 【神照禅师同宿】

白居易

八年三月晦，山梨花满枝。龙门水西寺，夜与远公期。
晏坐自相对，密语谁得知。前后际断处，一念不生时。

卷 452_24 【张常侍相访】

白居易

西亭晚寂寞，莺散柳阴繁。水户帘不卷，风床席自翻。
忽闻车马客，来访蓬蒿门。况是张常侍，安得不开尊。

卷 452_25 【早夏游宴】

白居易

虽慵兴犹在，虽老心犹健。昨日山水游，今朝花酒宴。
山榴艳似火，王蕊飘如霰。荣落逐瞬迁，炎凉随刻变。
未收木绵褥，已动蒲葵扇。且喜物与人，年年得相见。

· 全唐诗 ·

卷 452_26 【感白莲花】

白居易

白白芙蓉花，本生吴江滨。不与红者杂，色类自区分。
谁移尔至此，姑苏白使君。初来苦憔悴，久乃芳氛氲。
月月叶换叶，年年根生根。陈根与故叶，销化成泥尘。
化者日已远，来者日复新。一为池中物，永别江南春。
忽想西凉州，中有天宝民。埋歿汉父祖，孳生胡子孙。
已忘乡土恋，岂念君亲恩。生人尚复尔，草木何足云。

卷 452_27 【咏所乐】

白居易

兽乐在山谷，鱼乐在陂池。虫乐在深草，鸟乐在高枝。
所乐虽不同，同归适其宜。不以彼易此，况论是与非。
而我何所乐，所乐在分司。分司有何乐，乐哉人不知。
官优有禄料，职散无羁縻。懒与道相近，钝将闲自随。
昨朝拜表回，今晚行香归。归来北窗下，解巾脱尘衣。
冷泉灌我顶，暖水濯四肢。体中幸无疾，卧任清风吹。
心中又无事，坐任白日移。或开书一篇，或引酒一卮。
但得如今日，终身无厌时。

· 全唐诗 ·

卷 452_28【思旧】

白居易

闲日一思旧，旧游如目前。再思今何在，零落归下泉。
退之服硫黄，一病讫不痊。微之炼秋石，未老身溘然。
杜子得丹诀，终日断腥膻。崔君夸药力，经冬不衣绵。
或疾或暴天，悉不过中年。唯予不服食，老命反迟延。
况在少壮时，亦为嗜欲牵。但耽葷与血，不识汞与铅。
饥来吞热物，渴来饮寒泉。诗役五藏神，酒汨三丹田。
随日合破坏，至今粗完全。齿牙未脱落，肢体尚轻便。
已开第七秩，饱食仍安眠。且进杯中物，其余皆付天。

卷 452_29【寄卢少尹】

白居易

老诲心不乱，庄戒形太劳。生命既能保，死籍亦可逃。
嘉肴与旨酒，信是腐肠膏。艳声与丽色，真为伐性刀。
补养在积功，如裘集众毛。将欲致千里，可得差一毫。
颜回何为者，簞瓢才自给。肥醲不到口，年不登三十。
张苍何为者，染爱浩无际。妾媵填后房，竟寿百余岁。
苍寿有何德，回夭有何辜。谁谓具圣体，不如肥瓠躯。
遂使世俗心，多疑仙道书。寄问卢先生，此理当何如。

· 全唐诗 ·

卷 452_30【池上清晨候皇甫郎中】

白居易

晓景丽未热，晨飈鲜且凉。池幽绿蘋合，霜洁白莲香。
深扫竹间径，静拂松下床。玉柄鹤翎扇，银罍云母浆。
屏除无俗物，瞻望唯清光。何人拟相访，羸女从萧郎。

卷 452_31【咏怀】

白居易

我知世无幻，了无干世意。世知我无堪，亦无责我事。
由兹两相忘，因得长自遂。自遂意何如，闲官在闲地。
闲地唯东都，东都少名利。闲官是宾客，宾客无牵累。
嵇康日日懒，毕卓时时醉。酒肆夜深归，僧房日高睡。
形安不劳苦，神泰无忧畏。从官三十年，无如今气味。
鸿虽脱罗弋，鹤尚居禄位。唯此未忘怀，有时犹内愧。

卷 452_32【北窗三友】

白居易

今日北窗下，自问何所为。欣然得三友，三友者为谁。

· 全唐诗 ·

琴罢辄举酒，酒罢辄吟诗。三友递相引，循环无已时。
一弹惬中心，一咏畅四肢。犹恐中有间，以酒弥缝之。
岂独吾拙好，古人多若斯。嗜诗有渊明，嗜琴有启期。
嗜酒有伯伦，三人皆吾师。或乏詹石储，或穿带索衣。
弦歌复觞咏，乐道知所归。三师去已远，高风不可追。
三友游甚熟，无日不相随。左掷白玉卮，右拂黄金徽。
兴酣不叠纸，走笔操狂词。谁能持此词，为我谢亲知。
纵未以为是，岂以我为非。

卷 452_33 【吟四虽】

白居易

酒酣后，歌歇时。请君添一酌，听我吟四虽。年虽老，
犹少于韦长史。命虽薄，犹胜于郑长水。眼虽病，
犹明于徐郎中。家虽贫，犹富于郭庶子。省躬审分何侥幸，
值酒逢歌且欢喜。忘荣知足委天和，亦应得尽生生理。

卷 452_34 【裴侍中晋公以集贤林亭即事诗三十六韵见赠，
猥梦征和，才拙词繁，辄广为五百言以伸酬献】

白居易

三江路千里，五湖天一涯。何如集贤第，中有平津池。
池胜主见觉，景新人未知。竹森翠琅玕，水深洞琉璃。

· 全唐诗 ·

水竹以为质，质立而文随。文之者何人，公来亲指麾。
疏凿出人意，结构得地宜。灵襟一搜索，胜概无遁遗。
因下张沼沚，依高筑阶基。嵩峰见数片，伊水分一支。
南溪修且直，长波碧逶迤。北馆壮复丽，倒影红参差。
东岛号晨光，杲曜迎朝曦。西岭名夕阳，杳暖留落晖。
前有水心亭，动荡架涟漪。后有开阖堂，寒温变天时。
幽泉镜泓澄，怪石山欹危。春葩雪漠漠，夏果珠离离。
主人命方舟，宛在水中坻。亲宾次第至，酒乐前后施。
解缆始登泛，山游仍水嬉。沿洄无滞碍，向背穷幽奇。
瞥过远桥下，飘旋深涧陲。管弦去缥缈，罗绮来霏微。
棹风逐舞回，梁尘随歌飞。宴馀日云暮，醉客未放归。
高声索彩笺，大笑催金卮。唱和笔走疾，问答杯行迟。
一咏清两耳，一酣畅四肢。主客忘贵贱，不知俱是谁。
客有诗魔者，吟哦不知疲。乞公残纸墨，一扫狂歌词。
维云社稷臣，赫赫文武姿。十授丞相印，五建大将旗。
四朝致勋华，一身冠皋夔。去年才七十，决赴悬车期。
公志不可夺，君恩亦难希。从容就中道，勉曳来保厘。
貂蝉虽未脱，鸾皇已不羁。历征今与古，独步无等夷。
陆贾功业少，二疏官秩卑。乘舟范蠡惧，辟谷留侯饥。
岂若公今日，身安家国肥。羊祜在汉南，空留岘首碑。
柳恽在江南，只赋汀洲诗。谢安入东山，但说携蛾眉。
山简醉高阳，唯闻倒接_离。岂如公今日，余力兼有之。
愿公寿如山，安乐长在兹。愿我比蒲稗，永得相因依。

· 全唐诗 ·

白居易

我年日已老，我身日已闲。闲出都门望，但见水与山。
关塞碧岩岩，伊流清潺潺。中有古精舍，轩户无扃关。
岸草歇可藉，径萝行可攀。朝随浮云出，夕与飞鸟还。
吾道本迂拙，世途多险艰。尝闻嵇吕辈，尤悔生疏顽。
巢悟入箕颍，皓知返商巖。岂唯乐肥遁，聊复祛忧患。
吾亦从此去，终老伊嵩间。

卷 452_36 【张常侍池凉夜闲宴赠诸公】

白居易

竹桥新月上，水岸凉风至。对月五六人，管弦三两事。
留连池上酌，款曲城外意。或啸或讴吟，谁知此闲味。
回看市朝客，矻矻趋名利。朝忙少游宴，夕困多眠睡。
清凉属吾徒，相逢勿辞醉。

卷 452_37 【和皇甫郎中秋晓同登天宫阁言怀六韵】

白居易

碧天忽已高，白日犹未短。玲珑晓楼阁，清脆秋丝管。
张翰一杯酣，嵇康终日懒。尘中足忧累，云外多疏散。
病木斧斤遗，冥鸿羁绁断。逍遥二三子，永愿为闲伴。

· 全唐诗 ·

卷 452_38【送吕漳州】

白居易

今朝一壶酒，言送漳州牧。半自要闲游，爱花怜草绿。
花前下鞍马，草上携丝竹。行客饮数杯，主人歌一曲。
端居惜风景，屡出劳僮仆。独醉似无名，借君作题目。

卷 452_39【短歌曲】

白居易

世人求富贵，多为奉嗜欲。盛衰不自由，得失常相逐。
问君少年日，苦学将干禄。负笈尘中游，抱书雪前读。
布衾不周体，藜茹才充腹。三十登宦途，五十被朝服。
奴温新挟纩，马肥初食粟。未敢议欢游，尚为名检束。
耳目聒暗后，堂上调丝竹。牙齿缺落时，盘中堆酒肉。
彼来此已去，外余中不足。少壮与荣华，相避如寒燠。
青云去地远，白日经天速。从古无奈何，短歌听一曲。

卷 452_40【咏怀】

白居易

· 全唐诗 ·

高人乐丘园，中人慕官职。一事尚难成，两途安可得。
遑遑干世者，多苦时命塞。亦有爱闲人，又为穷饿逼。
我今幸双遂，禄仕兼游息。未尝羨荣华，不省劳心力。
妻孥与婢仆，亦免愁衣食。所以吾一家，面无忧喜色。

卷 452_41 【府西亭纳凉归】

白居易

避暑府西亭，晚归有闲思。夏浅蝉未多，绿槐阴满地。
带宽衫解领，马稳人拢辔。面上有凉风，眼前无俗事。
路经府门过，落日照官次。牵联縲绁囚，奔走尘埃吏。
低眉悄不语，谁复知兹意。忆得五年前，晚衙时气味。

卷 452_42 【老热】

白居易

一饱百情足，一酣万事休。何人不衰老，我老心无忧。
仕者拘职役，农者劳田畴。何人不苦热，我热身自由。
卧风北窗下，坐月南池头。脑凉脱乌帽，足热濯清流。
慵发昼高枕，兴来夜泛舟。何乃有馀适，只缘无过求。
或问诸亲友，乐天是与不。亦无别言语，多道天悠悠。
悠悠君不知，此味深且幽。但恐君知后，亦来从我游。

· 全唐诗 ·

卷 452_43【新秋喜凉，因寄兵部杨侍郎】

白居易

外强火未退，中锐金方战。一夕风雨来，炎凉随数变。
徐徐炎景度，稍稍凉飙扇。枕簟忽凄清，巾裳亦轻健。
老夫纳秋候，心体殊安便。睡足一屈伸，搔首摩挲面。
褰帘对池竹，幽寂如僧院。俯观游鱼群，仰数浮云片。
闲忙各有趣，彼此宁相见。昨日闻慕巢，召对延英殿。

卷 452_44【懒放二首，呈刘梦得、吴方之】

白居易

青衣报平旦，呼我起盥栉。今早天气寒，郎君应不出。
又无宾客至，何以销闲日。已向微阳前，暖酒开诗帙。

朝怜一床日，暮爱一炉火。床暖日高眠，炉温夜深坐。
雀罗门懒出，鹤发头慵裹。除却刘与吴，何人来问我。

卷 452_45【六十六】

白居易

· 全唐诗 ·

病知心力减，老觉光阴速。五十八归来，今年六十六。
鬓丝千万白，池草八九绿。童稚尽成人，园林半乔木。
看山倚高石，引水穿深竹。虽有潺湲声，至今听未足。

卷 452_46【三适赠道友】

白居易

褐绫袍厚暖，卧盖行坐披。紫毡履宽稳，蹇步颇相宜。
足适已忘履，身适已忘衣。况我心又适，兼忘是与非。
三适今为一，怡怡复熙熙。禅那不动处，混沌未凿时。
此固不可说，为君强言之。

卷 452_47【洛阳春赠刘李二宾客】

白居易

水南冠盖地，城东桃李园。雪消洛阳堰，春入永通门。
淑景方霭霭，游人稍喧喧。年丰酒浆贱，日晏歌吹繁。
中有老朝客，华发映朱轩。从容三两人，藉草开一尊。
尊前春可惜，身外事勿论。明日期何处，杏花游赵村。

卷 452_48【寒食】

· 全唐诗 ·

白居易

人老何所乐，乐在归乡国。我归故园来，九度逢寒食。
故园在何处，池馆东城侧。四邻梨花时，二月伊水色。
岂独好风土，仍多旧亲戚。出去恣欢游，归来聊燕息。
有官供禄俸，无事劳心力。但恐优稳多，微躬销不得。

卷 452_49【和裴令公一日日一年年杂言见赠】

白居易

一日日，作老翁。一年年，过春风。公心不以贵隔我，
我散唯将闲伴公。我无才能忝高秩，合是人间闲散物。
公有功德在生民，何因得作自由身。前日魏王潭上宴连夜，
今日午桥池头游拂晨。山客砚前吟待月，野人尊前醉送春。
不敢与公闲中争第一，亦应占得第二第三人。

· 全唐诗 ·

第四百五十三卷

卷 453_1【题裴晋公女几山刻石诗后】

白居易

何处画功业，何处题诗篇。麒麟高阁上，女几小山前。
尔后多少时，四朝二十年。贼骨化为土，贼垒犁为田。
一从贼垒平，陈蔡民晏然。骤军成牛户，鬼火变人烟。
生子已嫁娶，种桑亦丝绵。皆云公之德，欲报无由缘。
公今在何处，守都镇三川。旧宅留永乐，新居开集贤。
公今在何官，被袞珥貂蝉。战袍破犹在，髀肉生欲圆。
襟怀转萧洒，气力弥精坚。登山不拄杖，上马能掉鞭。
利泽浸入池，福降升自天。昔号天下将，今称地上仙。
勿追赤松游，勿拍洪崖肩。商山有遗老，可以奉周旋。

卷 453_2【洛阳有愚叟】

白居易

洛阳有愚叟，白黑无分别。浪迹虽似狂，谋身亦不拙。
点检盘中饭，非精亦非粝。点检身上衣，无馀亦无阙。

· 全唐诗 ·

天时方得所，不寒复不热。体气正调和，不饥仍不渴。
闲将酒壶出，醉向人家歇。野食或烹鲜，寓眠多拥褐。
抱琴荣启乐，荷锸刘伶达。放眼看青山，任头生白发。
不知天地内，更得几年活。从此到终身，尽为闲日月。

卷 453_3【饱食闲坐】

白居易

红粒陆浑稻，白鳞伊水鲂。庖童呼我食，饭热鱼鲜香。
箸箸适我口，匙匙充我肠。八珍与五鼎，无复心思量。
扪腹起盥漱，下阶振衣裳。绕庭行数匝，却上檐下床。
箕踞拥裘坐，半身在日暘。可怜饱暖味，谁肯来同尝。
是岁太和八，兵销时渐康。朝廷重经术，草泽搜贤良。
尧舜求理切，夔龙启沃忙。怀才抱智者，无不走遑遑。
唯此不才叟，顽慵恋洛阳。饱食不出门，闲坐不下堂。
子弟多寂寞，僮仆少精光。衣食虽充给，神意不扬扬。
为尔谋则短，为吾谋甚长。

卷 453_4【闲居自题】

白居易

门前有流水，墙上多高树。竹径绕荷池，萦回百馀步。
波闲戏鱼鳖，风静下鸥鹭。寂无城市喧，渺有江湖趣。

· 全唐诗 ·

吾庐在其上，偃卧朝复暮。洛下安一居，山中亦慵去。
时逢过客爱，问是谁家住。此是白家翁，闭门终老处。

卷 453_5【览镜喜老】

白居易

今朝览明镜，须鬓尽成丝。行年六十四，安得不衰羸。
亲属惜我老，相顾兴叹咨。而我独微笑，此意何人知。
笑罢仍命酒，掩镜捋白髭。尔辈且安坐，从容听我词。
生若不足恋，老亦何足悲。生若苟可恋，老即生多时。
不老即须夭，不夭即须衰。晚衰胜早夭，此理决不疑。
古人亦有言，浮生七十稀。我今欠六岁，多幸或庶几。
倘得及此限，何羨荣启期。当喜不当叹，更倾酒一卮。

卷 453_6【风雪夜中作】

白居易

岁暮风动地，夜寒雪连天。老夫何处宿，暖帐温炉前。
两重褐绮衾，一领花茸毡。粥熟呼不起，日高安稳眠。
是时心与身，了无闲事牵。以此度风雪，闲居来六年。
忽思远游客，复想早朝士。蹋冻侵夜行，凌寒未明起。
心为身君父，身为心臣子。不得身自由，皆为心所使。
我心既知足，我身自安止。方寸语形骸，吾应不负尔。

· 全唐诗 ·

卷 453_7【对琴酒】

白居易

西窗明且暖，晚坐卷书帷。琴匣拂开后，酒瓶添满时。
角尊白螺醖，玉轸黄金徽。未及弹与酌，相对已依依。
泠泠秋泉韵，贮在龙凤池。油油春云心，一杯可致之。
自古有琴酒，得此味者稀。只因康与籍，及我三心知。

卷 453_8【雪中晏起偶咏所怀兼呈张常侍、韦庶子、皇甫郎中】

白居易

穷阴苍苍雪雰雰，雪深没胫泥埋轮。东家典钱归碍夜，
南家貰米出凌晨。我独何者无此弊，复帐重衾暖若春。
怕寒放懒不肯动，日高眠足方频伸。瓶中有酒炉有炭，
瓮中有饭庖有薪。奴温婢饱身晏起，致兹快活良有因。
上无皋陶伯益廊庙材，的不能匡君辅国活生民。
下无巢父许由箕颍操，又不能食薇饮水自苦辛。
君不见南山悠悠多白云，又不见西京浩浩唯红尘。
红尘闹热白云冷，好于冷热中间安置身。三年侥幸忝洛尹，
两任优稳为商宾。非贤非愚非智慧，不贵不富不贱贫。
冉冉老去过六十，腾腾闲来经七春。不知张韦与皇甫，
私唤我作何如人。

· 全唐诗 ·

卷 453_9【和裴侍中南园静兴见示】

白居易

池馆清且幽，高怀亦如此。有时帘动风，尽日桥照水。
静将鹤为伴，闲与云相似。何必学留侯，崎岖觅松子。

卷 453_10【春寒】

白居易

今朝春气寒，自问何所欲。酥暖薤白酒，乳和地黄粥。
岂惟厌馋口，亦可调病腹。助酌有枯鱼，佐餐兼旨蓄。
省躬念前哲，醉饱多惭忸。君不闻靖节先生尊长空，
广文先生饭不足。

卷 453_11【菩提寺上方晚望香山寺，寄舒员外】

白居易

晚登西宝刹，晴望东精舍。反照转楼台，辉辉似图画。
冰浮水明灭，雪压松偃亚。石阁僧上来，云汀雁飞下。
西京闹于市，东洛闲如社。曾忆旧游无，香山明月夜。

· 全唐诗 ·

卷 453_12【二月一日作，赠韦七庶子】

白居易

园杏红萼坼，庭兰紫芽出。不觉春已深，今朝二月一。
去冬病疮痍，将养遵医术。今春入道场，清净依僧律。
尝闻圣贤语，所慎斋与疾。遂使爱酒人，停杯一百日。
明朝二月二，疾平斋复毕。应须挈一壶，寻花觅韦七。

卷 453_13【犬鸢】

白居易

晚来天气好，散步中门前。门前何所有，偶睹犬与鸢。
鸢饱凌风飞，犬暖向日眠。腹舒稳贴地，翅凝高摩天。
上无罗弋忧，下无羁锁牵。见彼物遂性，我亦心适然。
心适复何为，一咏逍遥篇。此仍著于适，尚未能忘言。

卷 453_14【梦刘二十八，因诗问之】

白居易

昨夜梦梦得，初觉思踟蹰。忽忘来汝郡，犹疑在吴都。
吴都三千里，汝郡二百馀。非梦亦不见，近与远何殊。

· 全唐诗 ·

尚能齐近远，焉用论荣枯。但问寝与食，近日两何如。
病后能吟否，春来曾醉无。楼台与风景，汝又何如苏。
相思一相报，勿复慵为书。

卷 453_15【闲吟】

白居易

贫穷汲汲求衣食，富贵营营役心力。人生不富即贫穷，
光阴易过闲难得。我今幸在穷富间，虽在朝廷不入山。
看雪寻花玩风月，洛阳城里七年闲。

卷 453_16【西行】

白居易

衣裘不单薄，车马不羸弱。蔼蔼三月天，闲行亦不恶。
寿安流水馆，硤石青山郭。官道柳阴阴，行宫花漠漠。
常闻俗间语，有钱在处乐。我虽非富人，亦不苦寂寞。
家僮解弦管，骑从携杯杓。时向春风前，歇鞍开一酌。

卷 453_17【东归】

白居易

· 全唐诗 ·

翩翩平肩舆，中有醉老夫。膝上展诗卷，竿头悬酒壶。
食宿无定程，仆马多缓驱。临水歇半日，望山倾一盂。
藉草坐嵬峨，攀花行踟蹰。风将景共暖，体与心同舒。
始悟有营者，居家如在途。方知无系者，在道如安居。
前夕宿三堂，今旦游申湖。残春三百里，送我归东都。

卷 453_18 【途中作】

白居易

早起上肩舁，一杯平旦醉。晚憩下肩舁，一觉残春睡。
身不经营物，心不思量事。但恐绮与里，只如吾气味。

卷 453_19 【小台】

白居易

新树低如帐，小台平似掌。六尺白藤床，一茎青竹杖。
风飘竹皮落，苔印鹤迹上。幽境与谁同，闲人自来往。

卷 453_20 【睡后茶兴忆杨同州】

白居易

· 全唐诗 ·

昨晚饮太多，嵬峨连宵醉。今朝餐又饱，烂漫移时睡。
睡足摩挲眼，眼前无一事。信脚绕池行，偶然得幽致。
婆娑绿阴树，斑驳青苔地。此处置绳床，傍边洗茶器。
白瓷瓿甚洁，红炉炭方炽。沫下麴尘香，花浮鱼眼沸。
盛来有佳色，咽罢余芳气。不见杨慕巢，谁人知此味。

卷 453_21【题文集柜】

白居易

破柏作书柜，柜牢柏复坚。收贮谁家集，题云白乐天。
我生业文字，自幼及老年。前后七十卷，小大三千篇。
诚知终散失，未忍遽弃捐。自开自锁闭，置在书帷前。
身是邓伯道，世无王仲宣。只应分付女，留与外孙传。

卷 453_22【旱热二首】

白居易

彤云散不雨，赫日吁可畏。端坐犹挥汗，出门岂容易。
忽思公府内，青衫折腰吏。复想驿路中，红尘走马使。
征夫更辛苦，逐客弥憔悴。日入尚趋程，宵分不遑寐。
安知北窗叟，偃卧风飒至。簟拂碧龙鳞，扇摇白鹤翅。
岂唯身所得，兼示心无事。谁言苦热天，元有清凉地。

· 全唐诗 ·

勃勃旱尘气，炎炎赤日光。飞禽颺将坠，行人渴欲狂。
壮者不耐饥，饥火烧其肠。肥者不禁热，喘急汗如浆。
此时方自悟，老瘦亦何妨。肉轻足健逸，发少头清凉。
薄食不饥渴，端居省衣裳。数匙梁饭冷，一领綃衫香。
持此聊过日，焉知畏景长。

卷 453_23【偶作二首】

白居易

战马春放归，农牛冬歇息。何独徇名人，终身役心力。
来者殊未已，去者不知还。我今悟已晚，六十方退闲。
犹胜不悟者，老死红尘间。

名无高与卑，未得多健羨。事无小与大，已得多厌贱。
如此常自苦，反此或自安。此理知甚易，此道行甚难。
勿信人虚语，君当事上看。

卷 453_24【池上作】

白居易

西溪风生竹森森，南潭萍开水沈沈。丛翠万竿湘岸色，
空碧一泊松江心。浦派萦回误远近，桥岛向背迷窥临。
澄澜方丈若万顷，倒影咫尺如千寻。泛然独游邈然坐，

· 全唐诗 ·

坐念行心思古今。菟裘不闻有泉沼，西河亦恐无云林。
岂如白翁退老地，树高竹密池塘深。华亭双鹤白矫矫，
太湖四石青岑岑。眼前尽日更无客，膝上此时唯有琴。
洛阳冠盖自相索，谁肯来此同抽簪。

卷 453_25【何处堪避暑】

白居易

何处堪避暑，林间背日楼。何处好追凉，池上随风舟。
日高饥始食，食竟饱还游。游罢睡一觉，觉来茶一瓯。
眼明见青山，耳醒闻碧流。脱袜闲濯足，解巾快搔头。
如此来几时，已过六七秋。从心至百骸，无一不自由。
拙退是其分，荣耀非所求。虽被世间笑，终无身外忧。
此语君莫怪，静思吾亦愁。如何三伏月，杨尹谪虔州。

卷 453_26【诏下】

白居易

昨日诏下去罪人，今日诏下得贤臣。进退者谁非我事，
世间宠辱常纷纷。我心与世两相忘，时事虽闻如不闻。
但喜今年饱饭吃，洛阳禾稼如秋云。更倾一尊歌一曲，
不独忘世兼忘身。

· 全唐诗 ·

卷 453_27【七月一日作】

白居易

七月一日天，秋生履道里。闲居见清景，高兴从此始。
林间暑雨歇，池上凉风起。桥竹碧鲜鲜，岸莎青靡靡。
苍然古磐石，清浅平流水。何言中门前，便是深山里。
双僮侍坐卧，一杖扶行止。饥闻麻粥香，渴觉云汤美。
平生所好物，今日多在此。此外更何思，市朝心已矣。

卷 453_28【开襟】

白居易

开襟何处好，竹下池边地。馀热体犹烦，早凉风有味。
黄萎槐蕊结，红破莲芳坠。无奈每年秋，先来入衰思。

卷 453_29【自宾客迁太子少傅分司】

白居易

头上渐无发，耳间新有毫。形容逐日老，官秩随年高。
优饶又加俸，闲稳仍分曹。饮食免藜藿，居处非蓬蒿。
何言家尚贫，银榼提绿醪。勿谓身未贵，金章照紫袍。

· 全唐诗 ·

诚合知止足，岂宜更贪饕。默默心自问，于国有何劳。

卷 453_30【自在】

白居易

杲杲冬日光，明暖真可爱。移榻向阳坐，拥裘仍解带。
小奴捶我足，小婢搔我背。自问我为谁，胡然独安泰。
安泰良有以，与君论梗概。心了事未了，饥寒迫于外。
事了心未了，念虑煎于内。我今实多幸，事与心和会。
内外及中间，了然无一碍。所以日阳中，向君言自在。

卷 453_31【咏史】

白居易

秦磨利刀斩李斯，齐烧沸鼎烹酈其。可怜黄绮入商洛，
闲卧白云歌紫芝。彼为蒟酱机上尽，此为鸾皇天外飞。
去者逍遥来者死，乃知祸福非天为。

卷 453_32【因梦有悟】

白居易

· 全唐诗 ·

交友沦殁尽，悠悠劳梦思。平生所厚者，昨夜梦见之。
梦中几许事，枕上无多时。款曲数杯酒，从容一局棋。
初见韦尚书，金紫何辉辉。中遇李侍郎，笑言甚怡怡。
终为崔常侍，意色苦依依。一夕三改变，梦心不惊疑。
此事人尽怪，此理谁得知。我粗知此理，闻于竺乾师。
识行妄分别，智隐迷是非。若转识为智，菩提其庶几。

卷 453_33【春游】

白居易

上马临出门，出门复逡巡。回头问妻子，应怪春游频。
诚知春游频，其奈老大身。朱颜去复去，白发新更新。
请君屈十指，为我数交亲。大限年百岁，几人及七旬。
我今六十五，走若下坂轮。假使得七十，只有五度春。
逢春不游乐，但恐是痴人。

卷 453_34【题天竺南院赠闲元旻清四上人】

白居易

杂芳润草合，繁绿岩树新。山深景候晚，四月有馀春。
竹寺过微雨，石径无纤尘。白衣一居士，方袍四道人。
地是佛国土，人非俗交亲。城中山下别，相送亦殷勤。

· 全唐诗 ·

卷 453_35 【哭师皋】

白居易

南康丹旌引魂回，洛阳篮舁送葬来。北邙原边尹村畔，
月苦烟愁夜过半。妻孥兄弟号一声，十二人肠一时断。
往者何人送者谁，乐天哭别师皋时。平生分义向人尽，
今日哀冤唯我知。我知何益徒垂泪，篮舆回竿马回轡。
何日重闻扫市歌，谁家收得琵琶伎。萧萧风树白杨影，
苍苍露草青蒿气。更就坟前哭一声，与君此别终天地。

卷 453_36 【隐几赠客】

白居易

宦情本淡薄，年貌又老丑。紫绶与金章，于予亦何有。
有时独隐几，嗒然无所偶。卧枕一卷书，起尝一杯酒。
书将引昏睡，酒用扶衰朽。客到忽已酣，脱巾坐搔首。
疏顽倚老病，容恕惭交友。忽思庄生言，亦拟鞭其后。

卷 453_37 【夏日作】

白居易

· 全唐诗 ·

葛衣疏且单，纱帽轻复宽。一衣与一帽，可以过炎天。
止于便吾体，何必被罗纨。宿雨林笋嫩，晨露园葵鲜。
烹葵炮嫩笋，可以备朝餐。止于适吾口，何必饫腥膻。
饭讫盥漱已，扪腹方果然。婆娑庭前步，安稳窗下眠。
外养物不费，内归心不烦。不费用难尽，不烦神易安。
庶几无夭阏，得以终天年。

卷 453_38【晚凉偶咏】

白居易

日下西墙西，风来北窗北。中有逐凉人，单床独栖息。
飘萧过云雨，摇曳归飞翼。新叶多好阴，初筠有佳色。
幽深小池馆，优稳闲官职。不爱勿复论，爱亦不易得。

卷 453_39【酬牛相公宫城早秋寓言见示兼呈梦得】

白居易

七月中气后，金与火交争。一闻白雪唱，暑退清风生。
碧树未摇落，寒蝉始悲鸣。夜凉枕簟滑，秋燥衣巾轻。
疏受老慵出，刘桢疾未平。何人伴公醉，新月上宫城。

卷 453_40【小台晚坐忆梦得】

· 全唐诗 ·

白居易

汲泉洒小台，台上无纤埃。解带面西坐，轻襟随风开。
晚凉闲兴动，忆同倾一杯。月明候柴户，藜杖何时来。

卷 453_41 【种桃歌】

白居易

食桃种其核，一年核生芽。二年长枝叶，三年桃有花。
忆昨五六岁，灼灼盛芬华。迨兹八九载，有减而无加。
去春已稀少，今春渐无多。明年后年后，芳意当如何。
命酒树下饮，停杯拾馀葩。因桃忽自感，悲吒成狂歌。

卷 453_42 【狂言示诸侄】

白居易

世欺不识字，我忝攻文笔。世欺不得官，我忝居班秩。
人老多病苦，我今幸无疾。人老多忧累，我今婚嫁毕。
心安不移转，身泰无牵率。所以十年来，形神闲且逸。
况当垂老岁，所要无多物。一裘暖过冬，一饭饱终日。
勿言舍宅小，不过寝一室。何用鞍马多，不能骑两匹。
如我优幸身，人中十有七。如我知足心，人中百无一。
傍观愚亦见，当己贤多失。不敢论他人，狂言示诸侄。

· 全唐诗 ·

卷 453_43【偶以拙诗数首寄呈裴少尹侍郎，蒙以盛制四篇，一时酬和，重投长句，美而谢之】

白居易

投君之文甚荒芜，数篇价直一束刍。报我之章何璀璨，累累四贯骊龙珠。毛诗三百篇后得，文选六十卷中无。一麋丽龟绝报赛，五鹿连柱难支梧。高兴独因秋日尽，清吟多与好风俱。银钩金错两殊重，宜上屏风张座隅。

· 全唐诗 ·

第四百五十四卷

卷 454_1【六年冬暮赠崔常侍晦叔】

白居易

鬓毛霜一色，光景水争流。易过唯冬日，难销是老愁。
香开绿蚁酒，暖拥褐绫裘。已共崔君约，尊前倒即休。

卷 454_2【戏招诸客】

白居易

黄醅绿醕迎冬熟，绛帐红炉逐夜开。
谁道洛中多逸客，不将书唤不曾来。

卷 454_3【十二月二十三日作，兼呈晦叔】

白居易

案头历日虽未尽，向后唯残六七行。床下酒瓶虽不满，

· 全唐诗 ·

犹应醉得两三场。病身不许依年老，拙宦虚教逐日忙。
闻健偷闲且勤饮，一杯之外莫思量。

卷 454_4【七年元旦对酒五首】

白居易

庆吊经过懒，逢迎跪拜迟。不因时节日，岂觉此身羸。
众老忧添岁，余衰喜入春。年开第七秩，屈指几多人。
三杯蓝尾酒，一碟胶牙饧。除却崔常侍，无人共我争。
今朝吴与洛，相忆一欣然。梦得君知否，俱过本命年。
同岁崔何在，同年杜又无。应无藏避处，只有且欢娱。

卷 454_5【七年春题府厅】

白居易

潦倒守三川，因循涉四年。推诚废钩距，示耻用蒲鞭。
以此称公事，将何销俸钱。虽非好官职，岁久亦妨贤。

· 全唐诗 ·

卷 454_6【早春醉吟，寄太原令狐相公、苏州刘郎中】

白居易

雪夜闲游多秉烛，花时暂出亦提壶。别来少遇新诗敌，
老去难逢旧饮徒。大振威名降北虏，勤行惠化活东吴。
不知歌酒腾腾兴，得似河南醉尹无。

卷 454_7【洛下送牛相公出镇淮南】

白居易

北阙至东京，风光十六程。坐移丞相阁，春入广陵城。
红旆拥双节，白须无一茎。万人开路看，百吏立班迎。
阊外君弥重，尊前我亦荣。何须身自得，将相是门生。

卷 454_8【箏】

白居易

云髻飘萧绿，花颜旖旎红。双眸剪秋水，十指剥春葱。
楚艳为门阀，秦声是女工。甲明银玳瑁，柱触玉玲珑。
猿苦啼嫌月，莺娇语泥风。移愁来手底，送恨入弦中。
赵瑟清相似，胡琴闹不同。慢弹回断雁，急奏转飞蓬。

· 全唐诗 ·

霜珮锵还委，冰泉咽复通。珠联千拍碎，刀截一声终。
倚丽精神定，矜能意态融。歇时情不断，休去思无穷。
灯下青春夜，尊前白首翁。且听应得在，老耳未多聋。

卷 454_9【洛中春游呈诸亲友】

白居易

莫叹年将暮，须怜岁又新。府中三遇腊，洛下五逢春。
春树花珠颗，春塘水麴尘。春娃无气力，春马有精神。
并辔鞭徐动，连盘酒慢巡。经过旧邻里，追逐好交亲。
笑语销闲日，酣歌送老身。一生欢乐事，亦不少于人。

卷 454_10【酬舒三员外见赠长句】

白居易

自请假来多少日，五旬光景似须臾。已判到老为狂客，
不分当春作病夫。杨柳花飘新白雪，樱桃子缀小红珠。
头风不敢多多饮，能酌三分相劝无。

卷 454_11【将归一绝】

白居易

· 全唐诗 ·

欲去公门返野扉，预思泉竹已依依。
更怜家酝迎春熟，一瓮醍醐待我归。

卷 454_12【罢府归旧居】

白居易

陋巷乘篮入，朱门挂印回。腰间抛组绶，纓上拂尘埃。
屈曲闲池沼，无非手自开。青苍好竹树，亦是眼看栽。
石片抬琴匣，松枝阁酒杯。此生终老处，昨日却归来。

卷 454_13【睡觉偶吟】

白居易

官初罢后归来夜，天欲明前睡觉时。
起坐思量更无事，身心安乐复谁知。

卷 454_14【问支琴石】

白居易

疑因星陨空中落，叹被泥埋涧底沈。天上定应胜地上，
支机未必及支琴。提携拂拭知恩否，虽不能言合有心。

· 全唐诗 ·

卷 454_15【自喜】

白居易

身慵难勉强，性拙易迟回。布被辰时起，柴门午后开。
忙驱能者去，闲逐钝人来。自喜谁能会，无才胜有才。

卷 454_16【裴常侍以题蔷薇架十八韵见示，因广为三十韵以和之】

白居易

托质依高架，攒花对小堂。晚开春去后，独秀院中央。
霁景朱明早，芳时白昼长。秾因天与色，丽共日争光。
剪碧排千萼，研朱染万房。烟条涂石绿，粉蕊扑雌黄。
根动彤云涌，枝摇赤羽翔。九微灯炫转，七宝帐荧煌。
淑气熏行径，清阴接步廊。照梁迷藻梲，耀壁变雕墙。
烂若丛然火，殷于叶得霜。胭脂含脸笑，苏合裛衣香。
浹洽濡晨露，玲珑漏夕阳。合罗排勘缬，醉晕浅深妆。
乍见疑回面，遥看误断肠。风朝舞飞燕，雨夜泣萧娘。
桃李惭无语，芝兰让不芳。山榴何细碎，石竹苦寻常。
蕙惨偎栏避，莲羞映浦藏。怯教蕉叶战，妒得柳花狂。
岂可轻嘲咏，应须痛比方。画屏风自展，绣伞盖谁张。
翠锦挑成字，丹砂印著行。猩猩凝血点，瑟瑟蹙金匡。
散乱萎红片，尖纤嫩紫芒。触僧飘毳褐，留妓冒罗裳。

· 全唐诗 ·

寡和阳春曲，多情骑省郎。缘夸美颜色，引出好文章。
东顾辞仁里，西归入帝乡。假如君爱杀，留著莫移将。

卷 454_17【感旧诗卷】

白居易

夜深吟罢一长吁，老泪灯前湿白须。
二十年前旧诗卷，十人酬和九人无。

卷 454_18【酬李二十侍郎】

白居易

笋老兰长花渐稀，衰翁相对惜芳菲。残莺著雨慵休啜，
落絮无风凝不飞。行掇木芽供野食，坐牵萝蔓挂朝衣。
十年分手今同醉，醉未如泥莫道归。

卷 454_19【和梦得】

白居易

纶阁沈沈天宠命，苏台籍籍有能声。岂唯不得清文力，
但恐空传冗吏名。郎署回翔何水部，江湖留滞谢宣城。

· 全唐诗 ·

所嗟非独君如此，自古才难共命争。

卷 454_20 【赠草堂宗密上人】

白居易

吾师道与佛相应，念念无为法法能。口藏宣传十二部，
心台照耀百千灯。尽离文字非中道，长住虚空是小乘。
少有人知菩萨行，世间只是重高僧。

卷 454_21 【喜照密闲实四上人见过】

白居易

紫袍朝士白髯翁，与俗乖疏与道通。官秩三回分洛下，
交游一半在僧中。臭帑世界终须出，香火因缘久愿同。
斋后将何充供养，西轩泉石北窗风。

卷 454_22 【赠皇甫六张十五李二十三宾客】

白居易

昨日三川新罢守，今年四皓尽分司。幸陪散秩闲居日，
好是登山临水时。家未苦贫常酝酒，身虽衰病尚吟诗。

· 全唐诗 ·

龙门泉石香山月，早晚同游报一期。

卷 454_23【微之敦诗晦叔相次长逝，岿然自伤，因成二绝】

白居易

并失鹓鸾侣，空留麋鹿身。只应嵩洛下，长作独游人。

长夜君先去，残年我几何。秋风满衫泪，泉下故人多。

卷 454_24【池上闲咏】

白居易

青莎台上起书楼，绿藻潭中系钓舟。日晚爱行深竹里，
月明多上小桥头。暂尝新酒还成醉，亦出中门便当游。
一部清商聊送老，白须萧飒管弦秋。

卷 454_25【凉风叹】

白居易

昨夜凉风又飒然，萤飘叶坠卧床前。
逢秋莫叹须知分，已过潘安三十年。

· 全唐诗 ·

卷 454_26 【和高仆射罢节度让尚书授少保分司喜遂游山水之作】

白居易

暂辞八座罢双旌，便作登山临水行。能以忠贞酬重任，
不将富贵碍高情。朱门出去簪缨从，绛帐归来歌吹迎。
鞍辔闹装光满马，何人信道是书生。

卷 454_27 【送考功崔郎中赴阙】

白居易

称意新官又少年，秋凉身健好朝天。
青云上了无多路，却要徐驱稳著鞭。

卷 454_28 【重修香山寺毕，题二十二韵以纪之】

白居易

阙塞龙门口，祇园鹫岭头。曾随减劫坏，今遇胜缘修。
再莹新金刹，重装旧石楼。病僧皆引起，忙客亦淹留。
四望穷沙界，孤标出赡州。地图铺洛邑，天柱倚崧丘。
两面苍苍岸，中心瑟瑟流。波翻八滩雪，堰护一潭油。

· 全唐诗 ·

台殿朝弥丽，房廊夜更幽。千花高下塔，一叶往来舟。
岫合云初吐，林开雾半收。静闻樵子语，远听棹郎讴。
官散殊无事，身闲甚自由。吟来携笔砚，宿去抱衾裯。
霁月当窗白，凉风满簟秋。烟香封药灶，泉冷洗茶瓯。
南祖心应学，西方社可投。先宜知止足，次要悟浮休。
觉路随方乐，迷涂到老愁。须除爱名障，莫作恋家囚。
便合穷年住，何言竟日游。可怜终老地，此是我菟裘。

卷 454_29【送杨八给事赴常州】

白居易

无嗟别青琐，且喜拥朱轮。五十得三品，百千无一人。
须勤念黎庶，莫苦忆交亲。此外无过醉，毗陵何限春。

卷 454_30【闻歌者唱微之诗】

白居易

新诗绝笔声名歇，旧卷生尘篋笥深。
时向歌中闻一句，未容倾耳已伤心。

卷 454_31【醉送李二十常侍赴镇浙东】

· 全唐诗 ·

白居易

靖安客舍花枝下，共脱青衫典浊醪。今日洛桥还醉别，
金杯翻污麒麟袍。喧阗夙驾君脂辖，酩酊离筵我藉糟。
好去商山紫芝伴，珊瑚鞭动马头高。

卷 454_32【醉别程秀才】

白居易

五度龙门点额回，却缘多艺复多才。贫泥客路黏难出，
愁锁乡心掣不开。何必更游京国去，不如且入醉乡来。
吴弦楚调潇湘弄，为我殷勤送一杯。

卷 454_33【自咏】

白居易

白衣居士紫芝仙，半醉行歌半坐禅。今日维摩兼饮酒，
当时绮季不请钱。等闲池上留宾客，随事灯前有管弦。
但问此身销得否，分司气味不论年。

卷 454_34【把酒思闲事二首】

· 全唐诗 ·

白居易

把酒思闲事，春愁谁最深。乞钱羁客面，落第举人心。
月下低眉立，灯前抱膝吟。凭君劝一醉，胜与万黄金。

把酒思闲事，春娇何处多。试鞍新白马，弄镜小青娥。
掌上初教舞，花前欲按歌。凭君劝一醉，劝了问如何。

卷 454_35【衰荷】

白居易

白露凋花花不残，凉风吹叶叶初乾。
无人解爱萧条境，更绕衰丛一匝看。

卷 454_36【池上送考功崔郎中，兼别房谏二妓】

白居易

文昌列宿征还日，洛浦行云放散时。
鹧鸪上天花逐水，无因再会白家池。

卷 454_37【自问】

· 全唐诗 ·

白居易

依仁台废悲风晚，履信池荒宿草春。
自问老身骑马出，洛阳城里觅何人。

卷 454_38 【送陈许高仆射赴镇】

白居易

敦诗说礼中军帅，重士轻财大丈夫。常与师徒同苦乐，
不教亲故隔荣枯。花钿坐绕黄金印，丝管行随白玉壶。
商皓老狂唯爱醉，时时能寄酒钱无。

卷 454_39 【青毡帐二十韵】

白居易

合聚千羊毳，施张百子毳。骨盘边柳健，色染塞蓝鲜。
北制因戎创，南移逐虏迁。汰风吹不动，御雨湿弥坚。
有顶中央耸，无隅四向圆。傍通门豁尔，内密气温然。
远别关山外，初安庭户前。影孤明月夜，价重苦寒年。
软暖围毡毯，枪撸束管弦。最宜霜后地，偏称雪中天。
侧置低歌座，平铺小舞筵。闲多揭帘入，醉便拥袍眠。
铁檠移灯背，银囊带火悬。深藏晓兰焰，暗贮宿香烟。
兽炭休亲近，狐裘可弃捐。砚温融冻墨，瓶暖变春泉。

· 全唐诗 ·

蕙帐徒招隐，茅庵浪坐禅。贫僧应叹羨，寒士定留连。
客宾于中接，儿孙向后传。王家夸旧物，未及此青毡。

卷 454_40【答梦得秋日书怀见寄】

白居易

幸免非常病，甘当本分衰。眼昏灯最觉，腰瘦带先知。
树叶霜红日，髭须雪白时。悲愁缘欲老，老过却无悲。

卷 454_41【同诸客题于家公主旧宅】

白居易

平阳旧宅少人游，应是游人到即愁。布谷鸟啼桃李院，
络丝虫怨凤凰楼。台倾滑石犹残砌，帘断珍珠不满钩。
闻道至今萧史在，髭须雪白向明州。

卷 454_42【答梦得八月十五日夜玩月见寄】

白居易

南国碧云客，东京白首翁。松江初有月，伊水正无风。
远思两乡断，清光千里同。不知娃馆上，何似石楼中。

· 全唐诗 ·

卷 454_43【初冬早起寄梦得】

白居易

起戴乌纱帽，行披白布裘。炉温先暖酒，手冷未梳头。
早起烟霜白，初寒鸟雀愁。诗成遣谁和，还是寄苏州。

卷 454_44【秋夜听高调凉州】

白居易

楼上金风声渐紧，月中银字韵初调。
促张弦柱吹高管，一曲凉州入泫寥。

卷 454_45【香山寺二绝】

白居易

空山寂静老夫闲，伴鸟随云往复还。
家酝满瓶书满架，半移生计入香山。

爱风岩上攀松盖，恋月潭边坐石棱。
且共云泉结缘境，他生当作此山僧。

· 全唐诗 ·

卷 454_46 【送舒著作重授省郎赴阙】

白居易

三岁相依在洛都，游花宴月饱欢娱。惜别笙歌多怨咽，
愿留轩盖少踟蹰。剑磨光彩依前出，鹏举风云逐后驱。
从此求闲应不得，更能重醉白家无。

卷 454_47 【同诸客嘲雪中马上妓】

白居易

珊瑚鞭弹马踟蹰，引手低蛾索一盂。腰为逆风成弱柳，
面因冲冷作凝酥。银篦稳簪乌罗帽，花襦宜乘叱拨驹。
雪里君看何所似，王昭君妹写真图。

卷 454_48 【喜刘苏州恩赐金紫，遥想贺宴，以诗庆之】

白居易

海内姑苏太守贤，恩加章绶岂徒然。贺宾喜色欺杯酒，
醉妓欢声遏管弦。鱼珮葺鳞光照地，鹖衔瑞带势冲天。
莫嫌鬓上些些白，金紫由来称长年。

· 全唐诗 ·

卷 454_49【蓝田刘明府携酌相过，与皇甫郎中卯时同饮，醉后赠之】

白居易

腊月九日暖寒客，卯时十分空腹杯。玄晏舞狂乌帽落，
蓝田醉倒玉山颓。貌偷花色老暂去，歌蹋柳枝春暗来。
不为刘家贤圣物，愁翁笑口大难开。

卷 454_50【刘苏州以华亭一鹤远寄，以诗谢之】

白居易

老鹤风姿异，衰翁诗思深。素毛如我鬓，丹顶似君心。
松际雪相映，鸡群尘不侵。殷勤远来意，一只重千金。

卷 454_51【早春忆苏州寄梦得】

白居易

吴苑四时风景好，就中偏好是春天。霞光曙后殷于火，
水色晴来嫩似烟。士女笙歌宜月下，使君金紫称花前。
诚知欢乐堪留恋，其奈离乡已四年。

· 全唐诗 ·

卷 454_52 【尝新酒忆晦叔二首】

白居易

尊里看无色，杯中动有光。自君抛我去，此物共谁尝。

世上强欺弱，人间醉胜醒。自君抛我去，此语更谁听。

卷 454_53 【负春】

白居易

病来道士教调气，老去山僧劝坐禅。

孤负春风杨柳曲，去年断酒到今年。

卷 454_54 【池上闲吟二首】

白居易

高卧闲行自在身，池边六见柳条新。幸逢尧舜无为日，
得作羲皇向上人。四皓再除犹且健，三州罢守未全贫。
莫愁客到无供给，家酝香浓野菜春。

非庄非宅非兰若，竹树池亭十亩馀。非道非僧非俗吏，

· 全唐诗 ·

褐裘乌帽闭门居。梦游信意宁殊蝶，心乐身闲便是鱼。
虽未定知生与死，其间胜负两何如。

卷 454_55【早春招张宾客】

白居易

久雨初晴天气新，风烟草树尽欣欣。虽当冷落衰残日，
还有阳和暖活身。池色溶溶蓝染水，花光焰焰火烧春。
商山老伴相收拾，不用随他年少人。

卷 454_56【营闲事】

白居易

自笑营闲事，从朝到日斜。浇畦引泉脉，扫径避兰芽。
暖变墙衣色，晴催木笔花。桃根知酒渴，晚送一瓯茶。

卷 454_57【感春】

白居易

老思不禁春，风光照眼新。花房红鸟觜，池浪碧鱼鳞。
倚棹谁为伴，持杯自问身。心情多少在，六十二三人。

· 全唐诗 ·

卷 454_58【春池上戏赠李郎中】

白居易

满池春水何人爱，唯我回看指似君。
直似挼蓝新汁色，与君南宅染罗裙。

卷 454_59【玩半开花赠皇甫郎中】

白居易

勿讶春来晚，无嫌花发迟。人怜全盛日，我爱半开时。
紫蜡黏为蒂，红苏点作蕤。成都新夹缬，梁汉碎胭脂。
树杪真珠颗，墙头小女儿。浅深妆驳落，高下火参差。
蝶戏争香朵，莺啼选稳枝。好教郎作伴，合共酒相随。
醉玩无胜此，狂嘲更让谁。犹残少年兴，不似老人诗。
西日凭轻照，东风莫杀吹。明朝应烂漫，后夜更离披。
林下遥相忆，尊前暗有期。衔杯嚼蕊思，唯我与君知。

卷 454_60【池边】

白居易

柳老香丝宛，荷新钿扇圆。残春深树里，斜日小楼前。

· 全唐诗 ·

醉遣收杯杓，闲听理管弦。池边更无事，看补采莲船。

卷 454_61【家酿新熟，每尝辄醉，妻侄等劝令少饮，因成长句以谕之】

白居易

君应怪我朝朝饮，不说向君君不知。身上幸无疼痛处，
瓮头正是撇尝时。刘妻劝谏夫休醉，王侄分疏叔不痴。
六十三翁头雪白，假如醒黠欲何为。

卷 454_62【送常秀才下第东归】

白居易

东归多旅恨，西上少知音。寒食看花眼，春风落日心。
百忧当二月，一醉直千金。到处公卿席，无辞酒醖深。

卷 454_63【且游】

白居易

手里一杯满，心中百事休。春应唯仰醉，老更不禁愁。
弄水回船尾，寻花信马头。眼看筋力减，游得且须游。

· 全唐诗 ·

卷 454_64【题王家庄临水柳亭】

白居易

弱柳缘堤种，虚亭压水开。条疑逐风去，波欲上阶来。
翠羽偷鱼入，红腰学舞回。春愁正无绪，争不尽残杯。

卷 454_65【题令狐家木兰花】

白居易

腻如玉指涂朱粉，光似金刀剪紫霞。
从此时时春梦里，应添一树女郎花。

卷 454_66【拜表回闲游】

白居易

玉珮金章紫花绶，纁衫藤带白纶巾。晨兴拜表称朝士，
晚出游山作野人。达磨传心令息念，玄元留意遣同尘。
八关净戒斋销日，一曲狂歌醉送春。酒肆法堂方丈室，
其间岂是两般身。

· 全唐诗 ·

卷 454_67【西街渠中，种莲垒石，颇有幽致，偶题小楼】

白居易

朱槛低墙上，清流小阁前。雇人栽菡萏，买石造潺湲。
影落江心月，声移谷口泉。闲看卷帘坐，醉听掩窗眠。
路笑淘官水，家愁费料钱。是非君莫问，一对一翛然。

卷 454_68【晚春闲居，杨工部寄诗、杨常州寄茶同到，因以长句答之】

白居易

宿醒寂寞眠初起，春意阑珊日又斜。劝我加餐因早笋，
恨人休醉是残花。闲吟工部新来句，渴饮毗陵远到茶。
兄弟东西官职冷，门前车马向谁家。

卷 454_69【玉泉寺南三里涧下，多深红踯躅，繁艳殊常，感惜题诗，以示游者】

白居易

玉泉南涧花奇怪，不似花丛似火堆。今日多情唯我到，
每年无故为谁开。宁辞辛苦行三里，更与留连饮两杯。

· 全唐诗 ·

犹有一般辜负事，不将歌舞管弦来。

卷 454_70【早服云母散】

白居易

晓服云英漱井华，寥然身若在烟霞。药销日晏三匙饭，
酒渴春深一碗茶。每夜坐禅观水月，有时行醉玩风花。
净名事理人难解，身不出家心出家。

卷 454_71【三月晦日晚闻鸟声】

白居易

晚来林鸟语殷勤，似惜风光说向人。遣脱破袍劳报暖，
催沽美酒敢辞贫。声声劝醉应须醉，一岁唯残半日春。

卷 454_72【早夏游平原回】

白居易

夏早日初长，南风草木香。肩舆颇平稳，涧路甚清凉。
紫蕨行看采，青梅旋摘尝。疗饥兼解渴，一醺冷云浆。

· 全唐诗 ·

卷 454_73【宿天竺寺回】

白居易

野寺经三宿，都城复一还。家仍念婚嫁，身尚系官班。
萧洒秋临水，沉吟晚下山。长闲犹未得，逐日且偷闲。

卷 454_74【侍中晋公欲到东洛，先蒙书问，期宿龙门，思
往感今，辄献长句】

白居易

昔蒙兴化池头送，今许龙门潭上期。聚散但惭长见念，
荣枯安敢道相思。功成名遂来虽久，云卧山游去未迟。
闻说风情筋力在，只如初破蔡州时。

卷 454_75【奉和晋公侍中蒙除留守，行及洛师，感悦发中，
斐然成咏之作】

白居易

鸾凤翱翔在寥廓，貂蝉萧洒出埃尘。致成尧舜升平代，
收得夔龙强健身。抛掷功名还史册，分张欢乐与交亲。
商山老皓虽休去，终是留侯门下人。

· 全唐诗 ·

卷 454_76 【送刘五司马赴任硤州兼寄崔使君】

白居易

位下才高多怨天，刘兄道胜独恬然。贫于扬子两三倍，
老过荣公六七年。笔砚莫抛留压案，箪瓢从陋也销钱。
郡丞自合当优礼，何况夷陵太守贤。

卷 454_77 【菩提寺上方晚眺】

白居易

楼阁高低树浅深，山光水色暝沉沉。嵩烟半卷青绡幕，
伊浪平铺绿绮衾。飞鸟灭时宜极目，远风来处好开襟。
谁知不离簪纓内，长得逍遥自在心。

卷 454_78 【杨柳枝词八首】

白居易

六么水调家家唱，白雪梅花处处吹。
古歌旧曲君休听，听取新翻杨柳枝。

陶令门前四五树，亚夫营里百千条。

· 全唐诗 ·

何似东都正二月，黄金枝映洛阳桥。

依依裊裊复青青，句引春风无限情。
白雪花繁空扑地，绿丝条弱不胜莺。

红板江桥青酒旗，馆娃宫暖日斜时。
可怜雨歇东风定，万树千条各自垂。

苏州杨柳任君夸，更有钱唐胜馆娃。
若解多情寻小小，绿杨深处是苏家。

苏家小女旧知名，杨柳风前别有情。
剥条盘作银环样，卷叶吹为玉笛声。

叶含浓露如啼眼，枝袅轻风似舞腰。
小树不禁攀折苦，乞君留取两三条。

人言柳叶似愁眉，更有愁肠似柳丝。
柳丝挽断肠牵断，彼此应无续得期。

· 全唐诗 ·

第四百五十五卷

卷 455_1【读老子】

白居易

言者不如知者默，此语吾闻于老君。
若道老君是知者，缘何自著五千文。

卷 455_2【读庄子】

白居易

庄生齐物同归一，我道同中有不同。
遂性逍遥虽一致，鸾凰终校胜蛇虫。

卷 455_3【读禅经】

白居易

须知诸相皆非相，若住无馀却有馀。言下忘言一时了，

· 全唐诗 ·

梦中说梦两重虚。空花岂得兼求果，阳焰如何更觅鱼。
摄动是禅禅是动，不禅不动即如如。

卷 455_4【感兴二首】

白居易

吉凶祸福有来由，但要深知不要忧。只见火光烧润屋，
不闻风浪覆虚舟。名为公器无多取，利是身灾合少求。
虽异匏瓜难不食，大都食足早宜休。

鱼能深入宁忧钓，鸟解高飞岂触罗。热处先争炙手去，
悔时其奈噬脐何。尊前诱得猩猩血，幕上偷安燕燕窠。
我有一言君记取，世间自取苦人多。

卷 455_5【问鹤】

白居易

乌鸢争食雀争窠，独立池边风雪多。
尽日蹋冰翘一足，不鸣不动意如何。

卷 455_6【代鹤答】

· 全唐诗 ·

白居易

鷹爪攫鸡鸡肋折，鹄拳蹴雁雁头垂。
何如敛翅水边立，飞上云松栖稳枝。

卷 455_7【闲卧有所思二首】

白居易

向夕褰帘卧枕琴，微凉入户起开襟。偶因明月清风夜，
忽想迁臣逐客心。何处投荒初恐惧，谁人绕泽正悲吟。
始知洛下分司坐，一日安闲直万金。

权门要路是身灾，散地闲居少祸胎。今日怜君岭南去，
当时笑我洛中来。虫全性命缘无毒，木尽天年为不才。
大抵吉凶多自致，李斯一去二疏回。

卷 455_8【喜闲】

白居易

萧洒伊嵩下，优游黄绮间。未曾一日闷，已得六年闲。
鱼鸟为徒侣，烟霞是往还。伴僧禅闭目，迎客笑开颜。
兴发宵游寺，慵时昼掩关。夜来风月好，悔不宿香山。

· 全唐诗 ·

卷 455_9【诗酒琴人，例多薄命，予酷好三事，雅当此科，而所得已多，为幸斯甚，偶成狂咏，聊写愧怀】

白居易

爱琴爱酒爱诗客，多贱多穷多苦辛。中散步兵终不贵，
孟郊张籍过于贫。一之已叹关于命，三者何堪并在身。
只合飘零随草木，谁教凌厉出风尘。荣名厚禄二千石，
乐饮闲游三十春。何得无厌时咄咄，犹言薄命不如人。

卷 455_10【寄明州于驸马使君三绝句】

白居易

有花有酒有笙歌，其奈难逢亲故何。
近海饶风春足雨，白须太守闷时多。

平阳音乐随都尉，留滞三年在浙东。
吴越声邪无法用，莫教偷入管弦中。

何郎小妓歌喉好，严老呼为一串珠。
海味腥咸损声气，听看犹得断肠无。

卷 455_11【闲卧】

· 全唐诗 ·

白居易

薄食当斋戒，散班同隐沦。佛容为弟子，天许作闲人。
唯置床临水，都无物近身。清风散发卧，兼不要纱巾。

卷 455_12【春早秋初，因时即事，兼寄浙东李侍郎】

白居易

春早秋初昼夜长，可怜天气好年光。和风细动帘帷暖，
清露微凝枕簟凉。窗下晓眠初减被，池边晚坐乍移床。
闲从蕙草侵阶绿，静任槐花满地黄。理曲管弦闻后院，
熨衣灯火映深房。四时新景何人别，遥忆多情李侍郎。

卷 455_13【新秋喜凉】

白居易

过得炎蒸月，尤宜老病身。衣裳朝不润，枕簟夜相亲。
楼月纤纤早，波风袅袅新。光阴与时节，先感是诗人。

卷 455_14【初夏闲吟，兼呈韦宾客】

白居易

· 全唐诗 ·

孟夏清和月，东都闲散官。体中无病痛，眼下未饥寒。
世事闻常闷，交游见即欢。杯觞留客切，妓乐取人宽。
雪鬓随身老，云心著处安。此中殊有味，试说向君看。

卷 455_15【哭崔二十四常侍】

白居易

貂冠初别九重门，马鬣新封四尺坟。薤露歌词非白雪，
旌铭官爵是浮云。伯伦每置随身锸，元亮先为自祭文。
莫道高风无继者，一千年内有崔君。

卷 455_16【奉酬侍中夏中雨后游城南庄见示八韵】

白居易

岛树间林峦，云收雨气残。四山岚色重，五月水声寒。
老鹤两三只，新篁千万竿。化成天竺寺，移得子陵滩。
心觉闲弥贵，身缘健更欢。帝将风后待，人作谢公看。
用里年虽老，高阳兴未阑。佳辰不见召，争免趁杯盘。

卷 455_17【送兖州崔大夫驸马赴镇】

白居易

· 全唐诗 ·

戚里夸为贤駉马，儒家认作好诗人。
鲁侯不得辜风景，沂水年年有暮春。

卷 455_18【少年问】

白居易

少年怪我问如何，何事朝朝醉复歌。
号作乐天应不错，忧愁时少乐时多。

卷 455_19【问少年】

白居易

千首诗堆青玉案，十分酒写白金盂。
回头却问诸年少，作个狂夫得了无。

卷 455_20【代琵琶弟子谢女师曹供奉寄新调弄谱】

白居易

琵琶师在九重城，忽得书来喜且惊。一纸展看非旧谱，
四弦翻出是新声。蕤宾掩抑娇多怨，散水玲珑峭更清。
珠颗泪沾金捍拨，红妆弟子不胜情。

· 全唐诗 ·

卷 455_21 【代林园戏赠】

白居易

南院今秋游宴少，西坊近日往来频。
假如宰相池亭好，作客何如作主人。

卷 455_22 【戏答林园】

白居易

岂独西坊来往频，偷闲处处作游人。
衡门虽是栖迟地，不可终朝锁老身。

卷 455_23 【重戏赠】

白居易

集贤池馆从他盛，履道林亭勿自轻。
往往归来嫌窄小，年年为主莫无情。

卷 455_24 【重戏答】

· 全唐诗 ·

白居易

小水低亭自可亲，大池高馆不关身。
林园莫妒裴家好，憎故怜新岂是人。

卷 455_25 【早秋登天宫寺阁赠诸客】

白居易

天宫阁上醉萧辰，丝管闲听酒慢巡。
为向凉风清景道，今朝属我两三人。

卷 455_26 【晓上天津桥闲望偶逢卢郎中、张员外携酒同倾】

白居易

上阳宫里晓钟后，天津桥头残月前。空阔境疑非下界，
飘飘身似在寥天。星河隐映初生日，楼阁葱茏半出烟。
此处相逢倾一醆，始知地上有神仙。

卷 455_27 【八月十五日夜同诸客玩月】

白居易

· 全唐诗 ·

月好共传唯此夜，境闲皆道是东都。嵩山表里千重雪，
洛水高低两颗珠。清景难逢宜爱惜，白头相劝强欢娱。
诚知亦有来年会，保得晴明强健无。

卷 455_28【对晚开夜合花赠皇甫郎中】

白居易

移晚校一月，花迟过半年。红开杪秋日，翠合欲昏天。
白露滴未死，凉风吹更鲜。后时谁肯顾，唯我与君怜。

卷 455_29【醉游平泉】

白居易

狂歌箕踞酒尊前，眼不看人面向天。
洛客最闲唯有我，一年四度到平泉。

卷 455_30【题赠平泉韦征君拾遗】

白居易

箕颍千年后，唯君得古风。位留丹陛上，身入白云中。
躁静心相背，高低迹不同。笼鸡与梁燕，不信有冥鸿。

· 全唐诗 ·

卷 455_31 【酬皇甫郎中对新菊花见忆】

白居易

爱菊高人吟逸韵，悲秋病客感衰怀。黄花助兴方携酒，
红叶添愁正满阶。居士荤腥今已断，仙郎杯杓为谁排。
愧君相忆东篱下，拟废重阳一日斋。

卷 455_32 【夜宴醉后留献裴侍中】

白居易

九烛台前十二姝，主人留醉任欢娱。翩翻舞袖双飞蝶，
宛转歌声一索珠。坐久欲醒还酩酊，夜深初散又踟蹰。
南山宾客东山妓，此会人间曾有无。

卷 455_33 【和韦庶子远坊赴宴未夜先归之作兼呈裴员外】

白居易

促席留欢日未曛，远坊归思已纷纷。无妨按辔行乘月，
何必逃杯走似云。银烛忍抛杨柳曲，金鞍潜送石榴裙。
到时常晚归时早，笑乐三分校一分。

· 全唐诗 ·

卷 455_34 【集贤池答侍中问】

白居易

主人晚入皇城宿，问客裴回何所须。
池月幸闲无用处，今宵能借客游无。

卷 455_35 【杨柳枝二十韵】

白居易

小妓携桃叶，新声蹋柳枝。妆成剪烛后，醉起拂衫时。
绣履娇行缓，花筵笑上迟。身轻委回雪，罗薄透凝脂。
笙引簧频暖，筝催柱数移。乐童翻怨调，才子与妍词。
便想人如树，先将发比丝。风条摇两带，烟叶贴双眉。
口动樱桃破，鬟低翡翠垂。枝柔腰袅娜，萼嫩手葳蕤。
唳鹤晴呼侣，哀猿夜叫儿。玉敲音历历，珠贯字累累。
袖为收声点，钗因赴节遗。重重遍头别，一一拍心知。
塞北愁攀折，江南苦别离。黄遮金谷岸，绿映杏园池。
春惜芳华好，秋怜颜色衰。取来歌里唱，胜向笛中吹。
曲罢那能别，情多不自持。缠头无别物，一首断肠诗。

卷 455_36 【答皇甫十郎中秋深酒熟见忆】

· 全唐诗 ·

白居易

烟景冷苍茫，秋深夜夜霜。为思池上酌，先觉瓮头香。
未暇倾巾漉，还应染指尝。醍醐惭气味，琥珀让晶光。
若许陪歌席，须容散道场。月终斋戒毕，犹及菊花黄。

卷 455_37【老去】

白居易

老去愧妻儿，冬来有劝词。暖寒从饮酒，冲冷少吟诗。
战胜心还壮，斋勤体校羸。由来世间法，损益合相随。

卷 455_38【送宗实上人游江南】

白居易

忽辞洛下缘何事，拟向江南住几时。
每过渡头应问法，无妨菩萨是船师。

卷 455_39【和同州杨侍郎夸柘枝见寄】

白居易

· 全唐诗 ·

细吟冯翊使君诗，忆作余杭太守时。
君有一般输我事，柘枝看校十年迟。

卷 455_40 【冬初酒熟二首】

白居易

霜繁脆庭柳，风利剪池荷。月色晓弥苦，鸟声寒更多。
秋怀久寥落，冬计又如何。一瓮新醅酒，萍浮春水波。

酒熟无来客，因成独酌谣。人间老黄绮，地上散松乔。
忽忽醒还醉，悠悠暮复朝。残年多少在，尽付此中销。

卷 455_41 【送姚杭州赴任，因思旧游二首】

白居易

与君细话杭州事，为我留心莫等闲。闾里固宜勤抚恤，
楼台亦要数跻攀。笙歌缥缈虚空里，风月依稀梦想间。
且喜诗人重管领，遥飞一醆贺江山。

渺渺钱塘路几千，想君到后事依然。静逢竺寺猿偷橘，
闲看苏家女采莲。故妓数人凭问讯，新诗两首倩留传。
舍人虽健无多兴，老校当时八九年。

· 全唐诗 ·

卷 455_42【寄李相公】

白居易

渐老只谋欢，虽贫不要官。唯求造化力，试为驻春看。

卷 455_43【冬日平泉路晚归】

白居易

山路难行日易斜，烟村霜树欲栖鸦。
夜归不到应闲事，热饮三杯即是家。

卷 455_44【利仁北街作】

白居易

草色斑斑春雨晴，利仁坊北面西行。
踟蹰立马缘何事，认得张家歌吹声。

卷 455_45【洛阳堰闲行】

白居易

· 全唐诗 ·

洛阳堰上新晴日，长夏门前欲暮春。
遇酒即沽逢树歇，七年此地作闲人。

卷 455_46 【过永宁】

白居易

村杏野桃繁似雪，行人不醉为谁开。
赖逢山县卢明府，引我花前劝一杯。

卷 455_47 【往年稠桑，曾丧白马，题诗厅壁，今来尚存，
又复感怀，更题绝句】

白居易

路傍埋骨蒿草合，壁上题诗尘藓生。
马死七年犹怅望，自知无乃太多情。

卷 455_48 【罗敷水】

白居易

野店东头花落处，一条流水号罗敷。
芳魂艳骨知何处，春草茫茫墓亦无。

· 全唐诗 ·

卷 455_49【路逢青州王大夫赴镇，立马赠别】

白居易

大旆拥金羁，书生得者稀。何劳问官职，岂不见光辉。
赫赫人争看，翩翩马欲飞。不期前岁尹，驻节语依依。

卷 455_50【和杨同州寒食乾坑会后，闻杨工部欲到，知予与工部有宿醒】

白居易

夜饮归常晚，朝眠起更迟。举头中酒后，引手索茶时。
拂枕青长袖，欹簪白接䌦。宿醒无兴味，先是肺神知。

卷 455_51【和刘汝州酬侍中见寄长句，因书集贤坊胜事，戏而问之】

白居易

洛川汝海封畿接，履道集贤来往频。一复时程虽不远，
百馀步地更相亲。朱门陪宴多投辖，青眼留欢任吐茵。
闻道郡斋还有酒，花前月下对何人。

· 全唐诗 ·

卷 455_52【池上二绝】

白居易

山僧对棋坐，局上竹阴清。映竹无人见，时闻下子声。

小娃撑小艇，偷采白莲回。不解藏踪迹，浮萍一道开。

卷 455_53【白羽扇】

白居易

素是自然色，圆因裁制功。飒如松起籁，飘似鹤翻空。
盛夏不销雪，终年无尽风。引秋生手里，藏月入怀中。
麈尾斑非疋，蒲葵陋不同。何人称相对，清瘦白须翁。

卷 455_54【五月斋戒，罢宴彻乐，闻韦宾客、皇甫郎中饮会亦稀，又知欲携酒馔出斋，先长句呈谢】

白居易

妓房匣镜满红埃，酒库封瓶生绿苔。居士尔时缘护戒，
车公何事亦停杯。散斋香火今朝散，开素盘筵后日开。
随意往还君莫怪，坐禅僧去饮徒来。

· 全唐诗 ·

卷 455_55【闲园独赏】

白居易

午后郊园静，晴来景物新。雨添山气色，风借水精神。
永日若为度，独游何所亲。仙禽狎君子，芳树倚佳人。
蚁斗王争肉，蜗移舍逐身。蝶双知伉俪，蜂分见君臣。
蠢蠕形虽小，逍遥性即均。不知鹏与鷃，相去几微尘。

卷 455_56【种柳三咏】

白居易

白头种松桂，早晚见成林。不及栽杨柳，明年便有阴。
春风为催促，副取老人心。

从君种杨柳，夹水意如何。准拟三年后，青丝拂绿波。
仍教小楼上，对唱柳枝歌。

更想五年后，千千条麹尘。路傍深映月，楼上暗藏春。
愁杀闲游客，闻歌不见人。

卷 455_57【偶吟】

· 全唐诗 ·

白居易

好官病免曾三度，散地归休已七年。老自退闲非世弃，
贫蒙强健是天怜。韦荆南去留春服，王侍中来乞酒钱。
便得一年生计足，与君美食复甘眠。

卷 455_58【池上即事】

白居易

移床避日依松竹，解带当风挂薜萝。钿砌池心绿蘋合，
粉开花面白莲多。久阴新霁宜丝管，苦热初凉入绮罗。
家酝瓶空人客绝，今宵争奈月明何。

卷 455_59【南塘暝兴】

白居易

水色昏犹白，霞光暗渐无。风荷摇破扇，波月动连珠。
蟋蟀啼相应，鸳鸯宿不孤。小僮频报夜，归步尚踟蹰。

卷 455_60【小宅】

白居易

· 全唐诗 ·

小宅里间接，疏篱鸡犬通。渠分南巷水，窗借北家风。
庾信园殊小，陶潜屋不丰。何劳问宽窄，宽窄在心中。

卷 455_61 【谕亲友】

白居易

适情处处皆安乐，大抵园林胜市朝。烦闹荣华犹易过，
优闲福禄更难销。自怜老大宜疏散，却被交亲叹寂寥。
终日相逢不相见，两心相去一何遥。

卷 455_62 【龙门送别皇甫泽州赴任、韦山人南游】

白居易

隼旟归洛知何日，鹤驾还嵩莫过春。
惆怅香山云水冷，明朝便是独游人。

卷 455_63 【刘苏州寄酿酒糯米，李浙东寄杨柳枝舞衫，偶
因尝酒试衫，辄成长句寄谢之】

白居易

柳枝谩蹋试双袖，桑落初香尝一杯。金屑醅浓吴米酿，

· 全唐诗 ·

银泥衫稳越娃裁。舞时已觉愁眉展，醉后仍教笑口开。
惭愧故人怜寂寞，三千里外寄欢来。

卷 455_64【诏授同州刺史，病不赴任，因咏所怀】

白居易

同州慵不去，此意复谁知。诚爱俸钱厚，其如身力衰。
可怜病判案，何似醉吟诗。劳逸悬相远，行藏决不疑。
徒烦人劝谏，只合自寻思。白发来无限，青山去有期。
野心惟怕闹，家口莫愁饥。卖却新昌宅，聊充送老资。

卷 455_65【寄杨六侍郎】

白居易

西户最荣君好去，左冯虽稳我慵来。
秋风一箸鲈鱼鲙，张翰摇头唤不回。

卷 455_66【韦七自太子宾客再除秘书监，以长句贺而餞之】

白居易

离筵莫怆且同欢，共贺新恩拜旧官。屈就商山伴麋鹿，

· 全唐诗 ·

好归芸阁狎鹓鸾。落星石上苍苔古，画鹤厅前白露寒。
老监姓名应在壁，相思试为拂尘看。

卷 455_67【酒熟忆皇甫十】

白居易

新酒此时熟，故人何日来。自从金谷别，不见玉山颓。
疏索柳花碗，寂寥荷叶杯。今冬问毡帐，雪里为谁开。

卷 455_68【九年十一月二十一日感事而作】

白居易

祸福茫茫不可期，大都早退似先知。当君白首同归日，
是我青山独往时。顾索素琴应不暇，忆牵黄犬定难追。
麒麟作脯龙为醢，何似泥中曳尾龟。

卷 455_69【即事重题】

白居易

重裘暖帽宽毡履，小阁低窗深地炉。
身稳心安眠未起，西京朝士得知无。

· 全唐诗 ·

卷 455_70【将归渭村先寄舍弟】

白居易

一年年觉此身衰，一日日知前事非。咏月嘲风先要减，
登山临水亦宜稀。子平嫁娶贫中毕，元亮田园醉里归。
为报阿连寒食下，与吾酿酒扫柴扉。

卷 455_71【看嵩洛有叹】

白居易

今日看嵩洛，回头叹世间。荣华急如水，忧患大于山。
见苦方知乐，经忙始爱闲。未闻笼里鸟，飞出肯飞还。

卷 455_72【咏怀】

白居易

随缘逐处便安闲，不入朝廷不住山。心似虚舟浮水上，
身同宿鸟寄林间。尚平婚嫁了无累，冯翊符章封却还。
处分贫家残活计，匹如身后莫相关。

· 全唐诗 ·

卷 455_73【咏老赠梦得】

白居易

与君俱老也，自问老何如。眼涩夜先卧，头慵朝未梳。
有时扶杖出，尽日闭门居。懒照新磨镜，休看小字书。
情于故人重，迹共少年疏。唯是闲谈兴，相逢尚有余。

· 全唐诗 ·

第四百五十六卷

卷 456_1 【从同州刺史改授太子少傅分司】

白居易

承华东署三分务，履道西池七过春。歌酒优游聊卒岁，
园林萧洒可终身。留侯爵秩诚虚贵，疏受生涯未苦贫。
月俸百千官二品，朝廷雇我作闲人。

卷 456_2 【奉和裴令公新成午桥庄绿野堂即事】

白居易

旧径开桃李，新池凿凤凰。只添丞相阁，不改午桥庄。
远处尘埃少，闲中日月长。青山为外屏，绿野是前堂。
引水多随势，栽松不趁行。年华玩风景，春事看农桑。
花妒谢家妓，兰偷荀令香。游丝飘酒席，瀑布溅琴床。
巢许终身稳，萧曹到老忙。千年落公便，进退处中央。

卷 456_3 【自题小草亭】

· 全唐诗 ·

白居易

新结一茅茨，规模俭且卑。土阶全垒块，山木半留皮。
阴合连藤架，丛香近菊篱。壁宜藜杖倚，门称荻帘垂。
窗里风清夜，檐间月好时。留连尝酒客，句引坐禅师。
伴宿双栖鹤，扶行一侍儿。绿醅量醖饮，红稻约升炊。
龌龊豪家笑，酸寒富室欺。陶庐闲自爱，颜巷陋谁知。
蝼蚁谋深穴，鸛鷀占小枝。各随其分足，焉用有余为。

卷 456_4【自咏】

白居易

细故随缘尽，衰形具体微。斗闲僧尚闹，较瘦鹤犹肥。
老遣宽裁袜，寒教厚絮衣。马从衔草展，鸡任啄笼飞。
只要天和在，无令物性违。自余君莫问，何是复何非。

卷 456_5【新亭病后独坐，招李侍郎公垂】

白居易

新亭未有客，竟日独何为。趁暖泥茶灶，防寒夹竹篱。
头风初定后，眼暗欲明时。浅把三分酒，闲题数句诗。
应须置两榻，一榻待公垂。

· 全唐诗 ·

卷 456_6 【闲卧寄刘同州】

白居易

软褥短屏风，昏昏醉卧翁。鼻香茶熟后，腰暖日阳中。
伴老琴长在，迎春酒不空。可怜闲气味，唯欠与君同。

卷 456_7 【残酌晚餐】

白居易

闲倾残酒后，暖拥小炉时。舞看新翻曲，歌听自作词。
鱼香肥泼火，饭细滑流匙。除却慵馋外，其余尽不知。

卷 456_8 【喜见刘同州梦得】

白居易

紫绶白髭须，同年二老夫。论心共牢落，见面且欢娱。
酒好携来否，诗多记得无。应须为春草，五马少踟蹰。

卷 456_9 【裴令公席上赠别梦得】

· 全唐诗 ·

白居易

年老官高多别离，转难相见转相思。
雪销酒尽梁王起，便是邹枚分散时。

卷 456_10【寻春题诸家园林】

白居易

闻健朝朝出，乘春处处寻。天供闲日月，人借好园林。
渐以狂为态，都无闷到心。平生身得所，未省似而今。

卷 456_11【又题一绝】

白居易

貌随年老欲何如，兴遇春牵尚有馀。
遥见人家花便入，不论贵贱与亲疏。

卷 456_12【家园三绝】

白居易

沧浪峡水子陵滩，路远江深欲去难。

· 全唐诗 ·

何似家池通小院，卧房阶下插鱼竿。

篱下先生时得醉，瓮间吏部暂偷闲。
何如家酝双鱼榼，雪夜花时长在前。

鸳鸯怕捉竟难亲，鸂鶒虽笼不著人。
何似家禽双白鹤，闲行一步亦随身。

卷 456_13【老来生计】

白居易

老来生计君看取，白日游行夜醉吟。陶令有田唯种黍，
邓家无子不留金。人间荣耀因缘浅，林下幽闲气味深。
烦虑渐消虚白长，一年心胜一年心。

卷 456_14【早春题少室东岩】

白居易

三十六峰晴，雪销岚翠生。月留三夜宿，春引四山行。
远草初含色，寒禽未变声。东岩最高石，唯我有题名。

卷 456_15【早春即事】

· 全唐诗 ·

白居易

眼重朝眠足，头轻宿酒醒。阳光满前户，雪水半中庭。
物变随天气，春生逐地形。北檐梅晚白，东岸柳先青。
葱茏抽羊角，松巢堕鹤翎。老来诗更拙，吟罢少人听。

卷 456_16 【叹春风兼赠李二十侍郎二绝】

白居易

树根雪尽催花发，池岸冰消放草生。
唯有须霜依旧白，春风于我独无情。

道场斋戒今初毕，酒伴欢娱久不同。
不把一杯来劝我，无情亦得似春风。

卷 456_17 【春来频与李二宾客郭外同游，因赠长句】

白居易

风光引步酒开颜，送老消春嵩洛间。朝蹋落花相伴出，
暮随飞鸟一时还。我为病叟诚宜退，君是才臣岂合闲。
可惜济时心力在，放教临水复登山。

· 全唐诗 ·

卷 456_18 【二月二日】

白居易

二月二日新雨晴，草芽菜甲一时生。
轻衫细马春年少，十字津头一字行。

卷 456_19 【奉和令公绿野堂种花】

白居易

绿野堂开占物华，路人指道令公家。
令公桃李满天下，何用堂前更种花。

卷 456_20 【清明日登老君阁望洛城，赠韩道士】

白居易

风光烟火清明日，歌哭悲欢城市间。何事不随东洛水，
谁家又葬北邙山。中桥车马长无已，下渡舟航亦不闲。
冢墓累累人扰扰，辽东怅望鹤飞还。

卷 456_21 【三月三日】

· 全唐诗 ·

白居易

画堂三月初三日，絮扑窗纱燕拂檐。莲子数杯尝冷酒，
柘枝一曲试春衫。阶临池面胜看镜，户映花丛当下帘。
指点楼南玩新月，玉钩素手两纤纤。

卷 456_22【雨中听琴者弹别鹤操】

白居易

双鹤分离一何苦，连阴雨夜不堪闻。
莫教迁客孀妻听，嗟叹悲啼泥杀君。

卷 456_23【酬郑二司录与李六郎中寒食日相过，同宴见赠】

白居易

偶因冷节会嘉宾，况是平生心所亲。迎接须矜疏傅老，
只供莫笑阮家贫。杯盘狼藉宜侵夜，风景阑珊欲过春。
相对喜欢还怅望，同年只有此三人。

卷 456_24【喜杨六侍御同宿】

白居易

· 全唐诗 ·

岸帻静言明月夜，匡床闲卧落花朝。二三月里饶春睡，
七八年来不早朝。浊水清尘难会合，高鹏低鷃各逍遥。
眼看又上青云去，更卜同衾一两宵。

卷 456_25【残春咏怀，赠杨慕巢侍郎】

白居易

位逾三品日，年过六旬时。不道官班下，其如筋力衰。
犹怜好风景，转重旧亲知。少壮难重得，欢娱且强为。
兴来池上酌，醉出袖中诗。静话开襟久，闲吟放醺迟。
落花无限雪，残鬓几多丝。莫说伤心事，春翁易酒悲。

卷 456_26【闲居春尽】

白居易

闲泊池舟静掩扉，老身慵出客来稀。愁应暮雨留教住，
春被残莺唤遣归。揭瓮偷尝新熟酒，开箱试著旧生衣。
冬裘夏葛相催促，垂老光阴速似飞。

卷 456_27【春尽日天津桥醉吟偶呈李尹侍郎】

白居易

· 全唐诗 ·

宿雨洗天津，无泥未有尘。初晴迎早夏，落照送残春。
兴发诗随口，狂来酒寄身。水边行嵬峨，桥上立逡巡。
疏傅心情老，吴公政化新。三川徒有主，风景属闲人。

卷 456_28【池上逐凉二首】

白居易

青苔地上消残暑，绿树阴前逐晚凉。轻屐单衫薄纱帽，
浅池平岸庾藤床。簪缨怪我情何薄，泉石谙君味甚长。
遍问交亲为老计，多言宜静不宜忙。

窗间睡足休高枕，水畔闲来上小船。棹遣秃头奴子拨，
茶教纤手侍儿煎。门前便是红尘地，林外无非赤日天。
谁信好风清簟上，更无一事但翛然。

卷 456_29【香山避暑二绝】

白居易

六月滩声如猛雨，香山楼北畅师房。
夜深起凭阑干立，满耳潺湲满面凉。

纱巾草履竹疏衣，晚下香山蹋翠微。
一路凉风十八里，卧乘篮輿睡中归。

· 全唐诗 ·

卷 456_30 【老夫】

白居易

七八年来游洛都，三分游伴二分无。风前月下花园里，
处处唯残个老夫。世事劳心非富贵，人间实事是欢娱。
谁能逐我来闲坐，时共酣歌倾一壶。

卷 456_31 【香山下卜居】

白居易

老须为老计，老计在抽簪。山下初投足，人间久息心。
乱藤遮石壁，绝涧护云林。若要深藏处，无如此处深。

卷 456_32 【无长物】

白居易

莫讶家居窄，无嫌活计贫。只缘无长物，始得作闲人。
青竹单床簟，乌纱独幅巾。其馀皆称是，亦足奉吾身。

卷 456_33 【宿香山寺酬广陵牛相公见寄】

· 全唐诗 ·

白居易

手札八行诗一篇，无由相见但依然。君匡圣主方行道，
我事空王正坐禅。支许徒思游白月，夔龙未放下青天。
应须且为苍生住，犹去悬车十四年。

卷 456_34 【以诗代书，寄户部杨侍郎，劝买东邻王家宅】

白居易

劝君買取东邻宅，与我衡门相并开。云映嵩峰当户牖，
月和伊水入池台。林园亦要闻闲置，筋力应须及健回。
莫学因循白宾客，欲年六十始归来。

卷 456_35 【赠谈客】

白居易

上客清谈何亹亹，幽人闲思自寥寥。
请君休说长安事，膝上风清琴正调。

卷 456_36 【初入香山院对月】

白居易

· 全唐诗 ·

老住香山初到夜，秋逢白月正圆时。
从今便是家山月，试问清光知不知。

卷 456_37【题龙门堰西涧】

白居易

东岸菊丛西岸柳，柳阴烟合菊花开。一条秋水琉璃色，
阔狭才容小舫回。除却悠悠白少傅，何人解入此中来。

卷 456_38【秋霖中奉裴令公见招，早出赴会，马上先寄六韵】

白居易

雨暗三秋日，泥深一尺时。老人平旦出，自问欲何之。
不是寻医药，非干送别离。素书传好语，绛帐赴佳期。
续借桃花马，催迎杨柳姬。只愁张录事，罚我怪来迟。

卷 456_39【尝酒听歌招客】

白居易

一瓮香醪新插刍，双鬟小妓薄能讴。管弦渐好新教得，

· 全唐诗 ·

罗绮虽贫免外求。世上贪忙不觉苦，人间除醉即须愁。
不知此事君知否，君若知时从我游。

卷 456_40【八月三日夜作】

白居易

露白月微明，天凉景物清。草头珠颗冷，楼角玉钩生。
气爽衣裳健，风疏砧杵鸣。夜衾香有思，秋簟冷无情。
梦短眠频觉，宵长起暂行。烛凝临晓影，虫怨欲寒声。
槿老花先尽，莲凋子始成。四时无了日，何用叹衰荣。

卷 456_41【病中赠南邻觅酒】

白居易

头痛牙疼三日卧，妻看煎药婢来扶。
今朝似校抬头语，先问南邻有酒无。

卷 456_42【晓眠后寄杨户部】

白居易

软绫腰褥薄绵被，凉冷秋天稳暖身。

· 全唐诗 ·

一觉晓眠殊有味，无因寄与早朝人。

卷 456_43【秋雨夜眠】

白居易

凉冷三秋夜，安闲一老翁。卧迟灯灭后，睡美雨声中。
灰宿温瓶火，香添暖被笼。晓晴寒未起，霜叶满阶红。

卷 456_44【喜梦得自冯翊归洛，兼呈令公】

白居易

上客新从左辅回，高阳兴助洛阳才。已将四海声名去，
又占三春风景来。甲子等头怜共老，文章敌手莫相猜。
邹枚未用争诗酒，且饮梁王贺喜杯。

卷 456_45【斋戒满夜，戏招梦得】

白居易

纱笼灯下道场前，白日持斋夜坐禅。无复更思身外事，
未能全尽世间缘。明朝又拟亲杯酒，今夕先闻理管弦。
方丈若能来问疾，不妨兼有散花天。

· 全唐诗 ·

卷 456_46 【和令公问刘宾客归来称意无之作】

白居易

水南秋一半，风景未萧条。皂盖回沙苑，蓝舆上洛桥。
闲尝黄菊酒，醉唱紫芝谣。称意那劳问，请钱不早朝。

卷 456_47 【酬梦得穷秋夜坐，即事见寄】

白居易

焰细灯将尽，声遥漏正长。老人秋向火，小女夜缝裳。
菊悴篱经雨，萍销水得霜。今冬暖寒酒，先拟共君尝。

卷 456_48 【偶于维扬牛相公处觅得箏，箏未到，先寄诗来，走笔戏答】

白居易

楚匠饶巧思，秦箏多好音。如能惠一面，何啻直双金。
玉柱调须品，朱弦染要深。会教魔女弄，不动是禅心。

卷 456_49 【答梦得秋庭独坐见赠】

· 全唐诗 ·

白居易

林梢隐映夕阳残，庭际萧疏夜气寒。霜草欲枯虫思急，
风枝未定鸟栖难。容衰见镜同惆怅，身健逢杯且喜欢。
应是天教相暖热，一时垂老与闲官。

卷 456_50 【长斋月满，携酒先与梦得对酌，醉中同赴令公之宴，戏赠梦得】

白居易

斋宫前日满三旬，酒榼今朝一拂尘。乘兴还同访戴客，
解醒仍对姓刘人。病心汤沃寒灰活，老面花生朽木春。
若怕平原怪先醉，知君未惯吐车茵。

卷 456_51 【奉酬淮南牛相公思黯见寄二十四韵】

白居易

白老忘机客，牛公济世贤。鸥栖心恋水，鹏举翅摩天。
累就优闲秩，连操造化权。贫司甚萧洒，荣路自喧阗。
望苑三千日，台阶十五年。是人皆弃忘，何物不陶甄。
篮舆游嵩岭，油幢镇海壖。竹篙撑钓艇，金甲拥楼船。
雪夜寻僧舍，春朝列妓筵。长斋俨香火，密宴簇花钿。
自觉闲胜闹，遥知醉笑禅。是非分未定，会合杳无缘。

· 全唐诗 ·

我正思扬府，君应望洛川。西来风袅袅，南去雁连连。
日落龙门外，潮生瓜步前。秋同一时尽，月共两乡圆。
旧眷交欢在，新文气调全。惭无白雪曲，难答碧云篇。
金谷诗谁赏，芜城赋众传。珠应晒鱼目，铅未伏龙泉。
远讯惊魔物，深情寄酒钱。霜纨一百匹，玉柱十三弦。
楚醴来尊里，秦声送耳边。何时红烛下，相对一陶然。

卷 456_52【吴秘监每有美酒，独酌独醉，但蒙诗报，不以
饮招，辄此戏酬，兼呈梦得】

白居易

蓬山仙客下烟霄，对酒唯吟独酌谣。不怕道狂挥玉爵，
亦曾乘兴解金貂。君称名士夸能饮，我是愚夫肯见招。
赖有伯伦为醉伴，何愁不解傲松乔。

卷 456_53【酬梦得霜夜对月见怀】

白居易

凄清冬夜景，摇落长年情。月带新霜色，砧和远雁声。
暖怜炉火近，寒觉被衣轻。枕上酬佳句，诗成梦不成。

卷 456_54【初冬月夜得皇甫泽州手札并诗数篇，因遣报书，

· 全唐诗 ·

偶题长句】

白居易

清冷玉韵两三章，落箔银钩七八行。心逐报书悬雁足，
梦寻来路绕羊肠。水南地空多明月，山北天寒足早霜。
最恨泼醅新熟酒，迎冬不得共君尝。

卷 456_55【雪中酒熟，欲携访吴监，先寄此诗】

白居易

新雪对新酒，忆同倾一杯。自然须访戴，不必待延枚。
陈榻无辞解，袁门莫懒开。笙歌与谈笑，随事自将来。

卷 456_56【酬令公雪中见赠，讶不与梦得同相访】

白居易

雪似鹅毛飞散乱，人披鹤氅立裴回。
邹生枚叟非无兴，唯待梁王召即来。

卷 456_57【题酒瓮呈梦得】

· 全唐诗 ·

白居易

若无清酒两三瓮，争向白须千万茎。麴蘖销愁真得力，
光阴催老苦无情。凌烟阁上功无分，伏火炉中药未成。
更拟共君何处去，且来同作醉先生。

卷 456_58【迂叟】

白居易

一辞魏阙就商宾，散地闲居八九春。初时被目为迂叟，
近日蒙呼作隐人。冷暖俗情谙世路，是非闲论任交亲。
应须绳墨机关外，安置疏愚钝滞身。

卷 456_59【洛下闲居，寄山南令狐相公】

白居易

已收身向园林下，犹寄名于禄仕间。不锻嵇康弥懒静，
无金疏傅更贫闲。支分门内馀生计，谢绝朝中旧往还。
唯是相君忘未得，时思汉水梦巴山。

卷 456_60【惜春赠李尹】

· 全唐诗 ·

白居易

春色有时尽，公门终日忙。两衙但不阙，一醉亦何妨。
芳树花团雪，衰翁鬓扑霜。知君倚年少，未苦惜风光。

卷 456_61【对酒劝令公开春游宴】

白居易

时泰岁丰无事日，功成名遂自由身。前头更有忘忧日，
向上应无快活人。自去年来多事故，从今日去少交亲。
宜须数数谋欢会，好作开成第二春。

卷 456_62【与梦得偶同到敦诗宅，感而题壁】

白居易

山东才副苍生愿，川上俄惊逝水波。履道凄凉新第宅，
宣城零落旧笙歌。园荒唯有薪堪采，门冷兼无雀可罗。
今日相逢偶同到，伤心不是故经过。

卷 456_63【杨六尚书新授东川节度使，代妻戏贺兄嫂二绝】

白居易

· 全唐诗 ·

刘纲与妇共升仙，弄玉随夫亦上天。
何似沙哥领崔嫂，碧油幢引向东川。

金花银碗饶君用，罽画罗衣尽嫂裁。
觅得黔娄为妹婿，可能空寄蜀茶来。

卷 456_64【闲游即事】

白居易

郊野游行熟，村园次第过。蓦山寻滪涧，蹋水渡伊河。
寒食青青草，春风瑟瑟波。逢人共杯酒，随马有笙歌。
胜事经非少，芳辰过亦多。还须自知分，不老拟如何。

卷 456_65【六十六】

白居易

七十欠四岁，此生那足论。每因悲物故，还且喜身存。
安得头长黑，争教眼不昏。交游成拱木，婢仆见曾孙。
瘦觉腰金重，衰怜鬓雪繁。将何理老病，应付与空门。

卷 456_66【池上早春，即事招梦得】

· 全唐诗 ·

白居易

老更惊年改，闲先觉日长。晴熏榆荚黑，春染柳梢黄。
云破山呈色，冰融水放光。低平稳船舫，轻暖好衣裳。
白角三升榼，红茵六尺床。偶游难得伴，独醉不成狂。
我有中心乐，君无外事忙。经过莫慵懒，相去两三坊。

卷 456_67【因梦得题公垂所寄蜡烛，因寄公垂】

白居易

照梁初日光相似，出水新莲艳不如。
却寄两条君令取，明年双引入中书。

卷 456_68【令公南庄花柳正盛，欲偷一赏，先寄二篇】

白居易

最忆楼花千万朵，偏怜堤柳两三株。
拟提社酒携村妓，擅入朱门莫怪无。

可惜亭台闲度日，欲偷风景暂游春。
只愁花里莺饶舌，飞入宫城报主人。

· 全唐诗 ·

卷 456_69【春夜宴席上戏赠裴淄川】

白居易

九十不衰真地仙，六旬犹健亦天怜。今年相遇莺花月，
此夜同欢歌酒筵。四座齐声和丝竹，两家随分斗金钿。
留君到晓无他意，图向君前作少年。

卷 456_70【赠梦得】

白居易

年颜老少与君同，眼未全昏耳未聋。放醉卧为春日伴，
趁欢行入少年丛。寻花借马烦川守，弄水偷船恼令公。
闻道洛城人尽怪，呼为刘白二狂翁。

卷 456_71【晚春欲携酒寻沈四著作，先以六韵寄之】

白居易

病容衰惨澹，芳景晚蹉跎。无计留春得，争能奈老何。
篇章慵报答，杯宴喜经过。顾我酒狂久，负君诗债多。
敢辞携绿蚁，只愿见青娥。最忆阳关唱，真珠一串歌。

· 全唐诗 ·

卷 456_72【三月三日祓禊洛滨】

白居易

三月草萋萋，黄莺歇又啼。柳桥晴有絮，沙路润无泥。
禊事修初半，游人到欲齐。金钿耀桃李，丝管骇凫鹭。
转岸回船尾，临流簇马蹄。闹翻扬子渡，蹋破魏王堤。
妓接谢公宴，诗陪荀令题。舟同李膺泛，醴为穆生携。
水引春心荡，花牵醉眼迷。尘街从鼓动，烟树任鸦栖。
舞急红腰软，歌迟翠黛低。夜归何用烛，新月凤楼西。

卷 456_73【同梦得暮春寄贺东西川二杨尚书】

白居易

龙节对持真可爱，雁行相接更堪夸。两川风景同三月，
千里江山属一家。鲁卫定知连气色，潘杨亦觉有光华。
应怜洛下分司伴，冷宴闲游老看花。

卷 456_74【喜小楼西新柳抽条】

白居易

一行弱柳前年种，数尺柔条今日新。渐欲拂他骑马客，

· 全唐诗 ·

未多遮得上楼人。须教碧玉羞眉黛，莫与红桃作麝尘。
为报金堤千万树，饶伊未敢苦争春。

卷 456_75【晚春酒醒寻梦得】

白居易

料合同惆怅，花残酒亦残。醉心忘老易，醒眼别春难。
独出虽慵懒，相逢定喜欢。还携小蛮去，试觅老刘看。

卷 456_76【感事】

白居易

服气崔常侍，烧丹郑舍人。常期生羽翼，那忽化灰尘。
每遇凄凉事，还思潦倒身。唯知趁杯酒，不解炼金银。
睡适三尸性，慵安五藏神。无忧亦无喜，六十六年春。

卷 456_77【和裴令公南庄绝句】

白居易

陶庐僻陋那堪比，谢墅幽微不足攀。
何似嵩峰三十六，长随申甫作家山。

· 全唐诗 ·

卷 456_78【宅西有流水，墙下构小楼，临玩之时，颇有幽趣，因命歌酒，聊以自娱，独醉独吟，偶题五绝句】

白居易

伊水分来不自由，无人解爱为谁流。
家家抛向墙根底，唯我栽莲越小楼。

水色波文何所似，麴尘罗带一条斜。
莫言罗带春无主，自置楼来属白家。

日滟水光摇素壁，风飘树影拂朱栏。
皆言此处宜弦管，试奏霓裳一曲看。

霓裳奏罢唱梁州，红袖斜翻翠黛愁。
应是遥闻胜近听，行人欲过尽回头。

独醉还须得歌舞，自娱何必要亲宾。
当时一部清商乐，亦不长将乐外人。

卷 456_79【偶作】

白居易

篮舁出即忘归舍，柴户昏犹未掩关。闻客病时惭体健，

· 全唐诗 ·

见人忙处觉心闲。清凉秋寺行香去，和暖春城拜表还。
木雁一篇须记取，致身才与不才间。

卷 456_80 【因梦得酬牛相公初到洛中小饮见赠】

白居易

淮南挥手抛红旆，洛下回头向白云。政事堂中老丞相，
制科场里旧将军。宫城烟月饶全占，关塞风光请半分。
诗酒放狂犹得在，莫欺白叟与刘君。

卷 456_81 【幽居早秋闲咏】

白居易

幽僻嚣尘外，清凉水木间。卧风秋拂簟，步月夜开关。
且得身安泰，从他世险艰。但休争要路，不必入深山。
轩鹤留何用，泉鱼放不还。谁人知此味，临老十年闲。

卷 456_82 【和令狐仆射小饮听阮咸】

白居易

掩抑复凄清，非琴不是箏。还弹乐府曲，别占阮家名。

· 全唐诗 ·

古调何人识，初闻满座惊。落盘珠历历，摇珮玉琤琤。
似劝杯中物，如含林下情。时移音律改，岂是昔时声。

卷 456_83【烧药不成命酒独醉】

白居易

白发逢秋王，丹砂见火空。不能留姹女，争免作衰翁。
赖有杯中绿，能为面上红。少年心不远，只在半酣中。

卷 456_84【送卢郎中赴河东裴令公幕】

白居易

别时暮雨洛桥岸，到日凉风汾水波。
荀令见君应问我，为言秋草闭门多。

卷 456_85【送李滁州】

白居易

君于觉路深留意，我亦禅门薄致功。未悟病时须去病，
已知空后莫依空。白衣卧病嵩山下，皂盖行春楚水东。
谁道三年千里别，两心同在道场中。

· 全唐诗 ·

卷 456_86 【长斋月满寄思黯】

白居易

一日不见如三月，一月相思如七年。似隔山河千里地，
仍当风雨九秋天。明朝斋满相寻去，挈榼抱衾同醉眠。

卷 456_87 【冬夜对酒寄皇甫十】

白居易

霜杀中庭草，冰生后院池。有风空动树，无叶可辞枝。
十月苦长夜，百年强半时。新开一瓶酒，那得不相思。

卷 456_88 【岁除夜对酒】

白居易

衰翁岁除夜，对酒思悠然。草白经霜地，云黄欲雪天。
醉依香枕坐，慵傍暖炉眠。洛下闲来久，明朝是十年。

· 全唐诗 ·

第四百五十七卷

卷 457_1【寄献北都留守裴令公】

白居易

天上中台正，人间一品高。休明值尧舜，勋业过萧曹。
始擅文三捷，终兼武六韬。动人名赫赫，忧国意忉忉。
荡蔡擒封豕，平齐斩巨鳌。两河收土宇，四海定波涛。
宠重移宫雘，恩新换阆旄。保厘东宅静，守护北门牢。
晋国封疆阔，并州士马豪。胡兵惊赤帜，边雁避乌号。
令下流如水，仁沾泽似膏。路喧歌五袴，军醉感单醪。
将校森貔武，宾僚俨隼旄。客无烦夜柝，吏不犯秋毫。
神在台骀助，魂亡玃狁逃。德星销彗孛，霖雨灭腥臊。
烽戍高临代，关河远控洮。汾云晴漠漠，朔吹冷飕飕。
豹尾交牙戟，虬须捧佩刀。通天白犀带，照地紫麟袍。
羌管吹杨柳，燕姬酌蒲萄。银含凿落盏，金屑琵琶槽。
遥想从军乐，应忘报国劳。紫微留北阙，绿野寄东皋。
忽忆前时会，多惭下客叨。清宵陪宴话，美景从游遨。
花月还同赏，琴诗雅自操。朱弦拂宫徵，洪笔振风骚。
近竹开方丈，依林架桔槔。春池八九曲，画舫两三艘。
径滑苔黏屐，潭深水没篙。绿丝萦岸柳，红粉映楼桃。
为穆先陈醴，招刘共藉糟。舞鬟金翡翠，歌颈玉螭螯。

· 全唐诗 ·

盛德终难过，明时岂易遭。公虽慕张范，帝未舍伊皋。
眷恋心方结，踟蹰首已搔。鸾皇上寥廓，燕雀任蓬蒿。
欲献文狂简，徒烦思郁陶。可怜四百字，轻重抵鸿毛。

卷 457_2【和东川杨慕巢尚书府中独坐，感戚在怀，见寄十四韵】

白居易

我是知君者，君今意若何。穷通时不定，苦乐事相和。
东蜀欢殊渥，西江叹逝波。只缘荣贵极，翻使感伤多。
行断风惊雁，年侵日下坡。片心休惨戚，双鬓已蹉跎。
紫绶黄金印，青幢白玉珂。老将荣补贴，愁用道销磨。
外府饶杯酒，中堂有绮罗。应须引满饮，何不放狂歌。
锦水通巴峡，香山对洛河。将军驰铁马，少傅步铜驼。
深契怜松竹，高情忆薜萝。悬车年甚远，未敢故相过。

卷 457_3【分司洛中多暇，数与诸客宴游，醉后狂吟，偶成十韵，因招梦得宾客，兼呈思黯奇章公】

白居易

性与时相远，身将世两忘。寄名朝士籍，寓兴少年场。
老岂无谈笑，贫犹有酒浆。随时来伴侣，逐日用风光。
数数游何爽，些些病未妨。天教荣启乐，人恕接舆狂。

· 全唐诗 ·

改业为逋客，移家住醉乡。不论招梦得，兼拟诱奇章。
要路风波险，权门市井忙。世间无可恋，不是不思量。

卷 457_4【小岁日喜谈氏外孙女孩满月】

白居易

今旦夫妻喜，他人岂得知。自嗟生女晚，敢讶见孙迟。
物以稀为贵，情因老更慈。新年逢吉日，满月乞名时。
桂燎熏花果，兰汤洗玉肌。怀中有可抱，何必是男儿。主

卷 457_5【闲吟赠皇甫郎中亲家翁】

白居易

谁能嗟叹光阴暮，岂复忧愁活计贫。忽忽不知头上事，
时时犹忆眼中人。早为良友非交势，晚接嘉姻不失亲。
最喜两家婚嫁毕，一时抽得尚平身。

卷 457_6【梦得卧病，携酒相寻，先以此寄】

白居易

病来知少客，谁可以为娱。日晏开门未，秋寒有酒无。

· 全唐诗 ·

自宜相慰问，何必待招呼。小疾无妨饮，还须挈一壶。

卷 457_7【酬思黯戏赠同用狂字】

白居易

钟乳三千两，金钗十二行。妒他心似火，欺我鬓如霜。
慰老资歌笑，销愁仰酒浆。眼看狂不得，狂得且须狂。

卷 457_8【又戏答绝句】

白居易

狂夫与我两相忘，故态些些亦不妨。
纵酒放歌聊自乐，接舆争解教人狂。

卷 457_9【令狐相公与梦得交情素深，眷予分亦不浅，一闻薨逝，相顾泫然。旋有使来，得前月未殁之前数日书及诗，寄赠梦得，哀吟悲叹，寄情于诗，诗成示予，感而继和】

白居易

緘题重叠语殷勤，存没交亲自此分。前月使来犹理命，
今朝诗到是遗文。银钩见晚书无报，玉树埋深哭不闻。

· 全唐诗 ·

最感一行绝笔字，尚言千万乐天君。

卷 457_10 【洛雪中，频与刘李二宾客宴集，因寄汴州李尚书】

白居易

水南水北雪纷纷，雪里欢游莫厌频。日日暗来唯老病，
年年少去是交亲。碧毡帐暖梅花湿，红燎炉香竹叶春。
今日邹枚俱在洛，梁园置酒召何人。

卷 457_11 【看梦得题答李侍郎诗，诗中有文星之句，因戏和之】

白居易

看题锦绣报琼瑰，俱是人天第一才。
好遣文星守躔次，亦须防有客星来。

卷 457_12 【闲适】

白居易

禄俸优饶官不卑，就中闲适是分司。风光暖助游行处，

· 全唐诗 ·

雨雪寒供饮宴时。肥马轻裘还且有，粗歌薄酒亦相随。
微躬所要今皆得，只是蹉跎得校迟。

卷 457_13【戏答思黯】

白居易

何时得见十三弦，待取无云有月天。
愿得金波明似镜，镜中照出月中仙。

卷 457_14【酬裴令公赠马相戏】

白居易

安石风流无奈何，欲将赤骥换青娥。
不辞便送东山去，临老何人与唱歌。

卷 457_15【新岁赠梦得】

白居易

暮齿忽将及，同心私自怜。渐衰宜减食，已喜更加年。
紫绶行联袂，篮舆出比肩。与君同甲子，岁酒合谁先。

· 全唐诗 ·

卷 457_16【早春持斋，答皇甫十见赠】

白居易

正月晴和风气新，纷纷已有醉游人。
帝城花笑长斋客，三十年来负早春。

卷 457_17【戏赠梦得，兼呈思黯】

白居易

霜鬓莫欺今老矣，一杯莫笑便陶然。陈郎中处为高户，
裴使君前作少年。顾我独狂多自哂，与君同病最相怜。
月终斋满谁开素，须拟奇章置一筵。

卷 457_18【早春忆游思黯南庄，因寄长句】

白居易

南庄胜处心常忆，借问轩车早晚游。美景难忘竹廊下，
好风争奈柳桥头。冰消见水多于地，雪霁看山尽入楼。
若待春深始同赏，莺残花落却堪愁。

· 全唐诗 ·

卷 457_19【酬皇甫十早春对雪见赠】

白居易

漠漠复雰雰，东风散玉尘。明催竹窗晓，寒退柳园春。
绿酝香堪忆，红炉暖可亲。忍心三两日，莫作破斋人。

卷 457_20【奉和思黯自题南庄见示兼呈梦得】

白居易

谢家别墅最新奇，山展屏风花夹篱。晓月渐沉桥脚底，
晨光初照屋梁时。台头有酒莺呼客，水面无尘风洗池。
除却吟诗两闲客，此中情状更谁知。

卷 457_21【送蕲春李十九使君赴郡】

白居易

可怜官职好文词，五十专城未是迟。晓日镜前无白发，
春风门外有红旗。郡中何处堪携酒，席上谁人解和诗。
唯共交亲开口笑，知君不及洛阳时。

· 全唐诗 ·

卷 457_22 【自题酒库】

白居易

野鹤一辞笼，虚舟长任风。送愁还闹处，移老入闲中。
身更求何事，天将富此翁。此翁何处当，酒库不曾空。

卷 457_23 【寒食日寄杨东川】

白居易

不知杨六逢寒食，作底欢娱过此辰。兜率寺高宜望月，
嘉陵江近好游春。蛮旗似火行随马，蜀妓如花坐绕身。
不使黔娄夫妇看，夸张富贵向何人。

卷 457_24 【醉后听唱桂华曲】

白居易

桂华词意苦丁宁，唱到常娥醉便醒。
此是人间肠断曲，莫教不得意人听。

卷 457_25 【酬梦得以予五月长斋延僧徒绝宾友见戏十韵】

· 全唐诗 ·

白居易

宾客懒逢迎，翛然池馆清。檐闲空燕语，林静未蝉鸣。
羶血还休食，杯觞亦罢倾。三春多放逸，五月暂修行。
香印朝烟细，纱灯夕焰明。交游诸长老，师事古先生。
禅后心弥寂，斋来体更轻。不唯忘肉味，兼拟灭风情。
蒙以声闻待，难将戏论争。虚空若有佛，灵运恐先成。

卷 457_26【奉和裴令公三月上巳日游太原龙泉忆去岁禊洛
见示之作】

白居易

去岁暮春上巳，共泛洛水中流。今岁暮春上巳，
独立香山下头。风光闲寂寂，旌旆远悠悠。
丞相府归晋国，太行山碍并州。鹏背负天龟曳尾，
云泥不可得同游。

卷 457_27【又和令公新开龙泉晋水二池】

白居易

旧有潢污泊，今为白水塘。笙歌闻四面，楼阁在中央。
春变烟波色，晴添树木光。龙泉信为美，莫忘午桥庄。

· 全唐诗 ·

卷 457_28【早夏晓兴赠梦得】

白居易

窗明帘薄透朝光，卧整巾簪起下床。背壁灯残经宿焰，
开箱衣带隔年香。无情亦任他春去，不醉争销得昼长。
一部清商一壶酒，与君明日暖新堂。

卷 457_29【春日题乾元寺上方最高峰亭】

白居易

危亭绝顶四无邻，见尽三千世界春。但觉虚空无障碍，
不知高下几由旬。回看官路三条线，却望都城一片尘。
宾客暂游无半日，王侯不到便终身。始知天造空闲境，
不为忙人富贵人。

卷 457_30【奉和思黯相公以李苏州所寄太湖石奇状绝伦因
题二十韵见示，兼呈梦得】

白居易

错落复崔嵬，苍然玉一堆。峰骈仙掌出，罅坼剑门开。
峭顶高危矣，盘根下壮哉。精神欺竹树，气色压亭台。

· 全唐诗 ·

隐起磷磷状，凝成瑟瑟胚。廉棱露锋刃，清越扣琼瑰。
岌嶰形将动，巍峨势欲摧。奇应潜鬼怪，灵合蓄云雷。
黛润沾新雨，斑明点古苔。未曾栖鸟雀，不肯染尘埃。
尖削琅玕笋，洼剌玛瑙罍。海神移碣石，画障簇天台。
在世为尤物，如人负逸才。渡江一苇载，入洛五丁推。
出处虽无意，升沉亦有媒。拔从水府底，置向相庭隈。
对称吟诗句，看宜把酒杯。终随金砺用，不学玉山颓。
疏傅心偏爱，园公眼屡回。共嗟无此分，虚管太湖来。

卷 457_31 【奉和思黯相公雨后林园四韵见示】

白居易

新晴夏景好，复此池边地。烟树绿含滋，水风清有味。
便成林下隐，都忘门前事。骑吏引归轩，始知身富贵。

卷 457_32 【晚夏闲居，绝无宾客，欲寻梦得，先寄此诗】

白居易

鱼笋早餐饱，蕉纱暑服轻。欲为窗下寝，先傍水边行。
晴引鹤双舞，秋生蝉一声。无人解相访，有酒共谁倾。
老更谙时事，闲多见物情。只应刘与白，二叟自相迎。

· 全唐诗 ·

卷 457_33 【寄李蕲州】

白居易

下车书奏龚黄课，动笔诗传鲍谢风。江郡讴谣夸杜母，
洛城欢会忆车公。笛愁春尽梅花里，簟冷秋生薤叶中。
不道蕲州歌酒少，使君难称与谁同。

卷 457_34 【酬思黯相公晚夏雨后感秋见赠】

白居易

暮去朝来无歇期，炎凉暗向雨中移。夜长只合愁人觉，
秋冷先应瘦客知。两幅彩笺挥逸翰，一声寒玉振清辞。
无忧无病身荣贵，何故沉吟亦感时。

卷 457_35 【久雨闲闷，对酒偶吟】

白居易

凄凄苦雨暗铜驼，袅袅凉风起漕河。自夏及秋晴日少，
从朝至暮闷时多。鹭临池立窥鱼笱，隼傍林飞拂雀罗。
赖有杯中神圣物，百忧无奈十分何。

· 全唐诗 ·

卷 457_36【雨后秋凉】

白居易

夜来秋雨后，秋气飒然新。团扇先辞手，生衣不著身。
更添砧引思，难与簟相亲。此境谁偏觉，贫闲老瘦人。

卷 457_37【酬梦得早秋夜对月见寄】

白居易

吾衰寡情趣，君病懒经过。其奈西楼上，新秋明月何。
庭芜凄白露，池色澹金波。况是初长夜，东城砧杵多。

卷 457_38【题谢公东山障子】

白居易

贤愚共在浮生内，贵贱同趋群动间。多见忙时已衰病，
少闻健日肯休闲。鹰饥受绁从难退，鹤老乘轩亦不还。
唯有风流谢安石，拂衣携妓入东山。

卷 457_39【谢杨东川寄衣服】

· 全唐诗 ·

白居易

年年衰老交游少，处处萧条书信稀。
唯有巢兄不相忘，春茶未断寄秋衣。

卷 457_40【咏怀寄皇甫朗之】

白居易

老大多情足往还，招僧待客夜开关。学调气后衰中健，
不用心来闹处闲。养病未能辞薄俸，忘名何必入深山。
与君别有相知分，同置身于木雁间。

卷 457_41【东城晚归】

白居易

一条邛杖悬龟榼，双角吴童控马衔。
晚入东城谁识我，短靴低帽白蕉衫。

卷 457_42【与梦得沽酒闲饮，且约后期】

白居易

· 全唐诗 ·

少时犹不忧生计，老后谁能惜酒钱。共把十千沽一斗，
相看七十欠三年。闲征雅令穷经史，醉听清吟胜管弦。
更待菊黄家酝熟，共君一醉一陶然。

卷 457_43【与牛家妓乐雨后会宴】

白居易

玉管清弦声旖旎，翠钗红袖坐参差。两家合奏洞房夜，
八月连阴秋雨时。歌脸有情凝睇久，舞腰无力转裙迟。
人间欢乐无过此，上界西方即不知。

卷 457_44【和杨六尚书喜两弟汉公转吴兴，鲁士赐章服，
命宾开宴，用庆恩荣，赋长句见示】

白居易

华筵贺客日纷纷，剑外欢娱洛下闻。朱绂宠光新照地，
彤襜喜气远凌云。荣联花萼诗难和，乐助埙篪酒易醺。
感羨料应知我意，今生此事不如君。

卷 457_45【自咏】

白居易

· 全唐诗 ·

须白面微红，醺醺半醉中。百年随手过，万事转头空。
卧疾瘦居士，行歌狂老翁。仍闻好事者，将我画屏风。

卷 457_46【梦得相过，援琴命酒，因弹秋思，偶咏所怀，
兼寄继之待价二相府】

白居易

闲居静侣偶相招，小饮初酣琴欲调。我正风前弄秋思，
君应天上听云韶。时和始见陶钧力，物遂方知盛圣朝。
双凤栖梧鱼在藻，飞沈随分各逍遥。

卷 457_47【九月八日酬皇甫十见赠】

白居易

君方对酒缀诗章，我正持斋坐道场。处处追游虽不去，
时时吟咏亦无妨。霜蓬旧鬓三分白，露菊新花一半黄。
惆怅东篱不同醉，陶家明日是重阳。

卷 457_48【慕巢尚书书云室人欲为置一歌者，非所安也。
以诗相报，因而和之】

白居易

· 全唐诗 ·

东川已过二三春，南国须求一两人。富贵大都多老大，
欢娱太半为亲宾。如愁翠黛应堪重，买笑黄金莫诉贫。
他日相逢一杯酒，尊前还要落梁尘。

卷 457_49【杪秋独夜】

白居易

无限少年非我伴，可怜清夜与谁同。欢娱牢落中心少，
亲故凋零四面空。红叶树飘风起后，白须人立月明中。
前头更有萧条物，老菊衰兰三两丛。

卷 457_50【凭李睦州访徐凝山人】

白居易

郡守轻诗客，乡人薄钓翁。解怜徐处士，唯有李郎中。

卷 457_51【苏州故吏】

白居易

江南故吏别来久，今日池边识我无。
不独使君头似雪，华亭鹤死白莲枯。

· 全唐诗 ·

卷 457_52【得杨湖州书，颇夸抚民，接宾纵酒题诗，因以绝句戏之】

白居易

岂独爱民兼爱客，不唯能饮又能文。
白蘋洲上春传语，柳使君输杨使君。

卷 457_53【天宫阁秋晴晚望】

白居易

洛城秋霁后，梵阁暮登时。此日风烟好，今秋节候迟。
霞光红泛艳，树影碧参差。莫虑言归晚，牛家有宿期。

卷 457_54【酬梦得暮秋晴夜对月相忆】

白居易

霁月光如练，盈庭复满池。秋深无热后，夜浅未寒时。
露叶团荒菊，风枝落病梨。相思懒相访，应是各年衰。

卷 457_55【同梦得和思黯见赠，来诗中先叙三人同宴之欢，

· 全唐诗 ·

次有叹鬓发渐衰嫌孙子催老之意，因酬妍唱，兼吟鄙怀】

白居易

醉伴腾腾白与刘，何朝何夕不同游。留连灯下明犹饮，
断送尊前倒即休。催老莫嫌孙稚长，加年须喜鬓毛秋。
教他伯道争存活，无子无孙亦白头。

卷 457_56【听歌】

白居易

管妙弦清歌入云，老人合眼醉醺醺。
诚知不及当年听，犹觉闻时胜不闻。

卷 457_57【三年冬，随事铺设小堂，寝处稍似稳暖，因念衰病，偶吟所怀】

白居易

小宅非全陋，中堂不甚卑。聊堪会亲族，足以贮妻儿。
暖帐迎冬设，温炉向夜施。裘新青兔褐，褥软白猿皮。
似鹿眠深草，如鸡宿稳枝。逐身安枕席，随事有屏帷。
病致衰残早，贫营活计迟。由来蚕老后，方是茧成时。

· 全唐诗 ·

卷 457_58【初冬即事呈梦得】

白居易

青毡帐暖喜微雪，红地炉深宜早寒。走笔小诗能和否，
泼醅新酒试尝看。僧来乞食因留宿，客到开尊便共欢。
临老交亲零落尽，希君恕我取人宽。

卷 457_59【自罢河南，已换七尹，每一入府，怅然旧游，
因宿内厅，偶题四壁，兼呈韦尹常侍】

白居易

每日河南府，依然似到家。杯尝七尹酒，树看十年花。
且健须欢喜，虽衰莫叹嗟。迎门无故吏，侍坐有新娃。
暖阁谋宵宴，寒庭放晚衙。主人留宿定，一任夕阳斜。

卷 457_60【天寒晚起引酌咏怀寄许州王尚书、汝州李常侍】

白居易

叶覆冰池雪满山，日高慵起未开关。寒来更亦无过醉，
老后何由可得闲。四海故交唯许汝，十年贫健是樊蛮。
相思莫忘樱桃会，一放狂歌一破颜。

· 全唐诗 ·

卷 457_61【四年春】

白居易

柳梢黄嫩草芽新，又入开成第四春。近日放慵多不出，
少年嫌老可相亲。分司吉傅频过舍，致仕崔卿拟卜邻。
时辈推迁年事到，往还多是白头人。

卷 457_62【白发】

白居易

白发生来三十年，而今须鬓尽皤然。歌吟终日如狂叟，
衰疾多时似瘦仙。八戒夜持香火印，三光朝念蕊珠篇。
其余便被春收拾，不作闲游即醉眠。

卷 457_63【追欢偶作】

白居易

追欢逐乐少闲时，补贴平生得事迟。何处花开曾后看，
谁家酒熟不先知。石楼月下吹芦管，金谷风前舞柳枝。
十听春啼变莺舌，三嫌老丑换蛾眉。乐天一过难知分，
犹自咨嗟两鬓丝。

· 全唐诗 ·

卷 457_64 【公垂尚书以白马见寄，光洁稳善，以诗谢之】

白居易

翩翩白马称金羈，领缀银花尾曳丝。毛色鲜明人尽爱，
性灵驯善主偏知。免将妾换惭来处，试使奴牵欲上时。
不蹶不惊行步稳，最宜山简醉中骑。

卷 457_65 【西楼独立】

白居易

身著白衣头似雪，时时醉立小楼中。
路人回顾应相怪，十一年来见此翁。

卷 457_66 【书事咏怀】

白居易

官俸将生计，虽贫岂敢嫌。金多输陆贾，酒足胜陶潜。
床暖僧敷坐，楼晴妓卷帘。日遭斋破用，春赖闰加添。
老向欢弥切，狂于饮不廉。十年闲未足，亦恐涉无厌。

· 全唐诗 ·

卷 457_67【酬梦得比萱草见赠】

白居易

杜康能散闷，萱草解忘忧。借问萱逢杜，何如白见刘。
老衰胜少夭，闲乐笑忙愁。试问同年内，何人得白头。

卷 457_68【问皇甫十】

白居易

苦乐心由我，穷通命任他。坐倾张翰酒，行唱接舆歌。
荣盛傍看好，优闲自适多。知君能断事，胜负两如何。

卷 457_69【早春独登天宫阁】

白居易

天宫日暖阁门开，独上迎春饮一杯。
无限游人遥怪我，缘何最老最先来。

卷 457_70【送苏州李使君赴郡二绝句】

· 全唐诗 ·

白居易

忆抛印绶辞吴郡，衰病当时已有余。
今日贺君兼自喜，八回看换旧铜鱼。

馆娃宫深春日长，乌鹊桥高秋夜凉。
风月不知人世变，奉君直似奉吴王。

卷 457_71【长洲曲新词】

白居易

茂苑绮罗佳丽地，女湖桃李艳阳时。
心奴已死胡容老，后辈风流是阿谁。

卷 457_72【忆江南词三首】

白居易

江南好，风景旧曾谙。日出江花红胜火，春来江水绿如蓝。
能不忆江南？

江南忆，最忆是杭州。山寺月中寻桂子，郡亭枕上看潮头。
何日更重游？

· 全唐诗 ·

江南忆，其次忆吴宫。吴酒一杯春竹叶，吴娃双舞醉芙蓉。
早晚复相逢。

· 全唐诗 ·

第四百五十八卷

卷 458_1【病中诗十五首·初病风】

白居易

六十八衰翁，乘衰百疾攻。朽株难免蠹，空穴易来风。
肘痹宜生柳，头旋剧转蓬。恬然不动处，虚白在胸中。

卷 458_2【病中诗十五首·枕上作】

白居易

风疾侵袭临老头，血凝筋滞不调柔。甘从此后支离卧，
赖是从前烂漫游。回思往事纷如梦，转觉馀生杳若浮。
浩气自能充静室，惊飙何必荡虚舟。腹空先进松花酒，
膝冷重装桂布裘。若问乐天忧病否，乐天知命了无忧。

卷 458_3【病中诗十五首·答闲上人来问因何风疾】

白居易

· 全唐诗 ·

一床方丈向阳开，劳动文殊问疾来。
欲界凡夫何足道，四禅天始免风灾。

卷 458_4【病中诗十五首·病中五绝句】

白居易

世间生老病相随，此事心中久自知。
今日行年将七十，犹须惭愧病来迟。

方寸成灰鬓作丝，假如强健亦何为。
家无忧累身无事，正是安闲好病时。

李君墓上松应拱，元相池头竹尽枯。
多幸乐天今始病，不知合要苦治无。

目昏思寝即安眠，足软妨行便坐禅。
身作医王心是药，不劳和扁到门前。

交亲不要苦相忧，亦拟时时强出游。
但有心情何用脚，陆乘肩輿水乘舟。

卷 458_5【病中诗十五首·送嵩客】

白居易

· 全唐诗 ·

登山临水分无期，泉石烟霞今属谁。
君到嵩阳吟此句，与教二十六峰知。

卷 458_6【病中诗十五首·罢灸】

白居易

病身佛说将何喻，变灭须臾岂不闻。
莫遣净名知我笑，休将火艾灸浮云。

卷 458_7【病中诗十五首·卖骆马】

白居易

五年花下醉骑行，临卖回头嘶一声。
项籍顾骓犹解叹，乐天别骆岂无情。

卷 458_8【病中诗十五首·别柳枝】

白居易

两枝杨柳小楼中，袅袅多年伴醉翁。
明日放归归去后，世间应不要春风。

· 全唐诗 ·

卷 458_9【病中诗十五首·就暖偶酌戏诸诗酒旧侣】

白居易

低屏软褥卧藤床，异向前轩就日阳。一足任他为外物，
三杯自要沃中肠。头风若见诗应愈，齿折仍夸笑不妨。
细酌徐吟犹得在，旧游未必便相忘。

卷 458_10【病中诗十五首·岁暮呈思黯相公、皇甫朗之及
梦得尚书】

白居易

岁暮皤然一老夫，十分流辈九分无。
莫嫌身病人扶侍，犹胜无身可遣扶。

卷 458_11【病中诗十五首·自解】

白居易

房传往世为禅客，王道前生应画师。我亦定中观宿命，
多生债负是歌诗。不然何故狂吟咏，病后多于未病时。

· 全唐诗 ·

卷 458_12【病中诗十五首·岁暮病怀赠梦得】

白居易

十年四海故交亲，零落唯残两病身。共遣数奇从是命，
同教步蹇有何因。眼随老减嫌长夜，体待阳舒望早春。
新乐堂前旧池上，相过亦不要他人。

卷 458_13【病中诗十五首·雪后过集贤裴令公旧宅有感】

白居易

梁王捐馆后，枚叟过门时。有泪人还泣，无情雪不知。
台亭留尽在，宾客散何之。唯有萧条雁，时来下故池。

卷 458_14【病中诗十五首·酬梦得贫居咏怀见赠】

白居易

岁阴生计两蹉跎，相顾悠悠醉且歌。厨冷难留乌止屋，
门闲可与雀张罗。病添庄舄吟声苦，贫欠韩康药债多。
日望挥金贺新命，俸钱依旧又如何。

· 全唐诗 ·

卷 458_15【病中诗十五首·酬梦得见喜疾瘳】

白居易

暖卧摩绵褥，晨倾药酒螺。昏昏布裘底，病醉睡相和。
未疾徒云尔，余年有几何。须知差与否，相去校无多。

卷 458_16【夜闻箏中弹潇湘送神曲感旧】

白居易

缥缈巫山女，归来七八年。殷勤湘水曲，留在十三弦。
苦调吟还出，深情咽不传。万重云水思，今夜月明前。

卷 458_17【感苏州旧舫】

白居易

画梁朽折红窗破，独立池边尽日看。
守得苏州船舫烂，此身争合不衰残。

卷 458_18【感旧石上字】

· 全唐诗 ·

白居易

闲拨船行寻旧池，幽情往事复谁知。
太湖石上镌三字，十五年前陈结之。

卷 458_19【见敏中初到邠宁秋日登城楼诗，诗中颇多乡思，因以寄和】

白居易

想尔到边头，萧条正值秋。二年贫御史，八月古邠州。
丝管闻虽乐，风沙见亦愁。望乡心若苦，不用数登楼。

卷 458_20【斋戒】

白居易

每因斋戒断荤腥，渐觉尘劳染爱轻。六贼定知无气色，
三尸应恨少恩情。酒魔降伏终须尽，诗债填还亦欲平。
从此始堪为弟子，竺乾师是古先生。

卷 458_21【戏礼经老僧】

白居易

· 全唐诗 ·

香火一炉灯一盏，白头夜礼佛名经。
何年饮著声闻酒，直到如今醉未醒。

卷 458_22【近见慕巢尚书诗中屡有叹老思退之意，又于洛下新置郊居，然寄奇方深，归心大速，因以长句戏而谕之】

白居易

近见诗中叹白发，遥知阍外忆东都。烟霞偷眼窥来久，
富贵粘身摆得无。新置林园犹濩落，未终婚嫁且踟蹰。
应须待到悬车岁，然后东归伴老夫。

卷 458_23【对镜偶吟，赠张道士抱元】

白居易

闲来对镜自思量，年貌衰残分所当。白发万茎何所怪，
丹砂一粒不曾尝。眼昏久被书料理，肺渴多因酒损伤。
今日逢师虽已晚，枕中治老有何方。

卷 458_24【病入新正】

白居易

· 全唐诗 ·

枕上惊新岁，花前念旧欢。是身老所逼，非意病相干。
风月情犹在，杯觞兴渐阑。便休心未伏，更试一春看。

卷 458_25【卧疾来早晚】

白居易

卧疾来早晚，悬悬将十旬。婢能寻本草，犬不吠医人。
酒瓮全生醖，歌筵半委尘。风光还欲好，争向枕前春。

卷 458_26【强起迎春，戏寄思黯】

白居易

杖策人扶废病身，晴和强起一迎春。
他时蹇跛纵行得，笑杀平原楼上人。

卷 458_27【梦得前所酬篇有炼尽美少年之句，因思往事，
兼咏今怀，重以长句答之】

白居易

炼尽少年成白首，忆初相识到今朝。昔饶春桂长先折，
今伴寒松取后凋。生事纵贫犹可过，风情虽老未全销。

· 全唐诗 ·

声华宠命人皆得，若个如君历七朝。

卷 458_28【病后寒食】

白居易

故纱绛帐旧青毡，药酒醺醺引醉眠。斗擞弊袍春晚后，
摩挲病脚日阳前。行无筋力寻山水，坐少精神听管弦。
抛掷风光负寒食，曾来未省似今年。

卷 458_29【老病相仍以诗自解】

白居易

荣枯忧喜与彭殇，都是人间戏一场。虫臂鼠肝犹不怪，
鸡肤鹤发复何伤。昨因风发甘长往，今遇阳和又小康。
还似远行装束了，迟回且住亦何妨。

卷 458_30【皇甫郎中亲家翁赴任绛州，宴送出城赠别】

白居易

慕贤入室交先定，结援通家好复成。新妇不嫌贫活计，
娇孙同慰老心情。洛桥歌酒今朝散，绛路风烟几日行。

· 全唐诗 ·

欲识离群相恋意，为君扶病出都城。

卷 458_31 【春暖】

白居易

风痹宜和暖，春来脚较轻。莺留花下立，鹤引水边行。
发少嫌巾重，颜衰讶镜明。不论亲与故，自亦昧平生。

卷 458_32 【残春晚起，伴客笑谈】

白居易

掩户下帘朝睡足，一声黄鸟报残春。披衣岸帻日高起，
两角青衣扶老身。策杖强行过里巷，引杯闲酌伴亲宾。
莫言病后妨谈笑，犹恐多于不病人。

卷 458_33 【送唐州崔使君侍亲赴任】

白居易

连持使节历专城，独贺崔侯最庆荣。乌府一抛霜简去，
朱轮四从板輿行。发时止许沙鸥送，到日方乘竹马迎。
唯虑郡斋宾友少，数杯春酒共谁倾。

· 全唐诗 ·

卷 458_34【春晚咏怀赠皇甫朗之】

白居易

艳阳时节又蹉跎，迟暮光阴复若何。一岁平分春日少，
百年通计老时多。多中更被愁牵引，少处兼遭病折磨。
赖有销忧治闷药，君家浓酎我狂歌。

卷 458_35【春尽日宴罢，感事独吟】

白居易

五年三月今朝尽，客散筵空独掩扉。病共乐天相伴住，
春随樊子一时归。闲听莺语移时立，思逐杨花触处飞。
金带缁腰衫委地，年年衰瘦不胜衣。

卷 458_36【病中辱崔宣城长句见寄，兼有觥绮之赠，因以
四韵总而酬之】

白居易

刘桢病发经春卧，谢朓诗来尽日吟。三道旧夸收片玉，
一章新喜获双金。信题霞绮情重，酒试银觥表分深。
科第门生满霄汉，岁寒少得似君心。

· 全唐诗 ·

卷 458_37【前有别杨柳枝绝句，梦得继和云春尽絮飞留不得，随风好去落谁家。又复戏答】

白居易

柳老春深日又斜，任他飞向别人家。
谁能更学孩童戏，寻逐春风捉柳花。

卷 458_38【池上早夏】

白居易

水积春塘晚，阴交夏木繁。舟船如野渡，篱落似江村。
静拂琴床席，香开酒库门。慵闲无一事，时弄小娇孙。

卷 458_39【谈氏外孙生三日，喜是男，偶吟成篇，兼戏呈梦得】

白居易

玉芽珠颗小男儿，罗荐兰汤浴罢时。茱苡春来盈女手，
梧桐老去长孙枝。庆传媒氏燕先贺，喜报谈家乌预知。
明日贫翁具鸡黍，应须酬赛引雏诗。

· 全唐诗 ·

卷 458_40 【开成上行皇帝挽歌词四首，奉敕撰进】

白居易

御宇恢皇化，传家叶至公。华夷臣妾内，尧舜弟兄中。
制度移民俗，文章变国风。开成与贞观，实录事多同。

晏驾辞双阙，灵仪出九衢。上云归碧落，下席葬苍梧。
莫晚馀尧历，龟新启夏图。三朝联棣萼，从古帝王无。

严恭七月礼，哀恻万人心。地感胜秋气，天愁结夕阴。
鼎湖龙渐远，濛汜日初沈。唯有云韶乐，长留治世音。

化成同轨表清平，恩结连枝感圣明。帝与九龄虽吉梦，
山呼万岁是虚声。月低仪仗辞兰路，风引笳箫入柏城。
老病龙髯攀不及，东周退傅最伤情。

卷 458_41 【时热少客，因咏所怀】

白居易

冠带心多懒，逢迎兴渐微。况当时热甚，幸遇客来稀。
湿洒池边地，凉开竹下扉。露床青篾簟，风架白蕉衣。
院静留僧宿，楼空放妓归。衰残强欢宴，此事久知非。

· 全唐诗 ·

卷 458_42【宣州崔大夫阁老忽以近诗数十首见示，吟讽之下，窃有所喜，因成长句，寄题郡斋】

白居易

谢玄晖歿吟声寢，郡阁寥寥笔砚闲。无复新诗题壁上，
虚教远岫列窗间。忽惊歌雪今朝至，必恐文星昨夜还。
再喜宣城章句动，飞觴遥贺敬亭山。

卷 458_43【足疾】

白居易

足疾无加亦不瘳，绵春历夏复经秋。开颜且酌尊中酒，
代步多乘池上舟。幸有眼前衣食在，兼无身后子孙忧。
应须学取陶彭泽，但委心形任去留。

卷 458_44【晚池泛舟，遇景成咏，赠吕处士】

白居易

岸浅桥平池面宽，飘然轻棹泛澄澜。风宜扇引开怀入，
树爱舟行仰卧看。别境客稀知不易，能诗人少咏应难。
唯怜吕叟时相伴，同把磻溪旧钓竿。

· 全唐诗 ·

卷 458_45【梦微之】

白居易

夜来携手梦同游，晨起盈巾泪莫收。漳浦老身三度病，
咸阳草树八回秋。君埋泉下泥销骨，我寄人间雪满头。
阿卫韩郎相次去，夜台茫昧得知不。

卷 458_46【感秋咏意】

白居易

炎凉迁次速如飞，又脱生衣著熟衣。绕壁暗蛩无限思，
恋巢寒燕未能归。须知流辈年年失，莫叹衰容日日非。
旧语相传聊自慰，世间七十老人稀。

卷 458_47【老病幽独，偶吟所怀】

白居易

眼渐昏昏耳渐聩，满头霜雪半身风。已将身出浮云外，
犹寄形于逆旅中。觞咏罢来宾阁闭，笙歌散后妓房空。
世缘俗念消除尽，别是人间清净翁。

· 全唐诗 ·

卷 458_48【和杨尚书罢相后夏日游永安水亭，兼招本曹杨侍郎同行】

白居易

道行无喜退无忧，舒卷如云得自由。良冶动时为哲匠，
巨川济了作虚舟。竹亭阴合偏宜夏，水槛风凉不待秋。
遥爱翩翩双紫凤，入同官署出同游。

卷 458_49【在家出家】

白居易

衣食支吾婚嫁毕，从今家事不相仍。夜眠身是投林鸟，
朝饭心同乞食僧。清唳数声松下鹤，寒光一点竹间灯。
中宵入定跏趺坐，女唤妻呼多不应。

卷 458_50【夜凉】

白居易

露白风清庭户凉，老人先著夹衣裳。
舞腰歌袖抛何处，唯对无弦琴一张。

· 全唐诗 ·

卷 458_51【继之尚书自余病来寄遗非一，又蒙览醉吟先生传题诗以美之，今以此篇用伸酬谢】

白居易

衰残与世日相疏，惠好唯君分有馀。茶药赠多因病久，
衣裳寄早及寒初。交情郑重金相似，诗韵清锵玉不如。
醉傅狂言人尽笑，独知我者是尚书。

卷 458_52【五年秋病后独宿香山寺三绝句】

白居易

经年不到龙门寺，今夜何人知我情。
还向畅师房里宿，新秋月色旧滩声。

饮徒歌伴今何在，雨散云飞尽不回。
从此香山风月夜，只应长是一身来。

石盆泉畔石楼头，十二年来昼夜游。
更过今年年七十，假如无病亦宜休。

卷 458_53【题香山新经堂招僧】

· 全唐诗 ·

白居易

烟满秋堂月满庭，香花漠漠磬泠泠。
谁能来此寻真谛，白老新开一藏经。

卷 458_54 【偶题邓公】

白居易

偶因携酒寻村客，聊复回车访薜萝。且值雪寒相慰问，
不妨春暖更经过。翁居山下年空老，我得人间事校多。
一种共翁头似雪，翁无衣食自如何。

卷 458_55 【早入皇城赠王留守仆射】

白居易

津桥残月晓沈沈，风露凄清禁署深。
城柳宫槐谩摇落，悲愁不到贵人心。

卷 458_56 【寄题庐山旧草堂，兼呈二林寺道侣】

白居易

· 全唐诗 ·

三十年前草堂主，而今虽在鬓如丝。登山寻水应无力，
不似江州司马时。渐伏酒魔休放醉，犹残口业未抛诗。
君行过到炉峰下，为报东林长老知。

卷 458_57【改业】

白居易

先生老去饮无兴，居士病来闲有馀。犹觉醉吟多放逸，
不如禅定更清虚。柘枝紫袖教丸药，羯鼓苍头遣种蔬。
却被山僧戏相问，一时改业意何如。

卷 458_58【山下留别佛光和尚】

白居易

劳师送我下山行，此别何人识此情。
我已七旬师九十，当知后会在他生。

卷 458_59【山中五绝句·岭上云】

白居易

岭上白云朝未散，田中青麦旱将枯。

· 全唐诗 ·

自生自灭成何事，能逐东风作雨无。

卷 458_60【山中五绝句·石上苔】

白居易

漠漠斑斑石上苔，幽芳静绿绝纤埃。
路傍凡草荣遭遇，曾得七香车辗来。

卷 458_61【山中五绝句·林下樗】

白居易

香檀文桂苦雕镌，生理何曾得自全。
知我无材老樗否，一枝不损尽天年。

卷 458_62【山中五绝句·涧中鱼】

白居易

海水桑田欲变时，风涛翻覆沸天池。
鲸吞蛟斗波成血，深涧游鱼乐不知。

· 全唐诗 ·

卷 458_63【山中五绝句·洞中蝙蝠】

白居易

千年鼠化白蝙蝠，黑洞深藏避网罗。
远害全身诚得计，一生幽暗又如何。

卷 458_64【自戏三绝句·心问身】

白居易

心问身云何泰然，严冬暖被日高眠。
放君快活知恩否，不早朝来十一年。

卷 458_65【自戏三绝句·身报心】

白居易

心是身王身是宫，君今居在我宫中。
是君家舍君须爱，何事论恩自说功。

卷 458_66【自戏三绝句·心重答身】

· 全唐诗 ·

白居易

因我疏慵休罢早，遣君安乐岁时多。
世间老苦人何限，不放君闲奈我何。

卷 458_67【会昌元年春五绝句·病后喜过刘家】

白居易

忽忆前年初病后，此生甘分不衔杯。
谁能料得今春事，又向刘家饮酒来。

卷 458_68【会昌元年春五绝句·赠举之仆射】

白居易

鸡球饧粥屡开筵，谈笑讴吟间管弦。
一月三回寒食会，春光应不负今年。

卷 458_69【会昌元年春五绝句·卢尹贺梦得会中作】

白居易

病闻川守贺筵开，起伴尚书饮一杯。

· 全唐诗 ·

任意少年长笑我，老人自觅老人来。

卷 458_70【会昌元年春五绝句·题朗之槐亭】

白居易

春风可惜无多日，家酝唯残软半瓶。
犹望君归同一醉，篮舁早晚入槐亭。

卷 458_71【会昌元年春五绝句·劝梦得酒】

白居易

谁人功画麒麟阁，何客新投魑魅乡。
两处荣枯君莫问，残春更醉两三场。

卷 458_72【过裴令公宅二绝句】

白居易

风吹杨柳出墙枝，忆得同欢共醉时。
每到集贤坊地过，不曾一度不低眉。

梁王旧馆雪濛濛，愁杀邹枚二老翁。

· 全唐诗 ·

假使明朝深一尺，亦无人到兔园中。

卷 458_73【百日假满，少傅官停，自喜言怀】

白居易

长告今朝满十旬，从兹萧洒便终身。老嫌手重抛牙笏，
病喜头轻换角巾。疏傅不朝悬组绶，尚平无累毕婚姻。
人言世事何时了，我是人间事了人。

卷 458_74【早热】

白居易

畏景又加旱，火云殊未收。篱暄饥有雀，池涸渴无鸥。
岸帻头仍痛，褰裳汗亦流。若为当此日，迁客向炎州。

卷 458_75【题崔少尹上林坊新居】

白居易

坊静居新深且幽，忽疑缩地到沧洲。宅东篱缺嵩峰出，
堂后池开洛水流。高下三层盘野径，沿洄十里泛渔舟。
若能为客烹鸡黍，愿伴田苏日日游。

· 全唐诗 ·

卷 458_76 【新涧亭】

白居易

烟萝初合涧新开，闲上西亭日几回。
老病归山应未得，且移泉石就身来。

卷 458_77 【对酒有怀寄李十九郎中】

白居易

往年江外抛桃叶，去岁楼中别柳枝。寂寞春来一杯酒，
此情唯有李君知。吟君旧句情难忘，风月何时是尽时。

卷 458_78 【杨六尚书频寄新诗，诗中多有思闲相就之志，
因书鄙意，报而谕之】

白居易

君年殊未及悬车，未合将闲逐老夫。身健正宜金印绶，
位高方称白髭须。若论尘事何由了，但问云心自在无。
进退是非俱是梦，丘中阙下亦何殊。

· 全唐诗 ·

卷 458_79【偶吟自慰兼呈梦得】

白居易

且喜同年满七旬，莫嫌衰病莫嫌贫。已为海内有名客，
又占世间长命人。耳里声闻新将相，眼前失尽故交亲。
尊荣富寿难兼得，闲坐思量最要身。

卷 458_80【寄潮州杨继之】

白居易

相府潮阳俱梦中，梦中何者是穷通。
他时事过方应悟，不独荣空辱亦空。

卷 458_81【雪暮偶与梦得同致仕裴宾客王尚书饮】

白居易

黄昏惨惨雪霏霏，白首相欢醉不归。
四个老人三百岁，人间此会亦应稀。

卷 458_82【雪朝乘兴欲诣李司徒留守，先以五韵戏之】

· 全唐诗 ·

白居易

夜寒生酒思，晓雪引诗情。热饮一两盏，冷吟三五声。
铺花怜地冻，销玉畏天晴。好拂乌巾出，宜披鹤氅行。
梁园应有兴，何不召邹生。

卷 458_83【赠思黯】

白居易

为怜清浅爱潺湲，一日三回到水边。
若道归仁滩更好，主人何故别三年。

卷 458_84【听歌六绝句·听都子歌】

白居易

都子新歌有性灵，一声格转已堪听。
更听唱到嫦娥字，犹有樊家旧典刑。

卷 458_85【听歌六绝句·乐世】

白居易

· 全唐诗 ·

管急弦繁拍渐稠，绿腰宛转曲终头。
诚知乐世声声乐，老病人听未免愁。

卷 458_86【听歌六绝句·水调】

白居易

五言一遍最殷勤，调少情多似有因。
不会当时翻曲意，此声肠断为何人。

卷 458_87【听歌六绝句·想夫怜】

白居易

玉管朱弦莫急催，容听歌送十分杯。
长爱夫怜第二句，请君重唱夕阳开。

卷 458_88【听歌六绝句·何满子】

白居易

世传满子是人名，临就刑时曲始成。
一曲四调歌八叠，从头便是断肠声。

· 全唐诗 ·

卷 458_89【听歌六绝句·离别难】

白居易

绿杨陌上送行人，马去车回一望尘。
不觉别时红泪尽，归来无泪可沾巾。

卷 458_90【闲乐】

白居易

坐安卧稳舆平肩，倚杖披衫绕四边。空腹三杯卯后酒，
曲肱一觉醉中眠。更无忙苦吟闲乐，恐是人间自在天。

· 全唐诗 ·

· 全唐诗 ·

第四百五十九卷

卷 459_1【立秋夕凉风忽至，炎暑稍消，即事咏怀，寄汴州节度使李二十尚书】

白居易

袅袅檐树动，好风西南来。红缸霏微灭，碧幌飘飘开。
披襟有余凉，拂簟无纤埃。但喜烦暑退，不惜光阴催。
河秋稍清浅，月午方裴回。或行或坐卧，体适心悠哉。
美人在浚都，旌旗绕楼台。虽非沧溟阻，难见如蓬莱。
蝉迎节又换，雁送书未回。君位日宠重，我年日摧颓。
无因风月下，一举平生杯。

卷 459_2【开成二年夏闻新蝉赠梦得】

白居易

十载与君别，常感新蝉鸣。今年共君听，同在洛阳城。
噪处知林静，闻时觉景清。凉风忽袅袅，秋思先秋生。
残槿花边立，老槐阴下行。虽无索居恨，还动长年情。
且喜未聋耳，年年闻此声。

· 全唐诗 ·

卷 459_3【题牛相公归仁里宅新成小滩】

白居易

平生见流水，见此转留连。况此朱门内，君家新引泉。
伊流决一带，洛石砌千拳。与君三伏月，满耳作潺湲。
深处碧磷磷，浅处清溅溅。碛岸束呜咽，沙汀散沦涟。
翻浪雪不尽，澄波空共鲜。两岸滟潏口，一泊潇湘天。
曾作天南客，漂流六七年。何山不倚杖，何水不停船。
巴峡声心里，松江色眼前。今朝小滩上，能不思悠然。

卷 459_4【春日闲居三首】

白居易

陶云爱吾庐，吾亦爱吾屋。屋中有琴书，聊以慰幽独。
是时三月半，花落庭芜绿。舍上晨鸠鸣，窗间春睡足。
睡足起闲坐，景晏方栉沐。今日非十斋，庖童馈鱼肉。
饥来恣餐馔，冷热随所欲。饱竟快搔爬，筋骸无检束。
岂徒畅肢体，兼欲遗耳目。便可傲松乔，何假杯中禄。

广池春水平，群鱼恣游泳。新林绿阴成，众鸟欣相鸣。
时我亦潇洒，适无累与病。鱼鸟人则殊，同归于遂性。
缅思山梁雉，时哉感孔圣。圣人不得所，慨然叹时命。
我今双鳞羽，取乐成谣咏。得所仍得时，吾生一何幸。

· 全唐诗 ·

劳者不觉歌，歌其劳苦事。逸者不觉歌，歌其逸乐意。
问我逸如何，闲居多兴味。问我乐如何，闲官少忧累。
又问俸厚薄，百千随月至。又问年几何，七十行欠一。
所得皆过望，省躬良可愧。马闲无羁绊，鹤老有禄位。
设自为化工，优饶只如是。安得不歌咏，默默受天赐。

卷 459_5【小阁闲坐】

白居易

阁前竹萧萧，阁下水潺潺。拂簟卷帘坐，清风生其间。
静闻新蝉鸣，远见飞鸟还。但有巾挂壁，而无客叩头。
二疏返故里，四老妇归山。吾亦适所愿，求闲而得闲。

卷 459_6【游平泉宴浥涧，宿香山石楼，赠座客】

白居易

逸少集兰亭，季伦宴金谷。金谷太繁华，兰亭阙丝竹。
何如今日会，浥涧平原曲。杯洒与管弦，贫中随分足。
紫鲜林笋嫩，红润园桃熟。采摘助盘筵，芳滋盈口腹。
闲吟暮支碧，醉藕春草绿。舞妙艳流风，歌清叩寒玉。
古诗惜昼短，劝我令秉烛。是夜勿言归，相携石楼宿。

· 全唐诗 ·

卷 459_7【池上幽境】

白居易

袅袅过水桥，微微入林路。幽境深谁知，老身闲独步。
行行何所爱，遇物自成趣。平滑青盘石，低密绿阴树。
石上一素琴，树下双草屨。此是荣先生，坐禅三乐处。

卷 459_8【夏日闲放】

白居易

时暑不出门，亦无宾客至。静室深下帘，小庭新扫地。
褰裳复岸帻，闲傲得自恣。朝景枕簟清，乘凉一觉睡。
午餐何所有，鱼肉一两味。夏服亦无多，蕉纱三五事。
资身既给足，长物徒烦费。若比箠瓢人，吾今太富贵。

卷 459_9【和思黯居守独饮偶醉见示六韵，时梦得和篇先成，
颇为丽绝，因添两韵，继而美之】

白居易

宫漏滴渐阑，城乌啼复歇。此时若不醉，争奈千门月。
主人中夜起，妓烛前罗列。歌袂默收声，舞鬟低赴节。

· 全唐诗 ·

弦吟玉柱品，酒透金杯热。朱颜忽已酡，清奏犹未阕。
妍词黯先唱，逸韵刘继发。铿然双雅音，金石相磨戛。

卷 459_10 【和梦得洛中早春见赠七韵】

白居易

众皆赏春色，君独怜春意。春意竟如何，老夫知此味。
烛馀减夜漏，衾暖添朝睡。恬和台上风，虚润池边地。
开迟花养艳，语懒莺含思。似讶隔年斋，如劝迎春醉。
何日同宴游，心期二月二。

卷 459_11 【櫻桃花下有感而作】

白居易

蔼蔼美周宅，櫻繁春日斜。一为洛下客，十见池上花。
烂熳岂无意，为君占年华。风光饶此树，歌舞胜诸家。
失尽白头伴，长成红粉娃。停杯两相顾，堪喜亦堪嗟。

卷 459_12 【洗竹】

白居易

· 全唐诗 ·

布裘寒拥颈，毡履温承足。独立冰池前，久看洗霜竹。
先除老且病，次去纤而曲。剪弃犹可怜，琅玕十余束。
青青复籊籊，颇异凡草木。依然若有情，回头语僮仆。
小者截鱼竿，大者编茅屋。勿作簪与箕，而令粪土辱。

卷 459_13【新沐浴】

白居易

形适外无恙，心恬内无忧。夜来新沐浴，肌发舒且柔。
宽裁夹乌帽，厚絮长白裘。裘温裹我足，帽暖覆我头。
先进酒一杯，次举粥一瓯。半酣半饱时，四体春悠悠。
是月岁阴暮，惨冽天地愁。白日冷无光，黄河冻不流。
何处征戍行，何人羁旅游。穷途绝粮客，寒狱无灯囚。
劳生彼何苦，遂性我何优。抚心但自愧，孰知其所由。

卷 459_14【三年除夜】

白居易

晰晰燎火光，氲氲腊酒香。嗤嗤童稚戏，迢迢岁夜长。
堂上书帐前，长幼合成行。以我年最长，次第来称觞。
七十期渐近，万缘心已忘。不唯少欢乐，兼亦无悲伤。
素屏应居士，青衣侍孟光。夫妻老相对，各坐一绳床。

· 全唐诗 ·

卷 459_15【自题小园】

白居易

不斗门馆华，不斗林园大。但斗为主人，一坐十馀载。
回看甲乙第，列在都城内。素垣夹朱门，蔼蔼遥相对。
主人安在哉，富贵去不回。池乃为鱼凿，林乃为禽栽。
何如小园主，拄杖闲即来。亲宾有时会，琴酒连夜开。
以此聊自足，不羨大池台。

卷 459_16【病中宴坐】

白居易

有酒病不饮，有诗慵不吟。头眩罢垂钩，手痹休援琴。
竟日悄无事，所居闲且深。外安支离体，中养希夷心。
窗户纳秋景，竹木澄夕阴。宴坐小池畔，清风时动襟。

卷 459_17【戒药】

白居易

促促急景中，蠢蠢微尘里。生涯有分限，爱恋无终已。
早夭羨中年，中年羨暮齿。暮齿又贪生，服食求不死。

· 全唐诗 ·

朝吞太阳精，夕吸秋石髓。徼福反成灾，药误者多矣。
以之资嗜欲，又望延甲子。天人阴鹭间，亦恐无此理。
域中有真道，所说不如此。后身始身存，吾闻诸老氏。

卷 459_18【赠梦得】

白居易

前日君家饮，昨日王家宴。今日过我庐，三日三会面。
当歌聊自放，对酒交相劝。为我尽一杯，与君发三愿。
一愿世清平，二愿身强健。三愿临老头，数与君相见。

卷 459_19【逸老】

白居易

白日下駸駸，青天高浩浩。人生在其中，适时即为好。
劳我以少壮，息我以衰老。顺之多吉寿，违之或凶夭。
我初五十八，息老虽非早。一闲十三年，所得亦不少。
况加禄仕后，衣食常温饱。又从风疾来，女嫁男婚了。
胸中一无事，浩气凝襟抱。飘若云信风，乐于鱼在藻。
桑榆坐已暮，钟漏行将晓。皤然七十翁，亦足称寿考。
筋骸本非实，一束芭蕉草。眷属偶相依，一夕同栖鸟。
去何有顾恋，住亦无忧恼。生死尚复然，其余安足道。
是故临老心，冥然合玄造。

· 全唐诗 ·

卷 459_20 【遇物感兴因示子弟】

白居易

圣择狂夫言，俗信老人语。我有老狂词，听之吾语汝。
吾观器用中，剑锐锋多伤。吾观形骸内，骨劲齿先亡。
寄言处世者，不可苦刚强。龟性愚且善，鸠心钝无恶。
人贱拾支床，鹖欺擒暖脚。寄言立身者，不得全柔弱。
彼固罹祸难，此未免忧患。于何保终吉，强弱刚柔间。
上遵周孔训，旁鉴老庄言。不唯鞭其后，亦要轭其先。

卷 459_21 【首夏南池独酌】

白居易

春尽杂英歇，夏初芳草深。薰风自南至，吹我池上林。
绿蘋散还合，赆鲤跳复沈。新叶有佳色，残莺犹好音。
依然谢家物，池酌对风琴。惭无康乐作，秉笔思沈吟。
境胜才思劣，诗成不称心。

卷 459_22 【官俸初罢，亲故见忧，以诗谕之】

白居易

· 全唐诗 ·

七年为少傅，品高俸不薄。乘轩已多惭，况是一病鹤。
又及悬车岁，筋力转衰弱。岂以贫是忧，尚为名所缚。
今春始病免，纓组初摆落。蝸甲有何知，云心无所著。
困中残旧谷，可备岁饥恶。园中多新蔬，未至食藜藿。
不求安师卜，不问陈生药。但对丘中琴，时开池上酌。
信风舟不系，掉尾鱼方乐。亲友不我知，而忧我寂寞。

卷 459_23【闲居偶吟，招郑庶子、皇甫郎中】

白居易

自哂此迂叟，少迂老更迂。家计不一问，园林聊自娱。
竹间琴一张，池上酒一壶。更无俗物到，但与秋光俱。
古石苍错落，新泉碧萦纡。焉用车马客，即此是吾徒。
犹有所思人，各在城一隅。杳然爱不见，搔首方踟蹰。
玄晏风韵远，子真云貌孤。诚知厌朝市，何必忆江湖。
能来小涧上，一听潺湲无。

卷 459_24【亭西墙下伊渠水中置石，激流潺湲成韵，颇有幽趣，以诗记之】

白居易

嵌巉嵩石峭，皎洁伊流清。立为远峰势，激作寒玉声。
夹岸罗密树，面滩开小亭。忽疑严子濑，流入洛阳城。

· 全唐诗 ·

是时群动息，风静微月明。高枕夜悄悄，满耳秋泠泠。
终日临大道，何人知此情。此情苟自惬，亦不要人听。

卷 459_25【闲题家池，寄王屋张道士】

白居易

有石白磷磷，有水清潺潺。有叟头似雪，婆娑乎其间。
进不趋要路，退不入深山。深山太濶落，要路多险艰。
不如家池上，乐逸无忧患。有食适吾口，有酒酤吾颜。
恍惚游醉乡，希夷造玄关。五千言下悟，十二年来闲。
富者我不顾，贵者我不攀。唯有天坛子，时来一往还。

卷 459_26【李卢二中丞各创山居，俱夸胜绝，然去城稍远，来往颇劳，弊居新泉实在宇下，偶题十五韵，聊劝二君】

白居易

龙门苍石壁，浥涧碧潭水。各在一山隅，迢遥几十里。
清镜碧屏风，惜哉信为美。爱而不得见，亦与无相似。
闻君每来去，矻矻事行李。脂辖复裹粮，心力颇劳止。
未如吾舍下，石与泉甚迤。凿凿复溅溅，昼夜流不已。
洛石千万拳，衬波铺锦绮。海珉一两片，激濑含宫徵。
绿宜春濯足，净可朝漱齿。绕砌紫鳞游，拂帘白鸟起。
何言履道叟，便是沧浪子。君若趁归程，请君先到此。

· 全唐诗 ·

愿以潺湲声，洗君尘土耳。

卷 459_27【北窗竹石】

白居易

一片瑟瑟石，数竿青青竹。向我如有情，依然看不足。
况临北窗下，复近西塘曲。筠风散馥清，苔雨含微绿。
有妻亦衰老，无子方茆独。莫掩夜窗扉，共渠相伴宿。

卷 459_28【饮后戏示弟子】

白居易

吾为尔先生，尔为吾弟子。孔门有遗训，复坐吾告尔。
先生饌酒食，弟子服劳止。孝敬不在他，在兹而已矣。
欲我少忧愁，欲我多欢喜。无如酝好酒，酒须多且旨。
旨即宾可留，多即壘不耻。吾更有一言，尔宜听入耳。
人老多忧贫，人病多忧死。我今虽老病，所忧不在此。
忧在半酣时，尊空座客起。

卷 459_29【闲坐看书，贻诸少年】

白居易

· 全唐诗 ·

雨砌长寒芜，风庭落秋果。窗间有闲叟，尽日看书坐。
书中见往事，历历知福祸。多取终厚亡，疾驱必先堕。
劝君少干名，名为锢身锁。劝君少求利，利是焚身火。
我心知已久，吾道无不可。所以雀罗门，不能寂寞我。

卷 459_30【梦上山】

白居易

夜梦上嵩山，独携藜杖出。千岩与万壑，游览皆周毕。
梦中足不病，健似少年日。既悟神返初，依然旧形质。
始知形神内，形病神无疾。形神两是幻，梦寐俱非实。
昼行虽蹇涩，夜步颇安逸。昼夜既平分，其间何得失。

卷 459_31【对酒闲吟，赠同老者】

白居易

人生七十稀，我年幸过之。远行将尽路，春梦欲觉时。
家事口不问，世名心不思。老既不足叹，病亦不能治。
扶持仰婢仆，将养信妻儿。饥饱进退食，寒暄加减衣。
声妓放郑卫，裘马脱轻肥。百事尽除去，尚馀酒与诗。
兴来吟一篇，吟罢酒一卮。不独适情性，兼用扶衰羸。
云液洒六腑，阳和生四肢。于中我自乐，此外吾不知。
寄问同老者，舍此将安归。莫学蓬心叟，胸中残是非。

· 全唐诗 ·

卷 459_32 【晚起闲行】

白居易

皤然一老子，拥裘仍隐几。坐稳夜忘眠，卧安朝不起。
起来无可作，闭目时叩齿。静对铜炉香，暖漱银瓶水。
午斋何俭洁，饼与蔬而已。西寺讲楞伽，闲行一随喜。

卷 459_33 【香山居士写真诗】

白居易

昔作少学士，图形入集贤。今为老居士，写貌寄香山。
鹤毳变玄发，鸡肤换朱颜。前形与后貌，相去三十年。
勿叹韶华子，俄成皤叟仙。请看东海水，亦变作桑田。

卷 459_34 【二年三月五日斋毕，开素当食，偶吟赠妻弘农郡君】

白居易

睡足肢体畅，晨起开中堂。初旭泛帘幕，微风拂衣裳。
二婢扶盥栉，双童舁簟床。庭东有茂树，其下多阴凉。
前月事斋戒，昨日散道场。以我久蔬素，加笏仍异粮。

· 全唐诗 ·

鲂鳞白如雪，蒸炙加桂姜。稻饭红似花，调沃新酪浆。
佐以脯醢味，间之椒薤芳。老怜口尚美，病喜鼻闻香。
娇驂三四孙，索哺绕我傍。山妻未举案，馋叟已先尝。
忆同牢盂初，家贫共糟糠。今食且如此，何必烹猪羊。
况观姻族间，夫妻半存亡。偕老不易得，白头何足伤。
食罢酒一杯，醉饱吟又狂。缅想梁高士，乐道喜文章。
徒夸五噫作，不解赠孟光。

卷 459_35【不出门】

白居易

弥月不出门，永日无来宾。食饱更拂床，睡觉一嚔伸。
轻簾白鸟羽，新簟青箭筠。方寸方丈室，空然两无尘。
披衣腰不带，散发头不巾。袒跣北窗下，葛天之遗民。
一日亦自足，况得以终身。不知天壤内，目我为何人。

卷 459_36【感旧】

白居易

晦叔坟荒草已陈，梦得墓湿土犹新。微之捐馆将一纪，
杓直归丘二十春。城中虽有故第宅，庭芜园废生荆榛。
筐中亦有旧书札，纸穿字蠹成灰尘。平生定交取人窄，
屈指相知唯五人。四人先去我在后，一枝蒲柳衰残身。

· 全唐诗 ·

岂无晚岁新相识，相识面亲心不亲。人生莫羨苦长命，
命长感旧多悲辛。

卷 459_37【送毛仙翁】

白居易

仙翁已得道，混迹寻岩泉。肌肤冰雪莹，衣服云霞鲜。
绀发丝并致，韶容花共妍。方瞳点玄漆，高步凌非烟。
几见桑海变，莫知龟鹤年。所憩九清外，所游五岳巅。
轩昊旧为侣，松乔难比肩。每嗟人世入，役役如狂颠。
孰能脱羁鞅，尽遭名利牵。貌随岁律换，神逐光阴迁。
惟余负忧谴，憔悴湓江壖。衰鬓忽霜白，愁肠如火煎。
羁旅坐多感，裴回私自怜。晴眺五老峰，玉洞多神仙。
何当悯湮厄，授道安虚孱。我师惠然来，论道穷重玄。
浩荡八溟阔，志泰心超然。形骸既无束，得丧亦都捐。
岂识椿菌异，那知鹏鷃悬。丹华既相付，促景定当延。
玄功曷可报，感极惟勤拳。霓旌不肯驻，又归武夷川。
语罢倏然别，孤鹤升遥天。赋诗叙明德，永续步虚篇。

卷 459_38【达哉乐天行】

白居易

达哉达哉白乐天，分司东都十三年。七旬才满冠已挂，

· 全唐诗 ·

半禄未及车先悬。或伴游客春行乐，或随山僧夜坐禅。
二年忘却问家事，门庭多草厨少烟。庖童朝告盐米尽，
侍婢暮诉衣裳穿。妻孥不悦甥侄闷，而我醉卧方陶然。
起来与尔画生计，薄产处置有后先。先卖南坊十亩园，
次卖东都五顷田。然后兼卖所居宅，仿佛获缗二三千。
半与尔充衣食费，半与吾供酒肉钱。吾今已年七十一，
眼昏须白头风眩。但恐此钱用不尽，即先朝露归夜泉。
未归且住亦不恶，饥餐乐饮安稳眠。死生无可无不可，
达哉达哉白乐天。

卷 459_39 【春池闲泛】

白居易

绿塘新水平，红槛小舟轻。解缆随风去，开襟信意行。
浅怜清演漾，深爱绿澄泓。白扑柳飞絮，红浮桃落英。
古文科斗出，新叶剪刀生。树集莺朋友，云行雁弟兄。
飞沈皆适性，酣咏自怡情。花助银杯气，松添玉轸声。
鱼跳何事乐，鸥起复谁惊。莫唱沧浪曲，无尘可濯缨。

卷 459_40 【池上寓兴二绝】

白居易

濠梁庄惠谩相争，未必人情知物情。

· 全唐诗 ·

懒捕鱼来鱼跃出，此非鱼乐是鱼惊。

水浅鱼稀白鹭饥，劳心瞪目待鱼时。
外容闲暇中心苦，似是而非谁得知。

卷 459_41 【宴后题府中水堂赠卢尹中丞】

白居易

水斋岁久渐荒芜，自愧甘棠无一株。新酒客来方宴饮，
旧堂主在重欢娱。莫言杨柳枝空老，直致樱桃树已枯。
从我到君十一尹，相看自置府来无。

卷 459_42 【和敏中洛下即事】

白居易

昨日池塘春草生，阿连新有好诗成。花园到处莺呼入，
骢马游时客避行。水暖鱼多似南国，人稀尘少胜西京。
洛中佳境应无限，若欲谙知问老兄。

卷 459_43 【送敏中新授户部员外郎西归】

白居易

· 全唐诗 ·

千里归程三伏天，官新身健马翩翩。行冲赤日加餐饭，
上到青云稳著鞭。长庆老郎唯我在，客曹故事望君传。
前鸿后雁行难续，相去迢迢二十年。

卷 459_44【南侍御以石相赠，助成水声，因以绝句谢之】

白居易

泉石磷磷声似琴，闲眠静听洗尘心。
莫轻两片青苔石，一夜潺湲直万金。

卷 459_45【闲居自题，戏招宿客】

白居易

水畔竹林边，闲居二十年。健常携酒出，病即掩门眠。
解绶收朝佩，褰裳出野船。屏除身外物，摆落世间缘。
报曙窗何早，知秋簟最先。微风深树里，斜日小楼前。
渠口添新石，篱根写乱泉。欲招同宿客，谁解爱潺湲。

卷 459_46【李留守相公见过，池上泛舟，举酒话及翰林旧事，因成四韵以献之】

白居易

· 全唐诗 ·

引棹寻池岸，移尊就菊丛。何言济川后，相访钓船中。
白首故情在，青云往事空。同时六学士，五相一渔翁。

卷 459_47【闰九月九日独饮】

白居易

黄花丛畔绿尊前，犹有些些旧管弦。偶遇闰秋重九日，
东篱独酌一陶然。自从九月持斋戒，不醉重阳十五年。

卷 459_48【览卢子蒙侍御旧诗，多与微之唱和，感今伤昔，
因赠子蒙，题于卷后】

白居易

早闻元九咏君诗，恨与卢君相识迟。今日逢君开旧卷，
卷中多道赠微之。相看掩泪情难说，别有伤心事岂知。
闻道咸阳坟上树，已抽三丈白杨枝。

卷 459_49【寒亭留客】

白居易

今朝闲坐石亭中，炉火销残尊又空。

· 全唐诗 ·

冷落若为留客住，冰池霜竹雪髯翁。

卷 459_50【新小滩】

白居易

石浅沙平流水寒，水边斜插一渔竿。
江南客见生乡思，道似严陵七里滩。

卷 459_51【和李中丞与李给事山居雪夜同宿小酌】

白居易

宪府触邪峨豸角，琐闱驳正犯龙鳞。那知近地斋居客，
忽作深山同宿人。一盏寒灯云外夜，数杯温酎雪中春。
林泉莫作多时计，谏猎登封忆旧臣。

卷 459_52【履道西门二首】

白居易

履道西门有弊居，池塘竹树绕吾庐。豪华肥壮虽无分，
饱暖安闲即有余。行灶朝香炊早饭，小园春暖掇新蔬。
夷齐黄绮夸芝蕨，比我盘飧恐不如。

· 全唐诗 ·

履道西门独掩扉，官休病退客来稀。亦知轩冕荣堪恋，
其奈田园老合归。跛鳖难随骐驎足，伤禽莫趁凤凰飞。
世间认得身人少，今我虽愚亦庶几。

卷 459_53【偶吟】

白居易

人生变改故无穷，昔是朝官今野翁。久寄形于朱紫内，
渐抽身入蕙荷中。无情水任方圆器，不系舟随去住风。
犹有鲈鱼莼菜兴，来春或拟往江东。

卷 459_54【雪夜小饮赠梦得】

白居易

同为懒慢园林客，共对萧条雨雪天。小酌酒巡销永夜，
大开口笑送残年。久将时背成遗老，多被人呼作散仙。
呼作散仙应有以，曾看东海变桑田。

卷 459_55【岁暮夜长，病中灯下闻卢尹夜宴，以诗戏之且
为来日张本也】

白居易

· 全唐诗 ·

荣闹兴多嫌昼短，衰闲睡少觉明迟。当君秉烛衔杯夜，
是我停飧服药时。枕上愁吟堪发病，府中欢笑胜寻医。
明朝强出须谋乐，不拟车公更拟谁。

卷 459_56【病中数会张道士见讥，以此答之】

白居易

亦知数出妨将息，不可端居守寂寥。病即药窗眠尽日，
兴来酒席坐通宵。贤人易狎须勤饮，姹女难禁莫慢烧。
张道士输白道士，一杯沆瀣便逍遥。

卷 459_57【卯饮】

白居易

短屏风掩卧床头，乌帽青毡白氎裘。
卯饮一杯眠一觉，世间何事不悠悠。

卷 459_58【寄题余杭郡楼，兼呈裴使君】

白居易

官历二十政，宦游三十秋。江山与风月，最忆是杭州。

· 全唐诗 ·

北郭沙堤尾，西湖石岸头。绿觞春送客，红烛夜回舟。
不敢言遗爱，空知念旧游。凭君吟此句，题向望涛楼。

卷 459_59【杨六尚书留太湖石在洛下，借置庭中，因对举
杯，寄赠绝句】

白居易

借君片石意何如，置向庭中慰索居。
每就玉山倾一酌，兴来如对醉尚书。

卷 459_60【喜入新年自咏】

白居易

白须如雪五朝臣，又值新正第七旬。老过占他蓝尾酒，
病馀收得到头身。销磨岁月成高位，比类时流是幸人。
大历年中骑竹马，几人得见会昌春。

卷 459_61【滩声】

白居易

碧玉班班沙历历，清流决决响泠泠。

· 全唐诗 ·

自从造得滩声后，玉管朱弦可要听。

卷 459_62【题石泉】

白居易

殷勤傍石绕泉行，不说何人知我情。
渐恐耳聋兼眼暗，听泉看石不分明。

卷 459_63【送王卿使君赴任苏州，因思花迎新使感旧游，
寄题郡中木兰西院一别】

白居易

一别苏州十八载，时光人事随年改。不论竹马尽成人，
亦恐桑田半为海。莺入故宫含意思，花迎新使生光彩。
为报江山风月知，至今白使君犹在。

卷 459_64【出斋日喜皇甫十早访】

白居易

三旬斋满欲衔杯，平旦敲门门未开。
除却朗之携一榼，的应不是别人来。

· 全唐诗 ·

卷 459_65【会昌二年春题池西小楼】

白居易

花边春水水边楼，一坐经今四十秋。望月桥倾三遍换，
采莲船破五回修。园林一半成乔木，邻里三分作白头。
苏李冥蒙随烛灭，陈樊漂泊逐萍流。虽贫眼下无妨乐，
纵病心中不与愁。自笑灵光岿然在，春来游得且须游。

卷 459_66【酬南洛阳早春见赠】

白居易

物华春意尚迟回，赖有东风昼夜催。寒缢柳腰收未得，
暖熏花口噤初开。欲披云雾联襟去，先喜琼琤入袖来。
久病长斋诗老退，争禁年少洛阳才。

卷 459_67【对新家酝玩自种花】

白居易

香麴亲看造，芳丛手自栽。迎春报酒熟，垂老看花开。
红蜡半含萼，绿油新酙醅。玲珑五六树，潋滟两三杯。
恐有狂风起，愁无好客来。独酣还独语，待取月明回。

· 全唐诗 ·

卷 459_68【携酒往朗之庄居同饮】

白居易

慵中又少经过处，别后都无劝酒人。
不挈一壶相就醉，若为将老度残春。

卷 459_69【以诗代书，酬慕巢尚书见寄】

白居易

书意诗情不偶然，苦云梦想在林泉。愿为愚谷烟霞侣，
思结空门香火缘。每愧尚书情眷眷，自怜居士病绵绵。
不知待得心期否，老校于君六七年。

卷 459_70【春尽日】

白居易

芳景销残暑气生，感时思事坐含情。无人开口共谁语，
有酒回头还自倾。醉对数丛红芍药，渴尝一碗绿昌明。
春归似遣莺留语，好住园林三两声。

· 全唐诗 ·

卷 459_71【招山僧】

白居易

能入城中乞食否，莫辞尘土污袈裟。
欲知住处东城下，绕竹泉声是白家。

卷 459_72【夏日与闲禅师林下避暑】

白居易

洛景城西尘土红，伴僧闲坐竹泉东。绿萝潭上不见日，
白石滩边长有风。热恼渐知随念尽，清凉常愿与人同。
每因毒暑悲亲故，多在炎方瘴海中。

卷 459_73【题新涧亭，兼酬寄朝中亲故见赠】

白居易

何处披襟风快哉，一亭临涧四门开。金章紫绶辞腰去，
白石清泉就眼来。自得所宜还独乐，各行其志莫相咍。
禽鱼出得池笼后，纵有人呼可更回。

· 全唐诗 ·

卷 459_74【病中看经赠诸道侣】

白居易

右眼昏花左足风，金篦石水用无功。不如回念三乘乐，
便得浮生百病空。无子同居草庵下，有妻偕老道场中。
何烦更请僧为侣，月上新归伴病翁。

卷 459_75【游丰乐招提佛光三寺】

白居易

竹鞋葵扇白绡巾，林野为家云是身。山寺每游多寄宿，
都城暂出即经旬。汉容黄绮为逋客，尧放巢由作外臣。
昨日制书临郡县，不该愚谷醉乡人。

卷 459_76【醉中得上都亲友书，以予停俸多时，忧问贫乏，
偶乘酒兴，咏而报之】

白居易

头白醉昏昏，狂歌秋复春。一生耽酒客，五度弃官人。
异世陶元亮，前生刘伯伦。卧将琴作枕，行以锺随身。
岁要衣三对，年支谷一囷。园葵烹佐饭，林叶扫添薪。

· 全唐诗 ·

没齿甘蔬食，摇头谢缙绅。自能抛爵禄，终不恼交亲。
但得杯中禄，从生甑上尘。烦君问生计，忧醒不忧贫。

卷 459_77【池畔逐凉】

白居易

风清泉冷竹修修，三伏炎天凉似秋。黄犬引迎骑马客，
青衣扶下钓鱼舟。衰容自觉宜闲坐，蹇步谁能更远游。
料得此身终老处，只应林下与滩头。

卷 459_78【池鹤八绝句·鸡赠鹤】

白居易

一声警露君能薄，五德司晨我用多。
不会悠悠时俗士，重君轻我意如何。

卷 459_79【池鹤八绝句·鹤答鸡】

白居易

尔争伉俪泥中斗，吾整羽仪松上栖。
不可遣他天下眼，却轻野鹤重家鸡。

· 全唐诗 ·

卷 459_80【池鹤八绝句·乌赠鹤】

白居易

与君白黑大分明，纵不相亲莫见轻。
我每夜啼君怨别，玉徽琴里忝同声。

卷 459_81【池鹤八绝句·鹤答乌】

白居易

吾爱栖云上华表，汝多攫肉下田中。
吾音中羽汝声角，琴曲虽同调不同。

卷 459_82【池鹤八绝句·鸢赠鹤】

白居易

君夸名鹤我名鸢，君叫闻天我戾天。
更有与君相似处，饥来一种啄腥膻。

卷 459_83【池鹤八绝句·鹤答鸢】

· 全唐诗 ·

白居易

无妨自是莫相非，清浊高低各有归。
鸾鹤群中彩云里，几时曾见喘鸢飞。

卷 459_84【池鹤八绝句·鹅赠鹤】

白居易

君因风送入青云，我被人驱向鸭群。
雪颈霜毛红网掌，请看何处不如君。

卷 459_85【池鹤八绝句·鹤答鹅】

白居易

右军殁后欲何依，只合随鸡逐鸭飞。
未必牺牲及吾辈，大都我瘦胜君肥。

卷 459_86【谈氏小外孙玉童】

白居易

外翁七十孙三岁，笑指琴书欲遣传。自念老夫今耄矣，

· 全唐诗 ·

因思稚子更茫然。中郎余庆钟羊祜，子幼能文似马迁。
才与不才争料得，东床空后且娇怜。

卷 459_87【送后集往庐山东林寺，兼寄云皋上人】

白居易

后集寄将何处去，故山迢递在匡庐。旧僧独有云皋在，
三二年来不得书。别后道情添几许，老来筋力又何如。
来生缘会应非远，彼此年过七十余。

卷 459_88【客有说】

白居易

近有人从海上回，海山深处见楼台。
中有仙龛虚一室，多传此待乐天来。

卷 459_89【答客说】

白居易

吾学空门非学仙，恐君此说是虚传。
海山不是吾归处，归即应归兜率天。

· 全唐诗 ·

卷 459_90 【哭刘尚书梦得二首】

白居易

四海齐名白与刘，百年交分两绸缪。同贫同病退闲日，
一死一生临老头。杯酒英雄君与操，文章微婉我知丘。
贤豪虽歿精灵在，应共微之地下游。

今日哭君吾道孤，寝门泪满白髭须。不知箭折弓何用，
兼恐唇亡齿亦枯。窅窅穷泉埋宝玉，駸駸落景挂桑榆。
夜台暮齿期非远，但问前头相见无。·

· 全唐诗 ·

第四百六十卷

卷 460_1 【昨日复今辰】

白居易

昨日复今辰，悠悠七十春。所经多故处，却想似前身。
散秩优游老，闲居净洁贫。螺杯中有物，鹤氅上无尘。
解佩收朝带，抽簪换野巾。风仪与名号，别是一生人。

卷 460_2 【病疮】

白居易

门有医来往，庭无客送迎。病销谈笑兴，老足叹嗟声。
鹤伴临池立，人扶下砌行。脚疮春断酒，那得有心情。

卷 460_3 【游赵村杏花】

白居易

· 全唐诗 ·

赵村红杏每年开，十五年来看几回。
七十三人难再到，今春来是别花来。

卷 460_4 【刑部尚书致仕】

白居易

十五年来洛下居，道缘俗累两何如。迷路心回因向佛，
宦途事了是悬车。全家遁世曾无闷，半俸资身亦有余。
唯是名衔人不会，毗耶长者白尚书。

卷 460_5 【初致仕后戏酬留守牛相公，并呈分司诸寮友】

白居易

南北东西无所羁，挂冠自在胜分司。探花尝酒多先到，
拜表行香尽不知。炮笋烹鱼饱餐后，拥袍枕臂醉眠时。
报君一语君应笑，兼亦无心羨保厘。

卷 460_6 【问诸亲友】

白居易

七十人难到，过三更较稀。占花租野寺，定酒典朝衣。

· 全唐诗 ·

趁醉春多出，贪欢夜未归。不知亲故口，道我是耶非。

卷 460_7【戏问牛司徒】

白居易

抖擞尘缨捋白须，半酣扶起问司徒。
不知诏下悬车后，醉舞狂歌有例无。

卷 460_8【不与老为期】

白居易

不与老为期，因何两鬓丝。才应免天促，便已及衰羸。
昨夜梦何在，明朝身不知。百忧非我所，三乐是吾师。
闭目常闲坐，低头每静思。存神机虑息，养气语言迟。
行亦携诗篋，眠多枕酒卮。自惭无一事，少有不安时。

卷 460_9【开龙门八节石滩诗二首】

白居易

铁凿金锤殷若雷，八滩九石剑棱摧。竹篙桂楫飞如箭，
百筏千艘鱼贯来。振锡导师凭众力，挥金退傅施家财。

· 全唐诗 ·

他时相逐四方去，莫虑尘沙路不开。

七十三翁旦暮身，誓开险路作通津。夜舟过此无倾覆，
朝胫从今免苦辛。十里叱滩变河汉，八寒阴狱化阳春。
我身虽殁心长在，暗施慈悲与后人。

卷 460_10【闲坐】

白居易

婆娑放鸡犬，嬉戏任儿童。闲坐槐阴下，开襟向晚风。
沍麻池水里，晒枣日阳中。人物何相称，居然田舍翁。

卷 460_11【酬寄牛相公同宿话旧劝酒见赠】

白居易

每来政事堂中宿，共忆华阳观里时。日暮独归愁米尽，
泥深同出借驴骑。交游今日唯残我，富贵当年更有谁。
彼此相看头雪白，一杯可合重推辞。

卷 460_12【道场独坐】

白居易

· 全唐诗 ·

整顿衣巾拂净床，一瓶秋水一炉香。不论烦恼先须去，
直到菩提亦拟忘。朝谒久停收剑珮，宴游渐罢废壶觞。
世间无用残年处，只合逍遥坐道场。

卷 460_13【偶作寄朗之】

白居易

历想为官日，无如刺史时。欢娱接宾客，饱暖及妻儿。
自到东都后，安闲更得宜。分司胜刺史，致仕胜分司。
何况园林下，欣然得朗之。仰名同旧识，为乐即新知。
有雪先相访，无花不作期。斗醪干酿酒，夸妙细吟诗。
里巷千来往，都门五别离。岐分两回首，书到一开眉。
叶落槐亭院，冰生竹阁池。雀罗谁问讯，鹤氅罢追随。
身与心俱病，容将力共衰。老来多健忘，唯不忘相思。

卷 460_14【狂吟七言十四韵】

白居易

亦知世是休明世，自想身非富贵身。但恐人间为长物，
不如林下作遗民。游依二室成三友，住近双林当四邻。
性海澄淳平少浪，心田洒扫净无尘。香山闲宿一千夜，
梓泽连游十六春。是客相逢皆故旧，无僧每见不殷勤。
药停有喜闲销疾，金尽无忧醉忘贫。补绽衣裳愧妻女，

· 全唐诗 ·

支持酒肉赖交亲。俸随日计钱盈贯，禄逐年支粟满囷。
洛堰鱼鲜供取足，游村果熟馈争新。诗章人与传千首，
寿命天教过七旬。点检一生微幸事，东都除我更无人。

卷 460_15【喜裴涛使君携诗见访，醉中戏赠】

白居易

忽闻扣户醉吟声，不觉停杯倒屣迎。
共放诗狂同酒癖，与君别是一亲情。

卷 460_16【得潮州杨相公继之书并诗，以此寄之】

白居易

诗情书意两殷勤，来自天南瘴海滨。初睹银钩还启齿，
细吟琼什欲沾巾。凤池隔绝三千里，蜗舍沈冥十五春。
唯有新昌故园月，至今分照两乡人。

卷 460_17【宿府池西亭】

白居易

池上平桥桥下亭，夜深睡觉上桥行。

· 全唐诗 ·

白头老尹重来宿，十五年前旧月明。

卷 460_18【闲眠】

白居易

暖床斜卧日曛腰，一觉闲眠百病销。
尽日一餐茶两碗，更无所要到明朝。

卷 460_19【杨柳枝词】

白居易

一树春风千万枝，嫩于金色软于丝。
永丰西角荒园里，尽日无人属阿谁。

卷 460_20【诏取永丰柳植禁苑感赋】

白居易

一树衰残委泥土，双枝荣耀植天庭。
定知玄象今春后，柳宿光中添两星。

· 全唐诗 ·

卷 460_21【斋居春久，感事遣怀】

白居易

斋戒坐三旬，笙歌发四邻。月明停酒夜，眼暗看花人。
赖学空为观，深知念是尘。犹思闲语笑，未忘旧交亲。
久作龙门主，多为兔苑宾。水嬉歌尽日，雪宴烛通晨。
事事皆过分，时时自问身。风光抛得也，七十四年春。

卷 460_22【每见吕南二郎中新文，辄窃有所叹惜，因成长句，以咏所怀】

白居易

双金百炼少人知，纵我知君徒尔为。望梅阁老无妨渴，
画饼尚书不救饥。白日回头看又晚，青云举足蹶何迟。
壮年可惜虚销掷，遣把闲杯吟咏诗。

卷 460_23【胡、吉、郑、刘、卢、张等六贤皆多年寿，予亦次焉，偶於弊居合成尚齿之会，七老相顾，既醉且欢，静而思之，此会稀有，因成七言六韵，以纪之传好事者】

白居易

· 全唐诗 ·

七人五百七十岁，拖紫纓朱垂白须。手里无金莫嗟叹，
尊中有酒且欢娱。诗吟两句神还王，酒饮三杯气尚粗。
嵬峨狂歌教婢拍，婆娑醉舞遣孙扶。天年高过二疏傅，
人数多于四皓图。除却三山五天竺，人间此会更应无。

卷 460_24【欢喜二偈】

白居易

得老加年诚可喜，当春对酒亦宜欢。
心中别有欢喜事，开得龙门八节滩。

眼暗头旋耳重听，唯余心口尚醒醒。
今朝欢喜缘何事，礼彻佛名百部经。

卷 460_25【闲居贫活计】

白居易

冠盖闲居少，簞瓢陋巷深。称家开户牖，量力置园林。
俭薄身都惯，营为力不任。饥烹一斤肉，暖卧两重衾。
尊有陶潜酒，囊无陆贾金。莫嫌贫活计，更富即劳心。

卷 460_26【赠诸少年】

· 全唐诗 ·

白居易

少年莫笑我蹉跎，听我狂翁一曲歌。入手荣名取虽少，
关心稳事得还多。老惭退马沾刍秣，高喜归鸿脱弋罗。
官给俸钱天与寿，些些贫病奈吾何。

卷 460_27【感所见】

白居易

巧者焦劳智者愁，愚翁何喜复何忧。莫嫌山木无人用，
大胜笼禽不自由。网外老鸡因断尾，盘中鲜鲙为吞钩。
谁人会我心中事，冷笑时时一掉头。

卷 460_28【寄黔州马常侍】

白居易

闲看双节信为贵，乐饮一杯谁与同。
可惜风情与心力，五年抛掷在黔中。

卷 460_29【和李相公留守题漕上新桥六韵】

白居易

· 全唐诗 ·

选石铺新路，安桥压古堤。似从银汉下，落傍玉川西。
影定栏杆倒，标高华表齐。烟开虹半见，月冷鹤双栖。
材映夔龙小，功嫌元凯低。从容济世后，馀力及黔黎。

卷 460_30【闲居】

白居易

风雨萧条秋少客，门庭冷静昼多关。金羁骆马近卖却，
罗袖柳枝寻放还。书卷略寻聊取睡，酒杯浅把粗开颜。
眼昏入夜休看月，脚重经春不上山。心静无妨喧处寂，
机忘兼觉梦中闲。是非爱恶销停尽，唯寄空身在世间。

卷 460_31【新秋夜雨】

白居易

蟋蟀暮啾啾，光阴不少留。松檐半夜雨，风幌满床秋。
曙早灯犹在，凉初簟未收。新晴好天气，谁伴老人游。

卷 460_32【春眠】

白居易

· 全唐诗 ·

枕低被暖身安稳，日照房门帐未开。
还有少年春气味，时时暂到梦中来。

卷 460_33 【喜老自嘲】

白居易

面黑头雪白，自嫌还自怜。毛龟薶下老，蝙蝠鼠中仙。
名籍同逋客，衣装类古贤。裘轻被白氎，靴暖蹋乌毡。
周易休开卦，陶琴不上弦。任从人弃掷，自与我周旋。
铁马因疲退，铅刀以钝全。行开第八秩，可谓尽天年。

卷 460_34 【能无愧】

白居易

十两新绵褐，披行暖似春。一团香絮枕，倚坐稳于人。
婢仆遣他尝药草，儿孙与我拂衣巾。回看左右能无愧，
养活枯残废退身。

卷 460_35 【河阳石尚书破回鹘、迎贵主、过上党射鹭鷥，
绘画为图，猗蒙见示，称叹不足，以诗美之】

白居易

· 全唐诗 ·

塞北虏郊随手破，山东贼垒掉鞭收。乌孙公主归秦地，
白马将军入潞州。剑拔青鳞蛇尾活，弦抨赤羽火星流。
须知鸟目犹难漏，纵有天狼岂足忧。画角三声刁斗晓，
清商一部管弦秋。他时麟阁图勋业，更合何人居上头。

卷 460_36【自咏老身示诸家属】

白居易

寿及七十五，俸沾五十千。夫妻偕老日，甥侄聚居年。
粥美尝新米，袍温换故绵。家居虽濩落，眷属幸团圆。
置榻素屏下，移炉青帐前。书听孙子读，汤看侍儿煎。
走笔还诗债，抽衣当药钱。支分闲事了，爬背向阳眠。

卷 460_37【自问此心呈诸老伴】

白居易

朝问此心何所思，暮问此心何所为。不入公门慵敛手，
不看人面免低眉。居士室间眠得所，少年场上饮非宜。
闲谈亹亹留诸老，美酝徐徐进一卮。心未曾求过分事，
身常少有不安心。此心除自谋身外，更问其余尽不知。

卷 460_38【六年立春日人日作】

· 全唐诗 ·

白居易

二日立春人七日，盘蔬饼饵逐时新。年方吉郑犹为少，
家比刘韩未是贫。乡园节岁应堪重，亲故欢游莫厌频。
试作循潮封眼想，何由得见洛阳春。

卷 460_39【斋居偶作】

白居易

童子装炉火，行添一炷香。老翁持麈尾，坐拂半张床。
卷幔看天色，移斋近日阳。甘鲜新饼果，稳暖旧衣裳。
止足安生理，悠闲乐性场。是非一以遣，动静百无妨。
岂有物相累，兼无情可忘。不须忧老病，心是自医王。

卷 460_40【咏身】

白居易

自中风来三历闰，从悬车后几逢春。周南留滞称遗老，
汉上羸残号半人。薄有文章传子弟，断无书札答交亲。
余年自问将何用，恐是人间剩长身。

· 全唐诗 ·

卷 460_41【予与山南王仆射起、淮南李仆射绅，事历五朝逾三纪，海内年辈，今唯三人，荣路虽殊，交情不替，聊题长句，寄举之、公垂二相公】

白居易

故交海内只三人，二坐岩廊一卧云。老爱诗书还似我，
荣兼将相不如君。百年胶漆初心在，万里烟霄中路分。
阿阁鸾凰野田鹤，何人信道旧同群。

卷 460_42【读道德经】

白居易

玄元皇帝著遗文，乌角先生仰后尘。金玉满堂非己物，
子孙委蜕是他人。世间尽不关吾事，天下无亲于我身。
只有一身宜爱护，少教冰炭逼心神。

卷 460_43【禽虫十二章】

白居易

燕违戊巳鹄避岁，兹事因何羽族知。
疑有凤凰颁鸟历，一时一日不参差。

· 全唐诗 ·

水中科斗长成蛙，林下桑虫老作蛾。
蛙跳蛾舞仰头笑，焉用鵙鹏鳞羽多。

江鱼群从称妻妾，塞雁联行号弟兄。
但恐世间真眷属，亲疏亦是强为名。

蚕老茧成不庇身，蜂饥蜜熟属他人。
须知年老忧家者，恐是二虫虚苦辛。

阿阁鸛鸾田舍乌，妍蚩贵贱两悬殊。
如何闭向深笼里，一种摧颓触四隅。

兽中刀枪多怒吼，鸟遭罗弋尽哀鸣。
羔羊口在缘何事，暗死屠门无一声。

螭螟杀敌蚊巢上，蛮触交争蜗角中。
应是诸天观下界，一微尘内斗英雄。

蠨蛸网上罥蜉蝣，反覆相持死始休。
何异浮生临老日，一弹指顷报恩雠。

蚁王化饭为臣妾，螺母偷虫作子孙。
彼此假名非本物，其间何怨复何恩。

豆苗鹿嚼解乌毒，艾叶雀衔夺燕巢。
鸟兽不曾看本草，谕知药性是谁教。

· 全唐诗 ·

一鼠得仙生羽翼，众鼠相看有羨色。
岂知飞上未半空，已作乌鸢口中食。

鹅乳养雏遗在水，鱼心想子变成鳞。
细微幽隐何穷事，知者唯应是圣人。